

5. Et tribuunt mihi malum pro bono,
et odium pro dilectione mea.
6. Super illum constitue improbum (qui eum vexet),
et adversarius stet ad dexteram ejus.
7. Quum judicatur, execat reus,
et precatio ejus sit in peccatum.
8. Sint dies ejus paucitates (pauci),
munus ejus accipiat alius.
9. Sint filii ejus orphani ,
et uxor ejus vidua.
10. Vagentur liberi ejus et mendicent,
et stipem (vel *victum*) quærant *procul* a ruderibus suis (domus suæ).
11. Illaqueet foenerator omnia quæ *sunt* illi,
et diripient alieni laborem ejus.
12. Ne sit illi qui protrahat benevolentiam,
neve sit qui misereatur orphanorum ejus.
13. Sit posteritas ejus in excisionem,
in altera ætate deleatur nomen eorum.
14. In memoriam revocetur culpa patrum ejus apud Jovam
et peccatum matris ejus ne deleatur.
15. Sint ('parentum delicta) coram Jova perpetuo ,
et abscidat e terra memoriam eorum :
16. Eo quod non cogitavit facere misericordiam ,
et persecutus est hominem afflictum et pauperem ,
et fractum animo, ad interficiendum *eum*.
17. Et amavit exsecrationem (in miseros loqui), et venit ei
et noluit benedictionem, et *procul* abest ab illo.
18. Et induat exsecrationem ut vestimentum suum ,
et intret *illa* aquarum instar in intima ejus ,
et olei instar in ossa ejus.
19. Sit illi ut vestis, *qua* tegit se ,
atque cingulum, quo perpetuo se cingit.
20. Hæc sit (vel *est*) merces adversariorum meorum a Jova ,
et eorum, qui loquuntur malum contra me.
21. Tu vero, Jova, Domine ,
fac mecum secundum nomen tuum ;
nam bona (eximia) *est* gratia tua : eripe me.
22. Nam afflictus et pauper ego *sum* ,
et cor meum vulneratum est in me.
23. Ut umbra, cum declinat, abeo ;
excutior, ut locusta (ventis exagitata).
24. Genua mea labant præ jejunio ,
et caro mea deficit pinguedine.
25. Et sum ego contumelia iis;
vident me , motitant caput suum.

26. Aduva me, Jova, Deus mi,
salva me secundum gratiam tuam.
27. Et cognoscant, hoc esse manum tuam (manus tuæ opus),
te, Jova, fecisse illud.
28. Exsecrentur illi, tu vero benedicis;
insurgant, pudore afficiuntur,
et servus tuus lætatur.
29. Induant adversarii mei ignominiam,
et tegant se, ut tunica, contumelia sua.
30. Celebrabo Jovam valde ore meo,
et in medio multorum laudabo eum,
31. Quod stat ad dexteram egeni,
ut salvet eum a condemnantibus animam ejus.

NOTÆ.

Vers. 3. Alius, *res odii*, i. e. odia. — Vers. 4. Ego vero nil nisi preces fundo : cf. *ego sum pax*, i. e. quietus, Ps. cxx, 7. Alius, *ego vero vir precum*. — Vers. 6. *Illum*, collect. capiendum. *Ad dexteram* : accusatorem reo a dextra stetisse apud Hebræos, colligitur ex Zach. iii, 1. — Vers. 8. *Munus* : Maurer, *opæ*. — Vers. 10. Alexandr. legit *vegorshou, expellantur*. — Vers. 11. *Illaqueet*, artibus fœneraticiis ad se rapiat. — Vers. 12. Cf. Ovidii illud : « Sis miser et nulli miserabilis. » — Vers. 13. *Deleatur* : Maurer, *extinguatur*. — Vers. 17. Maurer, *veniat, absit*, quanquam futura ræv convers. instructa nunquam optative accipiuntur. — Vers. 24. *Jejunio*, ex ægritudine, ait Maurer; ex pœnitentia, ait Hengstenberg. *Deficit pinguedine* sua pristina, emaciatur, *mem* privativo : ita Maurer; vel, *ut non sit pinguedo*, eod. sensu; Hengstenberg, *caro mea mentitur*, negatur (gr. *άρα ζετει* : cf. *Math. vi*, 16), *quia non est oleum*, quo ungatur.

BELLARMINI EXPLANATIO.

PSALMUS CVIII.

TITULUS ET ARGUMENTUM.

In finem, Psalmus David.

Non desunt ex recentioribus, qui hunc Psalmum exponant ad litteram de persecutoribus David, qualis fuit Doeg Idumæus, Achitophel et alii : sed cum nulla fiat in titulo mentio persecutorum David, et veteres expositores, Chrysostomus, Hieronymus, Augustinus, Theodoreetus et Euthymius simpliciter de Juda proditore et Judæis exponant, et S. Petrus in *Actis Apostol.*, cap. 1, de Juda proditore Psalmum hunc scriptum esse confirmet, nos quoque de Juda et Judæis Psalmum totum simpliciter exponemus. Igitur argumentum Psalmi est prophetia per modum imprecationis adversus Judam et Judæos Christi persecutores.

EXPLICATIO PSALMI.

Vers. 1. 1. DEUS, LAUDEM MEAM NE TACUERIS, QUAIA OS PECCATORIS, ET OS DOLOSI SUPER ME APERTUM EST.

Verba Christi sunt similia illis, quæ habentur in Evangelio *Joan. xvii* : « Clarifica me, tu Pater. » Rogat igitur Christus homo Deum Patrem, ut laudem ejus, id est, innocentiam, charitatem aliasque virtutes non taceat, quod impletum est per Apostolos Spiritu Sancto plenos, qui omnibus linguis toti mundo Christi laudes prædicaverunt; impletum quoque est per sequentes martyres, et confessores, et doctores, qui vel sanguine, vel mo-

ribus, vel litteris, vel miraculis, vel præconio vocis Christi encomia omnibus sæculis et omnibus gentibus nuntiaverunt. Reddit deinde causam, cur gloriam istam a Deo petat : quoniam non desunt, qui eam falsis criminibus obscurare conentur. « Quia, inquit, os peccatoris et dolosi, » Caiphæ videlicet et Judæ, vel generatim populi judaici, « super me apertum est. » Dicit autem *peccatoris et dolosi*, quoniam persecutores Christi odio et invidia pleni erant, et tamen dolo simulabant amicitiam, cum dicarent : « Magister, scimus quia verax es, et viam Dei in veritate do-

ces,» etc., *Matth. xxii.* Itaque peccatores erant, quia oderant, quem diligere debuissent; et dolosi erant, quia fingentes amicitiam eum capere volebant in sermone: vel, alii peccatores erant manifesti, qui aperte blasphemabant «eum seductorem esse, et in Beelzebub ejicere daemonia;» alii dolosi erant, ac per et hoc peccatores occulti, qui sub specie interrogationum, quasi discente cupientes, insidiabantur famae et vite ejus. Ex hebreo nonnulli vertunt, *Deus laudis meæ*, quia legunt in hebreo אלהָן, non אלהָן, sed falluntur; nam vox elohe, non semper est in regimine, sed est unum ex nominibus Dei, ut S. Hieronymus docet in epist. *ad Marcellam*. Adde quod nec Septuaginta Interpretes, nec S. Hieronymus agnoverunt istud regimen in nomine Dei, ut patet ex versionibus ipsorum. S. Hieronymus ex hebreo vertit, *Deus laudabilis mihi, ne taceas;* sed vox hebreæ אלהָן significat, *laus mea*, vel *laudem meam*; non enim Hebrei declinant nomina per casus. Septuaginta Interpretes intellexerunt ea voce significari *laudem meam*. S. Hieronymus autem significari credidit, *laus mea*, et ideo reddidit, *laudabilis mihi*; idem enim est: *Deus est laus mea*, et *Deus est laudabilis mihi*. Latinus Interpres græcam lectionem secutus est, quæ reprehendi non potest, cum hebraicæ lectioni conveniat. Illud, *ne tacueris*, opponitur illis, *os peccatoris apertum est*; æquum enim est ut veritas non taceat, quando falsitas clamat.

Vers. 2. 2. LOCUTI SUNT ADVERSUM ME LINGUA DOLOSA,
ET SERMONIBUS ODII CIRCUMDEDERUNT ME, ET EX-
PUGNAVERUNT ME GRATIS.

Declarat quod dixit: «Os peccatoris, et os dolosi apertum est super me.» «Apertum est, inquit, os dolosi,» quia locuti sunt adversum me lingua dolosa, laudantes, ut magistrum bonum, et interim insidiantes mihi, ut caperent in sermone. Apertum quoque est os peccatoris, quia «sermonibus odii circumdederunt me,» manifestantes verbis apertis odium quod gerebant in corde, et dicentes: «Non est hic homo a Deo; ecce homo vorax, et potator vini: Tolle, tolle, crucifige eum.» Sed sive dolosa lingua, sive sermonibus odii me oppugnarent, «gratis me oppugnabant,» quia sine ulla justa causa, cum redderent mala pro bonis. Illud, *expugnauerunt*, positum est pro *oppugnauerunt*. Verbum enim hebraicum et græcum *bellare* et *pugnare* significat. In eadem significatione ponitur hoc verbum in *Psalm. cxxviii*: «Sepe expugnauerunt me a juventute mea; etenim non potuerunt mihi,» ubi illud, *non potuerunt mihi*, demonstrat, *expugnauerunt* positum esse pro *pugnauerunt*.

Vers. 3. 3. PRO EO UT ME DILIGERENT, DETRAHEBANT
MIHI: EGO AUTEM ORABAM.

Explicat ultimam illam particulam, *gratis*, nam cum rependere deberent amorem amoris, illi vice

dilectionis detrahebant mihi; ego tamen non redidi mala pro malis, sed orabam Deum pro illis. Id aperte fecit Dominus in cruce, cum ait: «Pater, ignosce illis;» sed credibile est id eum occulte fecisse quotiescumque detractiones audiebat. Ex hebreo S. Hieronymus vertit, *pro eo quod eos diligebam*, ubi nos habemus, *pro eo ut me diligenter*. Sed vox hebraica ambigua est: potest enim esse nomen, ut est in sequenti versiculo, et significare, *dilectio mea*, et potest esse verbum, et significare *dilexi*, vel *diligebam*; nam a verbo בְּרַאֵת, quod est *diligere*, fit בְּרַאֵת, quod *dilexi* et *dilectio mea* significare potest. Græca vox, ἀγαπᾷ με, quæ significat, *diligere me*, est etiam ambigua, et potest accipi tam active, quam passive: *pro diligere me*, id est, *pro dilectione*, quam eis impendebam; et *pro diligere me*, id est, *pro dilectione*, quam mihi debebant; sed latinus Interpres sustulit istam ambiguatem, et vertit, *pro eo ut me diligenter*, et hanc intelligentiam secuti sunt expositores veteres, tum græci, ut Chrysostomus et Theodoreetus; tum latini, ut Hieronymus et Augustinus. Itaque veteres expositores Vulgatam latinam versionem suis expositionibus probaverunt.

4. ET POSUERUNT ADVERSUM ME MALA PRO Vers. 4. BONIS, ET ODIUM PRO DILECTIONE MEA.

Id ipsum clarius repetit, quasi dicat: Rependerunt mihi maledictionem pro benedictione, odium pro amore, vulnera multa pro curationibus multis, mortem corporalem pro vita spirituali.

5. CONSTITUE SUPER EUM PECCATOREM, ET DIA- Vers. 5. BOLUS STET A DEXTRIS EJUS.

Transitum facit Propheta ad Judam, quem prævidebat «ducem futurum eorum qui comprehenderunt Jesum,» ut loquitur S. Petrus *Acto. i*, et per modum imprecantis prædictit, que illi evenitura prospiciebat. Ac primum, inquit, «constitue super eum peccatorem,» id est, noluit Judas super se Christum, Dominum utique justissimum et mitissimum; ideo constitues super eum spiritum avaritiae, cui serviet infeliciter usque ad mortem. Judas enim servire voluit mammonæ, ac per hoc servire non potuit Christo, «quia nemo potest duobus dominis servire,» *Matth. vii*. Porro spiritus avaritiae iniquissimus est, cum honorem Deo debitum idolo tribuat, dicente Apostolo *ad Ephes. v*, de avaritia, «quod est idolorum servitus.» «Et diabolus stet a dextris ejus,» id est, et diabolus erit dux ejus in operibus malis, et illi perpetuo assistet, vel potius tanquam canem alligatum vinculo cupiditatis illum trahet, et ad nocendum proprio etiam magistro incitat. S. Augustinus, per peccatorem præpositum Judæ, intelligit eumdem diabolum, qui tanquam ejus dominus stabat a dextris ejus. Idem S. Augustinus recte monet Judam gessisse personam totius Synagogæ, quemadmodum S. Petrus gerebat personam to-

tius Ecclesiæ; et ideo, quæ hic dicuntur de Juda, illi quidem convenire, sed convenire etiam et illustrius toti Synagoge, quæ recusans habere Christum regem, habuit diabolum et Cæsarem, et ejus loco Pilatum.

Vers. 6. **6. CUM JUDICATUR EXEAT CONDEMNATUS, ET ORATIO EJUS FIAT IN PECCATUM.**

Prædictis nunc Prophetæ infelicissimum exitum Judæ, ad quam prophetiam respxisse videtur Dominus *Joan. xvii*, cum ait: «Quos dedisti mihi custodivi, et nemo ex iis periret, nisi filius perditionis, ut Scriptura impleteatur.» Ergo, inquit, «cum judicatur» a Deo in exitu de hac vita, «exeat», id est, exhibet condemnatus, et si forte oraverit Deum, oratio ejus non solum impetrabit remissionem peccati, sed ipsa oratio fit illi in peccatum. Cur oratio Judæ facta sit illi in peccatum, rationem reddit S. Hieronymus, quia oravit sine spe indulgentiae, et desperans laqueo se suspendit. S. Augustinus dicit factam esse in peccatum,

*Oratio peccato-
ris non semper
est pec-
catum.*

quia non est facta per Christum mediatorem. Euthymius addit factam esse in peccatum, quia Judas, ut etiam cæteri persecutores Christi, orabant Deum pro exterminatione nominis christiani. Posset etiam addi Judæ orationem factam esse in peccatum, quia Judas non a Deo, sed a diabolo auxilium petiti. Diabolus autem suspendum illi suasit. Quo loco admonendi sunt lectores, orationem peccatoris non semper esse peccatum, sed sepe multum valere ad remissionem peccatorum, ut intelligi potest ex oratione Publicani, *Luc. xviii*; tunc autem fieri in peccatum, et vere esse peccatum, cum is qui orat, vel non orat quem debet orare, id est, Deum verum, sed idola, vel diabolum; vel non orat pro re bona, quam æquum est a Deo peti, sed pro re mala, quæ Deo displicet, ut pro ruina inimicorum; vel non orat per unicum mediatorem, qui est Christus, sed per merita sua, quæ superbe se habere præsumit; vel denique non orat cum spe, aut fide, aut aliis necessariis bonæ orationis comitibus. Eadem quæ hic dicuntur de Juda convenienter Judæis, quorum ille typum gerebat. Judæ enim qui credere nolunt in Christum, exeunt de hac vita condemnati ad mortem sempiternam; et oratio eorum, quam assidue fundunt in synagogis suis, fit illis in peccatum: quia non orant Patrem per Filium, cum nec Filium, nec Patrem norint, et quia postulant quæ Deo non placent, excidium videlicet christianorum, et celerem adventum Antichristi; hunc enim illi pro Christo recipient, ut dicitur *Joan. v.*

Vers. 7. **7. FIANT DIES EJUS PAUCI, ET EPISCOPATUM EJUS ACCIPIAT ALTER.**

Hic est locus quem S. Petrus allegavit *Auctor. I*, ut ostenderet necessarium fuisse ut in locum Judæ aliquis substitueretur; et cum omnes Apostoli et discipuli judicio S. Petri acqueverint, ac per hoc unanimi consensu locum istum Psalmi de Juda

intellexerint, nemini licet aliter exponere. «Oportet», inquit apostolus *Petrus Auctor. I*, «impleri Scripturam, quam predixit Spiritus Sanctus per os David de Juda, qui fuit dux eorum qui comprehendenterunt Jesum.» Videmus autem impletum fuisse hoc vaticinium in Juda perfectissime: nam facti sunt dies ejus pauci, sive cum S. Augustino intelligamus dies apostolatus, sive cum S. Hieronymo dies vitæ, sive cum Euthymio dies ejus post peccatum commissum. «Et episcopatum», id est, apostolatum «ejus accipiat alter», Matthias videlicet, qui omnibus modis erat alter, id est, non consanguineus, non familiaris, non amicus, non similis vite ac morum. Nomen *episcopatus* in hebreo est *πατριάτης*, quod ab *inspiciendo* et *visitando* deducitur; debet enim episcopus assiduè inspicere et visitare oves suas, de quibus rationem Domino redditurus est: id quod, qui longe absunt ab episcopatu suo, certe præstare non possunt. Hoc idem impletum est in Judæis: nam post Judæ peccatum pauci fuerunt dies Judæorum in episcopatu, id est, in sacerdotio, sive pontificatu; et episcopatum eorum accepit alter, quia translatum est sacerdotium Aaronicum ad sacerdotium secundum ordinem Melchisedech, et nulli sunt hodie pontifices Judæorum, et multi sunt pontifices christianorum.

**8. FIANT FILII EJUS ORPHANI, ET UXOR EJUS VI- Vers. 8.
DUA.**

Ne quis forte existimat Judam condemnandum ad pœnam aliquam, vita durante, et ut fierent dies ejus pauci in episcopatu, non in corpore, Propheta declarat dies ejus futuros etiam paucos, ob imminentem veram mortem, per quam filii ejus orphani, et uxor vidua remaneret. Quod impletum est, quia eadem die laqueo se suspendit, et non diu postea in excidio Hierosolymæ omnes fere viri interierunt: et relicti sunt plurimi orphani et plurimæ viduae.

**9. NUTANTES TRANSFERANTUR FILII EJUS, ET Vers. 9.
MENDICENT; ET EJICIENTUR DE HABITATIONIBUS
SUIS.**

Explicat ærumnas filiorum Judæ, ac dicit eos instabiles vagaturos et mendicaturos in aliena regione, quoniam ab habitatione sua ejicientur. In hebreo paulo aliter leguntur ultima verba hujus versiculi. Sic enim vertit S. Hieronymus, *et querantur in parietinis suis*. Sed Septuaginta Interpretes, quos latinus sequitur, non legerunt in hebreo *τούς οὐκείδεν αὐτῶν*, id est, *ex ruinosis habitationibus suis*. Nam idem significat parietina, id est, domus dirutæ, ubi soli remanent parietes. Particula *ex*, quam habent Sep-

Episcopi
officium
est suum
gregem
visitare.

tuaginta Interpretes, habetur satis aperte in hebreo, quamvis S. Hieronymus verterit *in* : quoniam particula יְהָוָה utrumque significare potest, sed frequentius accipitur pro *ex*, vel *ab*. Itaque sensus nostrae lectionis est, quod Judæ filii, et cœteri Judæi non solum non permittentur habere integras domos, quia Hierusalem evertenda erat, sed ejicientur etiam de habitationibus dirutis, ut ne ruinas quidem domorum suarum possidere eis liceat, quod impletum esse res ipsa testatur.

Vers. 10. 10. SCRUTETUR FÖENERATOR OMNEM SUBSTANTIAM EJUS, ET DIRIPIANT ALIENI LABORES EJUS.

Aurum in visceribus Juðæorum a militibus Titi quasi-tum. Redditur hoc loco ratio cur filii Judæ et Judæi cœteri sint futuri pauperrimi, ac plane mendici : quia videlicet creditores eorum, quibus solvendo non erunt, diligentissime querent, et accipient substantiam eorum ; et si quid superfluerit ex labore eorum quæsumus, diripient alieni, milites scilicet Titi imperatoris, qui (ut scribit Josephus lib. VI De Bello Judaico, cap. xv) scrutabantur aurum etiam in visceribus hominum, ad hunc finem illos dissecantes. Et hec quidem olim passi sunt Judæi, sed nunc fœneratores effecti ex bonis pauperum christianorum ditescunt. Illud, *scrutetur*, nunc est in codice hebraico, וְכֹל, quod *illaqueare*, vel *irretire*, significat. Sed Septuaginta et S. Hieronymus, qui verterunt *scrutetur*, videntur legisse וְכַבֵּי, quod est *diligenter querere*; proinde post tempora S. Hieronymi, locus hic vitio librariorum corruptus videtur.

Vers. 11. 11. NON SIT ILLI ADJUTOR, NEG SIT QUI MISERATUR PUPILLIS EJUS.

Et hoc manifeste impletum est in Juda et in Judæis; Judas enim ad principes sacerdotum accessit et pecunias retulit, ac se peccasse confessus, nihil auxilii vel consolationis accepit; responderunt enim : « Quid ad nos? tu videris! » Matth. xxvii. Quare rejectus a sacerdotibus, et a Christo veniam non sperans, abiens laqueo se suspendit. Porro Judæi a Romanis obsessi neminem habuerunt, qui eos juvare auderet.

Vers. 12. 12. FIANT NATI EJUS IN INTERITUM, IN GENERATIONE UNA DELEATUR NOMEN EJUS.

Prædict Propheta, filiis Judæ mortuis, delen-dum omnino nomen ejus in generatione una, quia videlicet non remanebunt filii filiorum, id est, secunda vel tertia generatio. Et hoc quidem de filiis carnis Judæ impletum esse credimus : sed scimus etiam adimpletum in filiis spiritualibus. Nam aliorum Apostolorum multi numerati sunt filii filiorum, quos illi per Evangelii prædicationem in Christo generunt : et posteritas eorum in æternum manebit. Judæ vero spiritualis posteritas nulla est; Judæi vero quamvis non omnino extincti sint, perit tamen in generatione una regnum, sive res publica eorum : nam post eversam Hierosolymam, dispersi fuerunt in gen-

tes, et nunc impletur in eis quod prædictis Osee propheta cap. iii : « Quia dies multos sedebunt filii Israel sine rege, et sine principe, et sine sacrificio, et sine ephod, et sine theraphim. » Itaque illud, *interitum*, significat interitum populi, sive regni, ut non sint amplius unus populus, sive regnum, sed homines dispersi per omnes populos et regna. Ex hebreo S. Hieronymus verterit : *Fiat novissimum ejus interitus, in generatione altera deleatur nomen ejus*. Sed Septuaginta non male verterunt : « Fiant nati ejus in interitum, in generatione una deleatur nomen ejus. » Nam vox hebreæ אֲנֹתְרִיתָן significant ad litteram *reliquæ ejus*, sive, quod post eum remanet. Et quamvis possit hoc significare, *norissimum ejus*, ut verit S. Hieronymus, quia novissimum postea erit, tamen rectissime verterunt Septuaginta Interpretes, *nati ejus*, id est, *reliquæ ejus*, sive *posterioritas ejus*. Illud quoque, *in generatione una*, recte interpretatum est: quoniam Septuaginta non legerunt גָּמָן, id est *altera*, ut legit S. Hieronymus, sed גָּמָן *achad*, id est *una*; litteræ enim simillimæ sunt, et facile fuit librariis unam litteram pro alia ponere.

43. IN MEMORIAM REDEAT INIQUITAS PATRUM Vers. 13.
EJUS IN CONSPPECTU DOMINI: ET PECCATUM MATRIS
EJUS NON DELEATUR.

Addit Propheta ad calamitates Judæ et Judæorum, ut peccata parentum in eis puniantur. Vocat autem patres, non solum patrem ejus naturalem, sed omnes eos Hebreos qui peccaverunt in deserto, et postea in terra promissionis; vocat vero matrem, non tantum matrem propriam, sed integrum Synagogam, sive ipsam civitatem Hierusalem, de qua dicitur Thren. I : « Peccatum peccavit Hierusalem. » Quod autem hic dicit Propheta, significavit etiam Dominus Matth. xxiii, Quomodo cum ait : « Ut veniat super vos omnis sanguis peccata justus, qui effusus est super terram a sanguine Abel justi, usque ad sanguinem Zachariæ filii Barachiae, quem occidistis inter templum et altare. Amen dico vobis, venient hæc omnia super generationem istam. » Et hoc ipsum imprecati sunt impii Judæi filiis suis, Matth. xxvii, 23 : « Sanguis ejus super nos et super filios nostros. » Neque repugnat hæc sententia verbis Ezech. cap. xviii : « Filius non portabit iniquitatem patris. » Eze-chiel enim loquitur de filiis qui non imitantur peccata parentum; Psalmus autem loquitur de filiis qui peccata parentum imitantur. Deus enim, irritatus peccatis parentum, exspectat quidem filios ad pœnitentiam; sed si illi pergent parentum iniuitates imitari, et sic implere mensuram patrum suorum, tandem omnes exterminat, non solum considerans peccata præsentium, sed etiam præteriorum. Atque hoc est quod Exod. xx, Deus dixit, cum legem populo daret : « Ego sum Deus tuus fortis, zelotes, visitans peccata parentum in filios, in tertiam et quartam generationem eorum qui oderunt me. » Vide de concordia harum

Scripturarum S. Thomam in II, *Ques. LXXXVII*, art. 8, et theologos ceteros apud Magistrum Sententiarum, lib. II, dist. 33.

Vers. 14. 14. FIENT CONTRA DOMINUM SEMPER, ET DISPEREAT DE TERRA MEMORIA EORUM, PRO EO QUOD NON EST RECORDATUS FACERE MISERICORDIAM.

Repetit quod dixit de peccatis parentum, et ele-
ganter opponit memoriae peccatorum memoriam
gloriae Iudee et Judæorum, quasi dicat: Vivet co-
ram Deo memoria peccatorum patris et matris
ipsorum, ut poena semper maneat, et contra dis-
pereat de terra memoria gloriae et felicitatis ip-
sorum. Illud enim, *contra Dominum*, significat,
coram Domino, sive ex opposito oculorum Do-
mini, ut semper videantur a Domino peccata illa:
haec enim est vis vocis hebraicæ *neghed*, et
græcæ *avarice*. Illud autem, *memoria illorum*, non
significat simplicem memoriam personarum, sed

Comme-
moratio
Aposto-
lorum vi-
get, Ju-
da min-
me.
faustam commemorationem. Viget enim comme-
moratio aliorum Apostolorum, quæ quotannis
renovatur cum honore et laudibus ipsorum; Ju-
dæa commemoration nulla fit, et si quando nome
ejus pronuntiandum est, cum execratione et hor-
rore pronuntiatur: sic etiam gentis Judæorum
nulla fit commemoration, nisi cum contemptu, ut
gentis vilissimæ, quæ ubique servit. Addit Pro-
pheta causam tot calamitatum Judæa et Judæo-
rum: « Quoniam, inquit, non est recordatus fa-
cere misericordiam; » nam, ut scribit B. Jacobus
cap. II: « Judicium sine misericordia illi, qui
non facit misericordiam; » Hoc enim fuit pecca-
tum Judæa, quod cum videret principes Judæo-
rum furere adversus Christum, ipse nulla mise-
ricordia motus erga innocentem magistrum et
Dominum suum, crudelissime illum tradidit ca-
piendum et occidendum.

Vers. 15. 15. ET PERSECUTUS EST HOMINEM INOPEM ET MENDICUM, ET COMPUNCTUM CORDE MORTIFICARE.

Explicit Propheta in quo sita fuerit crudelitas
Judæa et populi Judæorum, quia videlicet perse-
cutes est Christum, « hominem inopem et men-
dicum, et compunctum corde mortificare, » id
est, ad eum morti tradendum. S. Augustinus non
audet haec de Christo exponere, quia Christus
non potest dici *compunctus corde*, cum compunctio
sit propria eorum, quorum est pœnitentia. Ideo
per hominem *compunctum corde*, intelligit Aposto-
los et alios fideles, quos Judæi usque ad mor-
tem persecuti sunt. Sed quia S. Hieronymus,
Theodoreetus, Euthymius et alii de Christo haec
omnia intelligunt, et textus ipse quadammodo

Christus
cur men-
dicus et
inops di-
catur?
nos cogit, ut hunc versiculum de Christo potis-
simum exponamus, dicendum est Christum dici
hominem inopem, quia cum esset dives, « propter
nos egenus factus est, » ut nos inopia sua locu-
pletaret, ut dicit Apostolus II Corin. VIII. Dici
etiam *mendicum*, quia ex aliena misericordia in
hoc mundo vivere voluit, ut verbo Dei prædi-

cando, et orationi pro nobis faciendæ totus in-
cumberet; dici denique *compunctum corde*, non
compunctione culpe, sed compunctione poenæ
et anxietatis, ac sollicitudinis, quam pro salute
generis humani assidue in corde gerebat. Nota-
tur autem in his verbis summa crudelitas: nam
qui hominem occidere querunt, vel moveri so-
lent ab iracundia ob injuriam acceptam, vel a
cupiditate spoliandi divitem, vel ab invidia alie-
næ felicitatis. Christus autem, mitis et humilis
corde, nemini faciebat injuriam; et cum esset
adeo contemptor bonorum hujus mundi, ut vo-
luntarie mendicus factus esset, non habebat unde
oculos cupidorum provocaret. Denique cum assi-
due hominum peccata defleret, et ad pœnitentia-
m agendam, ad felicitatem mundi spernen-
dam, ab bona cœlestia desideranda hortaretur,
nulla erat causa cur eum ad mortem ullus que-
reret.

16. ET DILEXIT MALEDICTIONEM, ET VENIET EI; Vers. 16.
ET NOLUIT BENEDICTIONEM, ET ELONGABITUR AB EO.

Nemo est qui diligere possit maledictionem,
vel odio habere benedictionem, si sub ratione
maledictionis et benedictionis voluntati propo-
nuntur; sed dicitur homo diligere maledictionem
et nolle benedictionem, quando ipse sibi causa
est, malis suis operibus, cur maledicatur et non
benedicatur. Sic Judas, tradendo Christum Ju-
dæis ob cupiditatem modicæ pecuniae, dilexit Judas
maledictionem, quia ipse sibi causa fuit cur ma-
lediceretur a Deo; et ipse idem deserendo Chri-
stum, in quo benedicendæ erant omnes genera-
tiones, noluit benedictionem, quia ipse sibi causa
fuit cur non benediceretur a Deo. Quod idem de
populo Judæorum dici potest. Venit enim Filius
Dei de cœlo, ut benedicet populum suum; sed
illi, Christum occidendo, sibi ipsi in causa fue-
runt, cur pro benedictione maledictionem acci-
perent, et benedictio ad gentes transferretur.
Porro benedictio Dei cumulum bonorum om-
nium significat, quemadmodum et maledictio
cumulum omnium malorum. Videmus autem
haec impleta fuisse primum in Juda, qui conti-
nuo et pecunias, quas acceperat, et vitam tem-
poralem et sempiternam amisit; deinde in po-
pulo Judæorum, qui regnum et sacerdotium per-
didit, et excæcatus atque obstinatus in increduli-
tate vivit, donec ad tenebras extieriores, quæ sunt
in gehenna, descendat.

17. ET INDUIT MALEDICTIONEM SICUT VESTIMENTUM, ET INTRAVIT SICUT AQUA IN INTERIORA EJUS,
ET SICUT OLEUM IN OSSIBUS EJUS. Vers. 1

Declarat Propheta pulcherrimis similitudinibus
maledictionem divinam esse cumulum omnium
malorum tum externorum, tum internorum, ita
ut homo maledictus a Deo cunctis malis ita re-
pleatur, ut nulli bono relinquatur locus. Primum
comparat maledictionem divinam vestimento,

quod totum corpus undique legit, et quia vestimentum non intrat ad viscera, comparat etiam aquæ, que hominem demersum in mari, non solum exterius abluit, sed etiam intrat ad stomachum, ad ventrem, ad pectus, ad omnia interna corporis humani : et quoniam aqua non penetrat ossa, imo neque carnes, venas, nervos, addit comparisonem olei, quod subtilissimum est; et non solum carnes et venas, et nervos, sed ipsa etiam ossa pervadit. Sic igitur divina maledictio, non solum Judæ et Judæorum, sed omnium illorum quibus dicetur: « Ite, maledicti, » replebit malis corpus et omnia ejus membra; replebit animam et omnes ejus sensus; replebit et mentem, et usque ad intima intelligentiae et voluntatis penetrabit. Quæ certe si homines mortales serio cogitarent, non sine magno horrore vivebant.

Vers. 18. 18. FIAT EI SICUT VESTIMENTUM QUO OPERITUR,
ET SICUT ZONA QUA SEMPER PRÆCINGITUR.

Addit Propheta maledictionem illam non solum ubique penetraturam, sed etiam sempiternam futuram. « Fiat, inquit, ei, » Judæ videlicet et populo Judæorum, « ea maledictio sicut vestimentum quo operitur, » id est, semper illi adhæreat, quemadmodum vestis semper adhæret homini, ne turpitudo ejus appareat. « Et sicut zona qua semper præcingitur, » id est, non solum maledictio illi adhæreat, sed etiam firmissime adhæreat, quo modo cingulum firmissimum et multiplicibus nodis adstringi solet. Quis digne cogitare valeat qualis sit nodus, quam firmus, quam insolubilis, decretum immutabile omnipotentis voluntatis Dei?

Vers. 19. 19. HOC OPUS EORUM, QUI DETRAHUNT MIHI
APUD DOMINUM, ET QUI LOQUUNTUR MALA ADVER-
SUS ANIMAM MEAM.

Concludit Propheta prædictionem miseriarum Judæ, dicens: « Hoc opus eorum, » id est, hæc erit merces operis eorum. Accipitur enim in Scriptura opus pro mercede operis, ut Levit. xix: « Non morabitur opus mercenarii tui apud te usque mane. » « Qui detrahunt mihi, » id est, qui me seductorem vocant, qui Filium Dei esse negant, etc., « apud Dominum, » id est, haec erit merces eorum apud Dominum, sive a Domino, ut clarius habetur in textu hebraico, quem S. Hieronymus sic reddidit: *Hæc est retrubatio a Domino his qui mihi adversantur, et qui loquantur mala adversus animam meam*, id est, qui obloquuntur de me mala. Est enim hæc pars posterior versiculi, repetitio et explicatio prioris.

Vers. 20. 20. ET TU, DOMINE, DOMINE, FAC MECUM PRO-
TER NOMEN TUUM, QUA SUAVIS EST MISERICORDIA
TUA.

In ultima parte Psalmi precator Christus pro se, et pro corpore suo, quod est Ecclesia; et pre-

cando prædictit multa bona, quemadmodum in superioribus partibus per modum imprecationis prædictit multa mala Judæ et Judeis. Primum igitur orat Dominum, ut sibi semper adsit, seque et corpus suum adjuvet propter gloriam nominis sui. « Et tu, inquit, אָדָם אֶלְيָהוּ, Domine, Domine. » Prima vox continet nomen quatuor litterarum, quod est proprium *Dei*, et deducitur ab *esse*, quia Deus est fons essendi; secunda continet aliud nomen, quod proprio *Domini* significat. Ita sensus est: Tu *fons essendi*, qui es *Dominus omnium rerum*, « fac mecum, » id est, mecum operare, mihi te adjunge, « propter nomen tuum, » id est, ad gloriam tuam. « Quia suavis est misericordia tua, » id est, quia misericordia tua benigna est, et facile inclinatur ad succurrendum miseris. Ubi loquitur tum pro se, tum pro corpore suo, quod est Ecclesia, et poscit auxilium Dei adversus persecutores ex tribus capitibus: primo, quia Deus est *Dominus omnium rerum*, ac per hoc potest, si velit, hostes reprimere; secundo, quia hoc postulatur propter nomen Dei extollendum; tertio, quia Dei misericordia benigna est, ac per hoc Deus non solum potest, sed etiam vult misereri. Et quoniam, ut dixi, hæc est prædictio per modum precationis, vel simul precatio et prædictio: ideo certi sumus Ecclesiam Christi semper a Deo protegendam et juvandam esse, « ut portæ inferi non prævaleant aduersus eam, » juxta id quod dictum est Matth. xvi.

21. LIBERA ME, QUA EGENUS ET PAUPER EGO
SUM, ET COR MEUM CONTURBATUM EST INTRA ME.
Vers. 21.

Pergit in oratione Propheta in persona Christi et videtur respicere tempus illud, quot Christus dixit Joan. xii: « Nunc anima mea turbata est, et quid dicam? Pater, salvifica me ex hac hora; » vel cum in horto precatus est Patrem, et Apostolis dixit: « Tristis est anima mea usque ad mortem. » « Libera, inquit, me ab imminentे morte, quoniam egenus et pauper ego sum, » id est, omni humano auxilio destitutus, non habeo, qui pugnet pro me; et anima mea turbata est intra me, id est, tristitia et horror ex consideratione mortis futuræ turbavit me. Hæc autem Christus dicebat, ut ostenderet se vere esse hominem, qui mortem absolute consideratam, ut naturæ contrarium exhorreret: cum tamen eamdem mortem, ut pretium redēptionis a Patre decretum et ordinatum maxime desideraret. Quare Joan. xii, cum dixisset: « Salvifica me ex hac hora, » subjunxit: « Sed propterea veui in hanc horam; » et Matth. xxvi, cum dixisset: « Transeat a me calix iste, » continuo addidit: « Sed non sicut ego volo, sed sicut tu. » Porro quod attinet ad corpus Christi, quod est Ecclesia, petitur liberatio a persecutionibus et tentationibus, quia ceterus Ecclesie egenus et pauper est, id est, non nititur viribus suis, aut meritis suis, sed tanquam vere mendicus, in solo Deo confidit.

Christus
indicat
se vere
esse ho-
minem.

Vers. 22. 22. SICUT UMBRA CUM DECLINAT, ABLATUS SUM ET EXCUSSUS SUM SICUT LOCUSTÆ.

Hæc pertinent ad comprehensionem Domini, quæ facta est post orationem in horto. Comparat vero Propheta comprehensionem umbræ deficiente, quoniam umbra sine ullo strepitu deficit, et maximo cum silentio. Sic enim et Dominus avulsus est a discipulis, et captivus ductus, imo etiam ad varia tribunalia, et ad ipsam Crucem adductus sine murmure, sine resistentia, sine defensione. « Sicut umbra, inquit, cum declinat, ablatus sum, » id est, ablatus sum a comitatu discipulorum ad tribunal Caiphæ, Pilati et Herodis eo silentio, quo declinans umbra deficere solet. « Et excussus sum, » id est, jactatus ab uno tribunali ad aliud, « sicut locustæ, » vilissima scilicet animalia, a vento jactari solent ab uno loco ad alium. S. Augustinus priorem partem versiculi refert ad Christum in persona propria, posteriorem ad Christum in persona discipulorum. Ille enim ablatus est, sicut umbra, illi excussi velut locustæ.

Vers. 23. 23. GENUA MEA INFIRMATA SUNT A JEJUNIO, ET CARO MEA IMMUTATA EST PROPTER OLEUM.

Hic videtur describi debilitas Christi ex jejunio, adjuncta vigilia, et labore illius noctis et sequentis diei, quo passio peracta est: quamvis etiam toto viâ tempore Dominum frequentissime jejunasse credendum sit. « Genua mea, inquit, infirmata, » id est debilitata « sunt a jejunio, et caro mea immutata, » id est, macie et pallore confecta apparuit « propter oleum, » id est, propter pinguedinem suam amissam. In hebreo clarius habetur, *caro mea immutata est* בְּשָׂרֶב, id est, *a pinguedine*, id est, ex pingui macilenta redditæ est. Varie hic locus ab alis explicatur; sed hæc nobis explicatio litteralis maxime visa est.

Vers. 24. 24. ET EGO FACTUS SUM OPPROBRIUM ILLIS, VI-DERUNT ME ET MOVERUNT CAPITA SUA.

Hic concludit passionem: nam post illam summam debilitatem, factus est Dominus opprobrium Judæis, cum eum in medio latronum crucifixum viderunt, et viso eo moverunt capita sua, stantes ante crucem et dicentes: « Vah! qui destruis templum Dei, » etc. Matth. xxvii.

Vers. 25. 25. ADUVA ME, DOMINE DEUS MEUS, SALVUM ME FAC SECUNDUM MISERICORDIAM TUAM.

Precatur Dominus de corpore exiens auxilium Patris ad celerem resurrectionem, ut diximus in explanatione Psalm. xxi et lxxviii, et simul precatur corpori suo mystico, id est, Ecclesiae, veram salutem corporis et animæ.

Vers. 26. 26. ET SCIANT, QUIA MANUS TUA HÆC, ET TU, DOMINE, FECISTI EAM.

Ne putarent homines Christum ad passionem et

mortem ignominiae plenam invitum pervenissem, et ne jactarent Judæi se potentia sua in Christum prævaluisse, admonet Propheta in persona Christi, hoc totum a Deo factum esse, juxta illud S. Petri Act. iii: « Deus, qui prænuntiavit per os omnium Prophetarum, implevit sic. » Ait igitur: « Et sciunt » homines omnes, ac præsertim Judæi, « quia manus tua hæc, » id est, quia hæc res, hæc passio, hæc mors mea, a manu tua, hoc est, voluntate et potestate tua processit. « Et tu, Domine, fecisti eam. » Neque enim potuerint Judæi aut Gentes Christo prævalere, eumque affligere et occidere, nisi Deus voluisset. Neque tamen excusantur a gravissima culpa, qui Christum occiderunt, quasi voluntatem Dei adimpleverint; ipsi enim non voluntatem Dei, sed odium cordis sui implere voluerunt: Deus autem mala eorum voluntate, quam ipse non fecerat, usus est ad mundum redimendum per obedientiam et charitatem, patientiam et humilitatem unici sui. S. Augustinus per *manum Dei*, hoc loco intelligit Christum, quem Deus fecisse dicitur, quia humanitatem ejus fecit. Alii per *manum Dei* intelligunt potentiam Dei, sed per particulas illas, *hæc et eam*, intelligunt salutem. Sed nos Theodoreum secuti sumus, cuius expositio maxime litteralis nobis visa est.

27. MALEDICENT ILLI, ET TU BENEDICES; QUI INSURGUNT IN ME, CONFUNDANTUR, SERVUS AUTEM TUUS LETABITUR.

Persecutores, ignorantes hæc quæ dicta sunt, « maledicent mihi » et Ecclesiæ meæ: ut revera usque ad hanc diem Judæi blasphemare et maledicere pergunt; sed « tu benedices, » non solum mihi, me glorificando et exaltando ad dexteram tuam, sed etiam propter me benedices omnes gentes, eas per fidem et baptismum in filios adoptando. Ex quo fiet ut illi, qui me persequuntur et mihi maledicunt, tandem « confundantur: servus autem tuus, » ego et fratres mei letitia semperna fruamur.

28. INDUANTUR, QUI DETRAHENT MIHI PUDORE, ET OPERIANTUR SICUT DIPLOIDE CONFUSIONE SUA.

Confirmat quod dixit, et per modum imprecationis prædicti omnes Christi et Ecclesiæ adversarios tandem cooperiendos confusione et pudore, instar vestimenti duplicitis undique hominem operientis. Quod quidem in die judicii omnino implebitur. Vox hebraica לִבְנָה significat vestem amplam et honorificam, qualis erat tunica sacerdotalis, quæ describitur Exod. xxviii. Sed Septuaginta Interpretes verterunt διπλοίδη, vel quia vestis erat tam ampla et longa, ut duplicari posset; vel quia revera ea vox significat vestem suffultam alia veste, ac per hoc duplitem, ut sunt apud nos vestes permultæ. Sensus autem est confusione damnatorum in novissimo die fore maximam, ita ut pleni sint futuri erubescencia et pu-

Jude
cur gr
viter
peccave
rint
Christu
occede
do?

dore. Et certe, quæ major confusio cogitari potest quam ingratitudinem, insipientiam aliaque via damnatorum in theatro mundi totius, coram angelis et hominibus, qui ab initio sæculi fuerunt, apertissime detegi?

Vers. 29. 29. CONFITEBOR DOMINO NIMIS IN ORE MEO, ET IN MEDIO MULTORUM LAUDABO EUM.

Hoc opponitur confusione impiorum. Illi enim præ confusione obmutescerunt: Christus autem et electi ejus « confitebuntur laudes Deo, nimis in ore suo, » id est, magno clamore magnoque jubilationis affectu, idque in medio multorum, in theatro orbis terrarum in die judicij, et postea in theatro cœlestis Jerusalem in æternum.

Vers. 30. 30. QUA ASTITIT A DEXTRIS PAUPERIS, UT SALVAM FACERET A PERSEQUENTIBUS ANIMAM MEAM.

Haec est ratio tante confessionis et laudis, quoniam Deus auxilio suo « astitit a dextris pauperis Christi, » et populi ejus, « ut salvaret a persequentibus Judæis, » vitam temporalem Christi, quod factum est per celerem resurrectionem, et a persequentibus tum hominibus, tum dæmonibus, vitam æternam electorum ejus. In hebræo est יְמִשְׁפָּט missophete, id est, a *judicibus*, pro eo

quod nos habemus, *a persequentibus*, et quidem quod attinet ad Christum, præcipui persecutores Christi fuerunt Caiphas et Pilatus, qui Christum morti adjudicaverunt. Sed sapientia Dei astitit Christo, tanquam optimus patronus, et sententiam iniquam revocari fecit a divina potentia, quæ Christum ad vitam revocavit. Quod vero attinet ad Ecclesiam, judices qui persequeruntur Ecclesiam, erant tum imperatores et reges, ac magistratus paganorum, qui multa milia sancctorum martyrum morti adjudicaverunt; tum præcipue dæmones, qui sententiam Dei in genus humananum latam proferebant, et ex illa genus humananum morti æternæ adjudicabant: sed astitit advocatus potentissimus Christus, « qui tulit de medio chirographum, quod erat contrarium nobis, illudque delevit et affixit cruci, » et pauperum animas salvas fecit, ut scribit Apostolus ad Coloss. II. Hic illud annotandum est, Deum assistere a dextris pauperum, id est, eorum qui agnoscunt paupertatem suam, debilitatem videlicet viarium suarum, et ideo assidue pulsant ad ostium Dei, qui dives est in misericordia. Item a dextris pauperis, id est, eorum qui exuerunt affectum rerum omnium creatarum, et spiritu pauperes effecti in solo Deo divitias suas posuerunt.

PSALMUS CX.

SECUNDUM HEBRAEOS.

V. v. — 1. Psalmus David.

Dixit Dominus Domino meo: Sede a dextris meis:

Donec ponam inimicos tuos, scabellum pedum tuoram.

2. Virgam virtutis tuae emittet Dominus ex Sion: dominare in medio inimicorum tuorum.

3. Tecum principium in die virtutis tuae in splendoribus sanctorum: ex utero ante luciferum genui te.

4. Juravit Dominus, et non pœnitabit eum: Tu es sacerdos in æternum, secundum ordinem Melchisedech.

5. Dominus a dextris tuis: confregit in die iræ suæ reges.

6. Judicabit in nationibus, implebit ruinas: conquassabit capita in terra multorum.

7. De torrente in via bibet: propterea exaltabit caput.

V. s. h. — David Canticum [h. Psalmus]:

Dixit Dominus Domino meo: Sede a dextris meis, donec ponam inimicos tuos scabellum pedum tuorum.

Virgam [h. baculum] fortitudinis tuae emitte Dominus ex Sion: dominare in medio inimicorum tuorum.

Populi tui spontanei erunt in die fortitudinis tuae in montibus [h. splendoribus] sanctis:

Quasi de vulva orietur tibi ros adolescentiae tuae.

Juravit Dominus, et non pœnitabit eum: Tu es sacerdos in æternum, secundum ordinem Melchisedech.

Dominus ad dexteram tuam [al. a dextera tua], percussit in die furoris sui reges.

Judicabit in gentibus, implevit [h. cadaveribus] valles, percutiet caput in terra multa.

De toriente in via bibet: propterea exaltabit caput.

Argumentum. — Regis Messiae celebrantur majestas, potentia et victoriæ bellorum. Expugnato a Davidicis copiis Hierosolymorum castello factum esse carmen videtur. Strophæ due: vers. 1-4, Dei Filio narrat vates, quæ ejus

causa facturus sit Pater; vers. 5-7, Patri narrat Filii praeclare facta. De Messia cani Psalmum arguunt, 1^o tum loca Novi Test. *Math. xxii*, 41-46; *Marc. xiii*, 35-37; *Luc. ix*, 41-44; *Act. ii*, 34; *vii*, 55-56; *I Petr. iii*, 22; *Rom. viii*, 34; *I Corinth. xv*, 24 seqq.; *Ephes. i*, 20-22; *Philipp. ii*, 9-11; *Hebr. i*, 3, 13, 14; *viii*, 1, x, 12-13; tum SS. PP. omnes; 2. tum rationes intrinsecæ: a) quod regem, de quo agitur, *Dominum suum ipse Davides vocat*; b) quod eum Jova a dextris suis sedere jubet; c) quod populus ejus ornamenti *sancitis* induitus sistitur; d) quod dicitur *sacerdos*; e) et quidem *in æternum*. Argumentis intrinsecis rationalistæ respondent, primo quidem, vel non a Davide scriptum esse carmen, sed in Davidem ab alio eo tempore factum, vel Davidem ut poetam de se ut rege ita potuisse loqui; secundo, locutionem *sedere ad dexteram Jovæ*, i. e. uti ejus auctoritate et potentia: sic etiam vicarii veterum Arabum regum in consensu ad dexteram regis locum tenebant; tertio, *ornamenti sanctis*, i. e. ornatu *festo*, eos decenti, qui Jova duce proficiscuntur ad bellum; quarto, coll. II *Som. vi* (Cf. *Zach. vi*, 13), tum I *Reg. viii*; II *Reg. xii*, 4 seqq.; *xviii*, 4 seqq.; *xxvii*, 1 seqq.; *Ps. cv*, 15; quinto, tò *in æternum* sàpè de *vita tempore*, sàpius etiam de minoris ambitus spatio, quam de æternitate metaphysica in Script. accipi. Maurer: « Duarum stropharum est Psalmus (1-3, 4-7), quarum utraque incipit a dicto quodam Jovæ, utraque regem Jovæ auspiciis hostes omnes prostraturum esse dicit. »

1. Davidis carmen.

Effatum Jovæ ad Dominum meum :

« Sede ad dexteram meam,
usque dum posuero hostes tuos scabellum pèdibus tuis. »

2. Baculum potentiae tuæ emittet (protendet) Jova ex Sione :
impera in medio hostium tuorum.

3. Populus tuus spontaneæ oblationes die militiae tuæ in ornatu sancto,
ex utero auroræ tibi ros juventutis tuæ.

4. Juravit Jova, nec poenitebit eum :
« Tu es sacerdos in perpetuum,
secundum rationem Melchisedeci. »

5. O Jova, Dominus (Messias) ad dexteram tuam *adest*,
inde confringit in die iræ suæ reges (hostiles).

6. Judicium exercet inter gentes (afferenda illis clade),
plena est *terra* cadaveribus,
confringit capita in terra ampla (late patent).

7. E rivo in via bibit,
hinc tollit caput.

NOTÆ.

Vers. 1. Usquedum tempus, quod excurrit, in praesenti non spectat, minime vero excludit. — *Baculum*, sceptrum, non gubernantis, sed dominantis. *Impera*, imperativus fidenter promittentis. — Vers. 3. Ita Hengstenberg, ut sensus sit: *Populus tuus*, o Messia, est *spontaneæ Deo oblationes*, *vestibus sanctis* induitus (cf. *Apoc. xix*, 14; *I Petr. iii*, 4; *Col. iii*, 9, 10) *in die triumphi tui* (ascensionis in cœlum); *juventus tua* (id. ac *populus tuus*) pulchra est ut *ros*, qui *ex utero auroræ* oritur. Alius, legendo *imka*: *Tecum* (tuæ) sunt omnes *excellentes in die virtutis tue* (triumphi, puta ascensionis) *in splendoribus sanctitatis* (cœlis); *ex utero ex aurora* (*ex utero auroræ*) *tibi* oritur *ros nativitatis tue*, i. e. *ex sinu Dei* trahis nativitatem pulchram vigentemque, ut rorem. Rationalistæ, *populus tuus*, o Davides, *promptus* (prop. *promptitudines*, abstr. pro concreto) est *die militie tue in ornatu sancto* (festo); *Ex utero auroræ* prodit *tibi ros juventutis tue*, i. e. rori *ex auroræ gremio* prodeunti par multitudine et vigore *tibi* sese offert pubes tua bellica. Tò *in ornatu sancto* alii priori hemistichio, posteriori alii jungunt. Pro *behaderei*, S. Hieronymus cum paucis legit *behaderei*, *in montibus sanctis*. — Vers. 4. *Sacerdos*, in sensu latissimo. Cohen est præcipius minister, quem Turcæ *Vizirum* vocant, cuius ministerio Rex sui regni res omnes administrat, qui regis est mediator, et illius vices gerit: cf. II *Reg. viii*, 8; *I Paral.*, *xviii*, 17. rex Messias igitur a Patre hic constituitur solus mediator Deum inter et creaturas (cf. *I Tim. ii*, 5; *Col. i*, 20; *Ephes. ii*, 18). *Rationem*, iod. parag. *Melchisedecus* rex erat et pontifex: cf. *Gen. xiv*, 18; *Math. xxvi*, 26; *Hebr. passim*. — Vers. 5. Ita factum est; en jam rex Messias, etc. Juxta Rationalistas jam describitur Davidis

pugna et victoria, Jova auxiliante. — Vers. 6. *Plena est terra, propr. plenum est, impers.* Alius, *complet cadavera*, numerum cadaverum; alii, *implet terram cadaveribus*. — Vers. 7. Hengstenberg: Ad Gedeonis factum alluditur. Alius: Rex Messias, antequam a dextris Jovæ sedeat, bibet e torrente (tribulationis) in via hujus vitæ; propterea exaltabitur in cœlis. Schunerrerus et hodiernorum plerique: Cum fatigatus fuerit cœde hostium, tamen haud remittet, sed potu aquæ ex rivo obvio refectus novas vires exseret in hostibus profligandis.

BELLARMINI EXPLANATIO.

PSALMUS CIX.

TITULUS ET ARGUMENTUM.

Psalmus David.

Hic Psalmus celeberrimus est, tum magnitudine mysteriorum, tum obscuritate sententiarum. Sed quamvis excœcati Judæi multa fabulentur, tamen apud Christianos nulla dubitatio est, quin hic Psalmus de Christi regno et sacerdotio intelligatur, ita explicante Spiritu Sancto in multis locis sanctorum Scripturarum, *Matth. xxii; Act. ii; I Corinth. xv; ad Hebr. 1, 5, 7 et 10.*

EXPLICATIO PSALMI.

Vers. 1. 1. DIXIT DOMINUS DOMINO MEO : SEDE A DEXTRIS MEIS.

Vidit in spiritu David Messiam, post mortem et resurrectionem, ascendentem in cœlum, et resert ad nos verba Dei Patris ad Filium, quibus eum invitauit ad conseedendum et corregnandum. «Dixit,» in hebreo est **דָּבַר נָאֵם**, quod proprio significat *dictum*, et conjunctum cum nomine sequenti, verti potuisset, *dictum Domini ad Dominum meum*. Sed sensus est idem, et gratia claritatis verterunt Septuaginta: «Dixit Dominus.» Quamvis autem *dixit* sit temporis præteriti, et tempore Davidis id tempus nondum advenisset, tamen recte utitur David verbo temporis præteriti, quia vidit rem futuram, tanquam præteritam. *Dominus* in hebreo est nomen quatuor litterarum, quod proprio soli Deo vero convenit; quod quamvis a modernis pronuntietur *Iehova*, tamen ab antiquis non solebat pronuntiari; sed loco ejus pronuntiabatur aliud nomen, quod *Dominum* significat. Ita Septuaginta Interpretes ubicumque hoc nomen proprium Dei invenerunt, verterunt *Κύρος*, id est *Dominus*, de qua re scripsimus in exercitatione grammatica ad primum vers. *Psalm. xxxiii.* «Domino meo,» in hebreo est, **לְאֱלֹהִים** *ladoni*, quod proprio *Domino meo* significat; quamvis autem Rabbini per *Dominum* hoc loco intelligent Abraham, ut S. Hieronymus refert in *Commentario* ad cap. *xxxii Matth.*; *mus* de vel Ezechiam, ut resert Justinus in *Dialogo contra Thryphonem*, et Tertullianus lib. V in *Marcionem*: tamen certum est non aliud hoc loco *Dominum* vocari, nisi Messiam, qui fuit filius David secundum carnem, et Dominus David secundum divinitatem: totus enim Psalmus id clamat, cum neque Abraham, neque Ezechias sederint ad dexteram Dei, neque geniti sint ante luciferum, neque sa-

cerdotes fuerint secundum ordinem Melchisedech. Quare Judæi, interrogati a Christo, *Matth. xxii*, quomodo David in spiritu vocet Messiam Dominum suum, non sunt ausi negare Psalmum intelligendum esse de Messia. Cur autem non repetatur hoc loco nomen proprium Dei, non est ratio, quia Filius non sit verus Deus, ut est Pater, ut Ariani docebant, sed quia hic non agitur de Filio Dei simpliciter, sed de Filio Dei incarnato. Filius autem Dei incarnatus in Scripturis passim Dominus appellatur, et Pater Deus, cum simul nominantur; cuius rei ratio est, quia nomen *Domini* convenit Filio secundum utramque naturam, nomen autem *Dei* non convenit ei, nisi ratione naturæ divinæ. Itaque si hoc loco idem nomen tributum fuisset Patri et Filio, suspicari possemus hæc dici Filio tantum, ut Deus est. Quod autem Filius Dei incarnatus, qui etiam Christus dicitur, in Scripturis passim appelletur Dominus et Pater Deus dicatur, perspicuum est ex illo *I Cor. VIII*: «Unus Deus Pater, et unus Dominus Jesus Christus;» et *II Cor. i*: «Gratia vobis, et pax a Deo Patre, et Domino Jesu Christo;» et *ad Ephes. vi*: «Pax fratribus, et charitas cum fide a Deo Patre, et Domino Jesu Christo;» et in ipsis Evangelii, atque Actis Apostolorum, et Epistolis eorumdem Apostolorum, cum ubique Christus dicatur *Dominus*, vix in uno aut altero loco dicitur *Deus*, quia videlicet, ut diximus, nomen Dei convenit Christo solum ratione naturæ naturæ, nomen Domini convenit secundum utramque naturam; unde etiam in Symbolo dicimus: «Credo in Deum, Patrem omnipotentem, et in Jesum Christum Filium ejus unicum, Dominum nostrum.» «Sede a dextris meis.» Sessio quietem et auctoritatem præcipue regiam denotat; hæc autem Christi sessio est ineffabilis quies, et summa regia potestas. Illud autem, q

Car non
dicatur
hic de Fi-
lio no-
men in-
effabile?

dextris meis, significat æqualitatem et consortium regni Dei Patris super omnes creatureas. Quam æqualitatem semper habuit Filius Dei ratione divinæ naturæ, sed ad eam elevatus est ratione naturæ humanæ, post humiliationem usque ad mortem, mortem autem crucis. Sic enim loquitur Apostolus *Philip.* II : « Propter quod et Deus exaltavit illum, et dedit illi nomen, quod est super omne nomen, ut in nomine Jesu omne genu flectatur, cœlestium, terrestrium, et infernorum, et omnis lingua confiteatur, quia Dominus Jesus Christus Christum in gloria est Dei Patris. » Idem enim est esse in sedere ad dexteram Patris quid sit, dextra Dei, et in gloria Dei, hoc est in maiestate Dei; haec autem gloria est, quod habeat nomen super omne nomen, et illi omne genu flectatur; sic etiam *Cor. xv*, ait idem Apostolus : « Oportet illum regnare, donec ponat omnes inimicos sub pedibus ejus, » ubi explicat Apostolus illud, *sede a dextris meis*; ut idem sit, quod regna mecum, donec ponam, etc. Idem quoque Apostolus *ad Hebr. i* : « Cui dixit angelorum : Sede a dextris meis? nonne omnes sunt administratorii spiritus in ministerium missi? » etc. Ubi per *sedere a dextris Dei* significatur differentia inter Christum et angelos; quod isti sint ministri et servi, et ideo non sedeant, sed mittantur in ministerium: Christus autem, ut Rex et Dominus, sedeat cum Patre, creaturis omnibus superior. Denique *S. Petrus Act. ii* : « Dextera, inquit, Dei exaltatus effudit hoc donum, quod vos videtis et auditis; non enim David ascendit in cœlum: dicit autem ipse: Dixit Dominus Domino meo: Sede a dextris meis, donec ponam inimicos tuos scabellum pedum tuorum. Certissime sciat ergo omnis domus Israel, quia et Dominum et Christum fecit Deus hunc Jesum, quem vos crucifixistis. » Ubi *S. Petrus docet*; *sedere a dextris Dei* esse *ascendisse in cœlum*, dominari et regnare ubique, ut dominatur et regnat Deus.

Vers. 2. **2. DONEC PONAM INIMICOS TUOS SCABELLUM PEDUM TUORUM.**

Hic versiculus continuatur cum primo apud *Hebreos*, juxta Rabbinorum distinctiones; sed Septuaginta Interpretes, qui Rabbinos omnes præcesserunt, novum versiculum esse debere judicarunt. Significat autem his verbis Prophetæ, regnum Christi nunquam finendum, neque periculum esse, ut ab inimicis evertatur, cum Deus statuerit paulatim omnes omnino inimicos illi subjicere, ut pacifice postea duret in æternum. Itaque illud, *donec*, non significat Christum non amplius sessurum, ubi fuerint omnes hostes debellati, sed significat Christi regnum semper propagandum magis et magis, donec nullus omnino supersit inimicus, qui illi genua non flectat, quasi dicat: Perge regnare mecum, nec desistas propagare regnum, donec omnes hostes debellantur. Porro semper ista propagatio quotidie impletur, dum alii conpropagantur ad fidem et obedientiam, et sponte sub-

jiciuntur pedibus Christi, ut in eis, tanquam in scabello quiescat, et tandem finito exilio pergunt ad patriam, ubi feliciter sub Deo requiescent; alii vel pervertuntur, vel in perversitate perdurant, et tandem per mortem ad judicium rapiuntur, et damnati ad inferos detruduntur, ubi Christi pedibus perpetuo comprimuntur. In novissimo die propagatio complebitur, et tum Christo flectetur omne genu, cœlestium, terrestrium et infernorum. At cur dicit Pater, « donec ponam? » nonne etiam Filius ponit inimicos suos scabellum pedum suorum? Omnino quod Pater operatur, etiam Filius operatur, ut ipsem asserit; sed tribuitur haec actio Patri, quia per eam redditur merces obedientiae Filii, ut paulo ante Apostolum dicentem audivimus: « Propter quod et Deus exaltavit illum. » Praeterea omnis actio, quæ ad potentiam pertinet, Patri solet tribui, quamvis etiam Filio sit communis, quoniam a Patre Filio communicatur, non Patri a Filio, et Filio quidem, ut Deus est, communicatur per generationem; eidem Filio, ut homo est, communicatur per gratiam hypostaticæ unionis. Quod autem Filius Patri cooperetur in hac actione subjiciendi communes hostes, dicitur in sequenti versiculo.

3. **VIRGAM VIRTUTIS TUÆ EMITTET DOMINUS EX SION : DOMINARE IN MEDIO INIMICORUM TUORUM.**

Propheta David cum in spiritu audivisset Patrem loquentem ad Filium, ac dicentem: « Sede a dextris meis, donec ponam inimicos tuos scabellum pedum tuorum, » convertit se ad Filium, et eodem spiritu revelante demonstrat unde incipienda esset propagatio regni Christi in terris. « Virgam, inquit, virtutis tuæ emittet Dominus ex Sion, » id est, Dominus Pater, ut ponat inimicos tuos scabellum pedum tuorum, sceptrum regalis potentiae tuæ ex civitate Jerusalem, et ex ipso monte Sion extendere incipiet, et propagabit usque ad ultimum terræ. Concordat cum hac prophetia verbum Domini, *Luc. xxiv*: « Oportebat Christum pati et resurgere a mortuis tertia die, et prædicari in nomine ejus penitentiam, et remissionem peccatorum in omnes gentes, incipientibus ab Hierosolyma; » et *Act. i*: « Eritis mihi testes in Jerusalem, et in omni Iudea et Samaria, et usque ad ultimum terræ. » Virga hoc loco sceptrum significat, et per sceptrum intelligitur regalis potestas: per virtutem autem significatur robur et fortitudo, ut clarius habetur in textu originali. Itaque virga virtutis est sceptrum potentiae; dicitur autem haec virga emittenda ex Sion, quasi ex monte illo germinaverit, quoniam in Jerusalem coepit regnum Christi spirituale; ibi enim fuerunt primi credentes, et ibi coepit propagatio fidei per Apostolos. « Dominare in medio inimicorum tuorum, » est quasi fausta acclamatio et exhortatio ad propagandum imperium per omnes gentes, quasi dicat: Tu igitur perge feliciter, infer vexillum crucis tuæ in medium paganorum et Iudeorum, ubi sunt Regni Christi spiritus in Iudeo salem

confertissimi hostes tui, ibique in medio eorum dominare, id est, illis invitatis et repugnantibus regnum tuum constitue. Quod certe brevi factum videmus: nam intra paucos annos, frustra Judaeis et paganis reluctantibus, Ecclesiae Christi in toto orbe terrarum constitutae fuerunt. Scribit enim Apostolus ad Coloss. I: « Evangelium in universo mundo est, et crescit, et fructificat; » et S. Irenaeus vicinus Apostolicis temporibus, lib. I, cap. II: Ecclesia, inquit, per universum orbem usque ad fines terrae seminata est; et cap. III, meminit Ecclesiarum Germaniae, Iberorum, Libyae, Aegypti, Galliarum, Orientis, et earum quae in medio mundi erant, per quas intelligit Ecclesias Graeciae et Italiae. Recte autem dicit Psalmus, « in medio inimicorum, tuorum, » quia quantumlibet Ecclesia propagetur et crescat, semper erit in medio inimicorum, id est, Judaeorum, paganorum, hereticorum, et falsorum christianorum, dum in terris peregrinatur. Sed in consummatione saeculi fiet separatio bonorum a malis, et non erit amplius regnum Christi in medio inimicorum suorum, sed eminebit et exaltabitur super omnes inimicos suos.

Vers. 4. 4. TECUM PRINCIPIUM IN DIE VIRTUTIS TUÆ, IN SPLENDORIBUS SANCTORUM, EX UTERO ANTE LUCIFERUM GENUI TE.

Dixerat: « Dominare in medio inimicorum tuorum, » quod intelligitur in hoc tempore, dum regnum Christi ab inimicis oppugnatur: declarat nunc quid erit in novissimo die, quando omnes inimici subjecti erunt, ut seabellum pedibus ejus. « Tecum, inquit, principium in die virtutis tuæ, » id est, tecum erit principatus manifestus, tunc apparebit omnibus tuum esse regnum, et apud te solum esse verum principatum. « In die virtutis tuæ, » in die videlicet novissimo, quando potentia tua cœlum movebit, solem obscurabit, terram concutiet, mortuos excitabit, et omnes ad tribunal tuum adducet. « In splendoribus sanctorum, » id est, quando circumdatus eris sanctis tuis, qui omnes fulgebunt sicut sol. « Ex utero ante luciferum genui te, » id est, ideo tecum erit tantus principatus, quia ego Deus Pater omnipotens « genui te » non ex nihilo, ut res creatas, sed « ex utero » meo, ut filium verum, naturalem et consubstantiale, idque « ante luciferum, » id est, antequam stellas crearem, ante omnem creaturam, ante omnia saecula. Hæc est communis expositio Patrum, Hieronymi, Chrysostomi, Augustini, Theodoreti et Euthymii. Sed consideremus singula verba. *Tecum*: ex hebreo S. Hieronymus vertit, *populus tuus*. Sed verbum hebreum potest legi *hammecha*, et significat, *populus tuus*; potest etiam legi *khimmecha*, et significat *tecum*, et sic legerunt Septuaginta Interpretes, et recte verterunt, *principium*: in hebreo est *גְּדוֹלָה*, quod proprie significat *principes*; sed Septuaginta videntur legisse *נֶבֶת*, *principatus*, et sic exponit

S. Chrysostomus hoc loco vocem græcam *ἀρχὴν*, quæ et *principium*, et *principatum* significare potest. Quod si placeat non accipere principium pro principatu, sed simpliciter pro principio, exponere poterimus: *Tecum principium*, id est, tecum est principium primum omnium rerum, quia tu es in Patre, et Pater in te. Sed prior expositio videtur preferenda, ut magis consentanea textui hebraico. *In die virtutis tuæ*: in his verbis nulla est discrepantia inter codices, nisi quod in hebraico per *virtutem* significatur proprie fortitudo et potentia. *In splendoribus sanctorum*; in hebraico legitur, *in montibus sanctitatis*. Sed videntur Septuaginta Interpretes non legisse *רַאשָׁה*, per *ר*, quod significat *montes*, sed *רַאשָׁה*, per *ר*, quod significat *splendores*. Idem autem est, *in splendoribus sanctitatis*, et *in splendoribus sanctorum*, dici siquidem possunt sancti homines *splendores sanctitatis*, quia sanctitas in eis resplendet. *Ex utero*; ex hoc verbo probant Sancti Patres efficacissime Christi divinitatem: nam si Christus creatura esset, non posset dici genitus ex utero: nemo enim dicit se genuisse ex utero domum, vel scamnum, vel aliud quidpiam ex arte factum: neque Deus unquam dixit se genuisse ex utero cœlum, aut terram. Porro per uterum intelligitur essentia Dei secreta et intima; et quamvis uterus proprie ad matrem, non ad patrem pertineat, recte tamen Deus Pater dicitur ex utero genuisse, tum ut clarius ostendatur Filius consubstantialis Genitori: clarus enim filius est ex substantia matris, quam ex substantia patris; tum quia Deus non opus habuit uxore ad filium gignendum et pariendum. Ipse enim genuit, ipse peperit, unde dicit Isaia cap. ult.: « Numquid ego, qui alios parere facio, ipse non pariam? » *Ante luciferum*; hinc significatur æternitas Filii, qui genitus fuit ante luciferi creationem, ac per hoc ante omnes creature. Sed posuit nomen luciferi, quoniam ipse etiam filius Dei, est quidam lucifer increatus. Est enim lux vera, que illuminat omnem hominem et omnem angelum. In hebreo habetur *בָּרָא*, quod S. Hieronymus vertit, *ex aurora*. Sed potest etiam verti, *præ aurora*, id est ante auroram. Septuaginta Interpretes posuerunt *luciferum* pro *aurora*, sive quia cum aurora solet oriri lucifer, sive quia ipsa aurora etiam est lucifer; quare S. Hieronymus Job. XI, 12, vertit, *orientis ut lucifer*, cum tamen in hebreo sit *mane*; itaque *luciferum* accipit pro *mane*, sive pro *aurora*. *Genui te*: in hebreo nunc legitur, *tibi ros nativitatis tuæ*. Sed Septuaginta non habuerunt illa duo vocabula, *tibi ros*; et pro *nativitatis tuæ*, legerunt, *genui te*, quia verba hebraica mutatis punctis utroque modo legi possunt, *גְּדוֹלָה*, id est *nativitatis tuæ*, *נֶבֶת*, id est *genui te*. Potest etiam fieri ut Septuaginta Interpretes legerint, *tibi ros nativitatis tuæ*, sed verba obscura declarare voluerint per suam versionem; et ideo dixerint, *genui te*. Id enim obscure significant illa verba, *ex utero ante luciferum tibi ros nativitatis tuæ*, id est, *ex utero ante luciferum fuit*

Christi
divinitas
unde
proba-
tur?

tibi nativitas ex me, ut est rori ex cœlo. S. Augustinus addit aliam expositionem minus principalem, quod videlicet David Christo filio suo secundum carnem dicat : Ego genui te ex utero Virginis Mariæ, filiæ meæ, antequam lucifer oriretur, id est, media nocte. Tertullianus quoque, lib. V in *Marcionem* exponit de partu Virginis, sed tribuit Deo illud, *genut te*, hoc modo : Ego, Deus Pater, genui te ex utero Virginis, nocturno tempore antequam lucifer oriretur.

Vers. 5. 5. JURAVIT DOMINUS, ET NON PÆNITEBIT EUM:
TU ES SACERDOS IN ÆTERNUM SECUNDUM ORDINEM
MELCHISEDECH.

Transit nunc a dignitate regia ad sacerdotalem, atque ostendit Christum esse sacerdotem æternum, non succedentem Aaroni, sed immediate a Deo institutum, cuius figura fuerat sacerdotium Melchisedech. *Juravit Dominus, et non pœnitabit eum :* Juramentum Dei promissionis stabilimentum est, id quod declaravit addens : « Et non pœnitabit eum, » id est, firmissime statuit, nunquam mutaturus : significat enim David his verbis, sacerdotium Aaronicum fuisse mutandum, sed sacerdotium Christi nunquam esse mutandum. *Poenitentia enim Dei dicitur per metaphoram*, cum Deus facit id quod faciunt homines, cum eos pœnitet facti ; mutant enim quod eos fecisse pœnit, sic

Christus Gen. vi. dicit Deus : « Delebo hominem, quem quomodo sacerdos in æternum ? creavi, a facie terræ, ab homine usque ad animantia ; pœnitet enim me fecisse eos ; » etc.

I Reg. xv : « Pœnitet me (ait Deus) quod constituerim regem Saul. » *Tu es sacerdos in æternum* : dicuntur hæc a Deo, non a Davide : *Apostolus enim ad Hebr. v.*, non semel repetit haec esse verba Patris ad Filium ; dicitur autem Christus sacerdos in æternum, tum quia effectus unici sacrificii, quo corpus suum obtulit in cruce, manet in æternum, juxta illud Apostoli *ad Hebr. x* : « Una oblatione consumavit in sempiternum sanctificatos ; » tum quia vivens ipse in æternum, sacrificium quotidie offert per manus ministrorum sibi invicem in Ecclesia succendentium, quod idem Apostolus *ad Hebr. vii*, confirmat, dicens : « Et alii quidem plures facti sunt sacerdotes, idcirco quod morte prohiberentur permanere ; hic autem eo quod maneat in æternum, sempiternum habet sacerdotium. » *Secundum ordinem Melchisedech* ; per *ordinem* intelligitur ritus, lex, traditio, consuetudo : hæc enim significat vox hebraica *דָבָרְתָה* ; opponitur autem ordo Melchisedech ordini Aaron secundum *Apostolum ad Hebr. vii*. Distinguitur vero ordo Melchisedech ab ordine Aaron in multis : *primo*, Melchisedech non legitur successisse alteri, neque ei successisse alter legitur ; nam ideo dicitur « sine patre, sine matre, sine genealogia, neque initium dierum, neque finem vita habens, » ut dicitur *ad Hebr. vii*. In sacerdotio autem Aaronis unus alteri succedebat, quia singuli moriendo sacerdotium filii relinquebant. *Secundo*, Melchisedech

erat sacerdos et rex ; Aaron, simplex sacerdos. *Tertio*, Melchisedech obtulit panem et vinum ; Aaron, oves et boves. *Quarto*, Melchisedech erat sacerdos universalis, non unius gentis tantum ; Aaron erat sacerdos duntaxat Hebreorum. *Quinto*, Melchisedech non egebat tabernaculo, Christ sacer secundum dñm dñner Melch sede

vel templo ad sacrificandum ; Aaron egebat, et ideo nunc apud Hebreos cessavit sacrificium, quia eversum est templum. Christus igitur sacerdos est secundum ordinem Melchisedech, quia revera nulli successit, neque alias ei successit in amplissima dignitate sempiterni sacerdotii ; et ipse vere ac proprie non habet patrem, ut homo, neque matrem, ut Deus ; idem Christus rex est et sacerdos, et obtulit panem et vinum in cœna, id est, corpus suum sub specie panis, et sanguinem suum in specie vini, et non est sacerdos Hebreorum tantum, sed Hebreorum et gentium ; neque alligatur sacerdotium ejus uni templo, vel tabernaculo, sed, ut prædictum Malachias cap. I, « a solis duntu ortu usque ad occasum in omni loco sacrificatur et offertur oblatio munda. » Ex his locis aperte convincitur hæresis Lutheranorum, qui negant sacrificium verum propriè dictum extare in Ecclesia Dei ; vel ostendunt Lutherani, si possunt, quomodo predictio sit adimpta de sacerdotio secundum ordinem Melchisedech instituendo, et nunquam mutando.

6. DOMINUS A DEXTRIS TUIS, CONFREGIT IN DIE Vers. (Irae sulæ reges.

S. Joannes Chrysostomus, quem Græci sequuntur, per *Dominum* hoc loco intelligit Patrem ; S. Augustinus intelligit Filium, S. Hieronymus dicit quidem *Dominum* hoc loco nominatum esse Patrem ; tamen statim addit illum, qui « confregit reges, judicabit in nationibus, implebit ruinas, et bibet de torrente, » esse Filium. Videtur autem nobis sententia S. Augustini esse aptior et facilior ; non enim debet rationem reddere, quomodo Pater sit a dextris Filii, cum paulo ante dictum sit Filium sedere a dextris Patris, neque quomodo Pater de torrente biberit, et caput exaltaverit. Denique melius continuatur contextus verborum Prophetæ, si expositionem S. Augustini sequamur. Igitur Prophetæ, posteaquam dixerat Filium a Patre sacerdotem æternum appellatum fuisse, convertit sermonem ad Patrem, ac dicit Christum vere fore sacerdotem æternum, quoniam etiamsi multi reges terre conspirabunt, ut sacerdotium totamque ejus religionem evertant : ipse tamen sedens a dextris Patris confringet reges adversarios, et illis omnibus invitis sacerdotium et sacra sua perpetuabit. « Dominus a dextris tuis, » id est, Christus a dextris tuis sedens, sicut illi dixisti : Sede a dextris meis, « confregit in die iræ suæ reges, » id est, in die qua irascetur inimicis suis, regibus terræ, Ecclesiam suam consequentibus, confringet eos, et jam in prænotione mea confredit ; jam enim prævideo, per spiritum prophetæ

Iamini Christi omnes male perierunt. Herodem ab Angelo percussum, Neronem destitutum, sibi manus injecisse; Domitianum, Maximum, Decium, et cæteros interfectos; Valerianum captivum in manus Barbarorum devenisse; Diocletianum et Maximianum præ desperatione imperium deposuisse; Julianum, Valentem, Humericum, et omnes denique inimicos reges misere periisse, atque in gehennam detrusos meritas pœnas dare.

Vers. 7. 7. JUDICABIT IN NATIONIBUS, IMPLEBIT RUINAS, CONQUASSABIT CAPITA IN TERRA MULTORUM.

Dixit quid faciet Christus in præsenti tempore adversus hostes suos, reges et principes terræ: nunc addit quid faciet in die novissimo adversus omnes inimicos suos: «Judicabit, inquit, in nationibus, » id est, is qui hoc tempore confregit imperium regum, et conservavit Ecclesiam suam tempore persecutionum, postea in fine sæculi «judicabit omnes nationes, » sive judicium exercebit in nationibus omnibus; et condemnatis omnibus impiis, «implebit ruinas, » id est, consummabit ultimum exterminium, complementum ruinæ impiorum perficiet. Ex hebræo S. Hieronymus legit, *implebit foveas*, quod etiam est verum, quia tunc implebuntur foveæ inferorum, omnibus malis hominibus et dæmonibus eo detrusis et conclusis: et hoc modo «conquassabit capita in terra multorum, » id est, humiliabit et conteret omnes superbos, qui nunc erecto capite adversus eum incedunt, tunc enim conculebit superbiam eorum, cum coram toto mundo ostendet infirmitatem eorum, et contemptibiles atque confusos efficiet: et hoc erit conquassare et conterere capita eorum. Dicit autem, «in terra multorum, » quia in terra paucissimi inveniuntur veri humiles et pii, respectu superborum et impiorum, qui prope infiniti sunt. In hebræo habetur, *in terra multa*, id est, in magna parte terræ; sed idem est sensus, sive quis dicat superbos multos inveniri in terra, sive superbos occupare multum terræ. S. Augustinus exponit haec omnia de præsenti tempore, et in bonam partem, ut *implere ruinas*, sit instaurare quod cecidit, et *conquassare capita* sit humiliare ad salutem per contritionem, quæ pia est et utilis expositio, sed mystica: nam ad litteram exponunt de ultimo judicio Theodoretus, Euthymius, et alii communiter.

8. DE TORRENTE IN VIA BIBET, PROPTEREA Vers. 8.
EXALTABIT CAPUT.

Hunc ultimum versiculum exponunt magno consensu omnes veteres de Christi humilitate in carne mortali, et exaltatione in gloria cœlesti, tum illi qui verba superiora exponunt de ipso Christo, tum qui exponunt de Patre. Quare mirum est aliquos recentiores aliter sensisse. Reddit igitur David rationem cur tanta sit Christi potentia, ut reges confringere, nationes judicare, implere ruinas, et conquassare capita possit; et dicit: « De torrente in via bibet, propterea exaltabit caput, » ac si diceret cum Apostolo: « Humiliavit semetipsum factus obediens usque ad mortem, mortem autem crucis, propter quod et Deus exaltavit illum, et dedit illi nomen, quod est super omne nomen. »

Christus proper humilitatem suam exaltatus.

Torrentem appellat cursum rerum humanarum: quomodo enim torrens magno impetu et sonitu fluit, et turbidus, ac turbatus incedit, et paulo post cessat, et ne vestigium quidem sui relinquit: sic sunt res humanæ tempore hujus mortalitatis; transeunt enim omnia, et ut plurimum turbida, et turbata: audiuntur sæpe maxima prælia, et turbations gentium et populorum, ut tempore Alexandri Magni, et postea Cæsaris, et aliorum similium. Sed paulo post finem accipiunt tum ipsi, tum posteri eorum, et vix inveniuntur vestigia potentiae ipsorum. Ad hunc torrentem descendit Filius Dei per incarnationem suam, « et in via, » id est, in spacio vitæ suæ mortalæ et transeuntis, « babit aquam » turbidam hujus « torrentis, » per tulit ærumnas nostræ mortalitatis, imo etiam in profundum torrentis descendit per passionem, ita ut non biberit aquam ad refrigerium et delectationem, sed biberit molestissimam aquam, ut illi faciunt, qui demerguntur in aquis, juxta illud Psalm. LXVIII: « Intraverunt aquæ usque ad animam meam. Infixus sum in limo profundi, et non est substantia: veni in altitudinem maris, et tempestas demersit me. » Merito igitur hujus tantæ humiliationis sponte susceptæ pro gloria Patris, et salute generis humani, exaltavit postea *caput suum*, ascendens cœlum, et sedens ad dexteram Patris, constitutus judex vivorum et mortuorum. Aliqui legunt in præterito, *babit*; sed textus hebraicus et græcus habent in futuro, *bibet*: proinde nostra communis lectio cum textibus originalibus concordat.

PSALMUS CXI

SECUNDUM HEBRÆOS.

V. v. — *Alleluia.*

1. Confitebor tibi, Domine, in toto corde meo, in consilio justorum, et congregatiōne.

II.

V. s. H.

Aleph. Confitebor tibi Domino in toto corde:

Beth. In consilio justorum [h. rectorum] et congregatione.

2. Magna opera Domini : exquisita in omnes voluntates ejus.

3. Confessio et magnificentia opus ejus, et justitia ejus manet in sæculum sæculi.

4. Memoriam fecit mirabilium suorum, misericors et miserator Dominus :

5. Escam dedit timentibus se.

Memor erit in sæculum testamenti sui.

6. Virtutem operum suorum annuntiabit populo suo.

7. Ut det illis hæreditatem gentium : opera manuum ejus, veritas et judicium.

8. Fidelia omnia mandata ejus, confirmata in sæculum sæculi, facta in veritate et æquitate.

9. Redemptionem misit populo suo : mandavit in æternum testamentum suum.

Sanctum et terribile nomen ejus.

10. Initium sapientiæ timor Domini.

Intellexus bonus omnibus facientibus eum : laudatio ejus manet in sæculum sæculi.

Gimel. Magna opera Domini :

Daleth. Exquirenda cunctis volentibus eum.

He. Gloria et decor opus ejus :

Vau. Et justitia ejus perseverans semper.

Zain. Memoriam fecit mirabilium suorum :

Heth. Clemens et misericors Dominus [al. Deus].

Teth. Escam dedit timentibus se.

Jod. Memor erit in sempiternum [*h. sæculum*] pacti sui.

Chaph. Fortitudinem operum suorum annuntiabit populo suo,

Lamed. Ut det eis hæreditatem gentium.

Mem. Opus manuum ejus veritas et judicium.

Nun. Fidelia omnia præcepta ejus,

Samech. Firmata in sempiternum [*h. sæculum*] jugiter :

Ain. Facta in veritate et æquitate.

Phe. Redemptionem misit populo suo.

Sade. Mandavit in æternum [*h. sæculum*] pactum suum :

Coph. Sanctum et terribile nomen ejus.

Res. Principium sapientiæ timor Domini.

Sin. Doctrina [*h. eruditio*] bona cunctis facientibus ea.

Thav. Laus ejus perseverat jugiter.

Argumentum. — Celebrantur beneficia in majores potissimum collata a Jova. Ordine alphabetico hic Psalmus conscriptus est, sed ita, ut in singulis versibus binæ reperiatur litteræ, in duobus postremis ternæ. Strophæ vix comparent, vel tot sunt, quot versiculi.

« Est hic Psalmus ex eorum numero, qui ab *Hallelu-iah* incipiunt, quorum *decem* sunt numero (*Ps. cvi, cxi-cxii, cxv-cxviii*), quemadmodum *quinq̄ue* ita finiunt (*civ seq. cxv-cxvii*). Ex quibus utrisque sex, *Ps. cxiii-cxviii, magnum Hallel* Hebreis dicti fuerunt. Horum usus in omnibus quidem festis, præcipue tamen in solemnibus Paschæ et Tabernaculorum fuit, ita ut *Ps. cxiii et cxiv* ante Paschalem coenam, sequentes vero Psalmi, *cxv-cxviii*, post eamdem cantati fuerint. Hisce vero hymnis proœmii loco nonnunquam præmissi putantur Psalmus noster et *cxi*. » Rosenmullerus.

1. Laudate Jovam.

Celebrem Jovam toto animo,
in consessu proborum (Israelitarum) atque cœtu.

2. Magna sunt opera Jovæ,

exquisita secundum omnia desideria eorum (rectorum).

3. Splendor et gloria (splendidum et gloriosum) est opus ejus, et justitia ejus stat in æternum.

4. Memoriam fecit mirabilibus suis, misericors et benignus est Jova.

5. Escam (manna) dedit cultoribus suis (in deserto), memor est in sæculum fœderis sui.

6. Potentiam operum suorum notam fecit populo suo, dando illis hæreditatem (peculium) gentium (Cananæarum).

7. Opera manuum ejus sunt integritas et jus, firma omnia mandata ejus,

8. Suffulta (immota) in æternum, in sæculum,
facta in vero et recto.
9. Redempcionem (a servitute Ægyptiaca) misit populo suo,
sancivit in æternum fœdus suum,
sanctum et terribile *est* nomen ejus.
10. Initium (et summa) sapientiae *est* timor (pietas) Jovæ,
adeoque intelligentia bona (recta) *est* omnibus facientibus ea (Jovæ mandata).
Laus ejus (Jovæ) manet in æternum.

NOTÆ.

Vers. 1 Aben-Esra observat, *cætum* oppositum esse *consessui*, qui conventus est secretior, ut sensus sit: clam et palam. Quam distinctionem Maurer silet, Hengstenberg rejicit. — Vers. 2. Maurer, *exoptata quoad*, etc. i. e. ejusmodi sunt, qualia optare Jovæ cultores possunt. — Vers. 4. *Memoriam*, etc. i. e. res fecit memoratu dignas, quarum fama nunquam intereat. — Vers. 10. Alius, *maneat*, ut doxologia sit, τῷ *Hallelu-Iah* exordii respondens.

BELLARMINI EXPLANATIO.

PSALMUS CX.

TITULUS ET ARGUMENTUM.

Alleluia.

Hic Psalmus, ut etiam multi sequentes, nihil habet in titulo, nisi *alleluia*, quod significat: *Laudate Dominum;* ex quo intelligimus argumentum Psalmi esse laudationem Dei. Notat S. Hieronymus hunc esse primum Psalmus perfecte alphabeticum; nam Psalmus **xxiv**, **xxxiii** et **xxxv**, alphabetici sunt, sed non perfecte, quia in eis aliqua littera deest, et ejus loco altera ponitur. Psalmus etiam **xxxviii** alphabeticus est, sed non ita perfecte, ut hic qui nunc est in manibus: nam in illo sub una littera modo ponitur unus versiculos, modo duo, modo tres: in hoc autem Psalmo tot sunt parvi versiculi, quot sunt litteræ alphabeticæ. Itaque Psalmus continet viginti duos versiculos, quales sunt apud Latinos versiculi iambici, et apud Italos versiculi septem syllabarum. Sed Septuaginta Interpretes magis ad sententias, et ad similitudinem aliorum Psalmorum, quam ad litteras respicientes, partiti sunt Psalmum in decem versus.

EXPLICATIO PSALMI.

Aleph. CONFITEBOR TIBI, DOMINE, IN TOTO CORDE MEO,

Beth. IN CONSILIO JUSTORUM, ET CONGREGATIONE.

David sanctus incipit hymnum ab invocatione, et simul explicat modum, quo utiliter laudari debet Deus. « Confitebor tibi, Domine, » id est, laudabo, sive confessionem laudis offeram tibi. « In toto corde meo, » hæc est conditio bonæ laudationis, ut non fiat solum voce, sed etiam corde: et non solum corde, sed toto corde, id est, toto affectu, nihil magis vel æque diligendo et laudando. Est etiam, « toto corde, » summa attentione, nihil aliud cogitando: indignum est enim versantem in laude omnipotentis Dei, quem Cherubim et Seraphim cum tremore adorant, mentem ad inferiora deflectere. « In consilio justorum, et congregatione, » id est, laudabo te toto corde, tum inter paucos justos, tum in cœtu mul-torum, et eorum promiscua multitudinē: nam

per consilium justorum videtur intelligentius locus secretus, ubi soli conveniunt sapientes ad consilium. Vox enim hebraica **TID** *secretum* significat, sive *consilium*, quod secretum requirat. Vox autem **TTY** *synagogam* significat, sive *congregatio-nem*, ad quam totus populus venire solebat.

Ghimel. MAGNA OPERA DOMINI.

Daleth. EXQUISITA IN OMNES VOLUNTATES EJUS.

Laudat primum ab operibus in communi, quod videlicet Deus laude dignus sit, quod omnia opera ejus magna sint, et quod sint ita perfecta, ut ad omnem usum Deo serviant. Magna laus, quod artifex non faciat alia opera magna; alia parva, alia pretiosa, alia vilia, sed quod omnia omnino, **Magna Dei laus ei sua operibus.** quæ ab ejus ingenio, vel manu prodeunt, magna sint. Talia esse opera Dei certe cognoscet, qui co-gitabit in omnibus, etiamsi nobis præ multititudine viluerint, infinitam Dei potentiam et sapientiam elucere, et nullum a nobis perfectly comprehendendi. Vere enim scripsit Ecclesiastes cap. I: « Cunctæ

res difficiles, non valet homo eas explicare sermone; » et cap. viii: « Intellexi, quod omnium operum Dei, nullam possit homo invenire rationem. » Neque solum magna sunt opera, sed « exquisita in omnes voluntates ejus, » id est, quæsita et parata in omnem usum Deo placitum, ut Deus de illis faciat quidquid voluerit, juxta illud *Psalm. cxviii*: « Quoniam omnia serviunt tibi; » nam, ut S. Augustinus recte disputat, nihil est quod magis Dei voluntati repugnare videatur, quam liberum arbitrium; quo fiunt peccata, quæ Deus prohibet: et tamen de ipso libero arbitrio Deus facit, quod vult; vel enim reformat illud per gratiam, vel punit per justitiam, et nisi ipse permetteret, liberum arbitrium non peccaret. Praeclarissima laus, et soli Deo propria, facere opera, qui in omnem usum queri, aptari et accommodari possint, et de quibus Deus quidquid velit, possit efficere. Vide *Commentarium* S. Joannis Chrysostomi, qui hæc omnia mira eloquentia tractat, descendens ad singula opera Dei. In hebreo habetur in numero multitudinis, *exquisita in omnes voluntates eorum*; sed fortasse Septuaginta aliter legerunt, vel certe ad insinuandam Trinitatem divinarum personarum in una essentia dicitur, positum est pronomen in numero multitudinis, cum nomine Domini numeri singularis.

He. CONFESSIO, ET MAGNIFICENTIA OPUS EJUS:
Vau. ET JUSTITIA EJUS MANET IN SÆCULUM SÆCULI.

Transit nunc Propheta ab opere creationis ad opus gubernationis, et ostendit hoc etiam opus omni laude esse dignissimum. « Confessio, inquit, et magnificentia opus ejus, » id est, operatio ejus, qua regit et gubernat mundum a se creatum, est confessio, id est, materia confessionis, laudis et gratiarum actionis, et etiam materia magnificentiae sua omnibus declaranda. Simili modo loquitur Sapiens, cum ait: « Gloria filiorum patres eorum, » *Prov. cap. xvii.* Et: « Dedeceus filii pater sine honore, » *Ecli. iii.* Hic enim accipitur *gloria*, vel *dedeceus* pro materia gloriæ, vel *dedecoris*. « Et justitia ejus manet in sæculum sæculi, » id est, non solum Deus magnifice gubernando operatur, quia prospicit omnibus abundanter, sed etiam justissime, ut nunquam magnificentia ejus a justitia disjuncta inveniatur; semper enim Deus servat promissa, et nulli facit injuriam. Id quod videtur præcipue additum propter vulgarem illam querimoniam, cur Deus sinit impios exaltari, et pios ærumnis et calamitatibus premi? Judicia enim Dei occulta esse possunt, injusta esse non possunt. Quantumvis igitur nobis aliter videatur, semper tamen opera Dei justa sunt et omni laude digna.

Zain. MEMORIAM FECIT MIRABILIA STORUM,
Cheth. MISERICORS ET MISERATOR DOMINUS.

Descendit ad particulare quoddam opus provi-

dentiæ divinæ, quando videlicet pluit manna de cœlo, quod fuit opus magnæ misericordiæ, non solum praesentibus, quos aluit in deserto, sed etiam posteris, quibus reliquit urnam manna plenam in memoriam miraculorum quæ patraverat in deserto. Sic enim habetur *Exod. vii*, et *ad Hebr. ix.* Manna vero illud figura fuit Sacramenti Eucharistie, quod datum est populo christiano in cibum spiritalem, et in memoriam mirabilium quæ operatus est Christus in terris, quorum præstantissimum est gloriosa passio, quæ mortem nostram moriendo destruxit, et de principe hujus mundi triumphavit. Ait igitur: « Memoriam fecit mirabilium suorum misericors et miserator Dominus. » Misericors et miserator distingui videntur apud Latinos, quod misericors ad habitum, miserator ad actum pertineat; sed in hebraico textu differunt in eo quod זרנְהַנְנָה significat simpliciter *misericordem*, מִשְׁרָךְ addit affectum paternum ac tenerum, qualis est patris in filium. Itaque *misericus* et *miserator*, hoc loco significant, misericors et paternus misericors.

Teth. ESCAM DEDIT TIMENTIBUS SE.

Iod. MÉMOR ERIT IN SÆCULUM TESTAMENTI SUI.

Hæc esca est manna, « quod Deus pluit de cœlo, et dedit timentibus se, » id est, cultoribus suis Hebreis: quamvis enim plurimi in eo populo peccatores essent, tamen Deum verum colebant; nam *timere Deum* in Scripturis colere significat. Et sicut volebat ut populus memor esset mirabilium suorum, quæ fecit quando eduxit populum de Ægypto, et per desertum in terram promissionis introduxit: ita vicissim promittebat se memorem futurum pacti sui, quod cum illis inierat: ideo addit: « Memor erit in sæculum testamenti sui, » id est, ostendet continua providentia et protectione se memorem esse foederis et promissorum suorum.

Caph. VIRTUTEM OPERUM SUORUM ANNUNTIABIT POPULO SUO.

Lamed. UT DET ILLIS HÆRESTITATEM GENTIUM.

Præcipuum caput foederis, quod cum Abraham pepigit Deus, fuit ut daret posteris ejus Hebreis terram Chananæorum, quæ ideo postea dicta est terra promissionis. Explicat igitur quomodo « memor erit testamenti sui, » dicens: « Virtutem operum suorum annuntiabit populo suo, » id est, memor pacti sui notam faciet populo suo virtutem, hoc est, potentiam et fortitudinem operum suorum, convertendo Jordanem retrorsum, clangore tubarum evertendo muros Hiericho, sistendo solem et lunam ad imperium Josue, lapides de cœlo super hostes Hebreorum pluendo, et similia multa miraculia operando. « Ut det illis hæreditatem gentium, » id est, ut daret illis fidelibus suis terram Palæstinæ, quam gentiles Chananæi tanquam propriam hæreditatem et possessionem obtinebant.

Mem. OPERA MANUM EJUS VERITAS ET JUDICIUM.

Nun. FIDELIA OMNIA MANDATA EJUS:

Samech. CONFIRMATA IN SÆCULUM SÆCULI:

Hain. FACTA IN VERITATE ET AÉQUITATE.

Ac ne quis injustitiam suspicaretur in eo quod Deus terram Palæstinæ abstulit Chananæis, et donavit Judæis, addit : « Opera manuum ejus veritas et judicium, » id est, omnia opera Domini, et in iis hoc particulare opus expulsionis Chananæorum, et introductionis Judæorum, facta sunt cum magna fidelitate et justitia. Veritas enim hoc loco, ut etiam alibi passim fidelitatem significat servandi promissa. Quoniam igitur promiserat Deus Abrahæ terram illam se daturum posteris ejus, hoc opus Dei factum est « in veritate; » et quoniam idem Deus non ante expulit Chananæos, quam « impleta esset mensura peccatorum, » ob quæ expelli mererentur; ideo hoc idem opus factum est « cum justitia, » quæ hoc loco dicitur judicium, quod est justitiae actus. « Opera ergo manuum ejus veritas et judicium, » id est, fideliter et juste fiunt. Quod autem mererentur puniri Chananæi, et in poenam privari terra Palæstinæ, probat Propheta : quia non servaverunt præcepta Dei naturalia, quæ sunt omnibus communia et immutabilia, quia continent prima principia justitiae : nam *Levit. xviii.*, prohibit Deus incestum, adulterium, vitium contra naturam, idolatriam, et similia, et addit : « Omnes execrationes istas fecerunt accolæ terræ, qui fuerunt ante vos, » et polluerunt eam; cavete ergo, « ne et vos similiter evomat, cum paria feceritis, sicut evomuit gentem quæ fuit ante vos. » Ait igitur : « Fidelia omnia mandata ejus, » id est, omnia præcepta Dei, præsertim naturalia, fidelia sunt, quia neminem decipiunt, cum sint rectissima et justissima, et per hoc poenam adferant prævaricatoribus, et præmia observatoribus. Nec solum fidelia sunt, sed etiam immutabilia et indispensabilia, cum in nullo casu inveniri possint injusta; ideo addit : « Confirmata in sæculum sæculi, facta in veritate et æquitate, » id est, stabilita sunt aëterna firmitate, quia condita sunt « in veritate, » id est, in rectitudine, « et æquitate, » id est, justitia: nam, ut diximus, rectitudinem et justitiam absolutam continent. Vide S. Thomam in I II, *Ques. C.*, art. 8.

Phe. REDEMPTIONEM MISIT POPULO SUO.

Tsade. MANDAVIT IN AETERNUM TESTAMENTUM SUTUM.

Non desunt etiam ex veteribus, qui hæc referant ad litteram ad liberationem populi de Ægypto: sed videtur omnino Propheta altiorem redemptions intelligere, ut exponunt S. Augustinus et Euthymius; nam de Judæis jam dixerat, datum illis fuisse manna de cœlo, et hæreditatem gentium; neque ulla erat ratio, cur reyerteretur

ad antiquiora. Igitur post decantata beneficia Dei erga Patres Testamenti veteris, transit ad beneficium longe excellentius Testimenti novi, quo vera atque aëterna redemptio continetur. « Redemptionem, inquit, misit populo suo, » quasi dicat : Post hæc misit redemptorem tam sæpe promissum, et tamdiu exspectatum, de quo prophetavit etiam Zacharias, cum ait *Luc. i* : « Benedictus Dominus Deus Israel, quia visitavi, et fecit redemtionem plebis suæ. » Redemit autem Christus populum suum de captivitate et servitute peccati, et potestate tenebrarum, pretio sanguinis sui. Et hoc modo vere et proprie « mandavit in aëternum testamentum suum, » id est, jussit (hoc enim significat vox hebræa *תִּתְּנָהֵן*) et statuit ut testamentum, sive pactum esset aëternum, de vera et aëterna salute, et possessione cœlestis patriæ; nam Testamentum vetus, quo promittebatur terra Palæstinæ, non fuisse aëternum, experientia docet. Quare et Hieremias cap. *xxxii*, ait : « Ecce dies veniunt, dicit Dominus, et feriam domui Israel et domui Judæ fœdus novum, non secundum pactum, quod pepigi cum patribus eorum, ut educerem eos de terra Ægypti, pactum quod irriterunt fecerunt, et ego dominatus sum eorum, dicit Dominus : sed hoo erit pactum, quod feriam cum domo Israel post dies illos, dicit Dominus : Dabo legem meam in visceribus eorum, et in corde eorum scribam eam, et ero eis in Deum, et ipsi erunt mihi in populum. »

Coph. SANCTUM ET TERRIBLE NOMEN EJUS.

Resch. INITIUM SAPIENTIÆ TIMOR DOMINI.

Docet consequenter modum permanendi in testamento Domini, ut assequamur promissiones ejus, ac dicit : « Sanctum et terrible nomen ejus, » id est, is qui mandavit in aëternum testamentum suum, sanctus et terribilis est, et ideo odit pollutionem et immunditiam peccati, quia sanctus est, et dicit, *Levit. xi* : « Sancti estote, quia sanctus sum Dominus Deus vester; » et simul punit pollutos et immundos, quia terribilis est, « et horrendum est incidere in manus Dei viventis, » *Hebr. x*; et propterea « initium sapientiæ timor Domini, » id est, illi vere incipiunt sapere, qui timent Dominum, et ex timore illo carent a peccatis, observant legem, operantur bona, ut paulatim ex timore ad amorem perveniant, et incipient odisse malum, non timore poenæ, sed amore justitiae. Potest etiam hic locus intelligi de timore sancto, quo timemus offenditionem Dei, quia diligimus Deum; qui timor dicitur initium sapientiæ, quia pertinet ad primam, et magis necessariam partem sapientiæ. Sapientia enim perfecta duo requirit, cognitionem et amorem Dei: sed in hac vita priores partes tribuuntur amori, sive timori sancto filiali. Unde Ecclesiasticus cap. *i*, ubi dixit : « Initium sapientiæ timor Domini, » addit, « plenitudo sapientiæ est timere Deum : » ut intelligamus timorem Domini sanc-

Sapientia
perfecta
duo re-
quirit.

tum dici initium, quia est quasi caput, id est, pars prima et potissima, ut dici possit etiam tota sapientia.

Scin. INTELLECTUS BONUS OMNIBUS FACIENTIBUS EUM.

Tau. LAUDATIO EJUS MANET IN SÆCULUM SÆCULI.

Declarat quod dixit, initium sapientiae esse timorem Domini. Est enim, ac si dicat : « Intelligentia quidem, » quæ pars est sapientiae, « bona est, » sed facientibus eam, id est, ex timore sancto facientibus, quod scientia docet esse faciendum : alioqui intelligentia sine timore inutilis vel perniciosa est : nam « scienti bonum facere, et non facienti, peccatum est illi, » Jacob. iv. Nomen intellectus, significatur hoc loco ipsa intelligentia, sive scientia, aut doctrina, ut voces hebraica et græca clarius sonant : pronomen *eum*, cum dicitur, *facientibus eum*, refertur ad intellectum, ut referunt Chrysostomus et Augustinus.

In hebræo habetur *facientibus ea*, nimurum quæ intelliguntur esse facienda. Itaque sensus in idem recidit. Quod autem sequitur : « Laudatio ejus manet in sæculum sæculi, » aliqui referunt ad Deum, ut sensus sit : Laudatio ejus, cuius nomen est sanctum et terribile, semper manebit, ita S. Chrysostomus. Sed videtur melius continuare textum expositiō S. Augustini, qui hunc versiculum refert ad illum qui timet Dominum, et qui facit quod intelligit esse faciendum : illius enim præmium erit, ut inhabitet in domo Domini omnibus diebus vite suæ, et sit unus ex illis, qui laudabunt Deum in sæculum sæculi. Quare *laudatio ejus* est laudatio qua ipse homo, timens Deum, perpetuo laudabit Dominum. Potest etiam satis commode intelligi versiculus de laude, qua ipse timens Deum, et faciens quod intelligit esse faciendum, laudabitur a Deo, ut servus bonus et fidelis, et consequenter laudabitur ab angelis et aliis sanctis, et ejusmodi laus erit æterna, quia, ut dicitur in *Psalm. cxi* : « In memoria æterna erit justus, ab auditione mala non timebit. »

PSALMUS CXII

SECUNDUM HEBRÆOS.

V. v. — *Alleluia, reversionis Aggæi et Zacharie.*

1. Beatus vir, qui timet Domnum : in mandatis ejus volet nimis.

2. Potens in terra erit semen ejus : generatio rectorum benedicetur.

3. Gloria et divitiae in domo ejus, et justitia ejus manet in sæculum sæculi.

4. Exortum est in tenebris lumen rectis : misericors, et miserator, et justus.

5. Jucundus homo qui miseretur et commodat, disponet sermones suos in judicio :

6. Quia in æternum non commovebitur.

7. In memoria æterna erit justus : ab auditione mala non timebit.

Paratum cor ejus sperare in Domino.

8. Confirmatum est cor ejus : non commovebitur, donec despiciat inimicos suos.

9. Dispersit, dedit pauperibus : justitia ejus manet in sæculum sæculi, cornu ejus exaltabitur in gloria.

10. Peccator videbit, et irascetur; dentibus

V. s. h. — *Alleluia.*

Aleph. Beatus vir qui timet Dominum,
Beth. In mandatis ejus volet nimis.

Gimel. Potens in terra erit semen ejus :

Daleth. Generatio justorum [*h. rectorum*] benedicetur.

Hē. Substantia et divitiae in domo ejus,
Vau. Et justitia ejus perseverans semper.

Zain. Ortum est in tenebris lumen justis [*h. rectis*] :

Heth. Clemens et misericors et justus [*h. pius*].

Teth. Bonus vir clemens et foederans :
Jod. Dispensabit verba sua in judicio.

Chaph. Quia in æternum [*h. sæculum*] non commovebitur.

Lamed. In memoria sempiterna erit justus.
Mem. Ab auditu malo non timebit :

Nun. Paratum cor ejus confidens in Domino.
Samech. Firmum cor ejus non timebit :

Ain. Donec aspiciat in hostibus suis.

Phe. Dispersit, dedit pauperibus,
Sade. Justitia ejus permanet in æternum.

Coph. Cornu ejus exaltabitur in gloria.

Res. Impius videbit, et irascetur;

suis fremet et tabescet : desiderium peccatorum *Sin.* Dentibus suis frendet, et tabescet :
 peribit. *Thav.* Desiderium impiorum peribit.

Argumentum. — Commemorat præmia pietatis, sicut Psalmus i et alii. Ordine alphabeticó scriptus hic quoque, et quidem ad exemplum proxime prægressi.

1. **Laudate Jovam.**
Beatus vir, qui timet Jovam,
præceptis ejus delectatur valde!
2. **Potens in terra erit semen ejus,**
genus rectorum benedicitur.
3. **Opes et divitiae sunt in domo ejus,**
et justitia ejus stat in æternum.
4. **Oritur in tenebris lux probis,**
misericors et benignus et justus est probus.
5. **Beatus vir, qui gratificatur et mutuum dat,**
res suas juste (et sapienter) dispensat (regit) :
6. **Nam in æternum non dimovebitur,**
memoriæ æternæ erit justus.
7. **A nuntio malo non timet,**
firmus est animus ejus, confisus Jovæ.
8. **Suffultus (firmatus) corde non timet,**
dum oculos pascet adversariis suis (devictis).
9. **Dispergit (largiter distribuit), dat pauperibus,**
justitia ejus manet in perpetuum,
ideo cornu ejus effert se cum honore.
10. **Improbis videt id et mœret,**
dentibus suis frendit et tabescit :
desiderium improborum evanescit.

NOTE.

Vers. 3. *Justitia*, etc., i. e. nec opibus corruptitur. Alii *justitiam* dictam volunt pro justitiæ *præmio* : sine ratione sufficienti. — Vers. 4. Sensus : Res proborum adversariorum in secundas convertuntur. — Vers. 7. *Malo*, tristi, puta periculorum. Alius de *fama* intelligit, hoc sensu : Non curat obtructationes aut calumnias ullas. — Vers. 10. Aut *videbit*, *mœrebit*, etc.

BELLARMINI EXPLANATIO.

PSALMUS CXI.

TITULUS ET ARGUMENTUM.

Alleluia, reversionis Aggæi et Zacharie.

Hic Psalmus recte conjungitur superiori, quia laudat virum justum, ut ille laudabat Deum, et est alphabeticus, continens viginti duos versiculos incipientes a litteris alphabeti ordine positis. Eundem quoque habet titulum, *alleluia*, apud Hebræos et Græcos; sed apud Latinos, teste Augustino, adduntur haec verba, *Alleluia, reversionis Aggæi et Zacharie*. Videtur enim David in spiritu prævidisse Aggæum et Zachariam, post expletum tempus captivitatis, rediisse ad populum, eumque admonuisse quanta sit felicitas viri justi et timentis Deum, ut hoc exemplo exhortetur alios ad probitatem, ut non incident in similem captivitatem.

EXPLICATIO PSALMI.

Aleph. BEATUS VIR, QUI TIMET DOMINUM.

Beth. IN MANDATIS EJUS VOLET NIMIS.

Hæc est propositio quam per totum Psalmum variis argumentis probat, ut suadeat omnibus pietatem : « Beatus, inquit est, quicumque timet Dominum. » Sed quia non quicunque timor facit beatum, addit declarans : « In mandatis ejus volet nimis. » Ubi repetendum est *qui*, ut hic sit sensus : Beatus est vir ille, qui timet Dominum, qui ex eo timore in mandatis ejus libentissime implendis versabitur : nam in mandatis velle nimis, nihil est aliud, nisi mandata valde diligere, et ad mandata multum esse affectum, sive in adimplendis mandatis magnam habere voluntatem. In summa ille dicitur felix, qui et interius timet Deum timore sancto, et exterius promptus est ad implenda mandata, ac per hoc justus et pius est.

Ghimel. POTENS IN TERRA ERIT SEMEN EJUS.

Daleth. GENERATIO RECTORUM BENEDICETUR.

Hæc est prima felicitas hominis timentis Deum, quod multam prolem consequetur. « Potens, inquit, in terra erit semen ejus, » id est, robusta erit ejus posteritas ob multitudinem filiorum; et rationem reddit, cum addit : « Generatio rectorum benedicetur, » quia videlicet generatio justorum ex divina benedictione fecundissima erit.

Sobolis Benedictio enim in Testamento veteri, ut plurimum ad fecunditatem pertinet. Hæc prima felicitas non erat in viris justis perpetua, sed frequens. *benedic-*
tio non
erat per-
petua in
veteri
Testa-
mento. Scimus enim Abrahamum longo tempore in matrimonio sine liberis vixisse, ut etiam filium ejus Isaac, et postea non paucos alios. Sed si exponatur Psalmus de fructu bonorum operum, ex semine gratiae cœlestis prodeunte, felicitas erit omnino perpetua : nemo enim est vere pius et justus, qui non assidue serat opera bona, ex quibus magnam omnino messem tempore suo collecturus sit.

He. GLORIA ET DIVITIE IN DOMO EJUS,

Vau. ET JUSTITIA EJUS MANET IN SÆCULUM SÆCULI.

Secunda felicitas est honorum et opum abundantia, quæ tamen non inducent ad peccatum, neque justitiam corrumpant. Sæpe enim accidit ut honores et divitiae superbiam gignant, vel carnalibus voluptatibus deserviant, et tum non felicitati, sed calamitati polius deputandæ sunt. Ait igitur : « Gloria et divitiae in domo ejus, » id est, non solum multitidine filiorum, sed etiam honoribus et divitiis abundabit justus, et tamen (quod est omnium felicissimum) non corrumpetur animus ejus istis fortunæ bonis, sed « justitia, » et probitas ejus, « perseverabit usque ad

finem. » Hæc etiam felicitas non est perpetua, si agatur de gloria et divitiis temporalibus; sed si de gloria interna, de bonæ conscientiæ testimonio, et de divitiis fidei, ac de illo quæstu magno intelligatur, de quo Apostolus I Timoth. vi : « Quæstus Magnus est pietas cum sufficientia, » id est, pietas sine sollicitudine temporalium, ita ut animus sit contentus iis quæ habet, perpetua felicitas erit : nam, ut ille dixit, animus dives debet esse, non arca; tunc autem animus dives est, quando alimentis et tegumentis contentus, nihil optat amplius, sed sibi ipse sufficit; quod Apostolus dixit, « pietas cum sufficientia, » et græce significantius *αὐτάρχεια*; quod declaravit idem Apostolus Philip. iv, cum ait : « Didici, in quibus sum, sufficiens esse; scio et abundare, et penuriam pati. »

Animus
dives
esse de-
bet, non
arca.

Zain. EXORTUM EST IN TENEBRIS LUMEN RECTIS.

Cheth. MISERICORS, ET MISERATOR, ET JUSTUS.

Tertia felicitas timentium Deum, est lumen prudentiae et consilii, divinitus affulgens in tenebris dubitationum, quæ passim occurunt in rebus gerendis, item in discernendis fraudibus falsorum fratrum; denique lumen consolationis in omnibus calamitatibus et ærumnis hujus vitæ. « Exortum est in tenebris lumen rectis, » id est, affulxit rectis hominibus, quales sunt timentes Deum, lumen consilii et consolationis in tenebris dubitationum et tribulationum; quod lumen est ipse Deus, « misericors, et miserator, et justus, » qui misericordiam facit viris misericordibus, quia justum est ut misericordes misericordiam consequantur.

Theth. JUCUNDUS HOMO QUI MISERETUR, ET COMMODAT :

Iod. DISPONET SERMONES SUOS IN JUDICIO :

Caph. QUA IN ÆTERNUM NON COMMÓVEBITUR.

Quarta felicitas est lætitia spiritualis, quæ resedit in corde timentium Deum. Qui enim Deum timent, facile indulgent offendentes miserando fragilitates humanas, facile etiam commendant egentibus, et sic implent Dominicum præceptum, Luc. vi : « Dimittile, et dimittemini; date, et dabitur vobis. » Hæc autem bona opera maximam lætitiam pariunt; sicut e contrario, qui retinent offendentes, vel negant proximo beneficium, semper amaro sunt animo, tum quia conscientia pungit, tum quia cogitant se odio haber. Illud, *miseretur*, a nonnullis refertur ad eleemosynas quæ dantur egentibus; sed quia de eleemosyna paulo post fit specialis mentio, cum dicitur : « Dispersit, dedit pauperibus, » ideo maluimus cum S. Augustino referre ad indulgentiam offenditorum, quod est genus eleemosynæ spiritualis. Quinta felicitas est prudentia in loquendo, prop.

ter quam evitantur incommoda maxima, inimicitiae, rixæ, detractiones, et similia. Qui enim timet Deum, « disponit sermones suos in judicio,» id est, dispensabit verba sua cum maturitate iudicii, ut neminem laedat, et inde plurima bona lucrabitur. Alii per sermones intelligent rationes et negotia. Sed quamvis vox hebræa et græca id patiantur, tamen vox latina non patitur, et verisimile est Prophetam varia bona timentium Deum enumerare, non eadem saepius repetere. De prudentia in negotiis supra jam dixerat; de prudentia in loquendo nihil hactenus dixit. Reddit autem rationem, cur disponet sermones suos in iudicio, cum addit: « Quia in æternum non commovebitur, » id est, quia vir est constans in propositis suis, et stabilis, et prævidet prudenter omnia, ut quicquid accidat, eum commovere non possit.

Lamed. IN MEMORIA ÆTERNA ERIT JUSTUS.

Mem. AB AUDITIONE MALA NON TIMEBIT.

Sexta felicitas timentis Deum est, quod vivet semper in hominum memoria, et vivet non per memoriam insignis alicujus flagitii, quomodo vivunt Judas et Cain, Herodes et Pilatus, Annas et Caiphas, sed vivet per memoriam gloriosam; nam laudes ejus enarrabit omnis Ecclesia Sanctorum; neque solum « in memoria æterna » erit apud mortales, sed etiam nomen ejus scriptum erit in libro vite, quod nunquam delebitur, et eo modo vere ac proprie in memoria æterna erit apud angelos in cœlo. Et « ab auditione mala non timebit, » id est, non timebit a detractionibus et reprehensionibus hominum impiorum; neque etiam timebit a sententia illa formidolosa iudicis æterni, videlicet: « Ite, maledicti, in ignem æternum, » etc., Matth. xxv.

Nun. PARATUM COR EJUS SPERARE IN DOMINO.

Samech. CONFIRMATUM EST COR EJUS, NON COMMOVEBITUR.

Hain. DONEC DESPICIAT INIMICOS SUOS.

Septima felicitas timentis Deum, est firma atque stabilis divina protectio, qua fretus nihil unquam malorum timebit. « Paratum cor ejus sperare in Domino, » id est, in omni adversitate, sive periculo imminenti cor ejus paratum habet refugium ad Deum, quia semper est promptum et paratum sperare in Domino, nunquam obliisciatur adjutorium Dei, nunquam diffidit, nunquam haesitat. « Confirmatum est cor ejus in hac fiducia, » ut nullum ei sit periculum, ne ab illa forte deficiat. « Non commovebitur donec despiciat inimicos suos, » id est, nunquam timebit, dum periculum ab inimicis durabit. Multo autem minus timebit, cum eos ut prostratos et devictos despiciat. In hebræo pro non commovebitur, habetur, non timebit; sed idem est sensus; pro despiciat, habetur rideat, ex quo sequitur ut despicerre hoc loco non sit proprie contemnere, sed

videre ex altiore loco, ut sit despicerre quasi deorsum inspicere, juxta illud Virgilii: « Despiciens mare velivolum: » Sed quia respicere inimicos ex alto, contingit illis qui vident inimicos dejectos et prostratos, ac per hoc illos contemnunt, recte potest exponi: « Donec despiciat, » id est, donec contemnat, ut jam devictos et profligatos; quamvis vox illa immediate non contemnere, sed inspicere significet, si cum voce hebraica convenire debeat. Et quoniam, durante hac vita mortali, nunquam cessabunt pericula ab hostibus pietatis, nec videbimus eos omnino prostratos, nisi cum in cœlesti sede positi longissime abjectos despiciemus; ideo illud, donec, tamdiu durabit quamdiu præsens vita durabit.

Phe. DISPERSIT, DEDIT PAUPERIBUS.

Tsade. JUSTITIA EJUS MANET IN SÆCULUM SÆCULI.

Coph. CORNU EJUS EXALTABITUR IN GLORIA.

Octava felicitas est gratia bene utendi divitiis; nam ex dono Dei habent amici Dei, ut intelligent quanta sapientia sit per eleemosynas transferre thesauros suos in eorum, Matth. vi, « ubi nec tinea demolitur, nec fures effodiunt, nec furantur. » « Dispersit, inquit, dedit pauperibus, » id est, iste homo timens Deum, opes suas non abscondit, neque augere studuit, sed sparsit in pauperes, id est, abundanter effudit, sed ea prudenter, ut dederit potius multis parum quam paucis multum, ut multis provideret necessaria, nullis daret superflua. Simile est quod habetur Isai. lviii: « Frange esurienti panem tuum; » et I Cor. xiii: « Si distribuero in cibos pauperum omnes facultates meas. » Nec tamen negamus quin aliquando melius sit multum uni dare, quam multis parum, ut cum virgo pauper tradenda est viro, vel ecclesia exedificanda, vel captivus redimendus. Vide S. Thomam in II II, Quæst. XXXII, art. 10, et S. Gregorium *De Cura Pastorali*, part. III, admonit. 21. Ex hac liberalitate duo bona lucratuſ est, unde vere beatus dici potest: primum, si pecunias diminuit, justitiam auxit, « et justitia ejus, » id est, bonum opus ejus « manet in sæculum sæculi, » conservandum apud Deum, ut suo tempore mercedem plenam accipiat; nam « qui miseretur pauperis, fœneratur Deo, » inquit Sapiens Prov. xxix. Deinde « cornu ejus exaltabitur in gloria, » id est, non solum mercedem habebit in vita futura, sed etiam in hoc sæculo potentia et gloria augebuntur; cornu in Scripturis potentiam et robur significat. Dicitur autem exaltari cornu alicujus, quando ille fit potentior et fortior. « Exaltari autem cornu in gloria, » est hominem fieri non solum potentem, sed etiam gloriosum, quales sunt viri celebres et honorati, quibus alii deferunt et cedunt. Significat igitur hic versiculus per eleemosynas non fieri homines tenuiores et despectos, sed augeri divitiis potentia et gloria, cuius rei multa sunt exempla in divinis litteris, præ-

sertim in libro *Job* et in libro *Tobie*; et non paucum legi possunt in Vitis Sanctorum, ac præcipue in *Vita S. Joannis Eleemosynarii*, et in *Prato Spirituali Sophronii*.

Resch. PECCATOR VIDEBIT, ET IRASCETUR.

Scin. DENTIBUS SUIS FREMET ET TABESCET.

Tau. DESIDERIUM PECCATORUM PERBIT.

Postrema felicitas est, quod timens Deum om-

nem invidiam superabit. « Peccator videbit, » id est, considerabit bona opera timentis Deum, et *Beatus qui timet Dominum,* *qui non timet.* ejus felicitate, et invidia torquebitur, « et irascetur » sorti ejus. Et instar rabidi canis « fremet » adversus illum, « et » præ dolore « tabescet; » sed interim « desiderium impii, » quo cupit perditionem justi, non adimplebitur, sed una cum ipso impio brevi « peribit. » Ergo beatus et felix est qui timet Dominum; miser et infelix, qui non timet.

PSALMUS CXIII

SECUNDUM HEBREOS.

V. v. — *Alleluia.*

1. Laudate, pueri, Dominum; laudate nomen Domini.

2. Sit nomen Domini benedictum, ex hoc nunc et usque in sæculum.

3. A solis ortu usque ad occasum, laudabile nomen Domini.

4. Excelsus super omnes gentes Dominus, et super cœlos gloria ejus.

5. Quis sicut Dominus Deus noster, qui in altis habitat,

6. Et humilia respicit in cœlo et in terra?

7. Suscitans a terra inopem, et de stercore erigens pauperem :

8. Ut collocet eum cum principibus, cum principibus populi sui.

9. Qui habitare facit sterilem in domo, matrem filiorum lætantem.

Argumentum. → In Jovam augustinum eundemque benignissimum trium stropharum hymnus: vers. 1-3, Jova celebrandus ab omnibus, omni tempore ac loco; vers. 4-6, Jova Deus altissimus; vers. 7-9, qui idem demittit se ad curam rerum humanarum. Paulo post redditum e captivitate scriptus.

1. Laudate Jovam.

2. Laudate, servi Jovæ,
laudate nomen Jovæ.

2. Sit nomen Jovæ benedictum,
ex nunc et usque in æternum.

3. Ab ortu solis usque ad occasum ejus
sit laudatum nomen Jovæ.

4. Altus est super omnes gentes Jova,
super cœlos gloria ejus.

5. Quis similis est Jovæ, Deo nostro,
qui excelse sedet,

6. Qui alte despicit
in cœlos et in terram?

V. s. h. — *Alleluia.*

Laudate, servi, Dominum : laudate nomen Domini.

Sit nomen Domini benedictum : amodo et usque in æternum [*h. sæculum*].

Ab ortu solis usque ad occasum ejus laudabile nomen Domini.

Excelsus super omnes gentes Dominus : super cœlos gloria ejus.

Quis ut Dominus Deus noster : qui in excelsis habitans,

Humilia respicit in cœlo et in terra?

Suscitans de terra [*h. pulvere*] inopem, et de stercore elevat pauperem,

Ut eum sedere faciat cum principibus, cum principibus populi sui.

Qui collocat sterilem in domo, matrem filiorum lætantem. Alleluia.

7. Erigit ex pulvere tenuem (vel *afflictum*),
e fimeto elevat pauperem,
8. Ut collocet *eum* cum principibus,
cum principibus populi sui.
9. Habitare facit sterilem domus (heram)
matrem filiorum lætantem.
Laudate Jovam.

NOTÆ.

Vers. 3. *Sit laudatum*; vel, *est laudandum*. — Vers. 4. Hengstenberg, *in cœlis gloria ejus*, puta ab angelis et sanctis celebratur. — Vers. 5. Propr. *se elevans ad sedendum*, *se deprimens ad videndum*, vel *qui altum facit sedendo, profundum aut humile facit videndo*. Iod parag.

BELLARMINI EXPLANATIO.

PSALMUS CXII.

TITULUS ET ARGUMENTUM.

Alleluia.

Hic Psalmus brevis et facilis hortatur cultores Dei ad ipsum Deum laudandum ob id potissimum, quod cum sit Altissimus, tamen non dedignatur ad nos oculos inclinare, et multis nos beneficiis afficere.

EXPLICATIO PSALMI.

Vers. 1. 1. LAUDATE, PUERI, DOMINUM; LAUDATE NOMEN DOMINI.

Nomine puerorum intelliguntur servi Dei, qui eum pure colunt; quamvis enim vox græca παιδες, et latina *pueri*, sint communes ad servos et ad pueros significandos, tamen vox hebraica יִתְבָּרֵךְ nihil significat, nisi *servum*; et clarius etiam id apparet ex eo quod in hebræo vox *Domini* est in casu signandi: *Laudate, servi, Domini*: *laudate nomen Domini*. Magna tamen est affinitas servos et pueros et magna pueri, et pueri servi, quoniam servi sinere debent se regi a dominis, quomodo parvuli reguntur a majoribus; unde etiam B. Paulus ait ad Gal. iv: «Quanto tempore haeres parvulus est, nihil differt a servo.» Admonemur igitur voce puerorum, servos Dei simplices et puros esse debere, et ad nutum Domini sine tergiversatione procedere. «Laudate, pueri, Dominum; laudate nomen Domini,» id est, o vos omnes, qui servi estis Dei, in hoc præcipue illi servite, ut pura mente cogitatis magnitudinem Domini vestri, et toto cordis affectu laudetis nomen ejus, potentiam videlicet, et gloriam ejus infinitam. Similis exhortatio habetur in Psalm. cxxxiii: «Ecce nunc benedicte Dominum, omnes servi Domini;» et in Psalm. cxxxiv: «Laudate nomen Domini; laudate, servi, Dominum.»

2. SIT NOMEN DOMINI BENEDICTUM, EX HOC Vers. 2. NUNG ET USQUE IN SÆCULUM.

Declarat modum quo servi Dei laudare debent nomen Domini, ac dicit affectu saltem et desiderio laudandum esse, quandoquidem re ipsa nos humi repentes laudare, ut oportet, nescimus. Dicite ergo, ait, intimo cordis affectu: «Sit nomen Domini benedictum, et nunc» a præsentibus, «et usque in æternum» a futuris, ut ab ejus laudibus nunquam cesseretur, vel potius, «ex hoc nunc,» incipite laudare, «et usque in sæculum» laudate, id est, semper laudate, sive prospera, sive adversa contingent, sive in hac vita, sive in futura, semper laus ejus sit in ore vestro, et cum S. Job semper dicite: «Sit nomen Domini benedictum.»

3. A SOLIS ORTU USQUE AD OCCASUM, LAUDABILE Vers. 3. NOMEN DOMINI.

Declarat hoc versu et sequentibus materiam laudis Dei, ac dicit ubique inveniri materiam laudis Dei, cum omnia sint plena operibus ejus magnis et mirabilibus, quæ diligenter considerata laudabilem reddunt artificem. «A solis ortu usque ad occasum,» id est, per totam mundi amplitudinem, a principio usque ad finem, «laudabile est nomen Domini,» propter opera ejus, quibus ab omni parte plenus est mundus.

Vers. 4. 4. EXCELSUS SUPER OMNES GENTES DOMINUS, ET SUPER CŒLOS GLORIA EJUS.

Non solum per amplitudinem mundi, sed etiam per altitudinem ubique invenitur materia laudis Dei; nam etiamsi multi sint in terra magni principes et potentissimi reges, tamen super omnes longe eminet Deus; neque solum «super omnes gentes terræ», sed etiam super omnes angelos cœli excelsus est Deus, et gloria ejus cœlos omnes, et qui habitant in eo, transcendit. S. Joannes Chrysostomus in his duobus versiculis vult continentem prædictionem Ecclesiæ christianæ, per quam factum est, ut «nomen Domini», quod in sola fere Judæa notum erat, «a solis ortu usque ad occasum», laudetur, et omnes gentes illi subjiciantur, et eo modo sit «excelsus Dominus super omnes gentes.»

Vers. 5. 5. QVIS SICUT DOMINUS DEUS NOSTER, QUI IN ALTIIS HABITAT, ET HUMILIA RESPICIT IN CŒLO ET IN TERRA?

Laudat nunc Deum ab admirabili benignitate, quæ conjuncta cum tanta sublimitate mirabilior appareat. «Quis, inquit, est sicut Deus noster, qui in altis habitat,» videlicet in summo cœlo, et tamen «humilia respicit,» homines videlicet, qui jacent in terra. Nam sic explicandus videtur ad litteram hic versiculos juxta distinctionem hebreicam, et modum loquendi Scripturæ; ut illud, *in cœlo*, referatur ad illa verba, *in altis habitat*, et illud, *in terra*, referatur ad illa, *humilia respicit*; præsertim cum in hebreo sint duo participia contraria: *Quis sicut Dominus Deus noster exaltans se ad sedendum, et humilians se ad respiciendum in cœlo et in terra*, id est, ad sedendum in cœlo, et ad respiciendum in terra. Similis est sententia illa in cap. I *Cantic.*: «Nigra sum, sed formosa, filiæ Sion, sicut tabernacula Cedar, sicut pelles Salomonis,» ubi *sicut tabernacula Cedar* conjungitur cum *nigra sum*, et *sicut pelles Salomonis* conjungitur cum *sed formosa*. Significatur autem hac phrasim Deum per excellentiam naturæ omnia sub se habere; et tamen per clementiam rebus omnibus, quamvis humillimis, adesse, ac præcipue hominibus mitibus, et corde humilibus se inclinare. Quod si non placeat hæc distinctio, potest etiam recte exponi, quod Deus, quamvis naturæ sit excellentissimæ et sublimissimæ, tamen a superbis et tumidis oculis avertere, ad humiles et mites libenter aspicere soleat; idque tam in cœlo quam in terra: nam et in cœlo superbos angelos detestatus, humiles respexit, et ad gloriæ suæ participationem evexit; et in terra superbis Pharaonibus, Saulibus, aliquaque similibus contemptis, ad Moysen, Davidem, aliosque mites et humiles respexit. Sed altiore et propheticō sensu significatur his verbis, Deum in cœlo sedentem non neglexisse genus humanum in terra humiliiter abjectum.

6. SUSCITANS A TERRA INOPEM, ET DE STERCORE Vers. 6.
ERIGENS PAUPEREM.

7. UT COLLOGET EUM CUM PRINCIPIBUS, CUM Vers. 7.
PRINCIPIBUS POPULI SUI.

Declarat cur Deus respiciat humiles; ac dicit id eum facere, ut eos exalteat. Quamvis autem hæc applicari possint singulis hominibus, quos ex infimo gradu Deus evexit ad summum, quales fuerunt Joseph patriarcha, Moses, David, et similes, tamen aptissime convenient hi duo versiculi humano generi, id est, toti gregi pusillo electorum, quibus Salvator ait *Luc. xii*: «Nolite timere, pusillus grex, quia complacuit Patri vestro dare vobis regnum,» nam genus humanum jacebat in terra, et in stercore peccati originalis et consequentium miseriarum; et tamen Deus sedens in cœlo respexit in terram, et inde suscitavit inopem, hominem videlicet spoliatum a latronibus, et relictum semivivum, et jacentem in stercore miseriarum, ut collocaret eum «cum principiis:» non quibuscumque, sed «cum principiis populi sui,» possessoribus cœlestis Jerusalēm, et participibus regni celorum. Nam exaltatio a paupertate temporali ad opes regni temporalis, etiamsi nobis magna esse videatur; vere tamen exigua ac pene nulla exaltatio est, cum opes regni caducæ sint, et ad dispensandum traditæ, et cum obligatione reddendæ rationis in die judicii, et conjunctæ cum magna afflictione spiritus, et periculo æternæ salutis amittendæ. At exaltatio a statu peccati et mortis, ad statum gloriarum, et beatæ immortalitatis, ad æqualitatem angelorum, ad consortium boni illius, quod ipsum Deum beatum facit, hæc vera, et vere magna, et appetenda maxime exaltatio est.

8. QUIL HABITARE FACIT STERILEM IN DOMO MATREM FILIORUM LÆTANTEM.

Quemadmodum infelicitas virorum est status humili et despectus, ita infelicitas mulierum est sterilitas. Sed quomodo Deus respicit viros humiles, ut de statu infimo erigit ad regnum, ita respicit humiles feminas, ut de sterilitate perducat ad fecunditatem. Potest autem hoc totum referri ad singulas feminas, ut Saram, Rebeccam, Rachelem, Annam, et similes. Sed altiore sensu pertinet ad Ecclesiam ex gentibus congregatam, quæ longo tempore mansit sterilis, sed in senectute peperit plurimos, juxta illud Apostoli *ad Gal. iv*, ex cap. LIV *Isai.*: «Lætare, sterilis, quæ non paris, erumppe, et clama, quæ non parturis, quia multi filii desertæ magis quam ejus quæ habet virum.» Quod autem ad verba attinet, cum dicitur: «Qui habitare facit sterilem in domo,» per *domum* intelligitur familia sive abundantia filiorum, ut sensus sit: Qui facit ut sterilis, quæ manebat solitaria, jam habitet inter multas proles, in magna familia. Id quod explicatur per verba sequentia: «Matrem filiorum lœtamem;»

id enim est, *habitare in domo*, esse matrem filiorum, ac per hoc esse lætantem ob filiorum multitudinem, quæ erat mœsta ob sterilitatem et so- litudinem.

PSALMUS CXIV

SECUNDUM HEBRAEOS.

V. v. — *Alleluia.*

1. In exitu Israel de Aegypto, domus Jacob de populo barbaro :
2. Facta est Judæa sanctificatio ejus, Israel potestas ejus.
3. Mare vidit, et fugit : Jordanis conversus est retrorsum :
4. Montes exultaverunt ut arietes, et colles sicut agni ovium.
5. Quid est tibi, mare, quod fugisti, et tu, Jordanis, quia conversus es retrorsum ?
6. Montes exultastis sicut arietes, et colles, sicut agni ovium ?
7. A facie Domini mota est terra, a facie Dei Jacob :
8. Qui convertit petram in stagna aquarum, et rupem in fontes aquarum.

V. s. n.

- Cum egredetur Israel de Aegypto : domus Jacob de populo barbaro :
- Factus est Judas in sanctificationem ejus : Israel potestas illius.
- Mare vidit, et fugit : Jordanis conversus est retrorsum.
- Montes subsilierunt quasi arietes : colles quasi filii gregis [*h. ovium*].
- Quid tibi est, mare, quod fugisti ? Jordanis, conversus es retrorsum.
- Montes, subsultastis quasi arietes : colles, quasi filii gregis [*h. ovium*].
- A facie Domini contremiscit terra : a facie Dei Jacob.
- Qui convertit petram in paludes aquarum : silicem in fontes aquarum.

PSALMUS CXV

SECUNDUM HEBRAEOS.

9. Non nobis, Domine, non nobis : sed nomini tuo da gloriam.
10. Super misericordia tua, et veritate tua, nequando dicant gentes : Ubi est Deus eorum ?
11. Deus autem noster in cœlo : omnia quæcumque voluit, fecit.
12. Simulacra gentium argentum et aurum, opera manuum hominum.
13. Os habent, et non loquentur : oculos habent, et non videbunt.
14. Aures habent, et non audient, nares habent, et non odorabunt.
15. Manus habent, et non palpabunt : pedes habent, et non ambulabunt : non clamabunt in gutture suo.
16. Similes illis fiant qui faciunt ea, et omnes qui confidunt in eis.
17. Domus Israel speravit in Domino : adjutor eorum et protector eorum est.
18. Domus Aaron speravit in Domino : adjutor eorum et protector eorum est.
19. Qui timent Dominum, speraverunt in Domino : adjutor eorum et protector eorum est.

- Non nobis, Domine, non nobis ; sed nomini tuo da gloriam : propter misericordiam tuam, et veritatem tuam.
- Ne [*h. Quare*] dicant gentes : Ubi est Deus eorum ?
- Deus autem noster in cœlo : universa quæ voluit, fecit.
- Idola gentium [*h. eorum*] argentum et aurum : opus manuum hominum.
- Os habent, et non loquentur : oculos habent, et non videbunt.
- Aures habent, et non audient : nasum habent, et non odorabunt.
- Manus habent, et non palpabunt ; pedes habent, et non ambulabunt : non [al. nec] sonabunt in gutture suo.
- Similes illis fiant qui faciunt ea, et omnes qui confidunt in eis.
- Israel confidit in Domino : auxiliator et protector eorum est.
- Domus Aaron confidit in Domino : auxiliator et protector eorum est.
- Timentes Dominum confidunt in Domino : auxiliator et protector eorum est.

20. Dominus memor fuit nostri, et benedixit Dominus recordatus nostri, benedicet, benedicet domui Israel, benedicet domui Aaron.
- Benedixit domui Israel, benedixit domui Aaron.
21. Benedixit omnibus qui timent Dominum, pusillis cum majoribus. Benedicet timentibus Dominum : parvis et magnis.
22. Adjiciat Dominus super vos, super vos, et super filios vestros. Addat Dominus super vos : super vos et super filios vestros,
23. Benedicti vos a Domino, qui fecit cœlum et terram. Benedicti vos a Domino : qui fecit cœlum et terram.
24. Cœlum cœli Domino : terram autem dedit filiis hominum. Cœlum cœlorum Domino : terram autem dedit filiis hominum.
25. Non mortui laudabunt te, Domine : neque omnes qui descendunt in infernum. Non mortui laudabunt Dominum : nec omnes qui descenderunt in silentium.
26. Sed nos qui vivimus benedicimus Domino, ex hoc nunc et usque in sæculum. Sed nos benedicimus Domino : amodo et usque in æternum. Alleluia.

Argumentum. — Breviter enarrantur res miræ præcipue, quas Deus edidit, quum Hebræos ex Ægypto in terras Cananæorum traduceret. Carmen in quatuor, si libet, strophas divide, duobus versiculis constantes.

1. Cum exiret Israel ex Ægypto,
domus Jacobi e populo barbare loquenti (peregrino),
2. Facta est Juda sacrum ejus (Jovæ),
Israel imperium ejus.
3. Mare vidit (Deum populo suo præsentem) et fugit,
Jordanes vertit se retrorsum.
4. Montes (Sinai et Horeb) subsilierunt ut arietes,
colles ut filii ovis (agnelli).
5. Quid est tibi, mare, quod fugis;
Jordanes, quod vertis te retrorsum?
6. Montes, quod subsilitis ut arietes;
colles, ut filii ovis?
7. Præ conspectu Domini contreme, terra,
præ conspectu Dei Jacobi,
8. Qui convertit petram in stagnum (lacum) aquarum,
saxum (vel silicem) in fontem aquarum.

NOTE.

Vers. 2. *Facta est Juda*, non *Judea*. Tribus illa per synecdochen pro toto populo. *Facta est* femin. quia terra significatur. *Sacrum*, populus ex omnibus selectus et Deo consecratus. *Ejus*. Non sine vi est, quod Jova, cuius plenus est vates, solo suffixo significatur.

PSALMUS CXV

SECUNDUM HEBRÆOS.

Argumentum. — In Syriaca atque Græca Alexandrina interpretatione, ad quam Vulgata Latina, Arabica et Æthiopica expressæ sunt, hic Psalmus cum præcedente conjunctus est; et Kimchi monet, hunc Psalmum in quibusdam

libris partem esse praecedentis, quod ipsum et in codd. 18 a Kennicotto, atque in codd. 53 a de Rossio enumeratis observatum est. Nec obstat, imo favet argumentum, nam brevem enarrationem Psalmi praeced. congrue excipiunt sententia tales, quales in *Ps. cxv* continentur. Qui carmen novum hic incipere volunt, in quinque has strophas partituntur: vers. 1-4, adjuva nos, Jova, ut intelligant qui te rident barbari, te esse Deum verum; 5-8, ipsorum dii sunt falsissimi; 9-11, confidite, Israelitæ, Jova; 12-15, res nostras aucturo; 16-18, celebrate Jovam. Nonnulli plores per omnem Psalmum choros sibi respondere putant: ita Ewaldus, qui vers. 1-11 populum loqui opinatur, 12-15 pontificem, 16-18 denuo populum.

1. Non nobis, Jova, non nobis,
sed nomini tuo da gloriam,
propter gratiam tuam, propter fidem tuam.
2. Cur dicant gentes :
« Ubi tandem Deus eorum ? »
3. Et Deus noster *est* in cœlis;
quæcumque voluerit, facit.
4. Simulacra illorum (barbarorum) argentum et aurum *sunt*,
opus manuum hominis.
5. Os iis *est*, et non loquuntur;
oculi iis, nec vident.
6. Aures iis, neque audiunt;
nasus iis, neque odorantur.
7. Manus eorum (nominat. abs. pro *iis*), et non palpant;
pedes eorum, et non incedunt,
non edunt sonum gutture suo.
8. Similes illis (simulaebris) sunt qui faciunt ea,
quicumque fiduciam collocant in eis.
9. Israel, fiduciam colloca in Jova;
auxilium eorum et clypeus eorum *is est*.
10. Domus Aaronis (sacerdotes), fiduciam collocate in Jova;
auxilium eorum et clypeus eorum *is est*.
11. Cultores Jovæ, fiduciam collocate in Jova;
auxilium eorum et clypeus eorum *is est*.
12. Jova memor fuit nostri, benedicat,
benedicat domum Israelis,
benedicat domum Aaronis.
13. Benedicat cultores Jovæ,
parvos cum magnis.
14. Augeat Jova vos,
vos et liberos vestros.
15. Benedicti *estote* vos Jovæ (a Jova),
creatore cœli et terræ.
16. Cœli *sunt* cœli Jovæ,
et terram dedit hominibus.
17. Non mortui laudant Jovam,
nec quicumque descenderunt in loca silentia (orcum).

18. Sed nos benedicamus Jovam,
ex nunc et usque in sèculum.
Laudate Jovam.

NOTE.

Vers. 1. *Gloriam* tibi debitam propter gratiam et fidem, qua nos liberasti. Maurer quæ tertio membro continentur seorsum capit a prægressis, et post *fidem tuam* intelligit *defende nos*. — Vers. 9. *Eorum* qui confidunt in eo. Pro imperativis in hoc et duobus seqq. vers. interpres veteres omnes expresserunt præterita, forsitan quia offendunt in tertiae pers. suffixo in vocibus *auxilium* et *clypeus*. — Vers. 14. Cf. Gen. xxx, 24; Joan. x, 16. — Vers. 16. Cœlum solum sibi Jova retinuit. — Vers. 18. Hengstenberg, *benedicimus*, ut nexus inter vers. 16 et 17 sit: si permittis nos, gentem tuam, ab inimicis deleri, quis tuas laudes in terris cultu publico et solemni predicabit?

BELLARMINI EXPLANATIO.

PSALMUS CXIII.

TITULUS ET ARGUMENTUM.

Alleluia.

Decantat in hoc Psalmo mirabilia opera Dei, dum educeret filios Israel de Ægypto in terram promissionis; idque ad eum finem, ut hortetur populum ad permanendum in confessione unius veri Dei, et sperandam continuo in ejus protectione.

EXPLICATIO PSALMI.

Vers. 1. 1. IN EXITU ISRAEL DE ÆGYPTO, DOMUS JACOB
DE POPULO BARBARO:

Vers. 2. 2. FACTA EST JUDÆA SANCTIFICATIO EJUS, ISRAEL
POTESTAS EJUS.

Narrat, initio Psalmi, quemadmodum populus Hebreorum in egressu de Ægypto cœperit habere formam populi peculiariter Deo subjecti, et a Deo singulari providentia gubernati, ac si Deus esset proprius eorum rex. Nam antequam ingrederebatur Ægyptum, erant una familia, non unus populus; dum autem manserunt in Ægypto, multiplicati sunt valde, sed admixti erant Ægyptiis, et regi Pharaoni serviebant; sed egressi de Ægypto, formam proprie reipublicæ habere cœperunt, Mose, tanquam Dei vicario et interprete, sumnum magistratum apud eos gerente. Hoc igitur est quod dicit, cum ait: «In exitu Israel de Ægypto, dominus Jacob de populo barbaro,» ubi cum dicitur, *domus Jacob*, repetendum est, *in exitu*, hoc modo: *In exitu Israel de Ægypto, in exitu*, inquam, *domus Jacob de populo barbaro*; quæ pars secunda versiculi est explicatio primæ: declarat enim per nomen *Israel*, se non intellexisse hominem illum, qui proprio nomine dicebatur *Israel*, sed totam familiam Jacob, id est, totam illam gentem, que a Jacob patriarcha, qui etiam *Israel* vocabatur, per carnalem generationem originem ducebatur. Per *populum barbarum* intelligitur Ægyptus. Significat autem vox hebraica γῆ loquen-

tem lingua ignota; et *barbarus* dicitur, cuius lingua non intelligitur, juxta illud Apostoli I Cor. XIV: «Si nesciero virtutem vocis, ero cui loquor barbarus, et qui loquitur mihi barbarus.» Dicitur igitur *populus barbarus*, populus Ægypti, quia alia lingua utebatur ab ea qua utebantur Hebrei. «Facta est Judæa sanctificatio ejus,» hoc est, tunc primum, cum egressi sunt filii Israel de Ægypto, Deus sanctificavit, sive dedicavit sibi in populum peculiarem, populum judaicum. «Israel potestas ejus;» idem repelit alii verbis, id est, tunc assumpsit peculiarem potestatem ac dominium super filios Israel. Quod attinet ad verba, per *Judeam*, intelligi debet hoc loco non terra quæ dicitur *Judæa*, sed gens *Judaica*; nam in hebreo est *Judas*, sicut paulo post, *Israel*. Solet autem Scriptura populum hebreum, nunc vocare *Judam*, de nomine principalis filii Israel; nunc *Israel*, de nomine patris: unde etiam vocantur *Judæi*, vel *Israelites*. Sed illud, *sanctificatio* et *potestas* intelligitur quasi materia sanctificationis et potestatis, ut sensus sit: Facta est gens judaica, sive israelitica, gens sanctificata Deo, et peculiariter subjecta potestati ejus. Pronomen relativum *eius* refertur ad Deum, sive Dominum, qui nominatus est in titulo: «Alleluia, Laudate Dominum;» quasi dicat: Laudate Dominum, quia cum egræderentur filii Israel de Ægypto, tunc factus est populus Israel, populus sanctificatus ei, et subjectus peculiariter potestati ejus.

Vers. 3. 3. MARE VIDIT ET FUGIT; JORDANIS CONVERSUS
EST RETRORSUM.

Vers. 4. 4. MONTES EXULTAVERUNT UT ARIETES, ET COL-
LES SICUT AGNI OVIVM.

Narrat mirabilia quæ acciderunt in egressu filiorum Israel de *Egypto*, et commoratione in deserto, et ingressu in terram promissionis, ut hinc ostendat Deum Hebraeorum esse verum Deum omnipotentem, quem jure ipsi colere et timere debeant; ac primum narrat miraculum, quo mare

Hebreorum Deus, versus est Deus. jubente Deo divisum est, ut populus transiret, ut habetur *Exod. xiv*; sed narrat poetica venustate, tribuens ipsi mari sensum, quasi videns majestatem Domini ex timore et reverentia se subduxerit. Conjungit deinde aliud miraculum circa Jordanem, quoniam ad idem elementum pertinet, quamvis multo posterius, id est, post annos quadraginta contigerit. Jordanis enim fluvius divisus quoque est tempore Josue, ut populus per siccum alveum transiret, ut habetur *Josue iv*. Deinde commemorat miracula, quæ acciderunt in terra, quando acceperunt legem, descendente Deo in montem Sinai; tunc enim terra mota est, et tremore concussa a majestate Domini, quasi trepidare et saltitare videbatur. Quod enim legimus *Exod. ix*: «Erat totus mons terribilis», significat montem tremore suo terrorem aliis incussisse, ut ex textu hebraico et graeco clarius colligitur. Postremo addit aliud miraculum de aquis in magna copia ex petra eductis: «Qui convertit petram in stagna aquarum, et rupem in fontes aquarum.» Sed veniamus ad verba. «Mare vidi, et fugit», id est, ita recessit de loco suo pars illa maris Rubri, ac si a conspectu Domini territa fuisse. «Jordanis conversus est retrorsum.» In libro *Josue* legitur, quod steterit flumen, et in altum instar montis excreverit; sed ex interpretatione Davidis intelligimus, non solum in altum crevisse, sed etiam ex parte refluxisse, et refluxus iste confirmari potest ex eo quod longissimo spatio temporis cessaverit fluere, donec videlicet totus populus commode transiret, qui multa centena millia hominum complectebatur. Itaque si solum in altum crevisset, et non etiam simul ex parte refluxisset, non solum ad instar montis, sed in altitudinem multo maiorem excrevisset. Simul igitur refluebat, ut David canit, et simul erigebatur et stabat, ne fluoret in partem illam, per quam Israelite transibant. «Montes exultaverunt ut arietes, et colles sicut agni ovium», id est, montes Sinai, partes videlicet maiores illius montis, et colles, partes minores ejusdem montis, contremiscere et subsilire visæ sunt instar arietum, vel agnorum repentinae terrore saltantium; quamvis enim vox *exultare* significare soleat gestire

prae lœtitia, tamen hoc loco videtur omnino referendum ad tremorem, tum quia eadem est causa mari ut fugiat, et monti ut saliat: fugere autem timoris est, non lœtitiae; tum quia paulo infra

dicitur: «A facie Domini mota est terra,» quæ verba terrorem indicant, et hunc locum exponunt.

5. QUID EST TIBI, MARE, QUOD FUGISTI? ET TU, VERS. 5.
JORDANIS, QUIA CONVERSUS ES RETRORSUM?

6. MONTES, EXULTASTIS SICUT ARIETES, ET COL- VERS. 6.
LES SICUT AGNI OVIVM.

7. A FACIE DOMINI MOTA EST TERRA, A FACIE VERS. 7.
DEI JACOB.

8. QUI CONVERTIT PETRAM IN STAGNA AQUARUM, VERS. 8.
ET RUPEM IN FONTES AQUARUM.

More poetico interrogat mare quare fugerit, et Jordanem quare conversus sit retrorsum, et montes et colles quare tremuerint; et respondet id fecisse praesentiam virtutis Dei, qui non solum hoc fecit, ut mare fugeret et terra tremeret, sed etiam, quod est mirabilius, unum elementum in alterum transmutavit; convertit enim terream rupem stantem atque durissimam in aquas molllissimas et velocissime discurrentes. «Quid est, inquit, tibi, mare, quod fugisti? et tu, Jordanis,» quid habes, «quod conversus es retrorsum?» et vos, «montes, quare exultastis ut arietes?» et vos, «colles, quasi agni ovium?» «A facie Domini mota est terra.» Haec nimis est causa, quia Dominus apparuit, et vim suam et potentiam manifestavit; et ideo terra, conspectum ejus non sustinens, tota contremuit. «Qui» Dominus «convertit petram in stagna aquarum,» quando Moses percutiente petram, *Num. xx*, egressæ sunt aquæ largissimæ; quod factum est, quia petra, jubente Domino, «conversa est in fontem aquarum.» Quod repetitur et declaratur, cum additur, «et rupem in fontes aquarum.» Significatur enim his verbis, non parvam aliquam et mollem petram, sed rupem saxeam duramque instar silicis conversam fuisse in fontem aquarum.

9. NON NOBIS, DOMINE, NON NOBIS; SED NOMINI VERS. 9.
TUO DA GLORIAM.

Hic incipit secundum Hebreos alias Psalmus; sed nos sequimur distinctionem antiquam Septuaginta Seniorum, quam etiam sequitur S. Hieronymus in sua versione ex hebreo: quod est argumentum, non in omnibus hebraicis codicibus divisi hunc Psalmum in duos. Igitur explicatis mirabilibus Dei, quæ facta sunt in exitu Israel de *Egypto*, precatur Propheta Deum nomine totius populi, ut non respiciat demerita populi, sed gloriam suam, et perget protegere cultores suos. «Non nobis, inquit, non nobis,» id est, non meritis nostris que nulla sunt, gloriam, sive laudem petimus, «sed nomini tuo da gloriam,» id est, propter gloriam nominis tui protege nos, non propter merita nostra.

10. SUPER MISERICORDIA TUA ET VERITATE TUA, VERS. 10.
NE QUANDO DICANT GENTES: UBI EST DEUS EORUM?

Indicat brevissime tres rationes cur Deus de-

beat nominis sui gloriam querere in conservando populo suo : *prima* est, quia ipse misericors est ; *secunda*, quia verax est et fidelis in promissione servanda ; *tertia*, ne detur occasio gentibus blasphemandi, si cultores Dei destitutos videant. Ait igitur, super misericordia tua et veritate tua, » nimirum funda gloriam tuam, sive da gloriam nomini tuo ; inde enim gloria tua demonstrabitur, si ostendes misericordiam erga populum tuum ; et rursus, si implebis veritatem promissorum tuorum, quae fecisti patribus nostris. « Ne forte dicant gentes : Ubi est Deus eorum ? » id est, ne detur occasio gentibus incredulis detrahendi de potentia, vel etiam de existentia tua.

Vers. 11. 11. DEUS AUTEM NOSTER IN COELO; OMNIA QUÆ CUMQUE VOLUIT, FECIT.

Vers. 12. 12. SIMULACRA GENTIUM ARGENTUM ET AURUM, OPERA MANUUM HOMINUM.

Vers. 13. 13. OS HABENT, ET NON LOQUENTUR; OCULOS HABENT, ET NON VIDEBUNT.

Vers. 14. 14. AURES HABENT, ET NON AUDIENT; NARES HABENT, ET NON ODORABUNT.

Vers. 15. 15. MANUS HABENT, ET NON PALPABUNT; PEDES HABENT, ET NON AMBULABUNT: NON CLAMABUNT IN GUTTURE SUO.

Propter id quod dixerat : « Ne forte dicant gentes : Ubi est Deus eorum ? » adjungit pulcherrimam antithesim Dei veri et falsorum deorum. Quasi dicat : Non est danda occasio gentibus blasphemandi ; sed tamen si forte dixerint : « Ubi est Deus eorum ? » nos respondebimus, « Deum nostrum esse in celo, » idque testari mirabilia ejus, quia fecit quidquid voluit ; sed contra dii eorum jacent in terra, et usque adeo nihil possunt facere, ut ne possint quidem exercere actiones membrorum quæ habere videntur ; nam cum habeant figuram humanam, et videantur habere membra omnia et sensus omnes ; tamen nec vident, nec audiunt, nec olfacent, nec palpant, nec ambulant, nec loquuntur, ac ne vocem quidem ullam ex gutture emittunt, si non ut homines, saltem ut jumenta.

Vers. 16. 16. SIMILES ILLIS FIANT QUI FACIUNT EA, ET OMNES QUI CONFIDENT IN EIS.

Hæc prædictio est per modum imprecationis pronuntiata, ut moris est Prophetarum. Vere enim qui faciunt idola, et qui confidunt in eis, similes illis fiant in vita futura post resurrectionem ; nam etiamsi habebunt sensus et membra, tamen sic habebunt quasi non haberent ; imo etiam cupient non habere : nihil enim videbunt, nihil audient, nihil olfacent, nihil palpabunt, nisi quod nollent ; ligatis enim manibus et pedibus, projecti in tenebras exteriorese se commo-
vvere non poterunt. In hac etiam vita similes sunt

^{tra}
Idola- similes quia videntur potius videre et audire,

quam revera videant et audiant, cum non vi-
deant, neque audiant, quæ ad salutem pertinent,
^{hac vita}
et quæ vera bona sunt, ut magis somniare quam
videre, vel audire dicendi sint, iuxta illud *Marc.*
viii : « Oculos habentes non videtis, et aures ha-
bentes non auditis. » Quod si etiam placeat hæc
exponere per modum imprecationis, non pote-
runt pagani conqueri, quia non fit illis injuria,
si eos fieri cupiamus similes diis ipsorum. Monet
autem S. Augustinus hæc quæ supra dicta sunt,
pertinere ad eos paganos, qui credunt ipsa idola
esse deos ; quia vero nonnulli dicebant, non ipsa
idola, sed numen in illis habitans esse colen-
dum, ideo in alio Psalmo, videlicet xcv, dicit :
« Dii gentium dæmonia, Dominus autem celos
fecit ; » et apud Apostolum I *Corinth.* x : « Quæ
immolant gentes, dæmonibus immolant, et non
Deo. » Ex his autem colligimus imagines Sancto-
rum non esse idola, neque earum ^{Sancto} _{rum} ^{rum} _{sunt}
venerationem esse idolatriam, quoniam neque ipsas imagines
deos esse credimus, neque sanctos viros, quos
repræsentant, pro diis habemus.

17. DOMUS ISRAEL SPERAVIT IN DOMINO; ADJUTOR EORUM ET PROTECTOR EORUM EST. Vers. 1

18. DOMUS AARON SPERAVIT IN DOMINO; ADJUTOR EORUM ET PROTECTOR EORUM EST. Vers. 1

19. QUI TIMENT DOMINUM, SPERAVERUNT IN DO-
MINO; ADJUTOR EORUM ET PROTECTOR EORUM EST. Vers. 1

Quia dixerat : « Similes illis fiant qui confidunt
in eis, » adjungit per antithesim, filios Israel con-
fidisse in Domino, et ideo habuisse Deum protec-
torem ; nominat autem primo domum Israelis,
id est, totam gentem hebraicam ; deinde domum
Aaronis, id est, tribum sacerdotalem, quia sacer-
dotes cum levitis cæteris peculiaris portio Do-
mini erant, et specialiter in Deo confidere debe-
bant ; addit postremo omnes timentes Deum,
quoniam non deerant aliqui extra filios Israel,
qui Deum colerent et timerent, quamvis ii pauci
essent : in his numerari solent Job et amici ejus,
et postea Naaman Syrus, et alii.

20. DOMINUS MEMOR FUIT NOSTRI, ET BENEDIXIT VERS. 2
NOBIS.

21. BENEDIXIT DOMUI ISRAEL, BENEDIXIT DOMUI VERS. 2
AARON.

22. BENEDIXIT OMNIBUS QUI TIMENT DOMINUM, VERS. 2
FUSILLIS CUM MAJORIBUS.

Confirmat quod dixerat, Deum adjutorem et
protectorem esse sperantium in se. Ac se ipse
constituit in numero confidentium in Deo, quippe
qui præter cæteros auxilium Dei et protectionem
expertus fuerat. Deinde eodem ordine confirmat
Deum benedixisse domui Israel, domui Aaron et
omnibus timentibus Deum, sive magnis, sive par-
vis, quod intelligi potest de omni magnitudine et
parvitate, sive ætatis, sive potestatis, sive sapien-

Memoria tiae, sive divitiarum. **Memoria** Dei significat hoc loco singularem providentiam erga cultores suos. **Dei quid sit?**

« **Memor**, inquit, fuit nostri, » id est, singulari providentia demonstravit se memorem esse nostri; « et benedixit nobis, » id est, beneficet nobis adjuvando et protegendo. Explicat autem quid sit illud, *nobis*, cum addit *domui Israel*, *domui Aaron*, et *omnibus timentibus eum*.

Vers. 23. 23. ADJICIAS DOMINUS SUPER VOS, SUPER VOS ET SUPER FILIOS VESTROS.

Vers. 24. 24. BENEDICTI VOS A DOMINO, QUI FECIT CÆLUM ET TERRAM.

« Ex abundantia cordis os loquitur, » ut ait D. Lucas cap. vi; quia pectus sancti Prophetæ ardebat desiderio gloriae Dei et salutis proximorum, ideo multiplicat verba, nunc prædicendo, nunc exhortando, nunc bene precando, ut hac ratione accendat homines ad Deum timendum timore sancto, et ad spem omnem in eo colloquendam. Igitur conversus ad timentes Deum, quibus dixit Deum benedixisse, ait: « Adjiciat Dominus super vos, » nimur benedictionem suam, id est, omnium bonorum copiam; nec solum, inquit, « super vos, sed etiam super filios vestros. » Et hoc modo sitis vos benedicti, plena atque perfecta benedictione a Domino, « qui fecit cœlum et terram, » id est, ab eo, in cuius manu est ros cœli et pinguedo terræ. Solebant enim sancti Testamenti veteris precari suis a Domino rorem cœli et pinguedinem terræ, quia omnes fructus terræ nascentur ex fecunditate terræ et ex pluvia cœli. Sed altiore sensu Deus benedicit de rore cœli et de pinguedine terræ, quos bonis cœlestibus et terrenis cumulat, quod fecit erga Abrahamum, Isaacum, Josephum, Davidem, et similes.

Vers. 25. 25. CÆLUM CŒLI DOMINO; TERRAM AUTEM DEDIT FILII HOMINUM.

Vers. 26. 26. NON MORTUI LAUBADUNT TE, DOMINE; NEQUE OMNES QUI DESCENDUNT IN INFERNUM.

Vers. 27. 27. SED NOS QUI VIVIMUS, BENEDICIMUS DOMINO, EX HOC NUNC ET USQUE IN SÆCULUM.

Hi tres versiculi duplice sensum habent: unum accommodatum Hebræis secundum vetus Testamentum; alterum accommodatum Christianis secundum Testamentum novum. Igitur priore sensu posteaquam dixerat: « Benedicti vos a Domino, qui fecit cœlum et terram, » docet æquum esse ut ii, qui benedicti sunt a Domino, benedificant ipsi quoque Dominum, dum vivunt super

terram, quam a Deo incolendam acceperunt, relinquentes angelis officium benedicendi in cœlo, ubi est domicilium Dei, et ministrorum ejus, qui illi coram assistunt. « Cœlum, inquit, cœli Domini, » id est, summum cœlum, quod est super cœlum aereum, Domino proprie dicatum est, et familiaribus ministris ejus angelis sanctis; « terram autem » cum elementis, quæ illi conjuncta sunt, « dedit filiis hominum habitandam; » ac pro tam insigni parte mundi debent filii hominum Deo assidue gratias agere, dum vivunt et bonis terra fruuntur. Nam « non mortui laudabunt te, Domine; » mortui enim, cum sensibus corporis careant, neque fruantur amplius terræ bonis, imo nec vivant secundum corpus, non laudant Dominum ore corporali, neque pro rebus terrenis gratias agunt. « Neque omnes qui descendunt in infernum, » id est, non solum mortui, qui jacent in sepulcris non laudant Dominum, sed neque illi « qui descendunt in infernum, » id est, spiritus mortuorum, qui descendunt in variis inferni regiones, Dominum benedicent pro terrenis bonis, quæ ad illos jam pertinent; « sed nos qui vivimus » in terris, et fruimur terrenis bonis, « benedicimus Domino, ex hoc nunc et usque in sæculum, » per generationes sibi invicem succedentes. At sensu christianis accommodato secundum promissiones Testamenti novi, dicendum est, per *cœlum cœli*, intelligi supremam partem cœli, ubi est domus filiorum Dei, de qua dicit Apostolus II Cor. v: « Scimus, quoniam si terrestris domus nostra hujus habitationis dissolvatur, ædificationem ex Deo habemus domum non manufactam, æternam in cœlis; » vel cum S. Augustino, per *cœlum cœli* intelligere possumus mentes justorum angelorum et hominum, in quibus Deus habitat per cognitionem et amorem: hanc domum sibi Deus elegit; « terram autem, » id est, mundum hunc visibilem dedit « filiis hominum, » prout distinguuntur a filiis Dei; et ideo subjungitur: « Non mortui laudabunt te, Domine, » id est, qui mortui sunt morte peccati, etiamsi vivant vita naturali, non laudabunt te, Domine, « neque omnes qui descendunt in infernum, » qui in morte peccati confirmati sunt, et ad poenas æternas descendedunt; « sed nos qui vivimus » vita gratiæ, qui per fidem et charitatem tibi inhæremus, et jam cœlestis patriæ cives sumus, quamvis interim ad tempus habitemus in terra, nos, inquam, « benedicimus tibi, » et benedicimus « usque in æternum. » Vide Chrysostomum hanc expositionem eleganter consequentem.

PSALMUS CXVI

SECUNDUM HEBRÆOS.

V. v. — *Alleluia.*

1. Dilexi, quoniam exaudiet Dominus vocem orationis meæ.

2. Quia inclinavit aurem suam mihi, et in diebus meis invocabo.

3. Circumdederunt me dolores mortis, et pericula inferni invenerunt me.

Tribulationem et dolorem inveni : 4. et nomen Domini invocavi.

O Domine, libera animam meam. 5. Misericors Dominus, et justus, et Deus noster misereatur :

6. Custodiens parvulos Dominus. Humiliatus sum, et liberavit me.

7. Converttere, anima mea, in requiem tuam : quia Dominus benefecit tibi :

8. Quia eripuit animam meam de morte, oculos meos a lacrymis, pedes meos a lapsu.

9. Placebo Domino in regione vivorum.

V. s. h.

Dilexi quoniam exaudiet [al. *audiet*] Dominus vocem deprecationis meæ.

Quoniam inclinavit aurem suam mihi, et in diebus meis invocabo.

Circumdederunt me funes mortis, et munitiones inferni invenerunt me.

Angustiam et dolorem reperi, et nomen Domini invocabo.

Obsecro, Domine, salva [h. *eripe*] animam meam : clemens Dominus, et justus : et Deus noster misericors [h. *pius*].

Custodit parvulos Dominus : attenuatus sum, et salvavit me.

Revertere, anima mea, in requiem tuam : quia Dominus reddet tibi.

Quia eruet animam meam de morte, oculos meos a lacrymis, pedes meos ab offensa.

Deambulabo coram Domino, in terris viventium.

PSALMUS CXV.

Vulg. — *Alleluia.*

1. Credidi, propter quod locutus sum : ego autem humiliatus sum nimis.

2. Ego dixi in excessu meo : Omnis homo mendax.

3. Quid retribuam Domino, pro omnibus quæ retribuit mihi?

4. Calicem salutaris accipiam, et nomen Domini invocabo.

5. Vota mea Domino reddam coram omni populo ejus.

6. Pretiosa in conspectu Domini mors sanctorum ejus.

7. O Domine, quia ego servus tuus, ego servus tuus, et filius ancillæ tuæ.

8. Dirupisti vincula mea : tibi sacrificabo hostiam laudis, et nomen Domini invocabo.

9. Vota mea Domino reddam in conspectu omnis populi ejus,

10. In atriis domus Domini, in medio tui, Jerusalem.

Credidi propter quod [h. *quia*] locutus sum : ego afflictus sum nimis.

Ego dixi in stupore meo : Omnis homo mendacium [h. *mentitur*].

Quid reddam Domino, pro omnibus quæ retribuit mihi?

Calicem salutaris [al. *salutis*] accipiam, et nomen Domini invocabo.

Vota mea Domino reddam coram omni populo ejus.

Gloriosa in conspectu Domini [h. *preciosa in oculis Domini*] mors sanctorum [h. *misericordium*] ejus.

Obsecro, Domine, quia ego servus tuus, ego servus tuus, filius ancillæ tuæ.

Dissolvisti vincula mea : tibi immolabo hostiam laudis [h. *confessionis*], et in nomine Domini invocabo.

Vota mea Domino reddam in conspectu omnis populi ejus,

In atriis domus Domini, in medio tui, Jerusalem. Alleluia.

Argumentum. — E recentioribus esse hoc carmen, praeter formam chaldaicam vers. 12, aliasque recentioris etatis formas (vers. 7, 19) loci suadent aliunde sumpti: vers. 3 (cf. *Ps. xviii*, 5), 8, 9 (cf. *lvi*, 14), 11 (cf. *xxxii*, 23), 15 (*lxxii*, 14). Strophæ duæ: vers. 1-11, liberavit me Jova ex summa miseria; vers. 12-19, pro tanto in me collato beneficio illi ego ante omnium oculos maximas exsolvam gratias.

1. *Eo delector, quod audit Jova
vozem meam, preces meas.*
2. *Nam inclinavit aurem suam ad me,
ideo per dies meas invocabo eum.*
3. *Cingebant me funes mortis,
et angustiae orci (vitæ discrimina) invenerant me,
calamitatem et ærumnas inveneram.*
4. *Et nomen Jovæ invocavi :
« o Jova, eripe animam meam ! »*
5. *Benignus est Jova et justus,
et Deus noster misericors est.*
6. *Tuetur simplices Jova :
debilis (exhaustus) eram, et me adjuvit.*
7. *Redi, anima mea, ad quietes tuas,
nam Jova benefecit tibi.*
8. *Nam liberasti, o Jova, animam meam a morte,
oculum meum a lacrymis,
pedem meum ab impulsione *ad lapsum*.*
9. *Ambulabo coram Jova (ei serviam)
in terris viventium.*
10. *Fidem habui (in Deo), quamvis dicerem :
« Ego afflictus sum valde. »*
11. *Dixi ego in trepidatione mea :
« Omnis homo mentiens est (fallit). »*

12. *Quomodo rependam Jovæ
omnia beneficia ejus in me *collata*?*
13. *Calicem salutis accipiam,
et nomen Jovæ invocabo.*
14. *Vota mea Jovæ persolvam;
coram universo populo ejus.*
15. *Pretiosa est in oculis Jovæ
mors cultorum ejus.*
16. *O Jova ! sane (gall. *oui*) ego servus tuus,
ego servus tuus, filius servæ tuæ;
solvisti vincula mea.*
17. *Tibi sacrificabo sacrificium laudis (gratiarum actionis),
et nomen Jovæ invocabo.*
18. *Vota mea Jovæ persolvam
coram universo populo ejus,*
19. *In atriis domus Jovæ,
in medio tui, Hierosolyma.
Laudate Jovam.*

NOTÆ.

Vers. 1. Hengstenb. *Diligo Deum, nam Deus; alias, diligo Deum, ideo exaudit.* Alii, *vocem (iod parag.) precum mearum.* — Vers. 6. *Simplices* vocat qui rerum imperiti, aut saltem sibi parum confidentes, totos se Dei tutelæ committunt. — Vers. 7. *Quieutes tuas* (cum *iod* parag.), i. e. quiesce jam, depone dolorem; vel *quietes tuas*, i. e. Deum; alias: i. e. *Hierosolymam*. — Vers. 10. Vel, *fidem habebam, quando*, etc. Alii, *ita ut dicerem;* alias, *ideo fiducialiter loquar, quamvis afflictus sim valde.* — Vers. 11. Alius, *ego loquar, inquam, vel dixi. Omnis homo, etc.* idem ac: *vana salus hominis.* — Vers. 13. Pro salute accepta cœnam sacrificalem instituam, in qua calicem convivis propinabo: cf. *Matth. xxvi, 27; Luc. xxii, 17, 18.* — Vers. 13. *Pretiosa*, i. e. non facile Deus concedit, ut cultores sui pereant, me servavit. — Vers. 16. *Sane. Mau- rer particulari ki vult esse precantis, non affirmantis, vertitque, ah, Jova!* clementer excipe grati animi significationem! *nam ego, etc.*

BELLARMINI EXPLANATIO.

PSALMUS CXIV.

TITULUS ET ARGUMENTUM.

Alleluia.

Psalmum hunc exponunt aliqui cum Hebræis de temporali aliqua pressura, vel morbo, a quo liberari cupiebat Prophetæ. Sed nos cum SS. Patribus, Basilio, Chrysostomo, Hieronymo, Augustino, existimamus intelligendum Psalmum esse de homine spirituali sitiente salutem æternam, et gente propter tentationes et pericula.

EXPLICATIO PSALMI.

Vers. 1. 1. DILEXI, QUONIAM EXAUDIET DOMINUS VOCEM ORATIONIS MEÆ.

Anima ardens desiderio Domini absolute dicit: « Dilexi, » et non explicat quem, quoniam existimat omnes alias similiter amare rem undecumque amabilem, ac proinde scire quem dicere velit. Sic B. Maria Magdalena, *Joan. xx*, interroganti: « Quem queris? » respondit: « Domine, si tu sustulisti eum, dico mihi, » et non declarat quem querat, et quem sublatum doleat, quia putabat omnes amare quem ipsa amabat, et sollicitos de illo esse, de quo ipsa sollicita erat. Et vere cum omnia bonum appetant, ut dicitur initio *Ethicorum*, et in solo Deo sit omnis ratio boni, et absit ab eo omnis ratio mali, quod significavit B. Joannes, cum ait in prima *Epist. cap. I*: « Deus lux est, et in eo tenebrae non sunt ullæ, » deberent homines Deum absolute amare: et cum audiant: « Dilexi, » intelligere deberent dilectionem summi boni significari. Sed tamen David, ex ratione quam reddit, satis indicat se de dilectione Dei esse locutum; ait enim: « Dilexi, quoniam exaudiet Dominus vocem orationis meæ, » id est, dilexi Dominum, quoniam benignus et misericors est, et ex naturali sua benignitate exaudiens vocem orationis meæ. Magna causa diligendi, quod altissimus Dominus, et qui rerum nostrarum non indiget, tam facilis sit ad audiendas preces vilissimorum servorum, ut se-

cure promittere nobis possimus audientiam, quod in *Psalm. LXXXV* clarius exprimitur, cum dicitur: « Quoniam tu, Domine, suavis et mitis, et multæ misericordiæ omnibus invocantibus te. » Sensus igitur est: Dilexi Dominum, quoniam certus sum quod exaudiens vocem orationis mee.

2. QUA INCLINAVIT AUREM SUAM MIHI, ET IN VERS. 2. DIEBUS MEIS INVOCABO.

Declarat unde didicerit Deum exauditurum preces suas, dicens: Inde scio, quia ipse prævenit me, ipse invitavit, dum « inclinavit ad me aures suas; » quorsum enim inclinaret ad os meum aurem suam, nisi me audire paratus esset? Porro Deus inclinat aures ad nos, quando inspirat nobis orationem; neque enim nos oraremus, nisi Deus per gratiam prævenientem inspiraret desiderium orandi. Igitur David assuetus internis vocationibus, ex desiderio orandi sibi ecclésia inspirato intellexit aurem Domini ad se inclinatam; et ideo etiam adjungit: « Et in diebus meis invocabo, » id est, dum afflgent mihi dies gratiæ Dei, et in hac luce video aurem Domini ad me inclinatam, non omittam occasionem, sed invocabo Dominum. Vocab enim dies suos, dies illos, quibus luce prævenientis gratiæ fruebatur: absente enim luce gratiæ nox succedit diei, de qua dicitur: « Venit nox, in qua nemo potest operari, » *Joan. ix. S. Joannes Chrysostomus, per illud, in diebus meis*, intelligit omnibus diebus vite meæ.

S. Augustinus per *dies meos* intelligit dies hujus mortalitatis, qui nostri dies dicuntur, quia nos ipsi peccando nobis illos fecimus.

Vers. 3. 3. CIRCUMDEDERUNT ME DOLORES MORTIS, ET PERICULA INFERNI INVENERUNT ME.

Explicat nunc materiam suæ orationis, quæ sunt tentationes et pericula salutis æternæ, quas solas tribulationes magni pendit anima vere Deum diligens. In Psalm. xvii, similia verba exposuimus de periculis mortis corporalis, quoniam titulus Psaltri ad id cogebat; sed hic Psalmus, qui nihil habet in titulo, nisi *alleluia*, ad sublimiorem intelligentiam nos invitat. Ait igitur: « Circumdederunt me dolores mortis, » id est, undique tentationes mortiferæ me circumstant, ut compellar clamare cum Apostolo ad Rom. vii: « Quis me liberabit de corpore mortis hujus? » In hebreo est vox ambigua, quæ et *funes*, sive *laqueos*, et *dolores*, significare potest; et vere tentationes mortiferæ funes sunt, sive laquei mortis, et etiam dolores mortis, quia ex illis viri pii dolorem concipiunt, qualis est in illis qui mortem sibi vident imminentem. Declarat paulo apertius, cum addit, « pericula inferni invenerunt me; » nam ex hoc periculo omnium periculorum maximo concipiunt dolores mortis, qui in illo adhuc se versari cogitant. Vox hebraica proprie *angustias inferni* significat, qua voce designatur locus angustus, per quem qui graduntur, in periculo præcipiti versantur, nisi singulos gressus vigilantissime observent, et talis est via salutis, arcta atque angusta; unde nullo negotio in præcipitum inferni ruunt, qui non caute ambulant. Unde monet Apostolus: « Videlicet quomodo caute ambuletis, » ad Ephes. v.

Vers. 4. 4. TRIBULATIONEM ET DOLOREM INVENI, ET NOMEN DOMINI INVOCAVI.

Multi sunt, qui circumdati sunt laqueis mortis et periculis inferni, et non advertunt, occupati fortasse prosperitatibus sæculi, et quo magis circumdati sunt ejusmodi periculis, eo minus ea considerant, et ideo neque timent, neque dolent; David autem ea considerabat, et considerando invenerat ubi esset, et ideo tremens ac dolens dicebat: « Tribulationem et dolorem inveni, et nomen Domini invocavi, » id est, tribulationem et dolorem inveni, quia blandiente licet sæculi prosperitate et felicitate, tamen adverte me circumdatum esse funibus et doloribus mortis, et periculis inferni expositum esse; ideo gemens nomen Domini invocavi, et dixi: « O Domine! libera animam meam. » S. Basilius paulo aliter exponit, ut sensus sit: « Circumdederunt me dolores mortis, et pericula inferni invenerunt me, » id est, peccatum mortale commisi, unde in mortem animæ incidi, et inferno propinquavi; sed ego tribulationem et dolorem pœnitentiae salutaris inveni, et hoc modo corde contrito et animo

contribulato nomen Domini invocavi, dicens: « O Domine! libera animam meam. »

5. O DOMINE! LIBERA ANIMAM MEAM: MISERICORS DOMINUS ET JUSTUS, ET DEUS NOSTER MISERETUR.

Dixerat: « Nomen Domini invocavi; » nunc subjicit ipsa verba invocationis: « O Domine! libera animam meam, » nimirum de doloribus mortis et periculis inferni. In hebreo est particula non solum vocantis, sed etiam obsecrantis, nimirum *ana*. Itaque potuisse verti: *Obsecro, Domine, libera animam meam;* sed idem est sensus. Deinde, ut ostendat se bona spe invocasse Dominum, addit quasi rationem, dicens: « Misericors Dominus et justus, » supple *est*, et Deus noster miseretur: » Misericors Dominus est, quia prævenit peccatorem gratia sua, dum ei pœnitentiam et orationem inspirat; ipse enim prior dilexit nos, ut dicit Apostolus Joan. iv. Justus etiam est, quia non sine flagello dimittit: « flagellat enim omnem filium quem recipit, » ut ait Paulus *ad Hebr.* ix; et iis ignoscit, qui sibi ipsi non ignoscunt; et tandem « Deus noster misereatur, » quia recipit quem flagellavit, et non solum peccata indulget, sed hæredem facit. S. Joannes Chrysostomus scribit, Deum dici misericordem et justum, quia semper admiscet misericordiam justitiae, et justitiam misericordiæ, et addit: « Deus noster misereatur, » quia Deus magis pronus est ad miserandum, quam ad puniendum.

6. CUSTODIENS PARVULOS DOMINUS; HUMILIATUS VERS. 6. SUM, ET LIBERAVIT ME.

Miseretur Dominus, ut paulo ante dictum est, sed præcipue parvulis timentibus eum; id enim in Psalm. cxi clarius habetur, cum dicitur: « Secundum altitudinem cœli a terra corroboravit Dominus misericordiam suam super timentes se. » Item: « Sicut miseretur pater filiorum, misertus est Dominus timentibus se. » Quod idem legimus in cantico Virginis Beiparæ, Luc. i: « Et misericordia ejus a progenie in progenies timentibus eum. » Quoniam igitur verba illa ultima versiculi superioris: « Et Deus noster miseretur, » intelliguntur de miseratione paterna, ut sonat vox hebraica *merachem*, ideo nunc declarat quos respiciat ista paterna miseratio, ac dicit respicere parvulos, id est, mites et humiles, ac timentes Deum filiali timore. « Custodiens parvulos Dominus, » id est, Dominus ex paterna miseratione custodiens est parvulos suos, quasi teneros filios, quibus æternam hæreditatem paravit. Et quoniam David non ignorabat testimonium reddente Spiritu Sancto spiritui ejus, se unum ex illis esse, addidit, « humiliatus sum, » id est, ex parvulis esse studui; et tandem concludit, « liberavit me, » quod de liberatione in spe intelligi debet, præsertim cum in hebreo sit in futuro, *et liberabit me.*

Vers. 7. 7. CONVERTERE, ANIMA MEA, IN REQUIEM TUAM,
quia DOMINUS BENEFECIT TIBI.

Liberatus homo justus in spe, gratulatur sibi ipsi tantum bonum, dicens : « Convertere, anima mea, in requiem tuam, » id est, festina passibus desiderii ad locum vere ac sempiternæ quietis, ad cœlestem Jerusalem, ad sinum veri Abraham,

Vita aeterna habetur, quoniam Dominus retribuit super te; quo est coro-verbo significatur vita aeterna esse corona justitia, et merces operum bonorum, ut hoc loco notia, et tavit S. Basilius. Ita que textum Vulgati interpretis merces bonorum ex hebraica proprietate explicare licebit.

Vers. 8. 8. QUA ERIPUIT ANIMAM MEAM DE MORTE, OCULOS MEOS A LACRYMIS, PEDES MEOS A LAPSI.

Declarat quid sit bonum illud magnum, sive magna illa retributio, de qua dictum est : « Benefecit tibi, » sive « retribuit tibi, » ac dicit esse vitam beatam et sempiternam. « Qui eripuit animam de morte, » id est, eripuit a morte, et donavit vitam; « oculos meos a lacrymis, » id est, dedit vitam non subjectam ulli malo, sed cumulatam omni bono; « absterget enim Deus omnem lacrymam ab oculis eorum, » ut dicitur Apoc. XXI. Et pedes meos a lapsu, » id est, dabit vitam non solum felicem, sed etiam securam ac sempiter-

nam, ut ab ea excidere nunquam possim. Ita liberabit a doloribus mortis et a periculis inferni, et in vita felicissimæ æternitate et securitate constituet.

9. PLACEBO DOMINO IN REGIONE VIVORUM.

Vers. 9.

Concludit Psalmum, dicens quod, quemadmodum ipse secure possidebit vitam optimam et dulcissimam, quæ vehementer ipsi placebit: ita etiam placebit ipse Domino vehementer et secure « in regione vivorum. » Dicit, *regio vivorum*, ubi omnes ab omni parte vivunt, et ideo placent omnibus modis Deo viventi: nam in hac peregrinatione multi mortui sunt, « et qui vivunt, secundum spiritum vivunt, non secundum corpus, quod propter peccatum mortuum est, » Rom. VIII; unde clamat Apostolus Rom. VII: « Quis me liberabit de corpore mortis hujus? » In hebreo habetur: *Ambulo coram Deo in terris viventium*. Sed idem est sensus: nam *ambulare coram Deo* est placere oculis Dei, recte et juste vivendo. Sic legimus Gen. V: « Ambulavit Henoe cum Deo; » et Gen. VI: « Noe fuit vir justus, atque perfectus, cum Deo ambulavit; » et Gen. XVII: « Ambula coram me, et esto perfectus; » et Luc. I: « Ut sine timore de manu inimicorum nostrorum liberati, serviamus illi in sanctitate et justitia coram ipso, omnibus diebus nostris. »

Regio
vivorum
quæ sit?

BELLARMINI EXPLANATIO.

PSALMUS CXV.

TITULUS ET ARGUMENTUM.

Alleluia.

Hunc Psalmum Hebrei partem esse volunt Psaltri superioris: sed nos distinctionem Septuaginta Seniorum sequimur: nec tamen negamus hunc Psalmum immediate subjungendum esse superiori, ut S. Basilius monet. Agit enim Propheta gratias Deo, et vota se persoluturum pollicetur pro salute aeterna, quam bona spe jam possidere cepit.

EXPLICATIO PSALMI.

Vers. 1. 1. CREDIDI, PROPTER QUOD LOCUTUS SUM : EGO AUTEM HUMILIATUS SUM NIMIS.

Respicit ad verba illa : « Placebo Domino in regione vivorum; » et quasi aliquis interrogasset: Unde nosti regionem vivorum? respondet se novisse per spiritum fidei. « Credidi, inquit, esse regionem vivorum » quamdam, licet oculis ea non videatur, et propter hanc fidem dixi : « Placebo Domino in regione vivorum. » Citavit hunc locum Apostolus II Cor. IV: « Habentes, inquit, eundem spiritum fidei, sicut scriptum est : Credidi propter quod locutus sum; et nos credimus, propter quod et loquimur, scientes quoniam, qui suscitavit Jesum, et nos cum Jesu sus-

citabit, et constituet vobissem. » Ubi B. Paulus docet, ex spiritu fidei, non ex ulla humana demonstratione, cognosci resurrectionem corporum et veram viventium regionem, in qua cum Domino Iesu constituendi sumus. Et quoniam haec fides requirit animam vere humilem, quæ se Spiritui Sancto plene subjiciat ad obedientiam fidei, subjungit : « Ego autem humiliatus sum nimis, » id est, ego vero ideo credidi, quia non ingenio meo nitor, sed valde humilem ac docilem me Spiritui Sancto praestili. Sic enim et Dominus ait Matth. XI: « Confiteor tibi, Pater, Domine cœli et terræ, quia abscondisti haec a sapientibus et prudentibus, et revelasti ea parvulis; » et in alio loco : « Quomodo vos potestis credere,

qui gloriam ab invicem accipitis? » *Joan. cap. v.*

Vers. 2. 2. EGO DIXI IN EXCESSU MEO : OMNIS HOMO MENDAX.

Varie admodum hunc versiculum exponunt autores, ut alii referant ad quamdam quasi desperationem regni obtinendi, quod Samuel Davidi promiserat, et in excessu quodam turbatus dixerit: « Omnis homo mendax, » videlicet, ut etiam Samuel mentitus videatur; alii referant ad populum in captivitate Babylonica constitutum, et desperantem de promissis Prophetarum; alii alter exponant. Sed non video quomodo ista, et alia id genus, cohærent cum reliquis partibus hujus Psalmi. Ideo magis probo sententiam Euthymii, qui haec refert ad excessum mentis, per quem Propheta ascenderit ad notitiam regionis vivorum, et dixerit in comparatione ejus regionis mendacium esse quidquid homines loquuntur de felicitate humana. « Ego, » inquit, qui humiliavi me valde, exaltatus a Domino ad mentis excessum, « in eo excessu, » videns quam falsa et fallacia sint, quæ videntur hominibus vera et solida bona, « dixi : Omnis homo mendax, » id est, omnis homo, qui humano affectu loquitur de felicitate, et magni aestimat bona mortalia et eaduca, mendax est: vera enim et stabilia bona non inveniuntur nisi in regione vivorum. Ex hac expositione cessat objectio, quam nomine sophistarum sibi ipse proposuit magnus Basilius: Si omnis homo mendax, igitur et David, qui est homo, mendax est; ergo mentitur cum dicit: « Omnis homo mendax, » ac per hoc sibi ipse contradicit, et dictum suum ipse destruit; hoc, inquam, sophisma cessat, quia per hominem intelligitur hoc loco homo humano affectu loquens, non autem homo loquens spiritu divino afflatus. Posset etiam dici aliud esse hominem semper mentiri, aliud esse mendacem: potest enim homo mendax aliquando vera loqui, praesertim si non ex se, sed spiritu Dei loquatur: mendax enim dicitur homo, quoniam ex natura sua obnoxius est errori et falsitati. Quomodo intelligitur, quod scribit Apostolus ad Rom. iii: « Est autem Deus verax, omnis autem homo mendax, » id est, solus Deus mentiri nequit, homines autem omnes mendacio sunt obnoxii; sed non continuo sequitur ut perpetuo mentiantur.

Vers. 3. 3. QUID RETRIBUAM DOMINO, PRO OMNIBUS QUÆ RETRIBUIT MIHI?

Animadvertis tantis se bonis cumulatum, cum et regionem vivorum Dei beneficio agnoverit, et in eam se ingressurum sperare cœperit, imo ac si jam ingressus esset, præ laetitia exultaverit, querit quid Domino retribuere possit. « Quid, inquit, retribuam Domino pro his quæ retribuit mihi? » Ille me de nihilo fecit, ille de iniuritate redemit, ille regionem viventium demonstravit, ille mihi etiam se daturum promisit; quid igitur

illi retribuam? Quod autem dicit, *retribuit mihi*, potest simpliciter accipi pro *tribuit*, ut exponit Euthymius; vel cum S. Augustino, notari liberalitas et misericordia Dei, qui tanta bona tribuit pro tantis malis.

4. CALICEM SALUTARIS ACCIPIAM, ET NOMEN Vers. 4.
DOMINI INVOCABO.

Non desunt, qui hunc calicem exponant de sacrificio legis veteris, quod liquoribus et libaminibus continebatur; vel de calice conviviali, quo in memoriam acceptæ salutis utebantur; sed ista levia sunt, et SS. Patres Basilius, Chrysostomus, in 2 expositione, Hieronymus, Augustinus, et cum iis Theodoretus et Euthymius magno consensu de calice patientiae et passionis hunc locum intelligunt, de quo calice Dominus, *Matth. xx.*, dixit: « Potestis bibere calicem quem ego bibiturus sum? » et *Matth. xxvi*: « Transeat a me calix iste; » et *Joan. xviii*: « Calicem quem dedit mihi Pater, non vis ut bibam illum? » Nec solum in Testamento novo, sed etiam apud Prophetas passim accipitur calix pro amara potionе tribulationis, ut *Psalm. lxxiv*: « Quia calix in manu Domini vini Calix pro plenus mixto; » et *Isai. li*: « Elevare, Hierusalem, quæ bibisti de manu Domini calicem iræ ^{amara potionе} ejus; » et *Hierem. xxv*: « Sume calicem vini furoris ^{seপ্তম} hujus de manu mea; » et *Ezech. xxiii*: « Haec dicit Dominus Deus : Calicem sororis tuæ bipes profundum et latum : eris in derisum et in subsanationem, et bipes illum, et epotabis usque ad faeces; » et *Habac. ii*: « Repletus es ignominia pro gloria; bibe tu quoque, et consopire, circumdabit te calix dexteræ Domini, et vomitus ignominiae super gloriam tuam. » Dicit igitur vir justus et amator Dei: Cum nihil habeam prestantius, quod offeram Deo meo, pro tam multis bonis, quæ retribuit mihi, « calicem salutaris accipiam, » id est, bibam libenti animo calicem Domini quantumvis amarum, sive tribulationes, sive pericula, sive mortem ipsam pro suo honore sustinere me velit: scio enim calicem hunc amarum quidem, sed salutarem futurum. Et quia de meis viribus non confido, sed in Domini adjutorio omnia possum ideo, « nomen Domini invocabo, » ut det mihi calicem suum intrepide haurire. Vocat autem Propheta, *calicem salutaris*, calicem salutis, id est, calicem salutiferum. Confirmat hanc expositionem consuetudo Ecclesiæ, quæ hunc Psalmum in Martyrum solemnitatibus cantare solita est.

5. VOTA MEA DOMINO REDDAM CORAM OMNI PO-
VERS. 5.
PULO EJUS : PRETIOSA IN CONSPPECTU DOMINI MORS
SANCTORUM EJUS.

Paratus ad calicem passionis bibendum securus dicit: Sacrificium laudis et confessionis Domini, non in angulis solum, et in cubiculis, sed palam et publice coram omni populo ejus, inimicis etiam presentibus, immolabo, etiamsi mortem

In quo
sensu
omnis
homo sit
mendax?

inde mihi imminere intelligam. « Pretiosa enim in conspectu Domini mors sanctorum ejus, » id est, magni estimat Dominus mortem Sanctorum pro suo honore et confessione susceptam : quomodo apud homines magni fiunt gemmæ pretiosæ, quibus regum diademata ornari solent, et quibus nihil clarius apud homines invenitur. Expendit hoc loco S. Basilius gloriam martyrum, quorum non solum animæ mox coronantur in cœlis, sed etiam reliquiæ corporum in maximo liquatione habentur in terris, antea siquidem qui tantum cultus hic probatur. autem, qui ossa martyrum contingit, sanctificationem acquirit.

Vers. 6. 6. O DOMINE! QUA EGO SERVUS TUUS, EGO SERVUS TUUS ET FILIUS ANCILLÆ TUÆ.

Non superbit vir sanctus, qui se totum Deo in sacrificium offert, sed agnoscit debitum servitutis, et juxta mandatum Domini dicit : Servus inutilis sum ; quod debui facere feci. « O Domine ! » inquit, quid magnum feci, quod vota mea publice reddidi, neque ob timorem mortis confessionem tuam omisi ? quod debui facere feci, « quia ego servus tuus sum, » redemptus de captivitate diaboli pretioso sanguine filii tui ; « ego, inquam, servus tuus sum, » non solum redemptionis gratia, sed etiam dono creationis, « sed et filius sum ancillæ tuæ, » id est, non emptius tantum, sed et vernacula, quia et mater mea ancilla tua est, duplice illo nomine, et creationis et redemptionis. Dicit autem, filius ancillæ tuæ, non filius servi tui, quia servitus sequitur ventrem : nam si liber ex ancilla gignat filium, ille filius servus nascitur. Unde Sara Abrahamo dixit : « Ejice ancillam et filium ejus ; non enim erit hæres filius ancillæ cum filio meo Isaac, » Gen. xxi. Itaque Ismael servus erat, quia matrem habuit ancillam, quamvis patrem haberet liberum, videlicet Abramum. S. Augustinus per ancillam intelligit Ecclesiam, que est mater nostra, ancilla ex naturæ debito, et libera ex gratiæ munere.

Servitus
sequitur
ventrem.

Vers. 7. 7. DIRUPISTI VINCULA MEA : TIBI SACRIFICABO HOSTIAM LAUDIS, ET NOMEN DOMINI INVOCABO.

Docet servum se Domini esse, sed servitute bona, erutum autem a servitute mala. Quomodo Dominus in Evangelio hortatur eos qui laborant, et onerati sunt, ut tollant jugum suum, « quia jugum ipsius suave est, et onus ejus leve, » Matth.

cap. xi; non liberat omnino a jugo et onere, sed tollit jugum asperum, ut imponat jugum suum suave, et aufert onus grave, ut imponat onus leve ; ita omnino dirupit Deus vincula, quibus a Satana alligabamur, vincula peccatorum et onera cupiditatum, quibus ad inferos deprimebamur : et alligat jugo suavi legis divinæ, et onere levissimo charitatis, quo in altum evehimur et exaltamur ad cœlum. « Dirupisti, inquit, vincula mea, » id est, liberasti a servitute durissima, et servum tuum esse voluisti, cui servire, regnare est. Ideo tibi « sacrificabo hostiam perpetuae laudis, » et non amplius invocabo falsos deos, mammonam videbilem et ventrem, opes et honores, quibus antea serviebam ; « sed nomen Domini, » qui solus verus est Deus, assidue « invocabo. »

8. VOTA MEA DOMINO REDDAM IN CONSPPECTU Ver. 8. **OMNIS POPULI EJUS, IN ATRIIS DOMUS DOMINI, IN MEDIO TUI HIERUSALEM.**

Hæc repetitio est quinti versiculi : « Vota mea Domino reddam coram omni populo ejus ; » additur enim, « in atriis domus Domini, in medio tui, Hierusalem, » ad significandum, ut S. Augustinus monet, debere servum Dei offerre vota sua, confessionem suam, et seipsum Deo, intra Ecclesiam, quæ per Hierusalem significatur : qui enim extra Ecclesiam id faciunt, nihil faciunt ; nam, ut scribit S. Cyprianus in lib. *De Unitate Ecclesiæ*, hæretici occidi possunt, coronari non possunt ; et eorum mors non est fidei corona, sed pœna perfidiae. Posset fortasse hic versiculus referri ad celestem Hierusalem, ut sicut supra dictum est : « Vota mea Domino reddam coram omni populo ejus, » de confessione in terris : ita nunc in fine Psalmi tale aliquid dicatur de confessione laudis et votis gratiarum actionis, quæ reddetur in cœlis ; ut hic sit sensus : « Vota mea Domino reddam, » id est, et tandem diruptis vineulis omnibus, et ad perfectam libertatem filiorum Dei vocatus, sacrificium laudis et gratiarum actionis « immolabo in conspectu omnis populi ejus, » jam glorificati in cœlis, « in atriis domus Domini, » id est, in ingressu domus Dei, de qua dicitur in Psalm. lxxxiii : « Beati qui habitant in domo tua, Domine, in sæcula sæculorum laudabunt te, » nec solum in atriis, sed etiam in domo, quæ domus in medio tui est, o superna gloriosa Jerusalem, quæ patria nostra es, ad quam ex peregrinatione quotidie suspiramus.

PSALMUS CXVII

SECUNDUM HEBRAIOS.

V. v. — *Alleluia.*

1. Laudate Dominum, omnes gentes; laudate eum, omnes populi.

V. s. II.

Laudate Dominum, omnes gentes; collaudate eum, universi populi [*h. plebes*].

2. Quoniam confirmata est super nos misericordia ejus, et veritas Domini manet in æternum.

Quia confortata est super nos misericordia ejus, et veritas Domini in æternum. Alleluia.

Argumentum. — Excitantur omnes populi ad celebrandum Jovam. « Brevitas Psalmi probabilem facit conjecturam, adhibitum illud fuisse vel ut ἔπειτα, quo populus finitis sacris dimitteretur, vel sub sacrorum initium, ante solemnissimum canticum, populi excitandi causa, fuisse decantatum. » Rosenmull. Posset etiam cantus fuisse interjectus inter strophas singulas longiorum carminum. In pluribus libris scriptis et editis junctus est Psalmus sequenti.

1. Laudate Jovam, omnes gentes;
celebrate eum, omnes populi.
 2. Nam magnificata est (prop. *invaluit*) super nos gratia ejus,
et fides Jovæ *manet in æternum*.
- Laudate Jovam.

BELLARMINI EXPLANATIO.

PSALMUS CXVI.

TITULUS ET ARGUMENTUM.

Alleluia.

Hunc Psalmum omnium brevissimum declarat Apostolus *ad Rom. v, 1*, ubi dicit, « Christem fuisse ministrum circumcisio[n]is ad confirmandas promissiones patrum; gentes autem super misericordia honorare Deum, » et allegat hæc verba: « Laudate Dominum, omnes gentes, et magnificate eum, omnes populi. » Ex quo intelligimus Prophetam hoc loco alloqui totam Ecclesiam ex gentibus et Iudeis congregatam, eamque hortari ad laudandum Deum, quod misericordiam et veritatem erga eum ostenderit. Sed observandum est cum Apostolus dicit, « gentes super misericordia debere honorare Deum, » ad Iudeos autem pertinere veritatem, quam Deus ostendit confirmando promissiones patrum, non esse sensum, ad Iudeos non pertinere misericordiam, sed ad gentes pertinere solam misericordiam, ad Iudeos autem misericordiam et veritatem; quia licet miserit Deus ad Iudeos Messiam, ut impletet promissiones patrum, tamen promissiones non *ex meritis* eorum, sed *ex mera misericordia* processerunt. Sic enim cecinit Zacharias *Luc. i*: « Ad faciem misericordiam cum patribus nostris, et memorari testamenti sui sancti; » et hoc tractat, ac demonstrat Apostolus *ad Rom. iii*: « Omnes peccaverunt, et egent gloria Dei; » et persequitur hoc argumentum usque ad finem capituli undecimi, ubi dicit: « Conclusit Deus omnia in incredulitate, ut omnium misereatur; » et idem docet in tota epistola *ad Galat.*, et *ad Ephes. ii*: « Eramus et nos natura filii iræ, sicut et cæteri. »

EXPLICATIO PSALMI.

Vers. 1. **1. LAUDATE DOMINUM, OMNES GENTES; LAUDATE EUM, OMNES POPULI.** suerunt Apostoli *Act. iv*, per *gentes* gentiles, et per *populos* Iudeos intelligentes.

Ecclesiam, ut dixi, totam alloquitur et ad laudandum Dominum cohortatur: intelligit autem per gentes, ut Apostolus monuit, gentilitatem conversam ad fidem, quam primo loco posuit, quia videbat multo majorem partem Ecclesiæ ex gentibus, quam ex Iudeis congregandam. Per *populos* autem intelligere videtur populos, sive tribus Iudeorum, similiter ad fidem conversorum, ut hoc loco notavit in *Commentario S. Hieronymus*; et similia verba *Psalm. ii*: « Quare fremuerunt Gentes, et populi meditati sunt inania? » expo-

2. QUONIAM CONFIRMATA EST SUPER NOS MISERICORDIA EJUS: ET VERITAS DOMINI MANET IN ÆTERNUM.

Ratio laudandi Deum est, « quoniam misericordia Domini stabilita est » per adventum Messiae super gentes et super Iudeos. Fundata enim est Ecclesia, « adversus quam portæ inferi non prævalebunt, » et constitutum est regnum, cuius non erit finis. Nec solum misericordia confirmata est, sed etiam « veritas promissionum adimpleta, » *Matth. xvi*, in æternum amplius non mutabitur.

PSALMUS CXVIII

SECUNDUM HEBRAEOS.

V. v. — *Alleluia.*

1. Confitemini Domino quoniam bonus : quoniam in sæculum misericordia ejus.

2. Dicat nunc Israel quoniam bonus : quoniam in sæculum misericordia ejus.

3. Dicat nunc domus Aaron, quoniam in sæculum misericordia ejus.

4. Dicant nunc qui timent Dominum, quoniam in sæculum misericordia ejus.

5. De tribulatione invocavi Dominum, et exaudivit me in latitudine Dominus.

6. Dominus mihi adjutor : non timebo quid faciat mihi homo.

7. Dominus mihi adjutor : et ego despiciam inimicos meos.

8. Bonum est confidere in Domino; quam confidere in homine.

9. Bonum est sperare in Domino, quam sperare in principibus.

10. Omnes gentes circuierunt me, et in nomine Domini quia ulti sum in eos.

11. Circundantes circumdederunt me, et in nomine Domini quia ulti sum in eos.

12. Circumdederunt me sicut apes, et exarserunt sicut ignis in spinis : et in nomine Domini quia ulti sum in eos.

13. Impulsus eversus sum, ut caderem ; et Dominus suscepit me.

14. Fortitudo mea, et laus mea Dominus ; et factus est mihi in salutem.

15. Vox exultationis et salutis in tabernaculis justorum.

16. Dextera Domini fecit virtutem : dextera Domini exaltavit me, dextera Domini fecit virtutem.

17. Non moriar, sed vivam, et narrabo opera Domini.

18. Castigans castigavit me Dominus, et morti non tradidit me.

V. s. h.

Confitemini Domino quoniam bonus : quoniam in æternum [*h. sæculum*] misericordia ejus.

Dicat nunc [*h. obsecro*] Israel : quoniam in æternum [*h. sæculum*] misericordia ejus.

Dicat nunc [*h. obsecro*] domus Aaron :
Quoniam in æternum [*h. sæculum*] misericordia ejus.

Dicant nunc [*h. obsecro*] qui timent Dominum : quoniam in æternum [*h. sæculum*] misericordia ejus.

Cum tribularer, invocavi Dominum, et exaudivit me in latitudine Dominus.

Dominus meus [al. add. *est*], non timebo quid faciat mihi homo.

Dominus mihi auxiliator [*h. inter auxiliares*], et ego despiciam [*h. aspiciam*] odientes me.

Melius est sperare [*h. confidere*] in Domino, quam sperare in homine.

Melius est sperare [*h. confidere*] in Domino, quam sperare in principibus.

Omnes gentes circumdederunt me ; in nomine Domini quia ulti sum in eas [*h. contrivi eas*].

Circumdederunt me, et obsederunt me : sed in nomine Domini, quia ulti sum in eas [*h. contrivi eas*].

Circumdederunt me quasi apes : existetæ sunt quasi ignis spinarum in nomine Domini, quia ulti sum in eas [*h. contrivi eas*].

Impulsus pellebar ut caderem, et Dominus sustentavit me [*h. et Dominus auxiliatus est mihi*].

Fortitudo mea, et laus mea Dominus : et factus est mihi in salutem.

Vox laudis et salutis in tabernaculis justorum.

Dextera Domini fecit fortitudinem [*h. virtutem*] : dextera Domini excelsa, dextera Domini fecit fortitudinem [*h. virtutem*].

Non moriar, sed vivam, et narrabo opera Domini.

Corripiens arguit [*h. castigans castigarit*] me Dominus, et morti non tradidit me.

19. Aperite mihi portas justitiae; ingressus in eas confitebor Domino.
20. Hæc porta Domini; justi intrabunt in eam.
21. Confitebor tibi quoniam exaudisti me, et factus es mihi in salutem.
22. Lapidem quem reprobaverunt aedificantes, hic factus est in caput anguli.
23. A Domino factum est istud, et est mirabile in oculis nostris.
24. Hæc est dies, quam fecit Dominus: exultemus, et lætemur in ea.
25. O Domine, salvum me fac; o Domine, bene prosperare.
26. Benedictus qui venit in nomine Domini. Benediximus vobis de domo Domini.
27. Deus Dominus, et illuxit nobis.
- Constituite diem solemnum in condensis, usque ad cornu altaris.
28. Deus meus es tu, et confitebor tibi: Deus meus es tu, et exaltabo te.
- Confitebor tibi, quoniam exaudisti me, et factus es mihi in salutem.
29. Confitemini Domino, quoniam bonus, quoniam in sæculum misericordia ejus.
- Aperite mihi portas justitiae: ingressus in eas confitebor Domino.
- Hæc porta Domini, justi intrabunt in eam.
- Confitebor tibi, quoniam exaudisti me, et factus es mihi in salutem.
- Lapidem [al. *lapis*] quem reprobaverunt aedificantes: factus est in caput anguli.
- A Domino factum est istud, et hoc est [al. tac. *est*] mirabile in oculis nostris.
- Hæc est dies quam fecit Dominus: exultemus et lætemur in ea.
- Obsecro, Domine, salva, obsecro: obsecro, Domine, prosperare, obsecro.
- Benedictus qui venit in nomine Domini: benediximus vobis de domo Domini.
- Deus Dominus, et apparuit [*h. illuxit*] nobis: frequentate [*h. obligate*] solemnitatem in frondosis, usque ad cornua altaris.
- Deus meus es tu, et confitebor tibi: Deus meus es tu, et exaltabo te.
- Confitebor Domino, quoniam bonus: quoniam in æternum [*h. sæculum*] misericordia ejus.

Argumentum. — Compositus videtur recentioribus post redditum de exilio Babylonico temporibus. In ea enim quæ vers. 5 et seqq. leguntur de hostibus, a quibus Jova Israelitas partim liberaverit, partim liberaturus sit, omnia optime convenient. Cantatum putat Maurer certis quibusdam diebus solemnibus, iisque Tabernaculorum (vers. 15-25); Hengstenberg vero illud refert ad diem, quo secundi templi primarius lapis solemniter positus est (vers. 22), conferteque I Esdr. III, 10, 11. Dramaticus est hic Psalmus, sed varie ab interpretibus distribuitur. Juxta Maurer, populus loquitur vers. 1-21, sacerdotum chorus vers. 22-27, totus denuo populus vers. 28 seq. Ewaldus: Populi chorus, vers. 1-4, chori dux 5-23, populi chorus 24, 25, Pontifex 26, 27, chori dux 28, populi chorus 29. Alius: Populus 1-18, rex seu dux populi 19, pontifex 20, dux 21-22, pontifex 23, dux 24, populus et pontifex 25, pontifex duci 26, populo 27, dux 28, omnes simul 29. Hengstenberg carmen dividit in duas strophas, versibus 14 constantes, utraque suum versibus 4 constans habente exordium. Ewaldum sequemur.

CHORUS.

1. Gratias agite Jovæ, nam benignus *est*,
nam in sempiternum *est* clementia ejus.
2. Dicat Israel:
In sempiternum clementia ejus.
3. Dicant domus Aaronis:
In sempiternum clementia ejus.
4. Dicant cultores Jovæ:
In sempiternum clementia ejus.

CHORI DUX.

5. Ex angustiis invocavi Jovam;
exaudiuit me (educens) in spatium amplum Jova.
6. Jova mihi (mecum) *stat*, non timeo,
quid faciat mihi homo.

COMMENTARIA IN PSALMOS.

7. Jova mihi *est* inter adjutores meos,
atque ego oculos pascam osoribus meis.
8. Melius *est* confugere ad Jovam,
quam fiduciam collocare in hominibus.
9. Melius confugere ad Jovam,
quam fiduciam collocare in principibus.
10. Omnes gentes circumdederunt me;
in nomine Jovæ næ *ego* exscindam eas!
11. Circumdederunt me et circumdederunt me (iterum);
in nomine Jovæ næ *ego* exscindam eas!
12. Circumdederunt me velut apes,
extincti sunt velut ignis spinarum,
in nomine Jovæ næ *ego* exscidi eos.

13. Impulisti me, *o hostis*, ut caderem,
sed Jova adjuvit me.
14. Gloria mea et cantio *est* Jova,
nam factus est mihi in salutem.
15. Vox jubili et salutis (triumphi) *sit* in tentoriis justorum (Israelitarum):
dextera Jovæ facit potentiam.
16. Dextera Jovæ elata est,
dextera Jovæ facit potentiam.
17. Non moriar, sed vivam,
et narrabo opera Jovæ.
18. Castigavit me Jova,
sed morti non tradidit me.

19. Aperite mihi portas justitiae,
ingrediar per eas, celebrabo Jovam.
20. Hæc porta Jovæ est;
justi ingrediuntur per eam.
21. Celebrabo te, quia exaudisti me,
et factus es mihi in auxilium.
22. Lapis, *quem* rejecerant ædificantes,
factus est in caput anguli.
23. A Jova factum est hoc,
id admirabile est in oculis nostris.

CHORUS.

24. Hic *est* dies, quem fecit Jova,
exsultemus et lætemur in eo.
25. Eia, Jova, salutem affer!
eia, Jova, prospera!

PONTIFEX.

26. Bene sit illi (omni) qui venit (huc intrat) in nomine Jovæ,
bona precamur vobis, *qui estis* e domo (populo) Jovæ.

27. Deus est Jova, et lucem (prospera omnia) dedit nobis :
ligate festum (victimam festi) funibus
ad cornua altare *adducentes eam.*

DUX CHORI.

28. Deus meus es tu, et celebrabo te,
Deus mi, efferam te *laudibus.*

CHORUS.

29. Gratias agite Jovæ, nam benignus *est*,
nam in sempiternum *manet* clementia ejus.

NOTE.

Vers. 2. Ewaldus, *sic dicat Israel, quia in*, etc., et ita deinceps. — Vers. 5. *In spatium*, etc. constr. prægnans; respicitur liberatio ab exsiliis miseria. — Vers. 6. Hengstenberg ita jungit, *non timeo quid*, etc. — Vers. 7. *Jova mihi*, etc. i. e. me adjuvat. Aliter Aben-Esra et Kimchi : Jova adjuvat mea causa etiam adjutores meos, ut **ל** pro **כִּי** dictum sit. — Vers. 13. Jam perventum est ad portas templi, quas sibi nunc aperiri jubet. — Vers. 22. « Est vero in hac proverbiali locutione neque *aedificantes* quinam sint, neque *aedificium* quoniam sit, quærendum, sed tertium comparationis ponendum in sola *evictione ab ima ad summam dignitatem.* » Maurer. Sunt, qui non lapidem in angulo inferiore collocatum intelligendum putent, sed *epistylum*, lapidem puta longum et crassum columnarum capitibus impositum. Ac potest sane utraque significatio defendi, nam *rosh* translate tam *summum* vel *supremum*, quam *initium* et *principium* significat. Magis tamen apta videtur prior notio : cf. *Job. xxxviii*, 6. Alius : Lapis quidam, prius ab architectis repudiatus, pro angulari tamen deinde receptus fuit, ob moras vitandas. — Vers. 24. Vel, ob *makkeph*, *hunc diem fecit Jova.* — Vers. 27. *Chag, festum*, pro sacrificio festo : cf. *Exod. xxii*, 18 ; *Malach. ii*, 3. Alius, *densate agmen vestrum, vos qui estis in frondibus densis ad cornua*, etc. : solis enim sacerdotibus ultra progredi licebat.

BELLAMENTI EXPLANATIO.

PSALMUS CXVII.

TITULUS ET ARGUMENTUM.

Alleluia:

Psalmus hic de Davide exponi potest ad litteram, ut facit S. Joannes Chrysostomus ; tamen convenit etiam toti populo christiano, cuius figuram David gerebat, et hanc expositionem persequitur S. Augustinus : canit autem tum David, tum populus Dei multa beneficia Dei ; sed illud potissimum, quo Christum, lapidem angularem exaltat in summum *aedificium*, ut duos parietes connecteret et contineret, quod factum est in die resurrectionis, et ideo Ecclesia canit hunc Psalmum in Dominica die ad Primam ; et verba illa ex hoc Psalmo : « Hec dies quam fecit Dominus, exultemus, et lætemur in ea, » resurrectioni applicat, et per octavam Paschæ frequentissime cum jubilo canit.

EXPLICATIO PSALMI.

Vers. 1. 1. CONFITEMINI DOMINO, QUONIAM BONUS, QUONIAM IN SÆCULUM MISERICORDIA EJUS.

Invitat David omnes ad laudandum Deum, et rationem reddit, « quoniam bonus. » Nihil brevis, nihil grandius dici potuit; nam solus Deus proprius et simpliciter bonus est, et nihil jure laudari potest, nisi bonum. Addit : « Quoniam in sœculum misericordia ejus, » ut ostendat ab effectu Deum esse bonum, ac per hoc etiam laudabilem. Nam bonitas Dei nulla in re magis cognosci potest a miseris, quam in misericordia. Misericordia enim nos creavit, misericordia redemit, misericordia protegit, misericordia coronabit, ita usque in sœculum misericordia ejus.

Solus Deus bonus pro-prie-

Vers. 2. 2. DICAT NUNC ISRAEL : QUONIAM BONUS ; QUONIAM IN SÆCULUM MISERICORDIA EJUS.

Vers. 3. 3. DICAT NUNC DOMUS AARON , QUONIAM IN SÆCULEM MISERICORDIA EJUS.

Vers. 4. 4. DICANT NUNC QUI TIMENT DOMINUM , QUONIAM IN SÆCULUM MISERICORDIA EJUS.

Explicat qui sint, quos invitaverat ad laudandum Deum, et nominat primo loco Israelem, id est, populum Israeliticum, quoniam inde fuerunt omnes Apostoli, qui primi crediderunt, et Ecclesiam inchoarant. Secundo, nominat domum Aaron, quia post Apostolos, « magna turba sacerdotum obediens ecepit fidem; » ut dicitur *Act. vi.* Denique addit : « Omnes qui timent Dominum, » quales fuerunt omnes gentiles, qui crediderunt, et Ecclesiae jam inchoatae se adjunxerunt. Itaque totam Ecclesiam ex Judeis et gentibus collectam invitat ad laudandum Deum.

Vers. 5. 5. DE TRIBULATIONE INVOCAVI DOMINUM , ET EXAUDIVIT ME IN LATITUDINE DOMINUS.

Incipit declarare materiam laudis divinæ, quod in angustia positus cum esset, invocavit Dominum, et Dominus, continuo exaudiens, posuit illum in latitudinem; opponit enim pulcherrime angustias latitudini : « Egò, inquit, de tribulatione invocavi Dominum, » id est, cum essem « in tribulatione, » sive « in angustia, » ut sonat vox hebraica ΥΕΥ, « invocavi Dominum, » id est, non merita mea jactavi, non conquestus sum, quod injuste paterer persecutionem, sed ad misericordiam Dei confugi, « et exaudivit me in latitudine Dominus, » id est, exaudiuit me, et de angustiis in latitudinem transtulit. Sicut autem per angustias significatur tribulatio, ita per latitudinem significatur liberatio a tribulatione. Quod autem id possit David de persona sua merito dicere, nolissimum est ex *Psalm. xvii* et *xxxviii*, et aliis multis. Quod idem etiam conveniat Ecclesiastice, non minus est notum. Certe initio nascentis Ecclesie, cum Herodes S. Petrum Ecclesie totius quibus liberata pastorem et principem inclusisset in carcerem, est Ecclesia « oratio siebat ab Ecclesia sine intermissione » ad Deum pro eo, *Act. xii*; et continuo exaudita est, et maximo miraculo de summis angustiis tribulationum in latitudinem magnæ consolationis educta est; et quoties de angustiis variarum persecutionum Neronis, Decii, Diocletiani, et similium tyrannorum, ad latitudinem pacis et quietis Deo miserante transivit, toties dicere potuit : « De tribulatione invocavi Dominum, et exaudivit me in latitudine Dominus. »

Vers. 6. 6. DOMINUS MIHI ADJUTOR, NON TIMEBO QUID FACIAT MIHI HOMO.

Vers. 7. 7. DOMINUS MIHI ADJUTOR, ET EGO DESPICIAM ENIMICOS MEOS.

Experimento proprio doctus David, sive po-

pulus Dei, magna fiducia exultat, et non dicit : « Dominus mihi adjutor » est, nihil deinceps patiar, scit enim se adhuc peregrinum inter hostes multa passurum; sed dicit : « Dominus mihi adjutor, » supple est, « non timebo quid faciat mihi homo, » id est, non turbabor propter mala, quae mihi infert homo, quia Dominus omnia convertet in bonum. Sie enim Dominus monuit : « Nolite timere eos qui occidunt corpus, et post haec non habent amplius quid faciant, » *Matth. x.* « Nam capillus de capite vestro non peribit, » *Luc. xxi*; et Apostolus : « Momentaneum et leve tribulationis nostræ aeternum gloriæ pondus operatur in nobis, » *II Cor. iv.* Quare merito addit : « Et ego despiciam inimicos meos, » quippe qui saeviendo in corpus gloriæ meæ deserviunt.

8. BONUM EST CONFIDERE IN DOMINO, QUAM CONFIDERE IN HOMINE. Vers.

9. BONUM EST SPERARE IN DOMINO, QUAM SPERARE IN PRINCIPIBUS. Vers.

Deducit ex dictis utili admonitionem de spe collocanda in Deo, non in hominibus quantumvis potentibus. Deus enim et potest et vult confidentes in se juvare, homines autem sœpe non possunt, sœpe etiam variis passionibus acti nolunt. Quod expertus fuerat David, qui aliquando speravit in Saule rege suo, alias in Achis rege Gethæo, alias in Achitophel consiliario prudenterissimo, alias in aliis, et in nullo fidem invenit : in Deo autem nunquam sine prospero eventu speravit. Ait igitur monens omnes : « Bonum est confidere in Domino, quam confidere in homine, » id est, magis quam confidere in homine. « Bonum est sperare in Domino, » magis « quam sperare in principibus, » terrenis videlicet. Haec comparatio accommodata est infirmati humanae, cui nota est potentia hominum, et maxime principum; Dei autem potestas occulta est plurimis, qui neque vident, neque considerant : forsan etiam non credunt magnitudinem Dei, alioqui dicendum fuisset : Bonum est sperare in Domino, malum autem sperare in homine. Sic enim ait Hieremias cap. xvii : « Maledictus homo, qui confidit in homine. » Neque tamen malum est in hominibus aliquam collocare in adjutorio angelorum, ne vel hominum bonorum, quia haec spes ad Deum referunt, qui non solum per se, sed etiam per suos adjuvat confidentes in se.

10. OMNES GENTES CIRCUIERUNT ME , ET IN NOMINE DOMINI , QUIA ULTUS SUM IN EOS. Vers.

11. CIRCUNDANTES CIRCUMDEDERUNT ME , ET IN NOMINE DOMINI , QUIA ULTUS SUM IN EOS. Vers.

12. CIRCUMDEDERUNT ME SICUT APES , ET EXAR- Vers. SERUNT SICUT IGNIS IN SPINIS, ET IN NOMINE Do- MINI , QUIA ULTUS SUM IN EOS. Vers.

Ostendit exemplo suo quam sit bonum confidere in Domino, cum ipse non semel, sed sepius

obsessus a magna multitudine hostium, Dei adiutorio ita liberatus fuerit, ut hostes suos prostratos viderit. Notum est, si de persona Davidis agatur, quam saepe a Saule cum magna manu obsessus fuerit, et mirabiliter liberatus; sed notius est quam saepe populus Dei a regibus potentissimis, et a populis innumerabilibus persecutio-nes gravissimas perpessus divinam ultionem viderit. Verba sunt paulo obscuriora, quoniam Vulgatus interpres voluit omnes voces hebraicas exprimere, et phrasis hebraica pharsi latinae non respondet. Clarius reddidisset, ut Graeci fecerunt, si omisisset illud, *quia*, et illud, *in*, ac dixisset, *omnes gentes circuierunt me, et in nomine Domini ultus sum*. Illud enim, *quia*, et illud, *in*, redundant, et illud, *eos*, est masculini generis, quia vocabulum hebraicum, חֲרָבָה, quod *gentes* significat, est etiam generis masculini. Itaque Interpres fideliter vertit, et quod in græco deerat, addidit ex hebræo. Sensus autem hic est : *Omnes gentes*, id est, tota fere multitudo gentium, circumdederunt me, et in nomine Domini ultus sum eas, id est, in virtute Dei vidi ultionem, quia Deus ultus est innocentiam meam, dum hostes prostravit ac delevit; addit autem : « Circumdederunt me, » ut ostendat non quomodocunque se fuisse circumdatum, sed ita arcte obsssum, ut nullum pateret effugium; addit etiam : « Circumdederunt me sicut apes, et sicut ignis in spinis, » ut ostendat multitudinem et vehementiam hostium: nam apes in tanta copia circumdant favum, ut numerari non possint; et ignis tanto impetu corripit spinas aridas, ut in puncto temporis eas consumat. In hebræo habetur חֲרָבָה, exstinctæ, vel consumptæ sunt gentes, videlicet sicut ignis in spinis. Sed non est verisimile Septuaginta Interpretes, vel auctorem Vulgatae editionis latinae reddidisse contrarium sensum; neque satisfaciunt, qui dicunt non esse contrarium sensum, exardescere ignem in spinis, et consumi ignem in spinis, quia utraque lectione significatur celeritas actionis ignis in spinas, qui mox, ut exarserit, extinguitur. Qui hoc dicunt, ideo non satisfaciunt, quoniam David subjungit : « Et in nomine Domini ultus sum in eos, » quod non dicceret, si inimici ejus antea fuissent extinti, sive consumpti. Existimo igitur Septuaginta Interpretes vocem illam, חֲרָבָה, accepisse in significatione activa, qualem habet in conjugatione *piel* et *poal*, non in passiva; et ideo non vertisse, exstinctæ, vel consumptæ sunt, sed consumere cupie-runt, sive exarserunt ad consumendum, sicut ignis in spinis.

Vera. 13. 13. IMPULSUS EVERSUM UT CADEREM, ET DOMINUS SUSCEPIT ME.

Vera. 14. 14. FORTITUDO MEA, ET LAUS MEA DOMINUS; ET FACTUS EST MIHI IN SALUTEM.

Amplificavit hactenus multitudinem et atrocitatem inimicorum; nunc confitetur infirmitatem

suam, quæ tanto robori par esse non poterat, ut hinc magis agnoscatur gloria Domini. Ego, inquit, tantæ violentiæ resistere non poteram; ideo ab hostibus impulsus in ruinam jam eversus ruere coeperam, « sed Dominus » in tempore « occurrentis sustentavit me. » Referri potest hoc ad pericula amittendæ vitæ corporalis, in quæ saepe incidit David; referri etiam potest ad pericula spiritualia gravissimarum tentationum, in quæ incidebat populus christianus tempore persecutionum, qui propterea agnosceens et confidens non suis viribus, sed ex gratia Dei vicisse, dicit : « Fortitudo mea, et laus mea Dominus, » id est, Dominus est fortitudo mea, quia viribus ejus vince; « et ipse idem est laus mea, » quia semper eum laudare debeo; « et ipse factus est mihi in salutem, » ipse Salvator meus fuit.

15. VOX EXULTATIONIS ET SALUTIS IN TABERNACULIS JUSTORUM.

Ex liberatione Davidis gavisi sunt justi, qui Justi non eam liberationem scire potuerunt: sed multo magis ex liberatione populi christiani de ingenti persecutione orta est « vox exultationis, et vox salutis, » id est, salutem annuntians « in tabernaculo justorum; » ubique enim resonat vox letitiae, et nuntius salutis. Notat S. Chrysostomus justos hic in terris non habere domos stabiles, sed tabernacula peregrinorum, vel militantium.

16. DEXTERA DOMINI FECIT VIRTUTEM, DEXTERA DOMINI EXALTAVIT ME: DEXTERA DOMINI FECIT VIRTUTEM.

Hæc est vox exultationis et salutis, quæ resonat in tabernaculis justorum, quod « dextera Domini, » id est, virtus et potentia Filii Dei « fecit virtutem, » id est, operata est fortiter ac potenter: nam Filius Dei dicitur in Scripturis brachium Domini, sive manus ejus dextera, quia Pater per Filium omnia fecit et facit : « Omnia per ipsum facta sunt, » Joan. 1; « per quem fecit et secula, » ad Hebr. 1; et Isai. LIII : « Quis credidit auditui nostro, et brachium Domini cui revelatum est? » Luc. 1 : « Fecit potentiam in brachio suo. » « Dextera Domini exaltavit me, » id est, in hoc dextera Domini fecit virtutem, quod depressit inimicos meos, et me exaltavit: sive id de Davide, sive de populo Dei intelligatur. « Dextera Domini fecit virtutem; » id repetitur letitiae causa. In hebræo non habetur, dextera Domini exaltavit me, sed dextera Domini excelsa, ut vertit S. Hieronymus; vel dextera Domini exaltans; utrumque enim significat vox חַזְקָה. Hanc secundam significationem secuti sunt Septuaginta Interpretes, et addiderunt me, ut sensus sit : Dextera Domini exaltans me fuit, quod est idem cum illo : Exaltavit me.

17. NON MORIAR, SED VIVAM, ET NARRABO OPERA DOMINI.

Vers. 18. 18. CASTIGANS CASTIGAVIT ME DOMINUS, ET MORTI NON TRADIDIT ME.

Pergit idem, sive David, sive populus Domini, commemorare beneficium Domini, qui persecutio-nes permittit, ut Pater, non ut hostis, ad purgationem, non ad mortem, quasi diceret, quantumvis magnas persecutio-nes passus sim, et forte iterum patiar: tamen non moriar, sed vivam, id est, non exterminabor, non deficiam omnino, ut adversarii vellent; sed permaneo et narrabo opera Domini, qui « castigans castigavit me » paterno flagello, sed « morti non tradidit me. »

Vers. 19. 19. APERITE MIHI PORTAS JUSTITIE, INGRESSUS IN EAS CONFITEBOR DOMINO. HÆC PORTA DOMINI, JUSTI INTRABUNT IN EAM.

Porta gloriae justitiae est.

Ex acceptis beneficiis sumit animum aspirandi ad majora, ac petit introduci tandem in celestem Hierusalem, in qua nulli injusti habitant. « Aperi-te, inquit, mihi portas justitiae, » id est, portas regni celorum, que ex justitia constant; porta enim gloriae justitia est. « Quarite, » inquit Dominus, *Matth. vi.*, « primum regnum Dei, et justitiam ejus. » « Ingressus in eas confitebor Domino, « quoniam qui habitant in domo Domini, in sæcula sæculorum laudabunt te, » *Psalm. LXXXIII.* « Hæc porta Domini, justi intrabunt in eam. » Hæc porta justitiae est vera porta, et unica, que ducit ad Dominum: et ideo justi soli intrabunt in eam. Alii aliter exponunt, videlicet de portis templi, vel civitatis Jerusalem. Sed nos secuti sumus Augustinum, Chrysostomum et Hieronymum; neque verum est quod per portas templi, vel civitatis terrenæ Jerusalem, soli justi intrarent.

Vers. 20. 20. CONFITEBOR TIBI, QUONIAM EXAUDISTI ME, ET FACTUS ES MIHI IN SALUTEM.

Declarat quod dixit: « Ingressus in eas confitebor Domino. » Dicit enim: « Confitebor tibi, quando videlicet ingressus ero in celestem Jeru-salem per portas justitiae, « quoniam exaudisti me; » nam etiamsi multa et varia justi petant in hoc mundo, tamen omnia tendunt ad unam pe-titionem, de qua dicitur in *Psalm. XXVI.*: « Unam petii a Domino, hanc requiram, ut inhabitem in domo Domini omnibus diebus vite mee. » De hac igitur petitione dicit: « Confitebor tibi, quo-niam exaudisti me; » et clarius adhuc exponit, dicens: « Et factus es mihi in salutem, » id est, qui eras spes mea, factus es salus mea: qui eras viaticum, factus es præmium.

Vers. 21. 21. LAPIDEM, QUEM REPROBAVERUNT ÆDIFICAN-TES, HIC FACTUS EST IN CAPUT ANGULI.

Vers. 22. 22. A DOMINO FACTUM EST ISTUD, ET EST MIRA-BILE IN OCULIS NOSTRIS.

Hos versiculos aliqui recentiores de Davide ex-ponunt ad litteram, quem dicunt factum fuisse in

caput anguli, quando factus est rex super Israe-lem et Judam; sed Davidem figuram gessisse Christi, qui factus est in caput anguli, cum factus est caput Ecclesiæ, ex Judæis et Gentibus con-gregatae. Cæterum SS. Patres absolute exponunt *Locus de Chi* locum tanquam ad se proprie spectantem allegavit, *Matth. XXI*, *Marc. XII*, et *Luc. XXI*; neque ullus respondit de Davide haec verba esse intelligenda. Sanctus etiam Petrus, *Act. IV*, ite-*Propri de Chi* rum coram omni populo hunc locum allegavit tanquam proprie de Christo scriptum, neque ul-lus contradixit. Sanctus etiam Paulus *ad Rom. IX*, et S. Petrus *I Epist. cap. II*, allegant Isaiam cap. *XXVIII*, de hoc lapide angulari, summo, electo, probato, etc. Denique idem apostolus Paulus *ad Ephes. II*, vocat Christum « angularem lapidem sumnum. » Certe non auderem Scripturam ita celebrem et decantatam, a Christo et Apostolis explicatam, ullo modo cum Davidis persona communicate. Accedit quod David non fuit pri-mus, neque solus rex super Israelem et Judam, ut ideo meruerit dici lapis angularis; nam ante ipsum fuit Saul rex super utrumque populum, et post eum Salomon; neque Israel et Judas erant proprie duo populi, sive duæ gentes diversæ, ut sunt Hebrei et Gentiles. Igitur omissa illa exposi-tione, dicendum est quod cum David in persona sua et populi Dei decantasset liberationem a tem-poralibus malis, et petiisset introitum in æternam salutem, declarat nunc quomodo Deus aperuerit viam ad hanc æternam salutem, et sine dubio ac-tus majore lumine propheticò hos versiculos scripsit: « Lapidem, quem reprobaverunt ædifi-cantes, hic factus est in caput anguli, » id est, misit Deus lapidem vivum, pretiosum, electum in terras; sed Judæi, ad quos tunc pertinebat offi-cium ædificandæ Ecclesiæ, hunc lapidem repro-baverunt, dicentes de Christo: « Non est hic homo a Deo, qui sabbatum non custodit; » et: « Non habemus regem nisi Cæsarem; » et: « Seductor ille dixit: Post tres dies resurgam, » et similia. Sed hic idem lapis ab ædificantibus reprobatus, quasi inutilis ad ædificium spiritu-rale, a Deo principali architecto « factus est in caput anguli, » id est, constitutus est super duos parietes, ut eos conjungeret et contineret, id est, factus est caput totius Ecclesiæ ex Hebreis et Gen-tibus congregatae, et tale caput, ut qui sub eo non ædificatur, salvus esse non possit; et om-nis, qui sub ipso tanquam lapis vivus ædificatur, omnino salvandus sit. Atque hoc a Domino fac-tum est, id est, electione et potestate divina, non consilio, vel ope humana, et ideo « mira-bile est in oculis nostris. » Quis enim non mire-tur hominem crucifixum et mortuum, ac sepul-

tum, post tres dies resurgere immortalem cum amplissima potestate; et caput ac principem declarari omnium hominum et angelorum; et per eum aditum patefieri hominibus mortalibus ad regnum celorum, et ad societatem angelorum, ad beatam immortalitatem?

Vers. 23. 23. HÆC EST DIES, QUAM FECIT DOMINUS; EXULTEMUS, ET LÆTEMUR IN EA.

«Hæc dies,» quia id factum est, est proprie dies, «quam fecit Dominus,» et ideo ob tantum beneficium «exultemus et lætemur in ea.» Hæc sine dubio est dies resurrectionis Dominicæ: quamvis enim ab ipsa conceptione propter unionem hypostaticam Dominus Jesus fuerit Christus, et caput Ecclesiæ; unde pastoribus ab angelo dictum legimus: «Annuntio vobis gaudium magnum, quia natus est vobis hodie Salvator, qui est Christus Dominus in civitate David;» tamen debuit prius reprobari ab hominibus, et humiliari usque ad mortem crucis, et postea exaltari per resurrectionem, et tunc declarari summus angularis lapis, et prædicari per omnes gentes, «quod non esset in alio aliquo salus,» ut dicitur *Act. iv.*

Dies resurrectionis dicatur dies Domini? Unde ipse etiam dixit *Matth. xxviii*: «Data est mihi omnis potestas in cœlo et in terra. Euntes ergo docete omnes gentes, baptizantes eos in nomine Patris, et Filii, et Spiritus Sancti.» Dicitur autem dies resurrectionis, dies quam fecit Dominus, vel quia Christus resurgens, ut sol iustitiae, novo modo fecit eum diem; vel quia peculiariter Deus eam diem sibi consecravit; vel «hæc est dies, quam fecit Deus» ad hunc finem, «ut exultemus et lætemur in ea.»

Vers. 24. 24. O DOMINE! SALVUM ME FAC; o DOMINE! BENE PROSPERARE; BENEDICTUS QUI VENIT IN NOME DOMINI.

Has laudes Christo dixerunt turbæ in die Palmarum, ut S. Hieronymus annotavit in *Commentario ad cap. xxxiii Matth.* Quod enim illi dixerunt, Καὶ ηὐστόν Ἡσάννα, benedictus qui venit in nomine Domini, in hoc versiculo nos habemus: sed in Evangelio relinquitur vox hebraica *hosanna*; hic explicatur per illa verba, o Domine! *salvum me fac*. Itaque Dominus in die Palmarum voluit visibiliter exhibere, et quasi preoccupare triumphum quem acturus erat invisibiliter in die Resurrectionis. Non enim poterat illi juste objici, quod triumphum ageret ante victoriam, quoniam de Victoria certissimus erat. Propheta autem, sicut prævidit et prædictus Christum ut lapidem reprobandum tempore passionis, et postea a Deo exaltandum in caput anguli tempore resurrectionis.

nis: ita prævidit et prædictus ipsa verba, quæ turbæ dicturæ erant in die triumphi Christi in die Palmarum, quo significaretur triumphus resurrectionis; et optimè accedit quod utraque dies, et Palmarum et Resurrectionis, esset dies Dominicæ. Ait igitur: «Exultemus et lætemur in hac die,» dicentes: «O Domine! salvum me fac;» in hebreo non est illud, *me*, sed simpliciter, *hosanna*, id est, *salva obsecro*. Græci tamen addidicunt explicandi gratia: *O Domine, bene prospere*, nimirum inchoato isto regno tuo; «benedictus qui venit in nomine Domini,» id est, benedicatur ab omnibus Messias, rex noster, «factus in caput anguli, qui venit in nomine Domini;» id est, non a seipso venit, non sibi regnum usurpavit, ut faciet Antichristus; sed venit missus a Patre suo, Domino cœli et terræ; sic enim explicavit Christus ipse *Joan. v.*

25. BENEDIXIMUS VOBIS DE DOMINA: DEUS Vers. 25.
DOMINUS, ET ILLUXIT NOBIS.

26. CONSTITUITE DIEM SOLEMNEM IN CONDENSIS, Vers. 26.
USQUE AD CORNU ALTARIS.

Explicata tota prophetia adventus Christi, et triumphi ejus, convertitur Propheta ad populum, atque illum exhortatur ad celebrandum diem festum solemnem in gratiarum actionem. «Benediximus, inquit, vobis de domo Domini,» id est, nos Prophetæ benediximus vobis populis fidelibus annuntiantes mysteria divina in salutem vestram. «Benediximus autem de domo Domini;» id est vobis, qui estis de domo domini, vel nos ex domo Domini, unde hæc ex revelatione didicimus, «benediximus vobis.» Summa autem est: «Deus Dominus, et illuxit nobis,» id est, Dominus noster ipse est verus Deus, et ipse illuxit nobis, ostendens nobis lucem miserationum suarum. Propterea «constituite diem solemnem,» id est, agite «diem solemnem in condensis,» id est, densos virides ramos adferentes, et ornantes templum «usque ad cornu altaris.» Ista varie exponuntur secundum ritus Judæorum, qui ad nos nihil pertinent.

27. DEUS MEUS ES TU, ET CONFITEBOR TIBI; Vers. 27.
DEUS MEUS ES TU, ET EXALTABO TE.

28. CONFITEBOR TIBI, QUONIAM EXAUDISTI ME, Vers. 28.
ET FACTUS ES MIHI IN SALUTEM.

29. CONFITEMINI DOMINO, QUONIAM BONUS, QUO- Vers. 29.
NIAM IN SÆCULUM MISERICORDIA EJUS.

Hæc est repetitio dictorum, affectum Prophetæ demonstrans.

PSALMUS CXIX

SECUNDUM HEBRAEOS.

V. v. — *Alleluia.*

1. *Aleph.* Beati immaculati in via, qui ambulant in lege Domini.
2. Beati qui scrutantur testimonia ejus; in toto corde exquirunt eum.
3. Non enim qui operantur iniquitatem, in viis ejus ambulaverunt.
4. Tu mandasti mandata tua custodiri nimis.
5. Utinam dirigantur viæ meæ, ad custodiendas justificationes tuas.
6. Tunc non confundar, cum perspexero in omnibus mandatis tuis.
7. Confitabor tibi in directione cordis, in eo quod didici judicia justitiae tuæ.
8. Justificationes tuas custodiam: non me derelinquas usqueaque.
9. *Beth.* In quo corrigit adolescentior viam suam? in custodiendo sermones tuos.
10. In toto corde meo exquisivi te: ne repellas me a mandatis tuis.
11. In corde meo abscondi eloquia tua: ut non peccem tibi.
12. Benedictus es, Domine: doce me justificationes tuas.
13. In labiis meis pronuntiavi omnia judicia oris tui.
14. In via testimoniorum tuorum delectatus sum, sicut in omnibus divitiis.
15. In mandatis tuis exercebor, et considerabo vias tuas.
16. In justificationibus tuis meditabor: non obliviscar sermones tuos.
17. *Cimel.* Retribue servo tuo, vivifica me, et custodiam sermones tuos.
18. Revela oculos meos, et considerabo mirabilia de lege tua.
19. Incola ego sum in terra: non abscondas a me mandata tua.
20. Concupivit anima mea desiderare justificationes tuas, in omni tempore.
21. Incepsti superbos: maledicti qui declinant a mandatis tuis.
22. Aufer a me opprobrium et contemptum, quia testimonia tua exquisivi.

V. s. h.

- Aleph.* Beati immaculati in via: qui ambulant in lege Domini.
- Beati qui custodiunt testimonia ejus: in toto corde requirunt [al. requirent] eum.
- Non enim qui operantur iniquitatem, in viis ejus ambulaverunt.
- Tu mandasti præcepta tua custodiri nimis.
- Utinam dirigantur viæ meæ, ad custodienda præcepta tua.
- Tunc non confundar, cum respexero ad omnia mandata tua.
- Confitabor tibi in directione cordis: cum dicero judicia justitiae tuæ.
- Præcepta tua custodiam: ne derelinquas me nimis.
- Beth.* In quo corrigit juvenis [h. mundabit puer] semitam suam, cum custodierit [h. ut custodiat] verba tua.
- In toto corde meo exquisivi te: ne errare me facias a mandatis tuis.
- In corde meo abscondi eloquium tuum, ut non peccem tibi.
- Benedictus tu [al. es], Domine: doce me præcepta tua.
- In labiis meis narravi omnes justitias [h. omnia judicia] oris tui.
- In via testimoniorum tuorum lœtatus [h. gavisus] sum, quasi in omnibus divitiis.
- In præceptis tuis meditabor, et contemplabor semitas tuas.
- In justitiis [h. præceptis] tuis delectabor, non obliviscar verba tua.
- Cimel.* Tribue servo tuo: vivam, et custodiam verba tua.
- Revela oculos meos, et videbo [h. aspiciam] mirabilia de [al. in] lege tua.
- Advena ego sum in terra: ne abscondas a me mandata [h. præcepta] tua.
- Desideravit anima mea desiderare [h. meditari anima mea desideravit] judicia tua in omni tempore.
- Incepsti superbos: maledicti qui recedunt a mandatis tuis.
- Aufer a me opprobrium et contemptum, quoniam testimonia tua custodivi.

23. Etenim sederunt principes, et adversum me loquebantur : servus autem tuus exercebatur in justificationibus tuis.

24. Nam et testimonia tua meditatio mea est, et consilium meum justificationes tuæ.

Daleth. 25. Adhæsit pavimento anima mea : vivifica me secundum verbum tuum.

26. Vias meas enuntiavi, et exaudisti me : doce me justificationes tuas.

27. Viam justificationum tuarum instrue me, et exercebor in mirabilibus tuis.

28. Dormitavit anima mea præ tædio; confirma me in verbis tuis.

29. Viam iniquitatis amove a me, et de lege tua miserere mei.

30. Viam veritatis elegi, judicia tua non sum oblitus.

31. Adhæsi testimentiis tuis, Domine : noli me confundere.

32. Viam mandatorum tuorum eucurri, cum dilatasti cor meum.

He. 33. Legem pone mihi, Domine, viam justificationum tuarum, et exquiram eam semper.

34. Da mihi intellectum, et scrutabor legem tuam ; et custodiam illam in toto corde meo.

35. Deduc me in semitam mandatorum tuorum : quia ipsam volui.

36. Inclina cor meum in testimonia tua, et non in avaritiam.

37. Averte oculos meos, ne videant vanitatem : in via tua vivifica me.

38. Statue servo tuo eloquium tuum, in timore tuo.

39. Amputa opprobrium meum, quod suspicatus sum, quia judicia tua jucunda.

40. Ecce concupivi mandata tua : in æquitate tua vivifica me.

Vau. 41. Et veniat super me misericordia tua, Domine : salutare tuum secundum eloquium tuum.

42. Et respondebo exprobrantibus mihi verbum : quia speravi in sermonibus tuis.

43. Et ne auferas de ore meo verbum veritatis usquequa : quia in judiciis tuis superesperavi.

44. Et custodiam legem tuam semper : in sæculum et in sæculum sæculi.

45. Et ambulabam in latitudine : quia mandata tua exquisivi.

Etenim sederunt principes, adversum me loquebantur : servus autem tuus meditabatur præcepta tua.

Sed et testimonia tua voluntas [*h. delectatio*] mea, quasi viri [*h. consilii*] amicissimi mei.

Daleth. Adhæsit pulveri anima mea : vivifica me juxta verbum tuum.

Vias meas exposui [*h. narravi*], et exaudiisti me [al. tac. *me*] : doce me justitiam tuam [*h. præcepta tua*].

Viam præceptorum tuorum [*h. mandatorum*] fac me intelligere, et loquar in mirabilibus tuis.

Distillavit anima mea præ stultitia : serva [*h. confirma*] me juxta eloquium tuum.

Viam mendacii aufer a me, et legem tuam dona mibi [*h. miserere mei*].

Viam fidei elegi : judicia tua proponebam.

Adhæsi testimentiis tuis : Domine, ne confundas me.

Viam mandatorum tuorum curram : quoniam dilatasti cor meum.

He. Ostende [*h. illumina*] mihi, Domine, viam præceptorum tuorum, et custodiam eam per vestigium.

Doce me, et observabo legem tuam : et custodiam eam in toto corde.

Deduc me in semita mandatorum [*h. præceptorum*] tuorum : quia ipsam volui.

Inclina cor meum ad testimonia tua, et non ad avaritiam.

Averte oculos meos, ne videant vanitatem : in via tua vivifica me.

Suscita servo tuo eloquium tuum, in timorem tuum.

Averte opprobrium meum : quod reveritus sum : quia [al. tac. *quia*] judicia tua bona.

Ecce desideravi præcepta [*h. mandata*] tua : in justitia tua vivifica me.

Vau. Et veniant mihi misericordiae tuæ, Domine, et salus tua juxta eloquium tuum.

Et respondebo exprobrantibus mihi sermonem : quia speravi in sermone tuo.

Et ne auferas de ore meo verbum veritatis usque nimis, quoniam judicia tua exspectavi.

Et custodiam legem tuam jugiter : in sempiternum, et ultra.

Et ambulabo in spacio : quia præcepta tua quæsivi.

46. Et loquebar in testimonis tuis in conspectu regum : et non confundebar.

47. Et meditabar in mandatis tuis, quæ dilexi.

48. Et levavi manus meas ad mandata tua, quæ dilexi : et exercebar in justificationibus tuis.

Zain. 49. Memor esto verbi tui servo tuo, in quo mihi spem dedisti.

50. Hac me consolata est in humilitate mea : quia eloquium tuum vivificavit me.

51. Superbi inique agebant usquequa : a lege autem tua non declinavi.

52. Memor fui judiciorum tuorum a sæculo, Domine, et consolatus sum.

53. Defectio tenuit me, pro peccatoribus derelictis legem tuam.

54. Cantabiles mihi erant justifications tuæ, in loco peregrinationis meæ.

55. Memor fui nocte nominis tui, Domine : et custodivi legem tuam.

56. Hac facta est mihi : quia justifications tuas exquisivi.

Heth. 57. Portio mea, Domine, dixi, custodire legem tuam.

58. Deprecatus sum faciem tuam in toto corde meo : miserere mei secundum eloquium tuum.

59. Cogitavi vias meas : et converti pedes meos in testimonia tua.

60. Paratus sum, et non sum turbatus : ut custodiam mandata tua.

61. Funes peccatorum circumplexi sunt me : et legem tuam non sum oblitus.

62. Media nocte surgebam ad confitendum tibi, super judicia justificationis tuæ.

63. Particeps ego sum omnium timentium te, et custodientium mandata tua.

64. Misericordia tua, Domine, plena est terra : justifications tuas doce me.

Teth. 65. Bonitatem fecisti cum servo tuo, Domine, secundum verbum tuum.

66. Bonitatem, et disciplinam, et scientiam doce me : quia mandatis tuis credidi.

67. Priusquam humiliarer ego deliqui : properea eloquium tuum custodivi.

68. Bonus es tu, et in bonitate tua doce me justifications tuas.

69. Multiplicata est super me iniquitas superborum : ego autem in toto corde meo scrutabor mandata tua.

70. Coagulatum est sicut lac cor eorum : ego vero legem tuam meditatus sum.

Et loquar in testimonialis tuis coram regibus, et non confundar.

Et delectabor in mandatis tuis, quæ dilexi.

Et levabo manus meas ad mandata tua, quæ dilexi, et loquar in præceptis tuis.

Zain. Memento sermonis servo tuo : quem me sperare fecisti.

Hæc est consolatio mea in afflictione mea : quia eloquium tuum vivificavit me.

Superbi deridebant me nimis : a lege tua non declinavi.

Recordatus sum judiciorum tuorum a sæculo, Domine, et consolatus sum.

Horror obtinuit me ab impiis, qui dereliquerunt legem tuam.

Carmina erant mihi præcepta tua, in domo peregrinationis meæ.

Recordatus sum in nocte nominis tui, Domine, et custodivi legem tuam.

Hoc factum est mihi : quia præcepta tua custodivi.

Heth. Pars mea, Domine : dixi, ut custodiam verbum tuum.

Deprecatus sum vultum tuum in toto corde : miserere mei secundum eloquium tuum.

Recogitavi vias meas, et converti pedes meos ad testimonia tua.

Festinavi, et non neglexi, custodire mandata tua.

Funes impiorum implicaverunt me : legem tuam non sum oblitus.

Medio noctis surgam ad confitendum tibi, super judicia justitiae [al. *justificationis*] tuæ.

Particeps ego sum omnium timentium te, et custodientium præcepta tua.

Misericordia tua, Domine, completa est terra, præcepta tua doce me.

Teth. Benefecisti cum servo tuo, Domine : secundum verbum tuum.

Bonum sermonem, et scientiam doce me : quia mandatis tuis credidi.

Antequam audirem, ego ignoravi : nunc autem eloquium tuum custodivi.

Bonus es tu, et beneficus : doce me præcepta tua.

Applicabant mihi mendacium superbi, ego autem in toto corde servabam præcepta tua.

Incrassatum est velut adeps cor eorum, et ego in lege tua delectabar.

71. Bonum mihi quia humiliasti me : ut discam justificationes tuas.

72. Bonum mihi lex oris tui, super millia auri et argenti.

Jod. 73. Manus tuæ fecerunt me, et plasma-
verunt me : da mihi intellectum, et discam mandata tua.

74. Qui timent te, videbunt me, et lætabun-
tur : quia in verba tua supersperavi.

75. Cognovi, Domine, quia æquitas judicia tua : et in veritate tua humiliasti me.

76. Fiat misericordia tua ut consoletur me,
secundum eloquium tuum servo tuo.

77. Veniant mihi miserationes tuæ, et vi-
vam : quia lex tua meditatio mea est.

78. Confundantur superbi, quia injuste ini-
quitatem fecerunt in me : ego autem exercebor
in mandatis tuis.

79. Convertantur mihi timentes te, et qui noverunt testimonia tua.

80. Fiat cor meum immaculatum in justifi-
cationibus tuis, ut non confundar.

Caph. 81. Defecit in salutare tuum anima
mea, et in verbum tuum supersperavi.

82. Defecerunt oculi mei in eloquium tuum,
dicentes : Quando consolaberis me?

83. Quia factus sum sicut uter in pruina :
justificationes tuas non sum oblitus.

84. Quot sunt dies servi tui? quando facies
de persequentibus me judicium?

85. Narraverunt mihi iniqui fabulationes :
sed non ut lex tua.

86. Omnia mandata tua veritas; inique per-
secuti sunt me, adjuva me.

87. Paulo minus consummaverunt me in
terra : ego autem non dereliqui mandata tua.

88. Secundum misericordiam tuam vivifica
me : et custodiam testimonia oris tui.

Lamed. 89. In æternum, Domine, verbum
tuum permanet in cœlo.

90. In generationem et generationem veritas
tua : fundasti terram, et permanet.

91. Ordinatione tua perseverat dies : quoniam
omnia servient tibi.

92. Nisi quod lex tua meditatio mea est;
tunc forte periisse in humilitate mea.

93. In æternum non obliviscar justificationes
tuas : quia in ipsis vivificasti me.

94. Tuus sum ego, salvum me fac : quoniam
justificationes tuas exquisivi.

95. Me exspectaverunt peccatores ut perde-
rent me : testimonia tua intellexi.

Bonum [al. add. *est*] mihi quia afflictus sum,
ut discerem præcepta tua.

Melior est mihi lex oris tui : super millia
auri et argenti.

Jod. Manus tuæ fecerunt me, et firmave-
runt me [al. tac. *me*] : doce me, et discam
mandata tua.

Qui timent te, videbunt me, et lætabuntur :
quia sermonem tuum exspectavi.

Scio, Domine, quia justum judicium tuum,
et vere afflixisti me.

Sit, obsecro, misericordia tua in consolatione
mea : sicut locutus es servo tuo.

Veniant mihi misericordiae tuæ, et vivam :
quia lex tua delectatio mea.

Confundantur superbi, quoniam inique con-
triverunt me : ego autem loquar in præceptis
tuis.

Revertantur ad me qui timent te, et qui
sciunt testimonium tuum.

Fiat cor meum perfectum in præceptis tuis,
ut non confundar.

Chaph. Defecit in salutare tuum anima
mea : in verbum tuum exspectavi.

Consumpti sunt oculi mei in verbum tuum :
dicentes, quando consolaberis me :

Et cum essem quasi uter in pruina : præ-
cepta tua non sum oblitus.

Quot sunt dies servi tui? quando facies in
persequentibus me judicium?

Foderunt mihi superbi foveas, quæ non erant
juxta legem tuam.

Omnia mandata tua vera : falso persecuti
sunt me, auxiliare mihi.

Paulo minus consumpserunt me in terra :
ego autem non dimisi præcepta tua.

Secundum misericordiam tuam vivifica me,
et custodiam testimonia oris tui.

Lamed. In æternum [al. *sæculum*], Domine,
verbum tuum permanet in cœlo.

In generatione, et generatione fides tua : fun-
dasti terram, et stat.

Judicio tuo stant usque hodie : quia omnia
servient tibi.

Nisi quod lex tua delectatio mea : forte peris-
sem in pressura mea.

In sempiternum non obliviscar præceptorum
tuorum : quia per ipsa vivificasti me.

Tuus ego sum, salva me : quoniam præcepta
tua quæsivi.

Me exspectaverunt impii, ut perderent me :
testimonium tuum considerabo.

96. Omnis consummationis vidi finem : latum mandatum tuum nimis.

Mem. 97. Quomodo dilexi legem tuam, Domine! tota die meditatio mea est.

98. Super inimicos meos prudentem me fecisti mandato tuo : quia in æternum mihi est.

99. Super omnes docentes me intellexi : quia testimonia tua meditatio mea est.

100. Super senes intellexi : quia mandata tua quæsivi.

101. Ab omni via mala prohibui pedes meos : ut custodiam verba tua.

102. A judiciis tuis non declinavi : quia tu legem posuisti mihi.

103. Quam dulcia fancibus meis eloquia tua! super mel ori meo.

104. A mandatis tuis intellexi : propterea odivi omnem viam iniquitatis.

Nun. 105. Lucerna pedibus meis verbum tuum, et lumen semitis meis.

106. Juravi et statui custodire judicia justitiae tue.

107. Humiliatus sum usquequaque, Domine; vivifica me secundum verbum tuum.

108. Voluntaria oris mei beneplacita fac, Domine, et judicia tua doce me.

109. Anima mea in manibus meis semper, et legem tuam non sum oblitus.

110. Posuerunt peccatores laqueum mihi : et de mandatis tuis non erravi.

111. Hæreditate acquisivi testimonia tua in æternum : quia exultatio cordis mei sunt.

112. Inclinavi cor meum ad facientes justifications tuas in æternum, propter retributionem.

Samech. 113. Iniquos odio habui, et legem tuam dilexi.

114. Adjutor et susceptor meus es tu : et in verbum tuum supersperavi.

115. Declinate a me, maligni, et scrutabor mandata Dei mei.

116. Suscipe me secundum eloquium tuum, et vivam : et non confundas me ab exspectatione mea.

117. Adjuva me, et salvus ero, et meditabor in justificationibus tuis semper.

118. Sprevisti omnes discedentes a judiciis tuis : quia injusta cogitatio eorum.

119. Prævaricantes reputavi omnes peccatores terræ : ideo dilexi testimonia tua.

120. Confige timore tuo carnes meas : a judiciis enim tuis timui.

Omnis consummationis vidi finem : latum mandatum [*h. præceptum*] tuum nimis.

Mem. Quam dilexi legem tuam! tota die hæc meditatio mea.

Super inimicos meos instruxisti me mandato tuo : quia in sempiternum hoc est mihi.

Super omnes qui docebant me, eruditus sum : quia testimonia tua meditatio mea.

Super senes intellexi : quia præcepta tua servavi.

Ab omni semita mala prohibui pedes meos, ut custodirem [al. *custodiam*] verba tua.

A judiciis tuis non recessi : quia tu illuminasti me.

Quam dulce gutturi meo eloquium tuum, super mel ori meo.

Præcepta tua considerabam : propterea odivi omnem semitam mendacii.

Nun. Lucerna pedi meo verbum tuum, et lux semitæ meæ.

Juravi, et perseverabo : ut custodiam judicia justitiae tue.

Afflictus sum usque nimis : Domine, vivifica me juxta verbum tuum.

Voluntaria oris mei complacent tibi, Domine, et secundum judicia tua doce me.

Anima mea in manu mea semper, et legis tue non sum oblitus.

Posuerunt impii laqueum mihi, et a præceptis tuis non aberravi.

Hæreditas mea testimonia tua in sempiternum : quia gaudium cordis mei sunt.

Inclinavi cor meum ut facerem justicias tuas, propter æternam retributionem.

Samech. Tumultuosos odivi, et legem tuam dilexi.

Protectio mea et scutum meum tu es : verbum tuum expectavi.

Recedite a me, maligni, et custodiam mandata Dei mei.

Confirmata secundum verbum tuum, et vivam : et noli me confundere ab exspectatione mea.

Auxiliare mihi, et salvus ero : et delectabor in præceptis tuis jugiter.

Abjecisti omnes qui aversantur præcepta tua : quia mendax cogitatio eorum.

Quasi scoriam computasti omnes impios terræ : propterea dilexi testimonia tua.

Horripilavit a timore tuo caro mea, et judicia tua timui.

Ain. 121. Feci judicium et justitiam : non tradas me calumniantibus me.

122. Suscipe servum tuum in bonum : non calumnientur me superbi.

123. Oculi mei defecerunt in salutare tuum, et in eloquium justitiae tuae.

124. Fac cum servo tuo secundum misericordiam tuam, et justificationes tuas doce me.

125. Servus tuus sum ego : da mihi intellectum, ut sciam testimonia tua.

126. Tempus faciendi, Domine : dissipaverunt legem tuam.

127. Ideo dilexi mandata tua super aurum et topazion.

128. Propterea ad omnia mandata tua dirigebar : omnem viam iniquam odio habui.

Phe. 129. Mirabilia testimonia tua : ideo scrutata est ea anima mea.

130. Declaratio sermonum tuorum illuminat : et intellectum dat parvulus.

131. Os meum aperui, et attraxi spiritum : quia mandata tua desiderabam.

132. Aspice in me, et miserere mei, secundum judicium diligentium nomen tuum.

133. Gressus meos dirige secundum eloquium tuum : et non dominetur mei omnis injustitia.

134. Redime me a calumniis hominum, ut custodiam mandata tua.

135. Faciem tuam illumina super servum tuum, et doce me justificationes tuas.

136. Exitus aquarum deduxerunt oculi mei : quia non custodierunt legem tuam.

Sade. 137. Justus es, Domine, et rectum judicium tuum.

138. Mandasti justitiam testimonia tua, et veritatem tuam nimis.

139. Tabescere me fecit zelus meus : quia oblitus sunt verba tua inimici mei.

140. Ignitum eloquium tuum vehementer : et servus tuus dilexit illud.

141. Adolescentulus sum ego, et contemptus : justificationes tuas non sum oblitus.

142. Justitia tua, justitia in æternum ; et lex tua veritas.

143. Tribulatio et angustia invenerunt me : mandata tua meditatio mea est.

144. Æquitas testimonia tua in æternum : intellectum da mihi, et vivam.

Coph. 145. Clamavi in toto corde meo, exaudi me, Domine : justificationes tuas requiram.

Ain. Feci judicium et justitiam : ne derelinquas me his qui calumniantur me.

Sponde pro servo tuo in bonum : ne calumnientur me superbi.

Oculi mei defecerunt in salutare tuum et in eloquium justitiae tuae.

Fac cum servo tuo juxta misericordiam tuam, et præcepta tua doce me.

Servus tuus sum ego, instrue me : et cognoscam testimonia tua.

Tempus est ut facias, Domine : prævaricati sunt legem tuam.

Propterea dilexi mandata tua super aurum et topazium.

Propterea in [al. *ad*] universa præcepta tua direxi : omnem semitam mendacii odio habui.

Phe. Mirabilia testimonia tua ; idcirco custodivit ea anima mea.

Ostium sermonum tuorum lucidum, docens [al. *docet*] parvulos.

Os meum aperui et respiravi : quia mandata [h. *præcepta*] tua desiderabam.

Respicere ad me, et miserere mei : juxta judicium diligentium nomen tuum.

Gressus meos firma [al. *confirmata*] in sermone [h. *eloquio*] tuo, et non des potestatem in me universæ iniquitati.

Redime me a calumnia hominum, et custodiam præcepta [h. *mandata*] tua.

Vultum tuum ostende servo tuo, et doce me præcepta tua.

Rivi aquarum fluebant de oculis meis : quia non custodierunt legem tuam.

Sade. Justus es, Domine, et rectum judicium tuum.

Praecepisti justitiam testimoniis tuis, et veritatem nimis.

Consumpsit me zelus meus : quia obliiti sunt verborum tuorum hostes mei.

Probatus sermo tuus nimis, et servus tuus dilexit illum.

Parvulus ego sum, et contemptibilis : sed præcepta tua non sum oblitus.

Justitia tua, justitia sempiterna, et lex tua veritas.

Tribulatio et angustia invenerunt me : mandata tua voluntas mea.

Justa testimonia tua semper [h. *sæculum*] : doce me, et vivam.

Coph. Clamavi in toto corde, exaudi me, Domine : præcepta tua custodiam.

146. Clamavi ad te: salvum me fac, ut custodiā mandata tua.

147. Præveni in maturitate, et clamavi: quia in verba tua supersperavi.

148. Prævenerunt oculi mei ad te diluculo, ut meditarer eloquia tua.

149. Vocem meam audi secundum misericordiam tuam, Domine, et secundum judicium tuum vivifica me.

150. Appropinquaverunt persequentes me iniquitati: a lege autem tua longe facti sunt.

151. Prope es tu, Domine, et omnes viæ tuæ veritas.

152. Initio cognovi de testimoniosis tuis: quia in æternum fundasti ea.

Res. 153. Vide humilitatem meam, et eripe me: quia legem tuam non sum oblitus.

154. Judica judicium meum, et redime me: propter eloquium tuum vivifica me.

155. Longe a peccatoribus salus: quia justificationes tuas non exquisierunt.

156. Misericordia tuæ multæ, Domine: secundum judicium tuum vivifica me.

157. Multi qui persequuntur me, et tribulant me: a testimoniosis tuis non declinavi.

158. Vidi prævaricantes, et tabescebam: quia eloquia tua non custodierunt.

159. Vide quoniam mandata tua dilexi, Domine: in misericordia tua vivifica me.

160. Principium verborum tuorum, veritas: in æternum omnia judicia justitiæ tuæ.

Sin. 161. Principes persecuti sunt me gratias, et a verbis tuis formidavit cor meum.

162. Letabor ego super eloquia tua, sicut qui invenit spolia multa.

163. Iniquitatem odio habui, et abominatus sum: legem autem tuam dilexi.

164. Septies in die laudem dixi tibi, super judicia justitiæ tuæ.

165. Pax multa diligentibus legem tuam, et non est illis scandalum.

166. Exspectabam salutare tuum, Domine, et mandata tua dilexi.

167. Custodivit anima mea testimonia tua, et dilexit ea vehementer.

168. Servavi mandata tua et testimonia tua: quia omnes viæ meæ in conspectu tuo.

Tau. 169. Appropinquet deprecatio mea in conspectu tuo, Domine: juxta eloquium tuum da mihi intellectum.

170. Intret postulatio mea in conspectu tuo: secundum eloquium tuum eripe me.

Invocavi te, salvum me fac, et custodiam testimonia tua.

Surgebam adhuc in tenebris, et clamabam, verbum tuum exspectans.

Præveniebant oculi mei vigilias, ut meditarer in sermonibus tuis.

Vocem meam exaudi juxta misericordiam tuam: Domine, secundum judicium tuum vivifica me.

Appropinquaverunt persecutores mei sceleris, et a lege tua procul facti sunt.

Prope es tu, Domine, et omnia mandata tua veritas.

A principio novi de testimoniosis tuis: quod in æternum fundaveris ea.

Res. Vide afflictionem meam, et eripe me: quia legis tuæ non sum oblitus.

Judica causam meam, et redime me: in sermone tuo vivifica me.

Longe ab impiis salus: quia præcepta tua non quæsierunt.

Misericordia tuæ multæ, Domine: juxta judicia tua vivifica me.

Multi qui persequuntur me, et affligunt me: a testimoniosis tuis non declinavi.

Vidi prævaricatores tuos, et mœrebam: quia verbum tuum non custodierunt.

Vide quoniam præcepta tua dilexi: Domine, juxta misericordiam tuam vivifica me.

Caput verborum tuorum veritas, et in sempiternum omnime judicium justitiæ tuæ.

Sin. Principes persecuti sunt me sine causa: verba autem tua timuit cor meum.

Gaudens ego sum in eloquio tuo: sicut qui invenit spolia multa.

Mendacium odio habui, et detestatus sum: legem [al. add. *autem*] tuam dilexi.

Septies in die laudavi te super judiciis justitiæ tuæ.

Pax multa diligentibus legem tuam, et non est illis scandalum.

Exspectavi salutare tuum, Domine, et mandata tua feci.

Custodivit anima mea testimonia tua, et dilexit ea nimis.

Custodivi præcepta tua et testimonia tua, quia omnes viæ meæ in conspectu tuo.

Thav. Ingrediatur [*h. appropinquet*] laus mea coram te, Domine: secundum verbum tuum doce me.

Veniat deprecatio mea ante vultum tuum: secundum eloquium tuum libera me.

171. Eructabunt labia mea hymnum, cum docueris me justificationes tuas.

172. Pronuntiabit lingua mea eloquium tuum : quia omnia mandata tua aequitas.

173. Fiat manus tua ut salvet me : quoniam mandata tua elegi.

174. Concupivi salutare tuum, Domine, et lex tua meditatio mea est.

175. Vivet anima mea, et laudabit te, et iudicia tua adjuvabunt me.

176. Erravi sicut ovis quæ perit : quæ servum tuum, quia mandata tua non sum oblitus.

Fundant labia mea hymnum : docebis enim me præcepta tua.

Loquetur lingua mea sermonem tuum : quia omnia mandata tua justa.

Sit manus tua auxiliatrix mea : quia præcepta tua elegi.

Desideravi salutare tuum, Domine, et lex tua voluntas mea.

Vivet anima mea, et laudabit te : et iudicia tua auxiliabunt mihi.

Erravi quasi ovis perdita, quæ servum tuum : quia mandatorum [h. præceptorum] tuorum non sum oblitus.

Argumentum. — « In hunc Psalmum varia congesta sunt, quæ ad pietatem alendam et confirmandam faciunt, hicque scopus est auctoris præcipuus ; ut doceat beatam vitam in observatione divinorum præceptorum esse positam. Quare precatur Deum, ut animum ad obedientiam suis legibus plene perfecteque præstandam ipsi confirmet, atque adeo caveat, ut ne ullis malis et formidinibus, ullis illecebris et irritamentis ad transgrediendum eas impelli possit et incitari. Quibus continue preces interseruntur, ut Deus eum conservet, eripiaturque e conditione misera, in qua versatur. Quæ dum precatur, testatur simul suam innocentiam et puritatem a criminibus, quorum ab adversariis accusatur, atque sese commendat Dei favori et defensioni in omnibus vitæ sua periculis, argumento sœpe repetito ab amore et studio suo erga leges divinas, a vitæ suæ innocentia et puritate, hostium improbitate, Dei veracitate. » Rosenmull. Viginti duobus octostichis conscriptum carmen hac ratione, ut primum octostichum per omnes versus a prima alphabeti littera נ incipiat, secundum a ב, tertium a ג, et sic deinceps. In quo ipso artificio, recentioris ætatis indicio, præcipua causa ponenda est, quod non perpetua sed dissipata et abrupta oratione argumentum persequitur scriptor. Ex vers. 23 et 161 perlucere videtur, fuisse auctorem ordinis sui spectatissimum ; vers. 46, 79 et multi alii prodere possint legis divinæ nuntium et interpretem. Divina lex variis in hoc Psalmo designatur nominibus, puta lex in genere; דרכִים via, via; נחִיָה semita; מִצְרָיִם præcepta, gall. préceptes vel enseignements, Vulg. testimonia, puta divinæ voluntatis (Kimchi docet hoc nomine significari doctrinam divinam, quantum habet adjuncta testimonia, i. e. sacramenta et ritus, qualia sunt circumcisio, sabbatum, etc.); בְּקָרֶב edicta, gall. ordonnances, vel observances; סְתָתָה statuta, vel decreta, Vulg. justifications, quia ea justos faciunt homines; מִצְרָיִם jussa, Vulg. mandata, gall. ordres; מִשְׁפָטִים sententiae, Vulg. iudicia, puta lex cum promissis et minis, quibus sancitur; דְבָרֶר verbum vel sermo, Vulg. eloquium.

I.

1. Beati qui sunt integri viæ (vitæ), qui ambulant in lege Jovæ.
2. Beati qui servant præcepta ejus, qui toto corde quærunt eum.
3. Omnino non faciunt pravum facinus, in viis ejus ambulant.
4. Tu proposuisti edicta tua, ut observarentur valde (summo studio).
5. Utinam recte dirigantur viæ meæ, ita ut observem statuta tua.
6. Tunc non pudore afficiar, dum respxero omnia jussa tua.
7. Celebrabo te sincero animo, discens sententias tuas justas.
8. Statuta tua observabo, ne derelinquas me nimis.

II.

9. Qua ratione puram reddet adolescens viam suam ? custodiendo (se, vel viam, vitam) secundum verba tua.

10. Toto meo corde quero te,
ne me aberrare sinas a jussis tuis.
11. In corde meo recondo sermones tuos,
ut non peccem in te.
12. Benedictus tu sis, Jova,
doce me statuta tua.
13. Labiis meis enarro
omnes sententias oris tui.
14. De via (observatione) præceptorum tuorum lætor,
velut de cunctis divitiis.
15. Edicta tua meditari volo,
et respicere vias tuas.
16. Statutis tuis oblecto me,
non obliviscar sermones tuos.

III.

17. Benèfacias servo tuo, ut vivam,
et servabo verba tua.
18. Aperi oculos meos, ut adspiciam
mirabilia ex lege tua *apparentia*.
19. Peregrinus ego sum in terra (ideoque ignarus),
ne occultes a me jussa tua.
20. Commixta (consumpta) est anima mea desiderio
sententiarum tuarum omni tempore.
21. Increpasti superbos : « Maledicti
qui aberrant a jussis tuis! »
22. Devolve a me opprobrium et contemptum,
nam præcepta tua servo.
23. Sedent principes, contra me colloquuntur,
servus tuus *interea* meditatur statuta tua.
24. Præcepta tua deliciæ meæ,
viri consilii (consiliarii) met.

IV.

25. Adhæret pulveri anima mea,
vitæ me restitue secundum verbum tuum.
26. Vias (res, vel actiones) meas enarro *tibi*, et exaudis me;
doce me statuta tua.
27. Viam edictorum tuorum fac me nosse,
et meditabor mirabilia tua.
28. Lacrymat (alius, *elanguet*) anima mea ex ægritudine,
erige me secundum verbum tuum.
29. Viam mendacii remove a me,
et legem tuam gratiōe concede mihi.
30. Viam veritatis elegi,
sententias tuas posui (vitæ meæ regulam; aliud : i. e. servo).

31. Inhæreo præceptis tuis,
Jova, ne me pudore afficias.
32. Viam jussorum tuorum curro (alius, *curram*, *si latam*, etc.),
nam latum facis (ab angustia; Maurer, *intelligens eorum redditus*) cor meum,

V.

33. Doce me, Jova, viam statutorum tuorum,
ut servem eam usque ad finem.
34. Intelligentem me redde, ut servem legem tuam,
et observem eam toto corde.
35. Fac ut ingrediar semitam jussorum tuorum,
nam ea delector.
36. Inclina cor meum ad præcepta tua,
neque ad lucrum *turpe*.
37. Præterire fac (averte) oculos meos, ne respiciant vanum (res *vanas*),
in viis tuis vivum (alacrem) me redde.
38. Stare fac (adimple) servo tuo verbum tuum,
quod *est* (dedisti) timori (timentibus) tui (vel, *qui* deditus est *timori tuo*).
39. Amove opprobrium meum, quod timeo,
nam sententiæ tuae bonæ (justæ) *sunt*.
40. En, desiderio teneor edictorum tuorum,
pro justitia tua vivum me serva (Maurer ut vers. 37, membrum posterius).

VI.

41. Et superveniant mihi misericordiæ tuæ, Jova,
auxilium tuum secundum verbum tuum :
42. Ut respondeam conviciatori meo verbum (aliquid, rem);
nam fiduciam posui in verbo tuo.
43. Neve subtrahas ori meo verbum veritatis nimis,
nam sententias tuas exspecto.
44. Et observabo legem tuam continuo,
in perpetuum atque sempiternum.
45. Et incedam in spatio amplio (prosperitate),
nam edicta tua quæro.
46. Et loquar de præceptis tuis coram regibus,
neque erubescam.
47. Et oblectabo me jussis tuis,
quæ diligo.
48. Et tollam manus meas ad jussa tua (ea sancte habeo), quæ diligo,
et meditabor statuta tua.

VII.

49. Memor sis verbi *tui* servo tuo,
propterea quod spem fecisti mihi.
50. Hoc solatium *est* (vel *sit*) meum in miseria mea,
quod verbum tuam vitam (vel *prosperitatem*) mihi reddit.

51. Insolentes illudunt mihi valde,
a lege tua non deflecto.
52. Memor sum sententiarum tuarum ab antiquo,
et consolor me.
53. Aestus vehemens prehendit me præ improbis,
qui derelinquunt legem tuam.
54. Cantus (cantandi materia) sunt mihi statuta tua
in domo peregrinationum (hujus vitæ misericarum) mearum.
55. Memor sum nocte (tribulationis?) nominis tui, Jova,
et observo legem tuam.
56. Hoc est mihi (proprium, vel *solutum*),
quod edicta tua servo.

VIII.

57. Pars mea, Jova, dico,
est observare verba tua (vel, *pars mea Jova est, statuo observare*, etc.).
58. Precor te toto corde,
miserere mei secundum verbum tuum.
59. Reputo vias meas,
et reduco pedes meos ad præcepta tua.
60. Festino, nec cuncor,
observare jussa tua.
61. Laquei (alii, *catervae*) improborum circumdant me,
legem tuam non obliviscor.
62. Media nocte surgo (vel *surgam*) ad gratias agendas tibi
propter sententias tuas justas.
63. Sodalis ego *sum* omnibus qui timent te,
et iis qui observant edicta tua.
64. Clementiaæ tuæ, Jova, plena est terra;
statuta tua doce me.

IX.

65. Benefacis servo tuo, Jova,
secundum verbum tuum.
66. Bonum intellectum et scientiam doce me,
nam in jussis tuis innitor.
67. Priusquam afflictus essem, erravi (deliqui);
nunc vero sermones tuos observo.
68. Benignus tu es et benefaciens,
doce me statuta tua.
69. Consuunt (Maurer, *agglutinant*) mihi mendacium,
ego toto corde servo edicta tua.
70. Obesum (i. e. stupidum) est, ut pinguedo, cor eorum,
ego lege tua me oblecto.
71. Bene mihi, quod afflictus fui,
ut discerem statuta tua.

72. Melior mihi lex oris tui *est*;
quam millia auri et argenti.

X.

73. Manus tuæ fecerunt me et formaverunt me;
intelligentem me redde, ut diseam jussa tua.
74. Timentes te vident me et lætantur,
nam verbum tuum *haud frusta exspecto*.
75. Novi, Jova, justitiam (justas) esse sententias tuas,
et cum fide (æque) te me afflixisse.
76. Sit, quæso, gratia tua solatio meo,
secundum verbum tuum servo tuo.
77. Superveniat mihi misericordia tua, ut vivam,
nam lex tua deliciæ meæ.
78. Confundantur (spe excidant) insolentes,
nam fallaciter (vel *sine causa*) *calumniis* me deprimunt;
ego meditor de edictis tuis.
79. Convertant se ad me cultores tui,
et cognoscant præcepta tua (Ewaldus, *et qui cognoscunt*).
80. Fiat cor meum perfectum (*sine reprehensione*; Maurer, *totum*) in statutis
tuis,
ut non pudore afficiar.

XI.

81. Tabescit ad (gall. *après*) salutem tuam anima mea,
nihilominus verbum tuum *semper exspecto*.
82. Tabescunt oculi mei desiderio verbi tui (adimplendi),
dum dico : « Quando consolaberis me? »
83. Si etiam fiam ut uter *vinarius* in fumo (aridus et corrugatus),
statuta tua non obliviseor.
84. Quot sunt dies vitæ servi tui?
quando facies de persecutoribus meis judicium?
85. Fodiunt mihi insolentes foveas,
qui non sunt (alii, *quod non est*) secundum legem tuam.
86. Omnia jussa tua fidelia;
sine causa (vel *dolose*) persequuntur me, *juva* me.
87. Prope fuit, ut perderent me ad terram (prostratum),
ego vero non dereliqui edicta tua.
88. Secundum gratiam tuam vitæ me restitue,
ut observem præceptum oris tui.

XII.

89. In perpetuum (alii intelligunt *es*), Jova,
verbum tuum firmiter stat in cœlis (*cœli firmitatis imago*).
90. Per omnes ætates *manet* fides tua:
fundasti terram, et stat (ita fides tua).

91. Ad sententias tuas stant (gall. *sont debout*) cuncta (cœli et terra) hodie
(usque ad hanc diem, semper),
nam omnia sunt servi tui.
92. Nisi lex tua deliciæ meæ,
tunc perissem in miseria mea.
93. In perpetuum non obliviscar edicta tua,
nam iis vitæ me restituis (mē recreas, vel erigis).
94. Tuus ego sum, adjuva me,
nam edicta tua quæro.
95. Me exspectant (inhibant) improbi, ut perdat me;
præcepta tua attendo.
96. Omni perfectioni (omnis rei perfectæ) vidi finem (gall. *borne*);
late patens est jussum tuum valde.

(mutata vocis religione, lxx) *serm. onomatop. XIII.*

97. Quam diligo legem tuam ! omni tempore illa est meditatio mea.
98. Hostibus meis sapientiorem me reddunt jussa tua,
nam in perpetuum id (hæc) mihi in oculis est.
99. Omnibus docentibus me prudentior ego sum,
nam præcepta tua meditatio mea sunt.
100. Senioribus intelligentior ego sum,
nam edicta tua servo.
101. Ab omni tramite malo cohibeo pedes meos,
ut observem verbum tuum.
102. A sententiis tuis non recedo,
nam tu instituisti me.
103. Quam levia (suavia) sunt palato meo verba tua ! magis quam mel ori meo.
104. Ex edictis tuis sapere disco,
propterea odi omnem tramitem mendacii.

(mutata vocis religione, lxx) *serm. onomatop. XIV.*

105. Lucerna pedibus meis est verbum tuum,
et lux semitæ meæ.
106. Juravi, et præstare id volo,
observaturum me esse sententias tuas justas.
107. Afflictus sum valde;
Jova, vitæ me restitue (me erige).
108. Spontanea sacrificia oris mei (laudes meas) benevole excipe, Jova,
et sententias tuas doce me.
109. Anima (vita) mea in manibus meis semper,
et legem tuam non obliviscor (eam servo cum vitæ periculo).
110. Ponunt improbi laqueum mihi,
et ab edictis tuis non aberro.

111. Peculii instar teneo præcepta tua in æternum,
nam gaudium cordis mei illa sunt.
112. Flexi cor meum ad faciendum statuta tua
in perpetuum usque ad finem.

XV.

113. Divisos (dubitatores, incredulos) odi,
et legem tuam diligo.
114. Protector (Maurer, *latibulum*) meus et clypeus mens tu es,
verbum tuum exspecto (in eo confidens).
115. Recedite a me, malefici,
ut servem jussa Dei mei.
116. Sustenta me secundum sermonem tuum, ut vivam,
neque me confundi sinas ab exspectatione mea (vel, *propter spem meam*).
117. Suffulci me, ut salvus fiam,
et respiciam statuta tua continua.
118. Contemnis omnes qui aberrant a statutis tuis,
nam vanitas (vana) est fraus eorum.
119. Ut scorias aufers (LXX, *חַבְשׁוּ reputavi*) omnes improbos terræ,
ideo diligo præcepta tua.
120. Horret præ terrore tui caro mea,
ataque a sententiis tuis timeo.

XVI.

121. Feci quod æquum et justum est,
non me relinques (dabis) oppressoribus meis.
122. Sponde pro servo tuo (in fidem tuam me recipe) in bonum (In salutem
meam),
ne me vi opprimant insolentes.
123. Oculi mei tabescunt desiderio salutis tuæ,
et verbi tui justi (adimplendi).
124. Fac cum servo tuo secundum gratiam tuam,
et statuta tua doce me.
125. Servus tuus ego sum, intelligentem me redde,
ut cognoscam præcepta tua.
126. Tempus est agendi Jovæ,
frangunt impii legem tuam.
127. Ideo diligo jussa tua,
magis quam aurum et aurum purum.
128. Ideo omnia (Dei) edicta omnis generis recta habeo (probo);
omnem tramitem mendacii odi.
129. Mirabilia sunt præcepta tua,
ideo servat ea anima mea.

130. Apertio (declaratio) verborum tuorum illustrat,
intelligentes reddit simplices.
131. Os meum distendo, et inhio,
nam jussorum tuorum desiderio teneor.
132. Converte te ad me, et miserere mei,
pro jure *quod est* (*debetur*; alii, *pro more*) diligentibus nomen tuum.
133. Gressus meos firma in verbo tuo,
nec in me dominari sinas ullam nequitiam.
134. Redime me ab oppressione hominum,
ut observem edicta tua.
135. Faciem tuam illustras (vel *facies tua luceat*) in seryum tuum,
et doce me statuta tua.
136. Rivos aquarum demittunt oculi mei,
quia *impii* non observant legem tuam.

XVIII.

137. Justus tu *es*, Jova,
et rectæ (propr. *rectum*; alii, *rectus in*, etc.) sententiæ tuæ.
138. Præstituisti justitiam præceptorum tuorum (præcepta justa dedisti),
et firmitatem *eorum* (firma) valde.
139. Consumit me indignatio mea,
quod obliiscuntur verba tua adversarii mei.
140. Purum (sincerum) *est* verbum tuum valde,
et servus tuus diligit illud.
141. Tenuis ego *sum* et contemptus,
edicta tua non obliyiscor.
142. Justitia tua jus (justa) *est* in æternum,
et lex tua veritas (integra, non fallax).
143. Miseria et angustiæ inveniunt me;
nihilominus jussa tua *sunt* deliciæ meæ.
144. Jus (justa) *sunt* præcepta tua in æternum;
intelligentem me redde, ut vivam.

XIX.

145. Clamo *ad te* toto corde : exaudi me, Jova,
statuta tua servabo.
146. Voco te, juva me,
et observabo præcepta tua.
147. Prævenio (gall. *je prends les devants*) in crepusculo *matutino* (alius,
vespertino, i. e. nocte), et vociferor,
verbum tuum exspecto (in eo confidens).
148. Præveniunt oculi mei vigiliis (priusquam decadant vigiliæ nocturnæ),
ad meditandum verbo tuo.
149. Vocem meam audi secundum gratiam tuam,
Jova, secundum sententias tuas vitæ me restitue.
150. Appropinquant *contra me*, qui sectantur scelus,

- a lege tua procul absunt.
151. Propinquus *tamen* tu es, Jova,
et omnia jussa tua sunt veritas.
152. Dudum scio ex (vel *de*) præceptis tuis,
in perpetuum servanda te illa constituisse.

XX.

153. Vide afflictionem meam et eripe me,
nam legem tuam non obliviscor.
154. Age causam meam et redime me,
secundum verbum tuum vitæ me restitue.
155. Procul abest ab improbis salus,
nam statuta tua non quærunt.
156. Misericordia tua magna est, Jova;
secundum sententias tuas vitæ me restitue.
157. Multi sunt persecutores mei et adversarii mei;
a præceptis tuis non deflecto.
158. Video perfidos et fastidio,
qui (vel *quia*) verbum tuum non observant.
159. Vide, edicta tua me diligere;
Jova, secundum gratiam tuam vitæ me restitue.
160. Summa verbi tui veritas est,
atque in perpetuum stat omnis sententia tua justa.

XXI.

161. Principes persequuntur me sine causa,
sed a verbis tuis timet cor meum.
162. Lætor ego de verbo tuo,
ut qui invenit prædam magnam.
163. Mendacium odi et abominor,
legem tuam diligo.
164. Septies (sæpius) per diem laudo te
propter sententias tuas justas.
165. Pax magna est diligentibus legem tuam,
neque iis est offendiculum.
166. Exspecto salutem tuam, Domine,
et jussa tua facio.
167. Observat anima mea præcepta tua,
et diligo ea valde.
168. Observo edicta tua et præcepta tua,
quia omnes viæ meæ coram te (tibi notæ sunt).

XXII.

169. Appropinquet clamor meus in conspectum tuum, Jova;
secundum verbum tuum intelligentem me redde.

170. Veniat obsecratio mea in conspectum tuum; secundum verbum tuum eripe me.
171. Ebulliant labia mea laudes tuas, nam docet me statuta tua.
172. Canat (vel pronuntiet) lingua mea verbum tuum, nam omnia jussa tua iustitia (justissima) sunt.
173. Sit manus tua ad juvandum me, nam edicta tua elegi.
174. Desiderio teneor salutis tuae, Jova, et lex tua deliciae meae.
175. Vivat (alius vivet) anima mea et laudet te, et sententiae tuae adjuvent me.
176. Oberro ut ovis perdita: require servum tuum, nam jussa tua non obliviscor.

BELLARMINI EXPLANATIO.

PSALMUS CXVIII.

TITULUS ET ARGUMENTUM.

Alleluia.

Ilic Psalmus tribus in rebus omnibus alias antecellit. *Primo*, utilitate; est enim totus moralis et hortatorius ad vitam secundum legem Domini instituendam, et ea causa est, cur quotidie ab Ecclesia frequentetur. *Secundo*, longitudine; continet enim versus 176, cum Psalmus LXIVII, qui ex reliquis longissimus est, non ascensiat ultra vers. 78. Causa hujus tantæ longitudinis fortasse fuit, ut populus haberet in quo pie et cum fructu occuparetur, dum ter in anno alios excederet. *Tertio*, elegantia et artificio alphabetico, siquidem primi octo versus incipiunt singuli a prima littera alphabeti, sequentes octo a secunda, et sic deinceps, ita ut octies totum alphabetum repetatur. Hujus rei causam non aliam esse arbitror, nisi ad memoriam adjuvantam, cum hic Psalmus memoriter recitandus, vel concinendus esset. Explicant hunc Psalmum diligenter SS. Patres, Hilarius, Ambrosius, Augustinus, Hieronymus, et innumerabiles alii, tum veteres, tum recentiores. Argumentum Psalmi est encomium legis divinae, et exhortatio ad eam servandam; sed interim admiscentur varii affectus, et precatioes ad Deum.

EXPLICATIO PSALMI.

Vers. 1. *Aléph. 1. BEATI IMMACULATI IN VIA, QUI AMBULANT IN LEGE DOMINI.*

Quod rectissimo ordine primum argumentum ad suadendam prestantiam et utilitatem divinarum principiis, dicit Propheta a beatitudine, quæ est ultimus finis hominis: nam in scientia morali, illud naturali, est finis, quod sunt prima principia in scientia naturali. Est autem hic sensus primi versiculi: « Beati » sunt qui in via hujus vitae non inquinantur luto, vel sordibus peccatorum; illi autem sunt, qui non inquinantur, ac per hoc beati sunt, « qui ambulant in lege Domini », id est, qui dimisis aliis viis, eligunt viam legis Domini, quæ sola mundissima et nitidissima est. Sed singula verba expendamus. Illud, *beati*, significat tum felicitatem æternam, quæ sola est perfecta beatitudo; tum felicitatem temporalem, qualis in hac vita haberi potest. Itaque sensus est: Beati erunt

æterna felicitate, et nunc etiam beati sunt, id est, lati atque quieti, nihil in hoc mundo cuperentes, qui vivunt sine macula peccati, eo quod « ambulent in lege Domini ». Quod enim recta via ad celestem beatitudinem sit observantia legis Dei, docet Christus *Math. cap. xix*: « Si vis ad vitam ingredi, serva mandata. » Quod etiam in hac vita nulli sint feliores iis, qui recte ac pie vivunt; notum est tum experientia, tum ratione: nam beatus est, qui habet quidquid vult, et nihil mali vult. Viri iniqui multa mala volunt, et multa non habent eorum quæ volunt. Viri justi nihil mali volunt, et habent quidquid volunt; quia solum Deum volunt, et ejus voluntatem implere cupiunt. Illud, *immaculati*, non significat parentiam omnis peccati, etiam venialis: sic enim nulli essent in hac vita immaculati; sed significat parentiam omnis peccati lethalis, quod solum proprie inducit maculam. Videtur autem sumpta me-

taphora a maculis quæ contrahuntur inter ambulandum, cum iter facimus per vias lutosas, aut pulverulentas, aut alio modo sordidas. Illud, *in via*, significat in vita hac mortali, quæ aptissime dicitur via, cum semper mutetur, et, ut ait Job cap. x : « Nunquam in eodem statu permaneat, » sed ab initio nascendi decurrat sine intermissione usque ad metam moriendi. Denique illud, *in lege Domini*, significat legem Domini esse quamdam viam rectam et mundam, cum peccatum omne prohibeat. Opponitur autem lex Domini legi carnis, de qua Apostolus *ad Roman. viii* : « Quæ est via cupiditatum, » et plena pulvere superbiæ, cœno luxuriæ et aqua sordida avaritiae.

Vers. 2. 2. BEATI QUI SCRUTANTUR TESTIMONIA EJUS, IN TOTO CORDE EXQUIRUNT EUM.

Declarat priorem versiculum, ac docet non sufficere quamcumque legis observantiam ad beatitudinem acquirendam. Multi enim superficie tenus observant legem, dum non occidunt, non furantur, non mæchantur; sed non vere ambulant, ut oportet, ad acquirendam felicitatem in lege Domini, quia forte oderunt proximum suum, retinent opes superfluas, cum meretricibus fornicantur. Oportet igitur, si quis beatus esse velit, « ut scrutetur omnia testimonia Domini, » id est, considereret diligenter sensum totius legis, quæ dicitur testimonium, quia testificatur nobis Dei voluntatem; qui enim scrutatur legem, invenit, non solum prohiberi homicidium per legem, *non occides*, sed prohiberi etiam odium et iram, ut Dominus exposuit *Matth. v*; imo juberi amorem, quia finis omnis legis est dilectio; et qui dicit: *Non occides*, ideo dicit, ne lædatur dilectio, et hoc idem intelliget de aliis præceptis, qui ea scrutabitur. Ille autem scrutatur testimonia ejus, qui « ex toto corde exquirit eum; » qui enim serio Deum querit, et toto corde desiderat ejus gratiam in hoc mundo, et ejus præsentiam in futuro, is sine dubio in omni opere suo diligenter scrutatur, quæ cor dicitur sit voluntas ejus, et secundum eam ambulare contumaciam habent. Exemplum habemus in viatoribus: qui enim ad aliquam civitatem quam citissime pervenire cupiunt, si sollicite scrutantur, et querunt a quibuscumque obviis, quæ sit recta et commoda via ad eam civitatem; qui vero deambulant animi gratia, neque propositum habent locum quo ire cupiant, non multum laborant de via. Ait igitur Propheta: « Beati qui scrutantur testimonia ejus, » id est, dixi beatos qui ambulant in lege Domini; sed explico me beatos dicere voluisse illos, qui ita ambulant in lege Domini, ut diligenter scrutentur sensum totius legis et voluntatem legislatoris; id quod illi soli faciunt, qui ex toto corde exquirunt Deum, « nihil creatum illi antepontentes, vel sequentes, neque amorem cordis inter Deum et creaturam dividentes; sed solum Deum diligentes in se, et creaturas propter ipsum.

3. NON ENIM QUI OPERANTUR INIQUITATEM, IN Vers. 2
VIIS EJUS AMBULAYERUNT.

Probat quod supra dixit, eos esse immaculatos, qui ambulant in lege Domini. Probat autem, quoniam nullus eorum, « qui operantur iniqutatem, » ac per hoc inquinati inveniuntur in itinere, « in viis, » id est, legibus Domini ambulavit; id enim manifestum signum est, solam viam Domini prestare immaculatos ambulantes in se. Erit igitur argumentum a contrario sensu: « Qui operantur iniqutatem, » et consequenter qui maculati inveniuntur, non ambulaverunt in viis Domini: igitur qui ambulant in viis Domini, non operantur iniqutatem, et proinde immaculati sunt. Movet hoc loco S. Augustinus questionem, ut ipse dicit, gravissimam: Quomodo qui operantur iniqutatem, non ambulent in viis Domini, cum omnes sancti ambulent in viis Domini, et tamen dicant cum S. Joanne I epist. cap. i: « Si dixerimus, quia peccatum non habemus, ipsi nos seducimus, » et « omne peccatum sit iniqutas, » eodem Joanne teste epist. cap. iii. Sed responderi potest eos, qui operantur iniqutatem, non ambulare in viis Domini, quatenus operantur iniqutatem; qui enim operantur iniqutatem lethalem, ambulant contrariam viam viæ Domini; qui operantur iniqutatem veniale, ambulant præter viam Domini. Porro sancti viri ambulant in viis Domini, quia voluntatem habent in lege Domini, et in ea semper habitualiter manent, et si quando divertunt a via, quia operantur præter legem Domini, mox per pœnitentiam et confessionem rediunt in viam.

4. TU MANDASTI MANDATA TUA CUSTODIRI NIMIS. Vers. 4

Alterum argumentum dicit Propheta ab excellenti legislatori, quasi dicat: Hæc mandata non sunt mandata hominum, sed Dei, et Dei qui omnino vult a servis suis debitam obedientiam. Sed ut argumentum majorem vim habeat, alloquitur ipsum Deum, dicens: « Tu mandasti mandata tua custodiri nimis, » id est, tu, Domine, qui libere potes servis imperare, et qui potes inobedientiam severissime ulcisci, et qui non potes ignorare, vel obliuisci prævaricatores, « tu, » inquam, « mandasti, » non consilium dando, sed plane impetrando, « mandata tua custodiri, » non negligenter et oscitanter, sed diligentissime et summo zelo. Quis igitur erit, qui non continuo applicet animum ad parendum?

5. UTINAM DIRIGANTUR VIÆ MEÆ, AD CUSTODIENDAS JUSTIFICATIONES TUAS! Vers. 5

Ex auctoritate tanti legislatoris, et tam severe jubentis, motus Propheta, optat quam diligentissime Dei mandata servare. Sed hoc proponit in persona sua, ut exemplo suo persuadeat omnibus aliis obedientiam exhibere Deo. Si enim ipse rex et princeps supremus ita tremit ad mandata

Legis
Domini
varia
sunt no-
mina.

Prima
gratia
non est
legi tri-
buenda.

Vers. 6.

Domini, et tanto affectu cupit illa implere, quid facere debent homines privati? «Utinam, inquit, dirigantur viæ meæ!» id est, actiones meæ, consilia mea, sermones mei, «dirigantur,» id est, conformentur rectitudini legis tuæ. «Ad custodiendas justificationes tuas,» id est, ad observandas leges tuas: lex enim Domini variis nominibus in Scripturis, atque in hoc potissimum Psalmo, appellatur, ut quoniam sæpius mentio ejus facienda est, verborum varietate lectoris fastidium minuatur. Igitur nunc dicitur lex, nunc præceptum, nunc mandatum, nunc sermo, nunc eloquium, nunc verbum, nunc alia, quæ perspicua sunt: interdum dicitur testimonium, ut supra monuimus, quoniam lex testificatur voluntatem Dei, interdum justificatio, ut hoc loco, quia justificat observatores suos, id est, justiores facit, juxta illud Apostoli Rom. cap. II: «Factores legis justificabuntur.» Dixi autem justiores fieri, qui legem observant, quia prima justificatio, qua ex peccatoribus efficiuntur justi, non potest legi tribui, sed gratiæ, dicente eodem Apostolo Gal. II: «Si per legem justitia, ergo Christus gratis mortuus est.»

6. TUNC NON CONFUNDAR, CUM PERSPEXERO IN OMNIBUS MANDATIS TUIS.

Colligit magnum fructum ex directione viarum suarum ad custodiendas justificationes Domini. Qui enim attendunt magnitudinem tanti legislatoris, si forte dum operantur, non respiciant ad regulam divinæ legis, et inveniant postea opera sua distorta, et non conformia rectitudini legis Dei, miro modo confunduntur et erubescunt, neque audent oculos ad Deum levare, dicentes intra se: Quis ego sum, qui opera mea, aut verba mea, aut cogitationes meas ausus sum non conformare rectitudini mandatorum summi Legislatoris, qui ea tanto zelo custodiri jussit? David igitur magnum fructum existimat, ut vere est, non habere causam tantæ confusionis; ideo dicit: Optavi dirigere vias meas ad custodiendas justificationes Domini, quia «tunc non confundar;» neque erit eur erubescam coram te, Domine, «cum perspexero in omnibus mandatis tuis,» id est, cum respexero in omnibus actionibus meis ad regulam mandatorum tuorum, ut rectitudini ejus conformem omnes actiones meas. Porro phrasis est linguae hebraicæ, *perspicere in mandatis*, pro eo quod nos dicimus, *perspicere ad mandata*. Ex his intelligimus quantum distent a spiritu et pietate Davidis, qui tam multa faciunt opera distorta, et nullo modo conformia legibus Dei; et tamen confusionem illam internam non conceipiunt, quia magnitudinem legislatoris non considerant.

Vers. 7.

7. CONFITEBOR TIBI IN DIRECTIONE CORDIS, IN EO QUOD DIDICIT JUDICIA JUSTITIA TUA.

Addit quod non solum non confundetur, sed

etiam gratias aget Deo, quod ejus gratia et adiutorio didicerit observantium legis divinæ. «Confitebor, inquit, tibi,» id est, laudabo te, et gratias agam tibi, sive confitebor laudes tuas et gratiam tuam, «in directione cordis,» id est, in rectitudine cordis, sive rectissimo corde; confitebor autem laudes tuas, «in eo quod didici,» id est, propterea quod gratia tua adjuvante didici «judicia justitiae tuæ,» id est, justissimas leges tuas. Est autem hoc loco observandum, illud, *didici*, non significare simplicem cognitionem, quæ ad intellectum pertinet, sed certam persuasionem et approbationem quam illi soli habent, qui re ipsa legem observare firmissime apud se constitunt: quomodo accipitur vox *descendi*, Joan. VI, ubi Dominus ait: «Omnis, qui audivit a Patre et didicit, venit ad me;» illi enim discunt a Patre cœlesti, qui intus in corde per infusionem Spiritus Sancti certo persuadentur bonum esse credere, vel converti, vel legem servare, etc. Nascitur autem hæc persuasio ex rectitudine cordis, quia rectis corde optimus videtur Deus, juxta illud Psalm. LXII: «Quam bonus Israel Deus his, qui recto sunt corde!» Quibus autem placet Deus, non possunt non placere omnes voluntates Dei, quæ per præcepta manifestantur: quare et ipsa misericordia placent. Porro per *judicia justitiae* intelliguntur eadem præcepta legis divinæ, quæ nunc dicuntur *judicia*, nunc *justitiae*, nunc etiam *judicia justitiae*. *Judicia* dicuntur, quia sunt quædam sententiæ a Deo judicate optimæ, sive quædam decreta et statuta divina; dicuntur etiam *justitiae*, quia sunt regulæ justitiam continentis; dicuntur denique *judicia justitiae*, quia sunt *judicia et decreta justissima*. Itaque sensus versiculi est: Laudabo te recto corde, ex eo quod persuasus sum leges tuas esse justissimas, et omnino custodiendas, quod totum non ex me, sed ex gratia tua me habere confiteor.

8. JUSTIFICATIONES TUAS CUSTODIAM, NON ME Vers. 8. DERELINQUAS USQUEQUAQUE.

Hæc est conclusio primi oeonarii, quasi dicat: Igitur cum lex tua custodita faciat beatos, et a te summo legislatore sit proposita, et severissime observari mandata, ego «*justificationes tuas custodiam*,» id est, decrevi et statui omnibus viribus custodire. Sed tu quoque vicissim non me deserbas auxilio et gratia tua, sine qua nihil possum; et si forte justo tuo judicio ad modicum deserbas me, ut intelligam infirmitatem meam, et ad te confugere atque in te confidere discam, saltem «non me derelinquas usquequaque,» id est, omnino et in perpetuum. In hebreo habetur *TND TY, usque nimis*, sive *usque valde*, quod in eamdem sententiam recidit. Sanctus enim David bene noverat nullum esse in hac peregrinatione, qui aliquando non sentiat gratiæ subtractionem: ait enim in alio loco: «Ego dixi in abundantia mea: Non movebor in æternum. Avertisti faciem

tuam, et factus sum conturbatus, » *Psalm. xxix*; et in hoc ipso *Psalm. cxviii*, sæpe David repetit se didicisse mandata Domini, et non minus sæpe rogit doceri eadem mandata.

Vers. 1. *Beth. 1. IN QUO CORRIGIT ADOLESCENTIOR VIAM SUAM? IN CUSTODIENDO SERMONES TUOS.*

Laudavit Dei legem a fine et ab auctore: nunc laudat ab utilitate, quam affert ei cui datur, et quoniam nullus magis indiget lege, quam ingrediens iter vitæ, id est adolescens, ideo de illo

Adolescens maxime indiget cognitio- ne legis Dei. peculiariter loquitur; adolescens enim primo, indiget lege Dei, quia in ipso maxime viget lex membrorum; secundo, quia nondum acquisivit prudentiam proprio experimento; tertio, quia sicut viatori maxime prodest initio itineris invenire rectam viam, ne posteaquam diu erraverit, cogatur majore labore et dispendio reverti ad principium viæ; sic etiam optimum est in adolescentia assuescere mandatis Domini, ut conservet innocentiam. « Bonum est viro, inquit Hieremias

Thren. iii, cum portaverit jugum ab adolescentia sua. » Quæritur hoc loco, quid intelligendum sit per adolescentiem. Non existimo Davidem loqui de adolescenti lapso in varios errores, qualis erat filius prodigus de Evangelio, *Luc. cap. xv*; nam ad corrigendos similes errores, necessaria est gratia pœnitentiae; neque sufficit notitia, vel custodia legis; neque videtur David loqui de juniore, ut distingui potest, contra hominem veterem, id est, de homine renovato per gratiam: hic enim agitur de corrigendis erroribus, qui in homine renovato correcti censentur. Existimo igitur Davidem simpliciter loqui de adolescenti ratione ætatis, qui indiget remedio contra naturales impetus naturæ corruptiæ, « quæ prona est ad malum ab adolescentia sua, » *Gen. cap. viii*. Est igitur sensus: « In quo corrigit, » id est, qua arte, quo modo, quo remedio « corrigit adolescentior viam suam, » id est, actiones, sive vitam suam corruptam naturali depravatione ex peccato originis, et propensam ad malum? In hebræo et graeco habetur in futuro, *in quo corriget*; sed in sensu nulla dissensio est; nam illud, *in quo corrigit*, idem est ac si dictum esset, *in quo corrigerem potest*, sive quid habet, unde corrigat errores quos committet in adolescentia sua? Respondet: « In custodiendo sermones tuos, » qui enim ab adolescentia assuescit timere Deum, et ex eo sancto timore sermones Dei, divinas videlicet leges diligenter custodire, is haud dubie multos vitabit errores, cuius rei exemplum habemus in Tobia juniore, « quem pater ejus ab infantia Deum timere docuit, et abstinere ab omni peccato, » *Tob. cap. I.*

De quo adolescenti loquutus Propheta ta. Vers. 2. *2. IN TOTO CORDE MEO EXQUISIVI TE: NE REPEL- LAS ME A MANDATIS TUIS.*

Ex hac tanta utilitate motus David, petit a Deo gratiam servandi mandata, et proponit omnino

illa servare, et exemplo suo idem nos facere debet; ac primum ponit rationem, cur exaudiri debat, quæ est ratio Evangelii: « Quærite, et invenietis; » et: « Omnis qui querit, invenit, » *Luc. cap. xi*. « In toto corde meo, inquit, exquisivite. » Hæc est ratio exauditionis, quia exquisivit Dominum toto corde, id est, quæsivit gratiam ejus, et cupivit illi placere, ejusque voluntatem adimplere. « Ne repellas me a mandatis tuis; » hæc est mira petitio, quasi Deus, qui « mandavit mandata sua custodiri nimis, » repellere velit aliquem a mandatis suis custodiendis. Sed hic modus loquendi significat necessitatem gratiae, quam Necessitas illi soli cognoscunt, qui cupiunt mandata servare, et virium suarum imbecillitatem experiuntur. Igmaritur « ne repellas me a mandatis tuis, » hunc habet sensum: Ne deseras me gratia tua; alioquin idem esset, ac si repelleres me ab impletione mandatorum tuorum, cum sine auxilio gratiae illa servari non possint.

3. *IN CORDE MEO ABSCONDI ELOQUIA TUA, UT NON PECCEM TIBI.* Vers. 3.

4. *BENEDICTUS ES, DOMINE, DOCE ME JUSTIFICA- TIONES TUAS.* Vers. 4.

Addit aliam rationem cur exaudiri debat, et rursum petit gratiam legis implendæ. Ratio cur exaudiri debat, est magnum desiderium non peccandi, ac per hoc legis custodiendæ. « In corde meo, inquit, abscondi eloquia tua, » id est, in intimo recessu cordis posui legem tuam, sive quod est idem, « eloquia tua, » ut nunquam obliviscar eorum. Finis autem hujus absconsionis est, ut non peccem tibi. Itaque desiderium non peccandi, facit ut nunquam oblivisci velim legis divinæ, et ut nunquam obliviscar, abscondi eam in intimo corde, ut nulla res inde mihi illam eripere possit. Præmissa ratione exauditionis, addit petitionem: « Benedictus es, Domine, doce me justificationes tuas, » ubi illud, *doce*, ut supra diximus, non significat simplicem notitiam: hanc enim se habere testatur cum dicit, « in corde se abscondisse eloquia Domini; » et supra dixit: « Didici iudicia justitiae; » sed significat gratiam implendæ legis. Tunc enim Deus docet justificationes suas, cum per gratiam intus in animo inspirat delectationem legis, et facit ut homo plâne persuasus omnino velit legem servare. Illud autem, *benedictus es, Domine*, additur ad confirmandam rationem exauditionis, quasi dicat: Tu, Domine, doce me justificationes tuas, qui ab omnibus rebus creatis benediceris, quia imples omnia benedictione, et inde vivunt et florent; unde dicitur in *Psalm. lxxxiii*: Etenim benedictionem dabit legislator. Itaque Deus benedicatur, et benedit; benedicitur dum laudatur, benedit dum beneficia præstat.

5. *IN LABIS MEIS PRONUNTIAVI OMNIA JUDICIA ORIS TUI.* Vers. 5.

Vers. 6. « 6. IN VIA TESTIMONIORUM TUORUM DELECTATUS SUM, SICUT IN OMNIBUS DIVITIIS.

Vers. 7. « 7. IN MANDATIS TUIS EXERCEBOR, ET CONSIDERABO VIAS TUAS.

Vers. 8. « 8. IN JUSTIFICATIONIBUS TUIS MEDITABOR, NON OBLIVISCAR SERMONES TUOS.

In his quatuor reliquis versiculis declarat animam suum erga legem Domini, quia fortasse mox benedictionem legislatoris acceperat, quam paulo ante petierat. Dicit enim se habere legem Dei in ore, in voluntate, in intelligentia et memoria, ac per hoc in omnibus partibus animæ. De ore dicit: « In labiis meis pronuntiavi omnia iudicia oris tui, » id est, assidue locutus sum, et prædicto præcepta tua omnibus, qui audire volunt: per iudicia enim præcepta intelligimus, et per id quod additur, « oris tui, » intelligimus præcepta illa non esse humana, sed divina, cum ore Domini manifestata sint. De voluntate et affectu dicit: « In via testimoniorum tuorum delectatus sum, sicut in omnibus divitiis, » id est, delectatus sum ambulare in via testimoniorum tuorum, sicut delectantur avari in omni copia divitarum. Magnus sane affectus, et rarus apud homines, cum e contrario soleant plerique pro tenui lucro contemnere omnia mandata Dei. De intelligentia, sive cogitatione dicit: « In mandatis tuis exercebor, et considerabo vias tuas; » nam exercebor hoc loco significat, exercebor meditando, ut ex voce hebraica manifestum est; unde etiam subditur identiter aliis verbis: « Et considerabo vias tuas. » Est igitur sensus: In mandatis tuis ruminandis, et saepel mecum submissa voce repetendis, et diligenter considerandis exercebor. De alio affectu cordis dicit: « In justificationibus tuis meditabor. » Illud enim meditabor, non est idem hoc loco cum exercebor, quod recte veri potuisset meditator, sed significat: Delectabo meipsum ludendo in justificationibus tuis decantandis: vox enim hebraica significat, ludere et oblectare seipsum. Supradixerat: « Delectatus sum in via testimoniorum tuorum, sicut in omnibus divitiis, » ubi mentionem facit delectationis ex re utili; nunc dicit: Oblectabo meipsum ludendo in mandatis tuis, ut ostendas ex lege Domini sumi etiam delectationem tanquam ex re dulci et suavi. Quomodo etiam in Psalm. xviii, comparata est lex Domini karro et melli, rei utili et dulci. Hic igitur est sensus hujus versiculi: « In justificationibus tuis meditabor, » id est, in præceptis tuis decantandis exercebor, ut inde delectationem animo percipiám, qualis jucunde ludendo percipitur. Addit ultimo de memoria: « Non obliviscar sermones tuos, » id est, ex tam crebra meditatione et suavi decantatione fiet, « ut sermones tuos, » id est, legem tuam, « nunquam obliviscar. » Hinc colligimus legem Domini habentibus benedictionem legravis? gislatoris, id est, spiritum veræ charitatis, non

esse gravem, neque difficilem, sed esse, ut Dominus ait in Evangelio Matth. cap. xi, « jugum suave, et onus leve. »

Ghimel. 1. RETRIBUE SERVO TUO, VIVIFICA ME, Vers. 1. ET CUSTODIAM SERMONES TUOS.

In hoc octonario enumerat impedimenta legis custodienda, et orat ut a se removeantur. Primum impedimentum est mors animæ; non enim possunt homines mortui servare mandata vitae, eo modo quo oportet, ad vitam æternam acci rendam. David autem etiam si sperare poterat se esse vivum, tamen « quia nemo scit utrum odio vel amore dignus sit, » Eccl. ix, et quia transfigurabat personas peccatorum in se, ideo vel prose, vel pro illis orat, et dicit: « Retribue servo tuo, vivifica me, et custodiam sermones tuos, » id est, restitue servo tuo, si forte in peccatis mortuus sit, vitam animæ, et tunc sermones tuos custodiare poterit. Illud, retribue, posset etiam explicari pro tribue; nam vox hebraica id facile patitur: tamen hoc loco servare possumus propriam significationem latinam, si per retribue intelligamus restitue, vel redde. Illud, vivifica me, in hebreo et graeco est vivam, et tunc sensus est: Retribue ut vivam, id est, restitue, vel redde vitam. Verba nostræ editionis sunt paulo obscuriora, sed in eundem sensum explicanda sunt, nimurum sic: « Retribue servo tuo, » id est, iterum tribue mihi servo tuo per gratiam, quod amisi per peccatum, et mox explicat, dicens: « Vivifica me, » hoc enim est, quod amisi; et vitæ restitutus, ambulare incipias viam mandatorum tuorum, et sic « custodiam sermones tuos. »

2. REVELA OCULOS MEOS ET CONSIDERABO, MT. Vers. 2. RABILIA DE LEGE TUA.

Alterum impedimentum sunt passiones animi, amor, timor, desiderium, ira, et similes perturbationes, quæ saepè faciunt ut homo non recte judicet. De hoc dicit: « Revela oculos meos, » id est, tolle per infusionem luminis tui velamen passionum ab oculis mentis meæ, et tunc oculo interiori purificate, « considerabo mirabilia de lege tua, » id est, mirabilem aequitatem, mirabilem sapientiam, mirabilem utilitatem, et alia id genus mirabilia, quæ de lege tua emicant.

3. INCOLA EGO SUM IN TERRA, NON ABSCONDAS A ME MANDATA TUA. A. Vers. 3.

Tertium impedimentum est terrena peregrinatio; nam qua parte peregrinamur in terra, carnales et terreni sumus: « lex autem tota spiritualis est, » ut dicitur Rom. cap. vii. Quare nisi Deus per gratiam nos spirituales efficiat, legem spiritualem implere non possumus. « Incola, inquit, sum in terra, » id est, homo terrenus sum, animalis sum, in terra habito, dum peregrinor a patria: ideo peto, « ut non abscondas a me mandata tua, » id est, per gratiam efficias ut capax fiam mandato-

Mors
animæ
primum
impedi-
mentum
servan-
dæ legi
divinae.

rum tuorum. Potest etiam hoc referri ad ignorantes viarum; vox enim hebraica *Vgħer* proprietas *advenam* et *peregrinum* significat; peregrini autem et advenae ignorantibus sunt viarum, et facile decipiuntur a civibus regionis. Petet igitur advenae et peregrinus, ut Deus illi viam bonam ostendat, ac dicit: « Non abscondas a me mandata tua; » id est, fac ut me non lateat via mandatorum tuorum, quae sola est recta via, quae ducit ad vitam.

Vers. 4. **4. CONCUPIVIT ANIMA MEA DESIDERARE JUSTIFICATIONES TUAS IN OMNI TEMPORE.**

Impedimentum quartum est imperfectio. Quartum impedimentum est imperfectio. Pauci enim sunt viri perfecti, qui toto corde diligent legem Dei, et ex amore justitiae operentur bona. Plurimi autem bonis desideriis tanguntur, sed ultra non proficiunt. In horum persona Propheta dicit: « Concupivit anima mea desiderare justificationes tuas in omni tempore; » non potuit dicere: « Concupivit anima mea implere mandata tua; » sed imperfectionem seam confessus, ait: « Concupivit desiderare, » et haec ipsa confessio imperfectionis est petitio perfectionis, quam Deus concedit, cum facit hominem ardenter desiderare custodiam mandatorum. Recte docet S. Augustinus, aliud esse concupiscentiam desiderii extra potentiam concupiscentem, aliud concupiscentiam desiderii intra eamdem potentiam: concupiscentia enim prior potest esse sine desiderio ejus rei, quae concupiscitur; posterior non potest: exempli gratia, agrotus, qui laborat inappetentia cibi, concupiscit desiderare cibum; et tamen non habet desiderium cibi, quia concupiscentia desiderii est in voluntate rationali, desiderium cibi debet esse in fauibus et palato, ubi tamen non est, dum ibidem manet inappetentia cibi. At concupiscentia desiderii mandatorum Domini in voluntate rationali est, et in eadem esse debet desiderium mandatorum: quare fieri non potest ut homo concupiscat desiderare, et non desideret, quia ipsa concupiscentia est desiderium mandatorum. Intelligendum igitur est per concupiscentiam desiderii significari imperfectum desiderium, ut paulo ante diximus; qui enim imperfecte desiderat, vult et non vult, cupit et non cupit, et ejusmodi sunt plurimi, qui desiderant beatitudinem regni cœlorum, sed ita frigide aetenuiter, ut nullus inde sequatur effectus: qui si ardore illo desiderarent, quo res tanta desideranda est, sine dubio non quiescerent, donec ad illam pervenirent; sed qui tales sunt, cum Davide imperfectum suum in oratione Domino manifestent ac dicant: « Concupivi desiderare justificationes tuas, » adjuva ut perfecte ardenterque desiderem, ut desiderium in opus transeat, et mandata tua custodiam in omni tempore.

Vers. 5. **5. INCREPASTI SUPEREOS: MALEDICTI, QUI DECLINANT A MANDATIS TUIS.**

Quintum impedimentum omnium maximum

superbia est, quæ non sinit collum jugo submittere; sed hoc impedimentum in se David non agnoscebat, neque in sui similibus, sed solum in hostibus Dei: ideo simpliciter illud execratur.

Increpasti, inquit, superbos, » qui videlicet ex contemptu mandata non servant. Talis fuit initio mundi Lucifer, quem Deus increpatione sua ad inferos tanto impetu deturbavit, ut Dominus dicit: « Videbam Satanam sicut fulgor de celo cadentem, » *Luc. x.* Talis fuit et Adam, qui ex superbia, qua fieri voluit sicut Deus, Deo non obediuit, et a Domino increpatus, tulit sententiam mortis pro se et pro toto humano genere. Vide S. Augustinum tract. 4 in epist. B. Joannis, et in Psalm. LXVIII, vers. 6, et lib. XIV *De Civit. Dei*, cap. XIII. Denique superbos omnes terribili increpatione Deus in judicio feriet; et ideo subiungit David: « Maledicti, qui declinant a mandatis tuis, » nimurum qui declinant potissimum ex superbia et contemptu legislatoris; illis enim præcipue dicetur: « Ite, maledicti, in ignem aeternum, » *Matth. xxv.*

6. AUFER A ME OPPROBRIUM ET CONTEMPTUM, Vers. 6.
QUIA TESTIMONIA TUA EXQUISIVI.

7. ETENIM SEDERUNT PRINCIPES, ET ADVERSUM ME LOQUEBANTUR: SERVES AUTEM TUUS EXERCEBATUR IN JUSTIFICATIONIBUS TEIS, Vers. 7.

Superbi non solum obdiren Deo recusant, sed etiam contemnunt, et contumelijs afficiunt eos qui obediunt; sed tandem contemptus et opprobrium in eos resident, ut hoc loco David prædictum: Quæ sunt cit: nam, ut saepè ex Augustino monuimus, ex quæ videntur in Psalmis imprecações, prædiciones sunt per modum imprecationis. Ait igitur: « Aufer a me opprobrium et contemptum; » id est, tempus erit, cum auferes a me opprobrium et contemptum, et in superbos inobedientes rejicies; « quia ego testimonia tua exquisivi, » quæ illi videlicet exquirere contempserunt. In hebreo habetur, quia testimonia tua custodiū, sed Septuaginta verterunt exquisivi, quod exponi debet, exquisivi ut custodiem. Declarat autem sequenti versiculo, eur dixerit: « Aufer a me opprobrium et contemptum, » dicens: « Etenim sederunt principes, et adversum me loquebantur, servus autem tuus exercebatur in justificationibus tuis. »

Principes enim superbi sederunt, vel congregati in concilium, vel in thronis suis judicantes, vel quiescentes in divitiis et potentia sua, « et adversum me loquebantur, » exprobantes obedientiam mandatorum Dei. « Ego autem servus tuus, » non respiciens ad minas, vel opprobria eorum, « exercebar in justificationibus tuis, » videlicet considerandis, prædicandis et adimplendis. De quibus principibus David loquatur ad litteram, incertum est: mystice autem haec referuntur a Patribus ad principes infideles, qui martyres, persequebantur.

Vers. 8. **8. NAM ET TESTIMONIA TUA MEDITATIO MEA EST,
ET CONSILIO MEUM JUSTIFICATIONES TUÆ.**

Explicat quod dixit : « Exercebar in justificationibus tuis. » Dicit enim : « Testimonia Domini, » et « justificationes Domini » hoc est, præcepta Domini, fuisse sibi loco dulcis consolationis, in rebus adversis, in dubiis autem loco fidelis consiliarii. In hebræo sic habetur : *Nam testimonia tua gaudium meum, viri consilii mei*, id est, lex tua mihi gaudium afferebat, et erat quasi vir consiliarius : nam in ea cogitanda oblectabar, et cum ea consultabam negotia mea. Ad hunc sensum reducenda sunt verba nostra editionis, ut cohaerent cum textu originali. Hic igitur erit sensus : « Nam et testimonia tua meditatio mea est, » id est, lex tua est mihi dulcis exercitatio, quasi ludi, vel cantici, unde consolationem accipio in rebus tristibus ; « et consilium meum justificationes tuæ, » id est, et consilium meum, quasi senatus meus, quem consulio in rebus dubiis sunt mihi « justificationes tuæ, » id est, eadem lex tua.

Vers. 1. **1. DALETH. 1. ADHÆSIT PAVIMENTO ANIMA MEA :
VIVIFICA ME SECUNDUM VERBUM TUUM.**

In hoc etiam octonario David induit personam hominis imperfecti, qui ex carnali concupiscentia retardatur a perfecta impletione mandatorum, et petit gratiam et adjutorium ad servanda mandata tua. « Adhaesit, inquit, pavimento anima mea, » id est, adhaesit terræ, hoc est terrenæ substantiæ, per amoris affectum anima mea. « Vivifica me secundum verbum tuum, » id est, da mihi vitam conformem legi tuae : nam adhærendo terræ, factus sum terrenus ; adhærendo carni, factus sum carnalis ; sed si vixero secundum legem tuam, quæ spiritualis est, adhærebo Deo, et unus spiritus fiam cum eo. In hebræo habetur, *adhæsi pulveri*; sed idem est sensus : nam pavimentum est terra, vel ex terra. Itaque qui adhæret pavimento, adhæret terræ. Notat S. Augustinus, nunc animam adhaerere carni, sive terræ, et ideo fieri carnalem et terrenam, et impediiri ab observatione perfecta legis : sed post resurrectionem gloriosam, caro adhæredit animæ, et anima Deo, et ideo tunc caro fiet spiritualis, et anima quodam modo deificabitur, et sine ulla difficultate perfectissime legem observabit, imo non egebit lege, quia sine lege, ea quæ sunt legis implebit.

Vers. 2. **2. VIAS MEAS ENUNTIAVI, ET EXAUDISTI ME :
DOCE ME JUSTIFICATIONES TUAS.**

Pergit in confessione miseriae et petitione gratiæ. « Ego, inquit, vias meas enuntiavi, » id est, actiones malas, quæ propriæ meæ sunt, non eruhi confiteri; sed palam enuntiavi, « et tu exaudiisti me » parcens mihi, solita misericordia tua. « Doce me justificationes tuas, » id est, nunc reconciliatus peto ut doceas me justificationes tuas,

id est, præcepta tua servare me facias. Illi enim, ut supra diximus, in hoc Psalmo doceri intelliguntur, qui ita persuadentur, ut faciant.

**3. VIAM JUSTIFICATIONUM TUARUM INSTRU ME, Vers. 3.
ET EXERCEBOR IN MIRABILIBUS TUIS.**

Proficere cupit in via Domini, ideo magis et magis precibus instat, ut doceatur a Deo. « Viam, inquit, justificationum tuarum instrue me, » id est, diligentius doce me, quæ sit via præceptorum tuorum, quomodo videlicet ambulare debam in lege tua. « Et exercebor in mirabilibus tuis, » id est, in schola tua edoctus exercebor in custodiendis illis etiam præceptis, quæ tam miracibia sunt, ut præ altitudine vix per ea incedi posse videatur, qualia sunt : « Diliges Deum ex toto corde ; » et : « Non concupisces ; » et : « Disliges inimicum tuum, » et similia.

**4. DORMITAVIT ANIMA MEA PRÆ TÆDIO, CON- Vers. 4.
FIRMA ME IN VERBIS TUIS.**

Iterum redit ad infirmitatem carnis confitendum et misericordiam postulandam. Nam in hac peregrinatione vix invenitur, qui non aliquando laxetur, et præ tædio continuæ luctæ, quam habet spiritus cum carne, dormitet, et tepidior fiat. « Dormitavit, inquit, anima mea præ tædio, » dum videlicet tetet ambulare viam laboriosam, carne concupiscente adversus spiritum. « Confirma me in verbis tuis, » id est, in præceptis tuis sectandis confirma me, addito fervore gratiæ tuæ, quo excitatus ambulare non cessem. In hebreo pro verbo *dormitavit*, est verbum נִפְלָא, *distillavit*. Non est improbabile Septuaginta Interpretes vertisse οὐτέζει, quod est *distillavit*, et postea errore librariorum factum esse οὐτέζει, quod est *dormitavit*. Certe S. Ambrosius utriusque lectionis meminit. In hebreo autem nulla est similitudo litterarum inter *dormitavit* et *distillavit* : nam *distillavit* scribitur נִפְלָא, *dormitavit* scribitur נִפְלָא; sensus tamen in idem recidit : nam *distillavit anima mea*, significat : Defecit anima mea instar earum rerum, quæ liquefunt et distillant humorem suum : qui autem deficiunt, et liquefunt præ tristitia, solent etiam deficiendo dormitare, *Luc. xxii* : « Invenit eos dormientes præ tristitia. » Vox *tædium* græce est, ἀνδία; acedia autem est tristitia de bono opere faciendo.

**5. VIAM INIQUITATIS AMOVE A ME, ET DE LEGE Vers. 5.
TUA MISERERE MEI.**

Declarat pluribus verbis, quod uno verbo dixerat : « Confirm me. » « Viam, inquit, iniuitatis amove a me, » id est, fac per gratiam tuam, ut longe recedam a via iniuitatis, id est, a lege peccati, quam ingredi incipiebam dormitando præ tædio ; et contra « de lege tua miserere mei, » id est, misericorditer operare ut ambulem per legem tuam. In hebreo habetur, *viam mendacii amove a me*, et opponitur ei, quod dicitur in

sequenti versiculo : « Viam veritatis elegi, » sed sensus est idem ; nam via iniquitatis est via mendacii, quia est via falsa et fallax, et potius devium quam via, et per eam ambulare, non est viam carpere, sed deviare. Illud autem, *de lege tua miserere mei*, est clarus in hebreo, *legem tuam dona mihi*; sed idem est sensus : est enim ac si dixisset ; Miserere mei, donando mihi legem tuam.

Vers. 6. 6. VIAM VERITATIS ELEGI, JUDICIA TUA NON SUM OBLITUS.

Hactenus confessus est miseriam, quam ex se habet : nunc in sequentibus versiculis declarat quid possit ex misericordia Dei, quasi dicat : Ex me viam mendacii elegi, sed ex misericordia tua, qua de lege tua misertus es mihi, « viam veritatis elegi, » id est, jam serio proposui veram viam, quae est via mandatorum tuorum ambulare; et ex misericordia tua « judicia tua, » id est, legem tuam, « non sum oblitus, » quamvis caro adversus spiritum vehementer concupisceret.

Vers. 7. 7. APHESI TESTIMONII TUIS, DOMINE, NOLI ME CONFUNDERE.

Ex me adhæsi pavimento : sed ex misericordia tua, « adhæsi testimonii tuis; » et quamvis carne serviam legi peccati, tamen mente servio legi tuae, et ideo « noli me confundere, » quod fieret, si auxilio tuo me destitueres.

Vers. 8. 8. VIAM MANDATORUM TUORUM CUCURRI, CUM DILATASTI COR MEUM.

Ex me dormitavi prætatio, sed ex misericordia tua « viam mandatorum cucurri, » id est, alacriter, expedite, cum delectatione legem tuam servavi, « cum dilatasti cor meum, » per infusionem charitatis, quae facit jugum suave et onus leve.

Vers. 9. He. 1. LEGEM PONE MIHI, DOMINE, VIAM JUSTIFICATIONUM TUARUM, ET EXQUIRAM EAM SEMPER.

In hoc octonario petit ordine quodam, primo, desiderium observandæ legis, deinde lumen ad eam intelligendam, tertio gratiam ad impletandam; postea vero petit remotionem contrariorum. David enim in hoc longissimo Psalmo rem eamdem saepius repetit, sed sub variis verborum formis, ad excitandum affectum, et tollendum fastidium. Primi versiculi hic sensus est : Fac, Domine, ut nullam aliam legem velim, nisi legem tuam. « Legem pone mihi, Domine, viam justificationum tuarum, » id est, statue mihi pro lege viam justificationum tuarum, id est, pone mihi in corde desiderium solius legis tuae. In hebreo clarus habetur, *doce me viam præceptorum tuorum*. Sed Septuaginta Interpretes considerantes quod a verbo יתְהַלֵּךְ sit vocabulum תְּהַלֵּךְ thorah, quod legem significat, prudenter intellexerunt verbum

הַלְלָנִי, quod hoc loco habetur, non solum docere, sed etiam legem ferre, significare posse; et ideo verterunt, οὐ μάθετε την ἔννοιαν, quod Latinus uno verbo exprimere non potuit, et ideo sensum obscuriorum fecit. Hinc cessant quæstiones, cur dicatur legem pone, cum jamdudum lex tradita sit, et cur justus roget ut sibi lex ponatur, cum Apostolus dicat, I Tim. 1 : « Justo non est lex posita. » Hæ quæstiones cessant, quia non petit Propheta sibi legem absolute poni; sed petit ut per gratiam Dei fiat, ut sibi non placeat lex peccati, vel mundi, vel carnis, sed sola lex Dei, illam solam sibi in corde, in desiderio, in affectu poni cupit, et ideo subdit: « Et exquiram eam semper, » id est, illam solam ex munere tuo desiderabo, fiet ut in omni mea actione queram quid jubeat lex tua. S. Hieronymus veritatem testigium, pro eo quod nos habemus semper; sed vox hebreæ est ambigua, et testigium et finem significat, et utroque modo sensus est bonus, sive dicat, exquiram vestigium, nimurum legis, hoc est, sequare eam; sive exquiram usque in finem, id est, semper.

2. DA MIHI INTELLECTUM, ET SCRUTABOR LEGEM Vers. 2.
TUAM, ET CUSTODIAMILLAM IN TOTO CORDE MEO. Vers. 2.

Posteaquam petivit desiderium sive affectum legis, petit etiam intellectum, ut recte illam intelligat, et scrutari possit ejus utilitates et præstantiam, ac cæteras ejus laudes, idque « ut custodiat illam in toto corde suo; » non enim cupid intelligere ad curiositatem, sed ad observantiam.

3. DEDUC ME, DOMINE, IN SEMITAM MANDATORIUM TUORUM, QUA IPSAM VOLUI. Vers. 3.

Nunc tertio postulat gratiam implendi legem : « Deduc me, Domine, in semitam mandatorum tuorum, » id est, fac me implere mandata tua; id enim est, incedere per semitam mandatorum. Vocantur autem semitæ, quia semitæ sunt viæ angustæ, breves, rectæ, mundæ, per quas non solent incedere, nisi homines pedites; non equi, non currus : et talis omnino est lex Domini, si comparetur ad leges carnis et mundi, quae sunt viæ latæ, sordidæ, obliquæ; et per eas animalia expertia rationis, id est, homines animales et carnæles incedunt. Ratio autem cur debeat exaudiiri, est in illis verbis, « quia ipsam volui, » id est, quia hanc semitam elegi, et per eam ambulare desideravi, ex munere Dei; decet enim, « ut qui dedit velle, det etiam perficere, » juxta promissionem Apostoli, Philip. II : « Qui operatur in vobis velle et perficere. »

4. INCLINA COR MEUM IN TESTIMONIA TUA, ET Vers. 4.
NON IN AVARITIAM. Vers. 4.

Hic versiculus respondet primo : ibi enim oraverat pro affectu cordis erga legem Dei, hic orat pro remotione affectus avaritiae, qui maxime impedit affectum erga legem Dei. « Inclina cor meum in testimonia tua, » id est, infunde cordi

Dens quowodo inclinet in malum? meo copiosam gratiam, per quam inclinetur in custodiam legis tuae, « et non in avaritiam, » id est, et non inclines cor meum in avaritiam. Dicitur autem Deus inclinare aliquem in malum, quando deserendo gratia sua, sinit illum inclinari in malum. Itaque isto modo loquendi Scriptura sancta demonstrat potentiam gratiae, non autem quod Deus proprie inclinet aliquando ad malum. Similia sunt illa Rom. 1: « Tradidit illos in reprobum sensum; » et Isai. LXIII: « Quare nos errare fecisti de via tua? »

Vers. 5. 5. AVERTE OCULOS MEOS NE VIDEANT VANITATEM, IN VIA TUA VIVIFICA ME.

Hic etiam versiculus recto ordine respondet secundo: nam ibi petit donum intelligentiae ad considerandam legem, hic petit ne oculi mentis avertantur a lege ad vanitates. « Averte oculos meos, ne videant vanitatem, » id est, ne occupentur in cogitandis temporalibus rebus, quae vanæ sunt; sed potius effice ut totus intendam legi tuae, et sic « in via tua vivifica me, » id est, in via tua ambularem, hoc est, legem tuam custodientem vivifica, refice et conserva.

Vers. 6. 6. STATUE SERVO TUO ELOQUIUM TUUM, IN TIMORE TUO.

Nonnulli significari existimant per eloquium Domini promissa Domini, et volunt sensum esse: « Statue eloquium tuum, » id est, imple promissa tua. Nos autem existimamus cum S. Augustino, per eloquium, intelligi legem, et sensum esse: « Statue servo tuo eloquium tuum in timore tuo, » id est, fac ut per sanctum timorem tuum statuantur, confirmetur, solidetur lex tua in servo tuo, ut immobiliter in illo haereat et perseveret. Itaque respondet hic versiculus tertio versiculo: ibi enim petitur gratia legis implendæ, hic petitur remotio instabilitatis, et petitur gratia perseverantiae.

Vers. 7. 7. AMPUTA OPPROBRIUM MEUM, QUOD SUSPICATUS SUM, QUAJ JUDICIA TUA JUCUNDA.

Magnus est opprobrium non perseveranda. Magnum erit opprobrium in die judicii, et nunc est etiam in conspectu angelorum, non perseverasse in lege servanda, cum lex Domini non solum utilis, sed etiam suavis sit et jucunda. Ideo cum petisset gratiam perseverantiae, addit quasi rationem, timorem videlicet opprobrii, quod sequetur non perseverantes. « Amputa, inquit, opprobrium meum, quod suspicatus sum, » id est, quod timui si non perseverarem in lege tua, cum tam bona sit: judicia enim in hoc Psalmo praecipita significant.

Vers. 8. 8. ECCE CONCUPIVI MANDATA TUA, IN AEQUITATE TUA VIVIFICA ME.

Concludit petitiones hujus octonarii, dicens jam satis patere, quod ex corde cupiat mandata servare. « Ecce, inquit, concupivi mandata tua, »

quasi dicat: Ecce appareat quod serio cupiam mandata tua, ideo « in aequitate tua, » id est, in ipsis mandatis tuis, id est, in observatione mandatorum, « vivifica me, » id est, auge et conserva mihi spiritualem vitam. Justus enim justificatur adhuc, dum mandata custodit.

Vau. 1. ET VENIAT SUPER ME MISERICORDIA TUA, DOMINE, SALUTARE TUUM SECUNDUM ELOQUIUM TUUM.

Illud, et, nihil continuat, sed additur ad initium librorum, vel capitulorum ornatus gratia apud Hebraeos; sic enim incipit liber Levitici, liber Ruth, liber Ezechielis; sic incipiunt multa capitula, ut Isai. VII: « Et factum est; » et cap. VIII: « Et dixit Dominus. » In hoc autem octonario ad singulos versus additur et, quoniam debent omnes versus incipere per tau, et per hanc litteram nulla fere vocabula incipiunt, excepta conjunctiva particula et. Petit autem Propheta initio octonarii misericordiam Dei, ac deinde in reliquis versibus declarat effectus hujus misericordiae, qui potissimum pertinent ad legis divinæ custodiam, quem finem et quasi scopum totus Psalmus respicit. Ait igitur: « Veniat super me misericordia, » id est, descendat ex alto gratia tua, et misericordia « super me. » Declarat autem que sit haec misericordia, addens, « salutare tuum secundum eloquium tuum, » id est, salus tua, sive misericordia sanans animam, « secundum eloquium tuum, » quo promisisti misericordiam et salutem sperantibus in te.

2. ET RESPONDEBO EXPROBRANTIBUS MIHI VERBUM, QUAJ SPERAVI IN SERMONIBUS TUIS.

Et cum venerit super me misericordia tua secundum promissionem tuam, non timebo adversarios exprobrantes mihi, quod frustra Deum timeam: nam « respondebo illis verbum verum, » cui non poterunt contradicere, quod videlicet « speraverim in sermonibus tuis, » qui promissa tua servare potes, quia es omnipotens, et servare vis, quia bonus es.

3. ET NE AUFERAS DE ORE MEO VERBUM VERITATIS USQUEQUAQUE, QUAJ IN JUDICIS TUIS SUPERSPERAVI.

Oro autem ut hoc verbum veritatis, quo gloriior adversus exprobrantes mihi, « non auferas de ore meo, » id est, non efficias, me destituendo gratia tua, ut non audeam hoc verbum loqui, non claudas ora de te confidentis et promissa tua prædicantis; vel si auferas ad modicum, ut probes me, non auferas « usquequaque, » non auferas omnino, vel in eternum. « Quia in judiciis tuis supersperavi, » id est, quia in tua justitia et fidelitate multum omnino speravi. S. Augustinus refert hoc ad electos martyres, qui si ad tempus permitti sunt negare veritatem, non tamen usquequaque negare permitti sunt, sed post nega-

tionem fleverunt, et post confessionem coronam meruerunt, quales fuerunt S. Petrus, S. Marcellinus et alii permulti.

Vers. 4. 4. ET CUSTODIAM LEGEM TUAM SEMPER, IN SÆCULUM ET IN SÆCULUM SÆCULI.

Hic jam subjicit effectum misericordiae sanantis animam, qui est perpetua legis divinæ custodia.

Vers. 5. 5. ET AMBULABAM IN LATITUDINE, QUIA MANDATA TUA EXQUISIVI.

Vers. 6. 6. ET LOQUEBAR DE TESTIMONIIS TUIS IN CONPECTU REGUM, ET NON CONFUNDEBAR.

Vers. 7. 7. ET MEDITABAR IN MANDATIS TUIS, QUÆ DILEXI.

Vers. 8. 8. ET LEVAVI MANUS MEAS AD MANDATA TUA, QUÆ DILEXI, ET EXERCEBAR IN JUSTIFICATIONIBUS TUIS.

His quatuor versiculis explicat per partes quæ sit perpetua legis custodia, quam promisit in quarto versiculo, dicens se corde, verbo, mente, et opere in lege Domini semper futurum, et quidem in hebraico textu hæc omnia habentur in futuro, *ambulabo, loquar, meditabor, levabo, exercebor*. Sed quia tempora variant significations apud Hebreos, non debent reprehendi Septuaginta et latinus Interpres, qui per præteritum imperfectum ista reddiderunt. Videtur autem Prophetæ, ut mox exauditus, mutasse modum loquendi. Dicit enim: « Et ambulabam in latitudine, » id est, veniente misericordia Domini super me, jam ambulabam non in angustiis timoris, sed in latitudine dilectionis, id est, libenter, cum gaudio, magno affectu cordis legem servabam, quia « illam exquisivi, » ut rem valde desideratam et amatam, « et loquebar » libere et sine timore de justitia sanctissime legis, etiam « coram regibus iniquis, et non confundebar, » et assidue cum animo meo de ipsa lege cogitabam, et ejus mysteria meditando considerabam; « et levavi manus meas, » ad implenda mandata sublimia et excelsa, id est, valde perfecta et ardua, vel, ut exponit S. Augustinus: Levavi manus meas ad opera legis, quia propter finem altissimum legem custodivi: qui enim propter mercedem temporalem legem custodiunt, non levant, sed deprimunt manus, dum operantur, neque dicere possunt: « Ad mandata tua quæ dilexi; non enim diligunt mundata, qui legislatore non diligunt. Denique his omnibus modis, id est, corde, mente, verbo et opere « exercebar in justificationibus tuis. »

Zain. In hoc octonario canit Prophetæ æternam retributionem, quam Deus legem servantibus promisit, ac propter eam spem dicit se et legem servasse, et in tribulatione consolationem accepisse, et de iniquorum prævaricatione doluisse.

1. MEMOR ESTO VERBI TUI SERVO TUO, IN QUO VERS. 4.
MIHI SPEM DEDISTI.

Non potest oblivisci Deus, nec voluntatem mutare, neque sententiam retractare: sed per figuram quædam sermonis humani dicitur? Deus <sup>Deus
quonemo
aliquid</sup> oblivious, quando differt implere quod promisit, quasi promissi sui esset oblitus. Differt autem aliquando Deus implere promissa sua, non obli-^{2.267} vione, sed judicio; et quamvis facturus sit omnino Deus quod facere decrevit, vult tamen rö-^{2.267} gari a fidelibus servis suis, et hæc oratio est unum ex mediis, per quæ Deus promissa sua adimplere decrevit. Orat igitur David in persona sua et aliorum fidelium, dicens: « Memor esto verbi tui, » id est, promissi tui, « in quo mihi spem dedisti, » cum dixisti servo tuo Abraham Gen. cap. xvii, et in illo omnibus filiis ejus: « Ambula coram me, et esto perfectus; » Gen. cap. xv, « Ego ero merces tua magna nimis. »

2. HÆC ME CONSOLATA EST IN HUMILITATE MEA, VERS. 2.
QUIA ELOQUIUM TUUM VIVIFICABIT ME.

Illud, hæc, non potest proprio referri ad spem, ut communiter exponitur, quoniam in textu hebraico, unde cæteræ editiones translatae sunt, non habetur nomen spei, sed verbum; et verti potuisset: *Memor esto verbi tui, in quo me sperare fecisti*. Sensus igitur est: « Hæc ī res, sive hoc me consolatione affecit in humilitate mea, id est, in afflictione et despectione mea, quia « eloquium tuum, » id est, promissio tua, « vivificavit me, » id est, vitam et spiritum mihi tribuit, vel robobravit et auxit.

3. SUPERBI INIQUE AGEBANT USQUEQUAQUE, 3. A VERS. 3.
LEGE AUTEM TUA NON DECLINAVI.

Vita et vigor, quem mihi tribuit promissio tua, in causa fuit, ut non declinarem a lege tua; etiamsi « superbi irrisores inique » agerent valde, cum me irrisiōibus suis a legis custodia avertere conarentur. In hebreo, pro *inique agebant*, habetur, *irridebant me*. Sed idem est sensus.

4. MEMOR FUI JUDICIORUM TUORUM A SÆCULO, VERS. 4.
DOMINE, ET CONSOLATUS SUM.

In humilitate et irrisiōibus « memor fui judiciorum tuorum a sœculo, » id est, judiciorum, quæ ab initio sœculi exercuisti exaltans humiles, superbos deprimens, reddens custodiēibus legem tuam præmia magna, et prævaricatoribus magna supplicia, et hinc accepi in omni tribulatione mea solatium.

5. DEFECTIO TENUIT ME PRO PECCATORIBUS, DE VERS. 5.
RELINQUENTIBUS LEGEM TUAM.

Eadem illa spes tanto mercede fecit ut misereretur hominum peccatorum, qui dereliquentes legem tuam tanto bono privantur. Vox hebraica נִזְעָקֶת, pro qua nos habemus *defectio*, significat

horrorem, sive tremorem, ardorem, sive aestum. Sed noster Interpres vertit *defectionem*, ut significaret tantum esse horrorem et aestum, de quo agit Propheta, ut *defectionem* inducat. Magne charitatis judicium est, contremiscere, ardere, desicere, ex misericordia erga peccatores, vel ex dolore ofensionis divinæ; nam de utraque *defectione* verius iste potest exponi.

Vers. 6. **6. CANTABILES MIHI ERANT JUSTIFICATIONES TUÆ IN LOCO PEREGRINATIONIS MEE.**

Inqui legem dereliquerunt, quia insuavem esse judicarunt: mihi autem scienti quanta merces posita sit custodientibus legem tuam, «*justificationes tuæ*,» id est, *præcepta tua usque adeo dulcia et suavia erant, ut in hac peregrinatione, qua peregrinamur a patria, dulce canticum fuerint.* In hebræo legimus, *carmena mihi fuerunt præcepta tua*; quare illud, *cantabiles*, significat leges Domini non fuisse sibi graves, quæ cum labore portandæ essent, sed suaves, quæ instar carminum oblectare possent.

Vers. 7. **7. MEMOR FUI NOCTE NOMINIS TUI, DOMINE, ET CUSTODIVI LEGEM TUAM.**

Illa beata spes tantæ promissionis non solum interdiu, sed etiam noctu mihi nomen tuum in memoriam revocabat, et ex affectu nominis tui, id est, ex ardentí amore tuo perseveravi in custodia legis tuæ.

Vers. 8. **8. HÆC FACTA EST MIHI, QUIA JUSTIFICATIONES TUAS EXQUISIVI.**

Quærunt Interpretes quid sit illud, *hæc*, an hæc spes, an hæc lex, an hæc promissio, an quid aliud. Sed apud Hebræos genus femininum ponitur pro neutro, quo illi carent. Itaque sensus est: *Hoc totum mihi evenit, nimis rursum, ut promissiones Dei considerarem, et spem inde conciperem, et cætera bona quæ inde nata sunt, «quia justificationes tuas exquisivi.»* Vult enim Propheta in hoc Psalmo, qui est encomium legis, omnia referre ad ipsam legem diligenter investigandam et amandam, ut hac ratione excitet homines ad considerationem et impletionem legis.

Vers. 4. **Cheth. 1. PORTIO MEA, DOMINE, DIXI CUSTODIRE LEGEM TUAM.**

In hoc octonario ponitur initio hæc propositione: «*Dominus est portio mea*,» inde deducitur desiderium legis diligenter custodiendæ, et preces ad Deum pro gratia legis implendæ, non obstantibus quibuslibet impedimentis. «*Portio mea, Domine,*» subintelligitur, *tu es.* Quamvis enim aliqui conjugant cum sequentibus, ut sensus sit: «*Portio mea, o Domine!* dixi,» erit «*custodire legem tuam*,» tamen multo verius est, sensum esse: «*Portio mea* » tu es, «*Domine;* » nam in græco additur verbum *es*, et in hebræo ponitur distinctio post vocabulum *Domine*. Posset etiam legi: *Por-*

tio mea Dominus; estque id conforme aliis locis, ut in *Psalm. xv*: «*Dominus pars hereditatis meæ;* » et *Psalm. lxxii*: «*Pars mea Deus in æternum;* » et *Thren. iii*: «*Pars mea Dominus,* » et sic exponunt hunc locum SS. Patres, Hilarius, Ambrosius, Hieronymus, Augustinus. Felix anima, quæ ex corde dicere potest: «*Portio mea, Domine,* » id est, omnibus rebus creatis abrenuntio, nihil juris in eis habere cupio, occupet ea quicunque voluerit: mihi tu, Domine, solus sufficientis, neque aliud requiro, aut requiram in æternum; et quia, ut te aliquando possideam, tibi soli placere cupio, ideo «*dixi,* » statui, firmiter proposui «*custodire legem tuam;* » scio enim quia non dignaris esse portio eorum, qui legem tuam non custodiunt.

Vers. 2. **2. DEFREGATUS SUM FACIEM TUAM IN TOTO CORDE MEO, MISERERE MEI SECUNDUM ELOQUIUM TUUM.**

Dixit, custodire legem Domini; sed quia sine adjutorio Dei vires humanæ non sufficient, ideo «*deprecatur faciem Domini in toto corde suo,* » et dicit: «*Miserere mei secundum eloquium tuum,* » id est, secundum promissionem tuam, «*miserere mei,* » ut te adjuvante impleam, quod te inspirante decrevi.

Vers. 3. **3. COGITAVI VIAS MEAS, ET CONVERTI PEDES MEOS IN TESTIMONIA TUA.**

Non satis est Deum orare, sed oportet etiam co-operari auxilio Dei; ideo Propheta, posteaquam precatus est Deum, addit: «*Cogitavi vias meas,* » rectene an secus ambularem; item consideravi actiones meas, an legi Dei conformes essent; et «*converti pedes meos in testimonia tua,* » id est, et converti affectus meos a lege carnis et peccati ad legem tuam, Domine, quæ sola est via recta.

Vers. 4. **4. PARATUS SUM, ET NON SUM TURBATUS, UT CUSTODIAM MANDATA TUA.**

Nee solum legem custodire decrevi, sed promptus fui statim aggredi opus justum, neque ultra perturbatio me retardare potuit a custodia legis tuæ. In hebræo legitur, *festinari, et non tardari custodire mandata tua.* Sed idem est sensus; nam qui imparatus est, non potest festinare; et qui turbatur, hærente solet et moram facere. Ideo illud, *paratus sum*, sic explicandum: Nullum tempus observandæ legis me imparatum inveniet, ut festinare non possim; sed semper paratus sum, et expeditus ad opus celeriter implendum; et nunquam turbatus sum, ut propterea moram facere me oporteat.

Vers. 5. **5. FUNES PECCATORUM CIRCUMPLEXI SUNT ME, ET LEGEM TUAM NON SUM OBLITUS.**

Non defuerunt tamen, qui me perturbare et retardare conarentur; nam «*funes peccatorum,* » id est, laquei, sive retia variarum tentationum,

que peccatores homines, sive dæmones tendere solent, «circumplexi sunt me, et tamen legem tuam non sum oblitus,» id est, facere non potuerunt tentationes illæ, ut legis tuae obliviscerer, et ab ipsa implenda retardarer.

Vers. 6. 6. MEDIA NOCTE SURGEAM AD CONFITENDUM TIBI, SUPER JUDICIA JUSTIFICATIONIS TUÆ.

Quia tu es, Domine, portio mea, non solum interdiu, sed etiam noctu, imo etiam media nocte, quando summa quies est in terris, vacavi legi tuae considerandæ : « surgebam enim media nocte ad confitendum tibi,» id est, ad te laudandum super justissima et sapientissima præcepta tua. S. Augustinus interpretatur hunc versiculum de tempore persecutionis, quod per noctem significari solet. Sed ad litteram videtur omnino intelligendus Propheta de laudibus nocturnis, ut exponunt Hilarius, Ambrosius, Hieronymus, Theodoreetus et alii fere omnes. Atque hinc didicit Ecclesia surgendum esse media nocte ad nocturnam psalmodiam; hunc enim locum allegant auctores, qui de divinis Officiis scripserunt.

Vers. 7. 7. PARTICIPS EGO SUM OMNIVM TIMENTIVM TE : ET CUSTODIENTIVM MANDATA TUA.

Hoc etiam deducitur ex prima illa propositione : « Portio mea Dominus;» omnes enim timentes Deum, et custodiens mandata ejus, colligantur tanquam membra viva in unum corpus glutino charitatis, quæ dicit : « Portio mea Dominus,» et hoc modo « singuli sunt participes omnium,» quia charitas facit omnia communia; « et si gaudet unum membrum, congaudent omnia membra; et si dolet unum membrum, condolent omnia membra,» ut ait Apostolus I Cor. XII. S. Augustinus exponit hunc versiculum de Christo, qui per ascensionem carnis humanae factus est particeps omnium timentium Deum, juxta illud Apostoli ad Hebr. II : « Quia pueri communicaverunt carni et sanguini, et ipse participavit eisdem,» et paulo ante : « Unde, inquit, non confunditur fratres eos vocare,» sed prior expositiō est communis et magis literalis.

Vers. 8. 8. MISERICORDIA TUA, DOMINE, PLENA EST TERRA : JUSTIFICATIONES TUAS DOCE ME.

Ego quidem « particeps sum omnivm timentivm te;» sed misericordiae tuae participes sunt omnes qui habitant in terra, et boni et mali, et homines et jumenta, et animata et inanimata. Proinde miserere mei, « ut doceas me justificationes tuas;» haec enim summa miseria est, non scire legem tuam, ut sciunt qui illam implent. Hanc miseriā tollat a me misericordia tua, quia hoc unum ambio, hoc concupisco, cum tu sis «portio mea, Domine,»

Vers. 1. Teth. 1. BONITATEM FECISTI CUM SERVO TUO, DOMINE, SECUNDUM VERBUM TUUM.

2. BONITATEM, ET DISCIPLINAM, ET SCIENTIAM Vers. 2. DOCE ME, QUIA MANDATIS TUIS CREDIDI.

In hoc octonario petit a Deo Propheta tria dona necessaria ad custodienda præcepta Domini, et ostendit ex effectis horum donorum necessitatem. Primum igitur utitur quodam quasi proœmio, dicens : « Bonitatem fecisti cum servo tuo, Domine,» id est, suavitatem et benignitatem, sive mansuetitudinem tuam exhibuisti servo tuo, « secundum verbum tuum,» id est, juxta promissiones tuas; quamvis enim in hebræo legatur בְּרֵבָה, quod significat *bonum*, et veri possit, ut vertit S. Hieronymus, *benefecisti servo tuo*, tamen Septuaginta Interpretes legerunt, *tub, bonitatem*, ut etiam in sequenti versu; et utrobique verterunt ρυστόντα, id est *bonitatem*, sive *suavitatem*. Sequitur postea : « Bonitatem et disciplinam et scientiam doce me,» id est, sicut, Domine, bonitatem, sive suavitatem erga servum tuum ostendisti, ita rogo ut doceas me eamdem bonitatem, sive suavitatem, quam exhibeam proximis meis, ita ut nulli nocere, nullum decipere, nullum fraudare velim; sed addas etiam, « ut doceas me disciplinam,» id est prudentiam, ut caveam deceptores et fraudulentos; et sic habeam suavitatem et bonitatem columbae, ut non desint mihi consilium et prudentia serpentis. Intelligo autem per vocem, *disciplinam*, virtutem prudentiæ, quia hoc requirit vox hebraica בְּרִית, quæ significat proprie saporem et consilium; neque vox græca et latina hanc significationem respuunt, cum sint vocabula generalia. Denique post bonitatem et prudentiam, peto etiam scientiam, qua agnoscam mysteria legis tuae, quæ scientia, sicut sine bonitate et prudentia inflat, ita habentibus bonitatem et prudentiam utilissima est; sequitur : « Quia mandatis Scien-tuis credidi,» id est, quia credidi mandatorum tuorum promissionibus, sive, credidi mandata tua divina esse et dignissima, quæ diligentissime quæruntur. Observandum est hoc loco plerosque homines scientiam querere, vel prudentiam, de bonitate parum laborare, sed Prophetam a Spiritu Sancto edoctum rectum ordinem esse secutum, ut primo bonitatem, deinde prudentiam, ultimo scientiam postularet.

3. PRIUSQVM HUMILIAKER, EGO DELIQUI : PROP- Vers. 2. TEREAE ELOQUIUM TUUM CUSTODIVI.

4. BONUS ES TU, ET IN BONITATE TUA DOCE ME Vers. 4. JUSTIFICATIONES TUAS.

Declarat necessitatem trium illorum donorum; quasi dicat : Non sine causa peto bonitatem, disciplinam et scientiam; nam ex defectu horum donorum deliqui, et propter delicta humiliatus sum a Deo justo judice. Priusquam humiliarer per immisionem tribulationum, ego deliqui per ignorantiam, quia scientia carui : nam vox hebreæ בְּרֵבָה, quæ hoc loco habetur, significat ignorare, sive delinquere ex ignorantia. Sequitur :

« Propterea eloquium tuum custodivi, » id est, propter ea deinceps attentius custodivi legem tuam ; sed tu qui « bonus, » id est, suavis et benignus « es, in hac tua bonitate, » id est, juxta hanc mansuetudinem tuam, « doce me justificationes tuas, » ut non amplius delinquam.

Vers. 5. 5. MULTIPLICATA EST SUPER ME INIQUITAS SUPERBORUM : EGO AUTEM IN TOTO CORDE MEO SCRUTABOR MANDATA TUA.

Vers. 6. 6. COAGULATUM EST SICUT LAC COR EORUM : EGO VERO LEGEM TUAM MEDITATUS SUM.

Hic significatur necessitas alterius doni, videlicet prudentiae. « Multiplicata est super me iniqutias superborum, » id est, superbi prævaricatorum multiplicarunt super me mendacia sua, ut me ad transgressionem inducerent; unde prudentiae donum mihi necessarium fuit, quo dono adjutus « in toto corde meo scrutabor mandata tua. » In hebreo pro vocabulo *iniqutias*, habetur ἡρων, id est *mendacium*; unde intelligimus per *iniqutiam*, ipsum mendacium, quod sine dubio quædam iniqutias est, præcipue si mendacium sit pernicioseum. « Coagulatum est sicut lac cor eorum, » id est, superbi illi induratum cor habent, sicut induratur caseus ex lacte coagulato confectus; ideo illis dimisis, legi tuæ meditandæ vacavi. In hebreo legitur *adeps*, pro *lacte* : sed eadem litteræ mutatis punctis utrumque significant; nam *chab* est *lac*, et *cheleb* est *adeps*.

Vers. 7. 7. BONUM MIHI QUA HUMILIASTI ME, UT DISCAM JUSTIFICATIONES TUAS.

Vers. 8. 8. BONUM MIHI LEX ORIS TUI SUPER MILLIA AURI ET ARGENTI.

Ex abundantia primi doni, quod jam consecutus erat, dicit : « Bonum mihi, quia humiliasti me ; neque enim hoc dicere potest nisi homo vere mitis et humilis corde, ac per hoc vere bonus, qui per experientiam judicium de bono ferre potest. Existimat enim is, qui vere bonus est, magnum donum humiliationem ex tribulatione venientem, quoniam causa est custodiæ legis, quæ quantum sit bonum, explicatur in versiculo sequenti : « Bonum mihi lex oris tui super millia auri et argenti ; » et vere ita est, quoniam per custodiæ legis acquiritur vita æterna, cui nulli thesauri comparari possunt.

Vers. 9. Iod. 1. MANUS TUÆ FECERUNT ME ET PLASMAVERUNT ME; DA MIHI INTELLECTUM, UT DISCAM MANDATA TUA.

In hoc octonario multis novis argumentis poscit gratiam legis custodiendæ, ac primum ex eo quod, cum sit figuratum manuum Domini, debet illi summam obedientiam. « Manus tuæ fecerunt me et plasmauerunt me, » id est, potentia tua et sapientia tua, quasi due manus tuæ, fecerunt me, cum non essem, et plasmauerunt me, ordinantes

membra et potentias, cum essem initio quasi massa luti, vel fecerunt me quoad animam, et plasmauerunt quoad corpus. Ideo cum totus sim tuus, debeamque tibi summam obedientiam, peto ut des mihi intellectum, ut discam mandata tua, non ut solum sciām, sed etiam faciam. In hebreo pro *plasmasti*, habetur *parasti* sive *firmasti*, per quod intelligitur perfecta formatio et distinctio membrorum, unde fit ut homo subsistat. Item pro *da mihi intellectum*, in hebreo et greco est una vox tantum, quæ significat *intelligentem facere*. Itaque illud, *da mihi intellectum*, non significat, *da mihi vim intelligendi*, quasi sine ea formatus esset, sed, *da mihi lumen divinum*, quo mens mea perfecte discat mandata tua, et sibi persuadeat optimum esse illa completere.

2. QUI TIMENT TE, VIDEBUNT ME, ET LÆTABUNTUR, QUA IN VERBA TUA SUPERSPERAVI.

Hæc est secunda ratio, quæ sumitur ab ædificatione proximorum. « Qui timent te, videbunt me » servantem mandata tua, « et lætabuntur, » quia videbunt me sperantem valde in verbis tuis, id est, in promissis quæ continentur in lege tua.

3. COGNOSI, DOMINE, QUAÆ EQUITAS JUDICIA TUA, ET IN VERITATE TUA HUMILIASTI ME.

Tertia ratio est a confessione propriæ culpæ. « Cognosvi, inquit, quia æquitas judicia tua, » id est, quod judicia tua justissima sunt, et si quando « me humiliasti » destituens gratia tua, « in veritate, » id est, in justitia tua fecisti, quia ita commerui ; ideo non conqueror de tua justitia, sed ad misericordiam tuam confugio et dieo :

4. FIAT MISERICORDIA TUA, UT CONSOLETUR ME, SECUNDUM ELOQUIUM TUCUM SERVO TUO.

Consolatio, quam petit, est gratia servandæ legis; qui enim dolet se humiliatum, quia destitutus gratia in peccatum incidit, consolationem magnam accipiet, si copiosa gratia perfusus legem Domini perfecte integreque servabit.

5. VENIANT MIHI MISERATIONES TUÆ, ET VIVAM, QUAIA LEX TUA MEDITATIO MEA EST.

Petit gratiam servandæ legis, ut consolationem acciperet : explicat nunc que sit vera consolatio, quam desiderat. « Veniant mihi miserations tuæ, et vivam, » id est, miserere mei secundum multitudinem miserationum tuarum, ut acquiram vitam vitam, quæ sola est vita beata et sempiterna. Recte enim monet S. Augustinus, ubi sine addito

vita ponitur nomen *vita*, ut plurimum intelligi *vita* ne ad *eternam*, quæ sola est simpliciter *vita*, Joan. I : *to, v* « In ipso vita erat; » Joan. V : « In resurrectionem *pluri* *vitæ*; » Matth. XIX : « Si vis ad vitam ingredi, serva *est* *etern* *mandata*. » « Quia lex tua meditatio mea est; » hæc est ratio, cur audeat petere misericordias Domini : decet enim ut Deus misericorditer respiciat in eum, qui assidue meditatur in lege.

Vers. 6. **6. CONFUNDANTUR SUPERBI, QUIA INJUSTE INQUITATEM FECERUNT IN ME; EGO AUTEM EXERCEROR IN MANDATIS TUIS.**

Quarta ratio ad obtainendam gratiam servandæ legis, sumitur a confusione iniquorum, sicut secunda sumebatur ab ædificatione piorum. « Confundantur superbi, » id est, da mihi gratiam, per quam perfecte leges tuas custodiam, ut hinc confundantur superbi prævaricatores, qui vexando et perseguendo injuste, efficere conantur ut etiam alii prævaricentur. Interim autem dum illi confunduntur et erubescunt, ego multo alacrius exercebor in mandatis tuis cogitandis et implendis. Illud, *injuste*, significat superbos iniquitatem fecisse scienter et studiose, non casu, non ex ignorantia, non ex inadvertentia, unde ab iniquitate immunes videri possent.

Vers. 7. **7. CONVERTANTUR MIHI TIMENTES TE, ET QUI NOVERUNT TESTIMONIA TUA.**

Hortatur pios, ut si qui sunt, qui a prævaricatoribus decepti ad illos respicere cooperint, ad se redeant et cum ipso jungantur. « Convertantur mihi, » id est, convertantur ad me, et mecum juncti legem Dei custodian, « timentes te, et qui neverunt testimonia tua, » id est, illi omnes, qui timorem Dei et scientiam legis habent. Ex græco textu legunt nonnulli, *convertant me*. Sed antiqua lectio id habebat, quod nos habemus, ut perspicuum est ex Patribus, Hilario, Ambrosio, Hieronymo, Augustino; et S. Hieronymus vertit ex hebreo, *reverlantur ad me*.

Vers. 8. **8. FIAT COR MEUM IMMAGULATUM IN JUSTIFICATIONIBUS TUIS, UT NON CONFUNDAR.**

Concludit petens gratiam saepe ac sœpius postulatam, qua corde perfecto mandata divina custodiat, ut neque in hoc saeculo, neque in futuro judicio, confusionis opprobrium timeat.

Vers. 9. **Caph. 1. DEFECIT IN SALUTARE TUUM ANIMA MEA, ET IN VERBUM TUUM SUPERSPERAVI.**

In hoc octonario inducit David personam euidentis servare mandata, et tamen inter tentationes graviter laborantis, atque auxilium de cœlo miserabiliter postulantis. S. Augustinus totum octonarium Ecclesiæ Christum exspectanti et sanctis martyribus accommodat, pie omnino et vere: sed quia totum Psalmum ad legis custodiam commendandam video pertinere, ideo hunc etiam octonarium ad litteram de legis custodia explicare decrevi. « Defecit in salutare tuum anima mea, » id est, anima mea præ magnitudine desiderii salutis æternæ jam pene defecit: *deficere enim in salutare nihil est aliud, nisi exspectando et desiderando salutem, laborare, languere, deficere.* « Et in verbum tuum supersperavi, » id est, et ego tamen valde speravi in verbum promissionis tuæ. Itaque dilatio salutis deficere

*Deficere
in salu-
tare quid
sit?*

facit, sed spes firma promissionis erigit et confortat.

**2. DEFECERUNT OCULI MEI IN ELOQUIO TUUM, Vers. 2.
DICENTES : QUANDO CONSOLABERIS ME?**

Mira Prophetæ locutio, quæ oculis officium arium et linguæ tribuit. Sed oculi interiores, et aures interiores, et lingua interior idem sunt; intellectus enim videt, audit, loquitur. « Defecerunt oculi mei in eloquio tuum, » id est, mens mea attendendo auxilium promissum, dum diutius differtur, deficit præ desiderio, quomodo deficiunt oculi corporales, cum nimis diu respiciunt ad locum, unde persona desiderata ventura speratur, « dicentes : Quando consolaberis me? » id est, oculi interiores defecerunt præ exspectatione, et defectum suum explicant, dicentes : Quando veniet consolatio illa perfecta, ut non amplius timeam casum et legis sanctæ prævaricationem? Possent etiam hec explicari de oculis exterioribus, qui cœlo inhærentes videntur quasi deficere, et dicere Domino : « Quando veniet auxilium de cœlo promissum? » Sic enim S. Hieronymus in epist. ad Eustochium, de Servanda virginitate, de se loquitur : « Post multas lacrymas, post in cœlum inhærentes oculos, » etc. Videtur dicere debuisse Prophetæ secundum leges grammaticæ : « Quando consolaberis nos? » Sed quia oculi sunt instrumenta animæ, de qua dictum erat : « Deficit anima mea, » ideo per oculos queritur consolatio non tam oculorum, quam animæ, quæ per illos respicit. Est igitur sensus : Quando consolaberis animam meam, cuius oculi deficiunt attendo et exspectando.

**3. QUA FACTUS SUM SICUT UTER IN PRUINA, Vers. 3.
JUSTIFICATIONES TUAS NON SUM OBLITUS.**

Non sine causa dico : « Quando consolaberis me? » quia præ desolatione et angustiis tentationum, factus sum aridus et destitutus humore gratiæ consolantis, ut est uter tempore frigidissimo in medio pruinæ constitutus. Similis est illa vox in Psalm. CXLII : « Anima mea facta est sicut terra sine aqua tibi. » Sed quanquam tanta spiritus ariditate labore, tamen « justifications tuas, » id est, præcepta tua, « non sum oblitus. » S. Ambrosius et S. Augustinus, per *utrem in pruina*, intelligunt carnem mortificatam et castigatam, et pruina cœlesti respersam, ut spiritui subjiciatur, quasi dicat Prophetæ : Carnem castigavi, et legem tuam non sum oblitus; æquum igitur est ut consoleris animam meam.

**4. QUOT SUNT DIES SERVI TUI? QUANDO FACIES Vers. 4.
DE PERSEQUENTIBUS ME JUDICIUM?**

Instat eidem petitioni, optans consolationem et liberationem a tentationibus. « Quot sunt dies servi tui, » quibus afflictio durabit? quando finientur dies tentationis et miseriae? « Quando facies de persequentibus me judicium? » quando

judicabis et condemnabis persequentes et tentantes me, ut iis condemnatis persecutio conquiscat? Non curiose querit quot anni supersint, aut vitæ suæ, aut durationis mundi; sed explicat his verbis desiderium æternæ vitæ, quando omnes impii, ad inferos detrusi, cessabunt vexare pios; et pii, summa atque æterna pace fruentes, in sanctitate et justitia Domino servient sine ullo timore cadendi.

Vers. 5. 5. NARRAVERUNT MIHI INQUI FABULATIONES, SED NON UT LEX TUA.

Hæc est causa, cur maxime cupiat ab iniquorum consortio liberari, quoniam iniqui tentantes pios narrant delectationes mundi, quæ sunt mere fabulæ, id est, delectationes sordidæ, fugaces, magis confictæ, quam verae; et nihil habent simile cum lege Domini, que pie custodita, delectationes stabiles et solidas adferit. Potest etiam *fabulatio* referri ad hæreticorum colloquia, ut referunt Ambrosius et alii. S. Hieronymus ex hebreo verit, *foderunt mihi superbi foveas*; sed scendum est vocem ΠΙΛΙΣ esse ambiguam, et posse significare *fabulationes*, a verbo ΠΙΛΙ, et *foveas*, a nomine ΠΙΛΙ. S. Hieronymus ut verteret consequenter ad verbum *foderunt*, transtulit *foveas*; non enim coherent *fabulationes* cum verbo *foderunt*. At Septuaginta Seniores, quia per nomen shîchôth intellexerunt *fabulationes*, noluerunt vertere *foderunt*, ne nimis impropria et obscura esset oratio; sed sequentes non verba, sed sensum, maluerunt vertere *narraverunt*, et vere sensum expresserunt: nam *fodere* in hebraica lingua significat *emere*, *acquirere*, *præparare*, *eruere*; igitur sensus est: *foderunt mihi fabulationes*, id est, emerunt fabulationes, ut mihi eas venderent; vel paraverunt fabulationes, ut mihi eas narrarent; vel *foderunt* et *eruerunt* ex fodina vanitatis fabulationes, ut eas mihi præberent. S. Augustinus legit, *narraverunt mihi delectationes*; S. Ambrosius, *exercitationes*, alii aliter. Sed verbum hebraicum significat proprie confabulationem, et submurmurationem submissa voce editam, quæ ad colloquia clandestina hæreticorum, vel impudicorum hominum recte accommodari potest. Vox græca ἀδελογία ab Ambrosio dicitur esse *superstitaloquitus*; ab Augustino, *delectabilis in sermone exercitatio*; ab Euthymio, *garrulitas et nugacitas*.

Vers. 6. 6. OMNIA MANDATA TUA VERITAS; INIQUE PERSECUTI SUNT ME, ADJUVA ME.

Quia dixerat: «Non sicut lex tua;» dicit nunc: «Omnia mandata tua» sunt ipsa «veritas», id est, verissimas promissiones continent, et inde verissimas delectationes observantibus legem tuam adferunt. Ideo injusti narrantes suas fabulationes inique persecuti sunt me, et tu Deus contra eorum insidias adjuva me.

Vers. 7. 7. PAULO MINUS CONSUMMAVERUNT ME IN

TERRA, EGO AUTEM NON DERELIQUI MANDATA TUÆ.

Tam gravis fuit persecutio istorum, qui per dulces sermones me subvertere nitabantur, ut pene me perdiderint in terra, et ad cœlum aspirare nequirem: tamen non obtinuerunt, quoniam «non dereliqui mandata tua.»

8. SECUNDUM MISERICORDIAM TUAM VIVIFICA Vers. 8. ME, ET CUSTODIAM TESTIMONIA ORIS TUI.

Redit ad primam petitionem, et concludit octonarium, dicens: «Secundum misericordiam tuam magnam vivifica me» vita beata et sempiterna, et tunc demum perfectissime custodiam legem tuam; potest etiam hoc intelligi de vita gratiae, per quam mandata Dei custodiuntur.

Lamed. 1. IN ÆTERNUM, DOMINE, VERBUM Vers. 1. TUUM PERMANET IN CŒLO.

2. IN GENERATIONEM ET GENERATIONEM VERITAS Vers. 2. TUA; FUNDASTI TERRAM, ET PERMANET.

3. ORDINATIONE TUA PERSEVERAT DIES, QUO- Vers. 3. NIAM OMNIA SERVIUNT TIBI.

In hoc octonario a firmitate promissionum divinarum sumit Propheta argumentum ad exhortandos homines ad legem servandam, quæ habet promissiones vitæ præsentis et futuræ. «In æternum, Domine, verbum tuum,» id est promissio tua, «permanet in cœlo;» nam etiamsi in terris videatur non permanere, dum justi opprimuntur, et injusti exaltantur, tamen in cœlo apud Deum omnino permanet. Deus enim quod promisit, implebit. Faciet enim ut justis breves tribulationes vertantur in gaudium sempiternum, et brevis gloria impiorum vertatur in oprobrium et supplicium sine fine duraturum. Idem autem repetit, vel explicat, dum addit: «In generationem et generationem veritas tua,» supple *permanet*, id est, semper manet veritas promissionum, dum semper verbum promissionis impletur, «in omni generatione et generatione,» id est, ab initio usque in finem, quod est idem, quod «in æternum.» Probat autem Propheta stabilitatem promissionum a stabilitate ordinationum divinarum duobus exemplis. «Fundasti terram et permanet;» hoc est primum exemplum, quasi dicat: Fundasti terram immobilem, et semper manet immobilis, ut ordinationi tuæ obediatur. «Ordinatione tua perseverat dies;» hoc est alterum exemplum. Ordinavit enim Deus, ut e contrario cœlum, sive sol moveretur semper, et motu suo diem efficeret; et obtemperat, et sic semper ordinatione divina perseverat dies. In hebreo conjungitur verbum numeri multitudinis cum nomine numeri singularis hoc modo: *Perseverant hic dies*, sive *hodie*, ad significandum, diem transeundo et fluendo permanere; transiunt dies, et nunquam stant, et tamen semper *hodie* permanet, ad quod alludens Apostolus,

Hebr. cap. iii. : « Adhortamini, inquit, vosmetipos per singulos dies, donec hodie cognominatur. » Ratio hujus tantæ firmitatis est, quod sequitur : « Quoniam omnia serviunt tibi; » nihil enim est in rebus creatis, quod Deo creatori ad nutum non pareat.

Vers. 4. 4. NISI QUOD LEX TUA MEDITATIO MEA EST, TUNC FORTE PERIISSEM IN HUMILITATE MEA.

Nisi, inquit, in lege tua assidue meditatus fuisset, ubi veritatem promissionum tuarum didi, forte periissem in afflictione mea, tentationibus adversariorum superatus. Pro *meditatio*, in hebreo est, *delectatio*, ex quo intelligimus hic agi de jucunda et dulci meditatione, quæ valde recreat animum hominis in tribulatione constituti, dum promissa divina ob oculos interiores ponit et cordi intime infigit. Per *humilitatem* autem hoc loco non significatur virtus humilitatis, sed afflictio, sive *pressura*, ut S. Hieronymus ex hebreo transtulit.

Vers. 5. 5. IN ÆTERNUM NON OBLIVISCAR JUSTIFICATIONES TUAS, QUIA IN IPSIS VIVIFICASTI ME.

Confortatus ex meditatione promissionum quæ in lege continentur, confidenter jam dico : « In æternum non obliviscar justificationes tuas, quia in ipsis, » id est, super earum observationem, « vivificasti me, » vitam gratiæ augendo, et vitam gloriae promittendo.

Vers. 6. 6. TUUS SUM EGO, SALVUM ME FAC, QUONIAM JUSTIFICATIONES TUAS EXQUISIVI.

Scriptum est in *Psalm. xxiii.* : « Domini est terra, et plenitudo ejus, orbis terrarum, et universi, qui habitant in eo; » ego tamen proprie tuus sum, quia agnosco me tuum esse, et volo tuus esse, et nullius alterius Domini volo esse, cum nulli cupiditati servire decreverim; ideo recte peto ut me salvum facias, id est, rem tuam conserves, ne pereat. « Quoniam justifications tuas exquisivi, » id est, quoniam tuus sum, et tanquam tui solius mancipium, nihil aliud quero, nisi mandata tua, ut illa perficiam. Vere pauci sunt, qui dicere possint : « Tuus sum ego, » quia pauci sunt, qui per affectum nulli rei serviant, nisi Deo.

Vers. 7. 7. ME EXPECTAVERUNT PECCATORES, UT PERDENT ME : TESTIMONIA TUA INTELLEXI.

Non sine causa dixi : « Salvum me fac, » quoniam « peccatores » in loco opportuno ad capiendum « me expectaverunt, » ut tentationi consentire me facerent, et sic « perderent me; » sed ego gratia tua adjutus « testimonia tua intellexi, » id est, intellexi quid lex tua in tali articulo præcipieret, quid promitteret, quid minaretur.

Vers. 8. 8. OMNIS CONSUMMATIONIS VIDI FINEM, LATUM MANDATUM TUUM NIMIS.

Intelligens testimonia tua, ex eis cognovi et « vidi finem consummationis » omnium rerum, judicium videlicet novissimum, in quo consummatis meritis bonis et malis, reddentur præmia bonis et supplicia malis. Vere igitur « latum mandatum tuum nimis, » id est, vere amplum et secundum est mandatum tuum, sive lex tua, cum in ea conspiciantur regulae bene vivendi, et præmia custodientium legem, et contra regulæ declinandi vitia, et supplicia prævaricatorum. Posset etiam sic exponi versiculus iste : « Intelligens testimonia tua, » id est, legem tuam, « vidi finem omnis consummationis, » id est, omnis perfectionis vitae, esse « mandatum tuum, » id est, præceptum dilectionis, quod est « latum nimis, » cum omnia mandata comprehendat, et cum ad Deum, et omnes angelos, et omnes homines, etiam inimicos extendatur. Alii aliter exponunt, et unusquisque propriam expositionem ad fert. Ambrosius et Hieronymus *finem omnis consummationis* dicunt esse Christum. Augustinus *finem omnis consummationis* dicit esse coronam martyrii, quia consummata perfectio est mori pro Christo. Theodoretus dicit omnia humana, opes, honores, et ^{Consummata perfectio, mori pro Christo.} similia, quantumvis consummata et perfecta, habere finem. Euthymius, per *omnem consummationem*, intelligit omnem interitum, tum bonorum, tum impiorum. Vedit enim Propheta finem mortis omnium esse poenam, vel gloriam.

Mem. 1. QUOMODO DILEXI LEGEM TUAM, DOMINE : TOTA DIE MEDITATIO MEA EST.

In hoc octonario iterum redit ad encomium legis, eamque laudat a multiplici utilitate et *delectatione*, quam secum ad fert. Ac primum testatur amorem suum erga divinam legem, deinde reddit causam amoris, enumerans ejus utilitates. « Quomodo dilexi, » id est, quam vehementer dilexi legem tuam : signum amoris est continua converratio cum re amata. « Tota die, inquit, meditatione mea est, » nihil aliud loquor, nihil aliud ago.

2. SUPER INIMICOS MEOS PRUDENTEM ME FECISTI MANDATO TUO, QUIA IN ÆTERNUM MIHI EST.

Hæc est prima utilitas legis, quia diligenter considerata et factis adimpleta, prudentem facit hominem, ut sciat quid, et quomodo, et quando, et ubi debeat loqui et agere, vel silere et quiescere : quam prudentiam non habent prævaricatores, qui regulam hanc rectissimam inter loquendum et agendum non respiciunt. Ait igitur : « Super inimicos meos, » prævaricatores videlicet legis « prudentem me fecisti mandato tuo, » id est, per mandatum tuum, dum illud assidue mediator et adimpleo. « Quia in æternum mihi est, » quia perpetuo mihi adest ante oculos mentis, neque unquam illius obliviscor.

3. SUPER OMNES DOCENTES ME INTELLEXI, QUIA TESTIMONIA TUA MEDITATIO MEA EST.

Vers. 4. 4. SUPER SENES INTELLEXI, QUIA MANDATA TUA
QUÆSIVI.

Hæc est altera utilitas legis : quia non solum prudentiam, sed etiam sapientiam gignit. Sed tamen quoniam videtur David nimum sibi tribuere, anteponendo sapientiam suam sapientæ omnium qui illum præcesserunt, in quibus erat Adam, Noe, Abraham, Isaac, Jacob, Joseph, Moses, Samuel, et alii : S. Augustinus docet hæc dici in persona Christi, qui cum esset annorum duodecim, et videretur quasi discipulus audiens legis doctores et seniores, tamen « super omnes docentes » se intelligebat. Ait S. Ambrosius, in persona populi christiani. Sed fortasse non erit necesse ad ista confugere : nam per *omnes docentes* intelligere possumus eos solos, qui Davidem puerum vel adolescentem docuerunt, parentes videlicet et pædagogos suos familiares. Quamvis enim non sit discipulus super magistrum, dum discipulus est, potest tamen is, qui discipulus fuit, diligentia et studio superare eum qui magister ipsius aliquando fuerat. Sic David facile sapientia magistros suos vicit propter continuam meditationem in lege Domini. Idem etiam intelligimus de senibus ; non enim voluit David dicere se sapientem fuisse *super omnes senes*, qui fuerant ab initio mundi, sed se adhuc juvenem sapientiorem fuisse multis senibus, ob studium suum assiduum in lege Domini meditanda.

Vers. 5. 5. AB OMNI VIA MALA PROHIBUI PEDES MEOS, UT
CUSTODIAM VERBA TUA.

Vers. 6. 6. A JUDICIS TUIS NON DECLINAVI, QUIA TU LE-
GEM POSUISTI MIHI.

Hæc est tertia utilitas legis Domini, quia facit multa vitare peccata. « Ab omni via mala prohibui pedes meos, id est, cavi ne ambularem per vias iniquorum, qui pro lege habent cupiditatem suam, quæ est lex carnis et peccati, id est, cavi ne aliqua in re delinquerem : idque, ut custodirem verba tua, id est legem tuam, quæ contrarium iter ostendebant. « A judiciis enim tuis, » id est, a justissimis mandatis tuis, « non declinavi, quia tu legem posuisti mihi, » id est, quia hanc sanctam legem tu Dominus meus mihi dedisti ; sive, ut exponit S. Augustinus, quia tu legem in corde mihi posuisti, tu fecisti per spiritum tuum, ut legem sanctam ex intimo corde meo diligem.

Vers. 7. 7. QUAM DULCIA FAUCIBUS MEIS ELOQUIA TUA,
SUPER MEL ORI MEO !

Hæc est quarta utilitas, quod summam adfert lex Domini se custodientibus voluptatem. Eloquia enim Domini, id est, mandata Domini dulcia sunt faucibus animæ, magis quam mel faucibus corporis : nihil jucundius bona conscientia, et spe supernæ beatitudinis, quam parit ob-servantia legis divinæ.

8. A MANDATIS TUIS INTELLEXI, PROPTERA Vers. 8.
ODIVI OMNEM VIAM INIQUITATIS.

Probat ex lege Domini magnam voluptatem se perceperisse, eo quod lex Domini bonam conscientiam pariat. Nam, inquit, « a mandatis tuis intellexi, » id est, a mandatis tuis eruditus, prudens et sapiens factus sum : clarior est hæc sententia in hebræo et græco textu. « Propterea odivi omnem viam iniquitatis, » id est, ex hac sapientia et prudentia acquisita ex assidua meditatione legis, non solum abstinui a peccatis, sed etiam magnum odium concepi adversus omnes iniquas actiones. Hoc autem odium mirifice conservat animi puritatem et sanctitatem, et gignit magnam fiduciam in Domino, unde oritur ineffabile gaudium, pax et tranquillitas omnibus thesauris et voluptatibus anteponenda.

Nun. 1. LUCERNA PEDIBUS MEIS VERBUM TUUM, Vers. 1.
ET LUMEN SEMITIS MEIS.

In hoc octonario laudat legem divinam Propheta ab eximia quadam utilitate; deinde promittit se eam observaturum, non obstante qualibet tribulatione. Utilitas eximia est, quod lex Domini sit nobis in via vitæ hujus instar lucernæ ambulantibus in tenebris. Lex enim peccati, id est, cupiditas, excœcat homines, sive maximas tenebras effundit, ut vera bona et vera mala non internoscantur ; et hinc ii, qui hanc legem sequuntur, id est, qui passionibus animi rapi se sinunt, in varia præcipitia ruunt : sed lex Domini has tenebras dissipat, et vera bona ac vera mala demonstrat ; et ideo qui eam sequuntur, non errant, neque cœciunt, sed recto tramite ad patriam cœlestem iter faciunt. Ait igitur : « Lucerna pedibus meis verbum tuum, » id est, lex tua est lucerna pedibus meis. Et hoc ipsum repetens et declarans addit : « Et lumen semitis meis. » Lucerna enim, dum illuminat semitas per quas incedendum est, dirigit pedes ambulantium : sermo est metaphoricus, sed facile intelligitur.

2. JURAVI, ET STATUI CUSTODIRE JUDICIA JUS- Vers. 2.
TITLE TUA.

Quia lex est lux, ac proinde res optima et utilissima, Propheta jurat et statuit, id est, firmissime apud se constituit, custodire ipsam legem, quam vocat *judicia justitiae*, id est, *judicia justissima*.

3. HUMILIATUS SUM USQUEQUAQUE, DOMINE ; Vers. 3.
VIVIFICA ME SECUNDUM VERBUM TUUM.

« Humiliatus, » id est, afflictus et vexatus sum valde, occasione legis servandæ : quia « omnes qui volunt pie vivere, persecutionem patiuntur, » ut dicit Apostolus II Timoth. iii ; sed tu, « Domine,

Legis
Domini
utilitas,
instar
lucernæ
ambu-
lantibus
in tene-
bris.

vivifica me, » id est, veram vitam, quæ a malis omnibus libera erit, mihi aliquando tribue, secundum promissum tuum : « Si vis ad vitam ingredi, serva mandata, » *Math. xix.* Posset etiam hic locus exponi de virtute humilitatis. Qui enim humiliant seipso, ut jugo legis se omnino subjiciant, illi secundum promissionem merentur exaltari ad vitam beatam et sempiternam.

Vers. 4. 4. VOLUNTARIA ORIS MEI BENEPLACITA FAC, DOMINE, ET JUDICIA TUA DOCE ME.

Quod juravi et statui custodire legem, non obstante qualibet persecutione, est voluntarium sacrificium oris mei : hoc igitur voluntarium sacrificium oro, ut tibi sit beneplacitum ; et quia ex se id non meretur, tu, Domine, fac illud beneplacitum, dum benigne ex gratia tua illud approbare dignaris ; ac, ut rite hoc sacrificium offeram, « doce me iudicia tua, » id est, doce me perfecte legem tuam observare. Alii referunt hæc *voluntaria* ad sacrificia votiva ovium et hircorum ; alii, ad sacrificia laudis et confessionis : sed continuatio Psaltri videtur requirere, ut per *voluntaria* intelligamus spontaneum juramentum legis custodiendæ.

Vers. 5. 5. ANIMA MEA IN MANIBUS MEIS SEMPER : ET LEGEM TUAM NON SUM OBLITUS.

Quam serio juraverim custodire legem tuam, et hoc tibi sacrificium sponte obtulerim, ex hoc intelligi potest, quod quotidie de vita periclitior propter legis tuæ custodiā, et tamen ipsam « legem non sum oblitus. » S. Ambrosius et S. Augustinus dicunt in plerisque libris legi, *anima mea in manibus tuis*, et hanc veriorem lectionem esse judicant. Eodem modo legunt S. Hilarius et S. Hieronymus in *Commentario Psalmorum* ; et sensus optimus et verissimus est, animas nostras in manu Dei esse, a quo pendet vita nostra, et in cuius potestate est, ut vivamus, vel moriamur. Sed in hebreo textu aperte est, *in manibus meis*, ut nos in editione Vulgata legimus ; et S. Hieronymus non solum in sua versione posuit, *in manibus meis*, sed etiam in epist. *ad Suniam et Frentiam* dicit Septuaginta Interpretes vertisse, *in manibus meis*, et omnes veteres graecos tractatores explicasse hoc modo : *Anima mea in manibus meis est*, id est, in periculo vite sum. Quod enim manibus tenetur, facile potest cadere, vel eripi, nisi fortiter custodiatur et defendatur ; et sic intelligitur illud *Judic. cap. xii* : « Posui animam meam in manibus meis, » hoc enim dicit Jephite, dum ad prælium valde periculosum pergit ; et illud *I Reg. xix*, de Davide : « Posuit animam suam in manu sua, et perecessit Philisteum. » Itaque credibile est Septuaginta Interpretes vertisse, *in manibus meis*, sed postea a scolio aliquo textum fuisse mutatum, quod videtur lectio clarior et facilior.

Anima mea in manibus meis est, id est, in periculo vite sum. Quod enim manibus tenetur, facile potest cadere, vel eripi, nisi fortiter custodiatur et defendatur ; et sic intelligitur illud *Judic. cap. xii* : « Posui animam meam in manibus meis, » hoc enim dicit Jephite, dum ad prælium valde periculosum pergit ; et illud *I Reg. xix*, de Davide : « Posuit animam suam in manu sua, et perecessit Philisteum. » Itaque credibile est Septuaginta Interpretes vertisse, *in manibus meis*, sed postea a scolio aliquo textum fuisse mutatum, quod videtur lectio clarior et facilior.

**6. POSUERUNT PECCATORES LAQUEUM MIHI, ET VERS. 6.
DE MANDATIS TUIS NONERRAVI.**

Non sine causa dixi : « Animam meam in manibus meis semper » fuisse, quia « peccatores posuerunt laqueum mihi, » ut me caperent et occiderent, et tamen ego « de mandatis tuis non erravi, » id est, non aberravi a mandatis tuis. Hoc impletum est, cum David quereretur a Saul ad mortem, et tamen ipse David semel et iterum, cum facile posset Saulem occidere, seque ab omni periculo liberare, noluit id facere, ne peccaret in Deum, vide lib. I *Reg. cap. xxiii, xxvi.*

**7. HÆREDITATE ACQUISIVI TESTIMONIA TUA IN VERS. 7.
ÆTERNUM, QUA EXULTATIO CORDIS MEI SUNT.**

Cur de mandatis tuis non erraverim, ea causa est, quia « hæreditate acquisivi testimonia tua in æternum, » id est, elegi mihi in hæreditatem æternam ipsam legem tuam, quia jucundissima et dulcissima mihi est, et summæ delectationis et exultationis causa.

8. INCLINAVI COR MEUM, AD FACIENDAS JUSTIFICATIONES TUAS IN ÆTERNUM PROPTER RETRIBUTIONEM.

Porro causa tante delectationis est merces copiosissima, quam secum adfert legis custodia. « Inclinavi cor meum ad faciendas justifications tuas, » id est, cum ab una parte lex peccati traheret me, ab altera lex tua, ego inclinavi cor meum tanquam staterem, aut bilancem, ad legem tuam faciendam, propter retributionem, quia videlicet consideravi stipendum legis tuæ esse vitam sempiternam. S. Hieronymus ex hebreo verit, *inclinavi cor meum ad faciendas justifications tuas propter æternam retributionem*; textus hebraicus utramque lectionem admittit.

Samech. 1. INIQUOS ODO HABUI, ET LEGEM TUAM DILEXI.

In hoc octonario Propheta detestatur prævaricatores legis divinæ, et se contrarium eis esse demonstrat. Monet autem S. Augustinus non dixisse Prophetam in primo versiculo : « Iniquitatem odio habui, et legem tuam dilexi, » ut videbatur requirere ordo verborum ; sed dixisse : « Iniquos odio habui, et legem tuam dilexi, » ut ostenderet se non solam iniquitatem, sed etiam iniquos odisse ; et rursum non dixisse : « Iniquos odio habui, et justos dilexi, » sed et legem tuam dilexi, ut indicaret se non odisse iniquos, nisi quia contrarii sunt legi divinæ quam dilexit. Itaque odio habui iniquos, non ratione naturæ, sed ratione iniquitatis : sicut contra diligebat inimicos, ac per hoc iniquos, non ratione iniquitatis, sed ratione naturæ.

**2. ADJUTOR ET SUSCEPTOR MEUS ES TU, ET IN VERS. 2.
VERBUM TUUM SUPERSPERAVI.**

Ut non timeam iniquos, quos odi, et legem adimpleam quam dilexi : « adjutor et susceptor meus es tu : » adjutor, in lege custodienda, et susceptor in evadenda persecutione iniquorum. Et ego vicissim in verbum promissionis tuae valde speravi.

Vers. 3. 3. DECLINATE A ME, MALIGNI, ET SCRUTABOR MANDATA DEI MEI.

Una ex causis, cur odio habeat iniquos Prophetæ, est, quia eorum consortium valde impedit meditationem verbi divini, quæ quietem et pacem animi desiderat. Ideo cupit eos a se recedere, ut muscas molestissimas.

Vers. 4. 4. SUSCIBE ME SECUNDUM ELOQUIUM TUUM, ET VIVAM; ET NON CONFUNDAS ME AB EXSPECTATIONE MEA.

Ut cupio iniquos a me recedere, ita cupio ut tu, Domine, ad me accedas, et in sinum tuum suscias « secundum eloquium » promissionum tuarum, et tum verissime « vivam », cum tibi, qui vita es, conjunctus ero. Et quia de benignitate tua, non de meritis meis, id exspecto, « non confundas me ab exspectione mea. »

Vers. 5. 5. ADJUVA ME, ET SALVUS ERO; ET MEDITABOR IN JUSTIFICATIONIBUS TUIS SEMPER.

Idem aliis verbis repeatit; idem enim est: « Suscipe me, et vivam : » et « Adjuva me, et salvus ero. » Fructus autem hujus susceptionis erit, ut sine impedimento semper meditari valeat in lege Domini.

Vers. 6. 6. SPREVISTI OMNES DISCEDENTES A JUDICIIS TUIS, QUAIA INUSTA COGITATIO EORUM.

Ostendit nunc quod si ipse odio habet iniquos, et a se recedere cupit, id facit exemplo Dei, qui iniquos justissime execratur. « Sprevisti, » inquit, tanquam rem nullius momenti, « omnes discedentes a judiciis tuis, » id est, omnes iniquos, qui discedunt a via legis divinæ. « Quia injusta cogitatio eorum, » id est, quoniam ipsi cogitant se non debere subdi legi Dei, nec ab ea pendere; qua cogitatione nihil iniquius esse potest, cum omnis creatura summo jure Creatori subjici debat. Hæc fuit cogitatio Luciferi, qui similis Altissimo, non autem ei subditus esse voluit. Eadem fuit cogitatio primorum parentum, qui eupierunt esse sicut dii. Eadem est cogitatio omnium superbiorum, qui dicunt in corde suo : « Quis noster Dominus est? » Hos igitur spernit Deus, et non multum curat, si multa millia eorum pereant in æternum, quia quanto pluris ipsi se aestimant, tanto minoris flunt a Deo.

Vers. 7. 7. PRÆVARICANTES REPUTAVI OMNES PECCATO-RES TERRÆ: IDEO DILEXI TESTIMONIA TUA.

Movet hoc loco magnam questionem S. Augustinus, quomodo omnis peccator prævaricator

dici possit, cum Apostolus dieat : « Ubi non est Lex, nec prævaricatio, » Rom. IV; et rursum : ^{Pauli expositio.} « Qui sine lege peccaverunt, sine lege peribunt, » Rom. II. Respondet, illud, ubi non est lex, nec prævaricatio, intelligi de lege in universum; illud autem, qui sine lege peccaverunt, intelligi de lege scripta tantum; proinde omnes peccatores dicendi sunt prævaricatores, quia omnes prævaricantur legem naturalem scriptam in cordibus. Sed cur Propheta hoc dicit? ut ostendat peccatum, quod est maximum malorum, non aliunde nobis accidere, nisi ex prævaricatione legis. Subiungit : « Ideo dilexi testimonia tua, » id est, ut tam magnum malum effugiam, dilexi legem tuam. S. Hieronymus ex hebreo vertit, quasi scorriam reputasti omnes peccatores terræ. Sed Septuaginta Interpretes per vocem סְנִים non intellexerunt scoriam, a voce נָסְבָת; sed recedentes, quod est idem cum prævaricantes; nam verbum נָסְבָת significat recedere; inde נָסְבָת significat recedentes. Iod autem et vau sunt litteræ permutabiles. Sic etiam non legerunt חַיָּשָׁבָת, quod est repulasti, sed חַיָּשָׁבָת, quod est reputavi.

8. CONFIGE TIMORE TUO CARNES MEAS, A JU- Vers. 8. DICIS ENIM TUIS TIMUI.

Postulat in fine confirmationem in timore Dei, ut in custodia legis per eum timorem perseveret. « Confige, » inquit, quasi clavis, « timore tuo carnes meas, » id est, cupiditates meas carnales, ut se commovere non possint, juxta illud Apostoli : « Qui autem sunt Christi, carnem suam crucifixerunt cum vitiis et concupiscentiis, » Gal. cap. V. « A judiciis enim tuis timui, » id est, quoniam jam coepi timere a judiciis tuis poenas horribiles comminantibus, ideo cupio stabiliri in hoc sancto timore, ut ab eo nunquam divellar. Ex hebreo S. Hieronymus vertit, horripilavit caro mea; sed sciendum quod verbum נָסְבָת non solum significat horrere, sed etiam clavis configere: nam ex hoc verbo deducitur nomen מסְבָר masber, quod significat clavum. Parum autem refert, quod hic ponatur verbum præteriti temporis, et modi indicativi: nam eadem litteræ, mutatis punctis, faciunt imperativum; proinde recte Septuaginta verterunt confige, vel, ut Patres legerunt, confige clavis.

Hain. 1. FECI JUDICIUM ET JUSTITIAM, NON TRADAS ME CALUMNIANTIBUS ME. ^{Vers. 11.}

In hoc octonario petit gratiam liberationis a calumniatoribus, et auxilium ad legem perfecte adimplendam. « Feci, inquit, judicium et justitiam, » id est, reddidi unicuique suum, ideo æquum est, ut « non tradas me calumniantibus » mihi. Calumniatores nostri perpetui, dæmones sunt, quibus tradimur a Deo, quando permittemur tentari ab illis, vel potius quando Deo deserente superamur, et tentantibus consentimus.

Vers. 2. 2. SUSCIP SERVUM TUUM IN BONUM, NON CALMNIENTUR ME SUPERBI.

« Feci, inquit, justitiam, » sed ut semper faciam, et non deficiam faciendo, « suscipe servum tuum in bonum, » illum dirigendo. Clarior est textus hebraicus, ubi habetur, *dirige*, sive *ordina et apta servum tuum ad bonum*, ut semper placeat illi bonum; et hinc fiet ut non calumnientur mihi superbi, sive homines, sive dæmones. Qui enim bene confirmatus est in bono, et bene aptatus, ut ubiquique et semper bonum illi placeat, ita perseveranter bene se gerit, ut nihil sit cur timeat calumniatores.

Vers. 3. 3. OCULI MEI DEFECERUNT IN SALUTARE TUUM, ET IN ELOQUIUM JUSTITIE TUA.

Confirmat, se valde ardenter desiderare perfectam illam directionem ad bonum, quæ in vita æterna dabitur electis. « Oculi mei defecerunt, » præ desiderio respicientes assidue in salutem tuam, quæ de cœlo nobis adveniet, « et in eloquium justitie tuae, » id est, in promissionem tuam fidelissimam. Vide quæ dicta sunt ad versiculum primum et secundum litteræ *caph.*

Vers. 4. 4. FAC CUM SERVO TUO SECUNDUM MISERICORDIAM TUAM, ET JUSTIFICATIONES TUAS DOCE ME.

Pergit in oratione, ac petit ut Dominus operetur secum non secundum merita ipsius, sed « secundum misericordiam » suam, que in eo potissimum consistit, ut doceat « justificationes suas, » id est, intime persuadeat bonum esse implere et custodiare legem Domini, atque hoc modo doceat non tam scire, quam facere. Quod fit, quando Deus infundit magnam charitatem, non quando solam donat scientiam, quæ sine charitate inflat, non ædificat.

Vers. 5. 5. SERVUS TUUS SUM EGO, DA MIHI INTELLEG-
TUM, UT SCIAM TESTIMONIA TUA.

Ista tam frequens petitio ejusdem rei, signum est magni desiderii. « Servus tuus sum ego, » ac per hoc teneor mandatis tuis obediens; « da mihi igitur intellectum, » id est, fac me intelligere testimonia tua, ut illa perfecte addiscam. Vide primum versiculum litteræ *tod*, qui est huic similis.

Vers. 6. 6. TEMPUS FACIENDI, DOMINE, DISSIPAVERUNT
LEGEM TUAM.

Hic versiculus duobus modis exponi solet. SS. Patres Hilarius, Ambrosius et Augustinus exponunt de gratia Salvatoris, ut sensus sit: O Domine, jam « tempus est faciendi, » quia satis docuisti verbis, satis mandasti; nunc tempus est ut facias, ut exemplo doceas, ut carnem sumas, ut obedientiam usque ad mortem crucis exhibeas, ut gratiam dones, qua justificatio legis impleri possit a nobis: nam « dissipaverunt legem tuam, » Judæi videlicet, quibus data erat. At græci, Theo-

doreetus et Euthymius, quos plerique recentiorum sequuntur, exponunt de punitione scelerorum, ut sensus sit: Tempus est, Domine, ut facias iudicium adversus impicos, eosque punias, quoniam « dissipaverunt legem tuam, » id est, non solum utecumque violaverunt, sed penitus dissipaverunt, cum nihil ejus obseruent. Utraque bona est expeditio, sed videtur illa magis mystica, hæc magis litteralis. S. Augustinus legit, *tempus faciendi*, *Domino*; S. Ambrosius, *tempus faciendi*, *Domine*, ut habet editio nostra Vulgata. S. Hilarius utroque modo hunc versiculum legit. In hebraico et græco textu habetur, *Domino*; sed idem est sensus, dummodo illud, *faciendi*, tribuatur Deo, non homini, et sensus sit: Tempus est ut tu, Domine, facias.

Vers. 7. 7. IDEO DILEXI MANDATA TUA SUPER AURUM ET TOPAZION.

Vers. 8. 8. PROPTERA AD OMNIA MANDATA TUA DIRIGE-
BAB: OMNEM VIAM INIQUAM ODIO HABUI.

Quia multi « dissipaverunt legem tuam, » et ob hoc video illis gravissimum imminere supplicum: ideo ego ex adverso magis incensus sum amore legis tuae, et pluris illam facio quam aurum et lapides pretiosos; ideo etiam non solum legem diligebam, sed etiam custodire satagebam. « Dirigebar enim ad omnia mandata tua, » id est, recte ambulabam per viam mandatorum tuorum, non declinans ad dexteram, vel sinistram; imo etiam « omnem viam iniuitatis, » id est, omnem legem carnis et peccati « odio habui, » et declinavi. Porro per vocem *topazion*, quod est in hebræo ४, significatur lapis pretiosus, quem dicunt aurei coloris esse, et valde lucidum: vide Strabonem lib. VI, et Plinium lib. XXXVII, cap. viii. Eamdem vocem habemus in *Psalm. xviii*, ubi Septuaginta Interpretes et S. Hieronymus verterunt, *lapidem pretiosum*, quia videbant prophetam in una specie intellexisse genus ipsum lapidum pretiosorum.

Vers. 9. Phe. 1. MIRABILIA TESTIMONIA TUA, IDEO SCRUTATA EST EA ANIMA MEA.

In hoc octonario iterum Propheta revertitur ad laudandam legem, et ad petendam gratiam, et ad eamdem legem perfecte servandam. Laudat igitur legem, quod admirabilis sit, et ideo eam scrutatus sit diligenter. At *Deuter. xxx*, ubi legimus: « Mandatum hoc non supra te est, » in hebreo habetur, *mandatum hoc non mirabile est*. Respondeo, leges Domini sive morales, sive judiciales, sive ceremoniales, non esse mirabiles, quod attinet ad sensum litteralem, nam apertæ sunt et faciles; et qui eas non servant, non possunt excusari ab ignorantia: et hoc affirmat Moses in *Deuteronomio*. At, quod attinet ad mysticos sensus, præsertim legum ceremonialium, mirabiles et obscurissimæ sunt, cum per illas figurentur omnia mysteria christianæ religionis: atque hoc

significare videtur hoc loco Propheta. Præterea decalogus, quo lex Domini potissima continetur, hoc ipso valde mirabilis est, quod tam claris et apertis sententiis conscriptus sit, cum tamen in summa brevitate complectatur omnia principia justitiae, ad quæ reducuntur omnes leges, quæ factæ sunt et quæ fient. Omnes enim aliae leges, quæ sunt innumerabiles, et maxima volumina repleverunt, et deinceps replebunt, omnes, inquam, vel sunt conclusiones, vel determinationes legum decalogi. Itaque sicut parva semina mirabilia sunt, quia virtute continent magnas arbores: sic decalogus mirabilis est, quia virtute continet omnes leges totius mundi.

Vers. 2. 2. DECLARATIO SERMONUM SUORUM ILLUMINAT,
ET INTELLECTUM DAT PARVELIS.

Quia dixerat mirabilia esse mandata divina, nunc addit, quod si declarentur vel ab ipso Deo per infusionem luminis divini, vel ab aliquo perito doctore, mirifice mentem illustrant. Declarat autem lex, tum quando aperiuntur mysteria figurarum, quæ in lege ceremoniali continentur; tum quando deducuntur conclusiones ex lege morali; tum denique quando decreta legis judicialis ad facta particularia applicantur. Ex hebreo verit S. Hieronymus, *ostium sermonum tuorum*: sed vox פָּנָא non solum *ostium*, sed etiam *apertio*, ac per hoc *declarationem* significat. Quod sequitur: «Et intellectum dat parvulis,» significat legis declarationem parvulis esse necessariam, id est, simplicibus et ignorantibus. Fortasse etiam, ut S. Augustinus monet, per parvulos intelligere debemus humiles; isti enim facilius res divinas addiscunt, juxta illud *Matth. xi*: «Confiteor tibi, Pater, quia abscondisti hæc a sapientibus et prudentibus, et revelasti ea parvulis,» iis videlicet, qui non sunt in oculis suis sapientes, nec prudentes.

Vers. 3. 3. OS MEUM APERUI, ET ATTRAXI SPIRITUM,
QUIA MANDATA TUA DESIDERABAM.

Et ego, ut unus ex parvulis, os meum interius aperui orando et petendo, «et attraxi spiritum» bonum, spiritum scientiae et pietatis, quo mandata intelligere et implere possem. Nam ipsa mandata tua intelligere et implere desiderabam. Sumpta est metaphora a respiratione corporali: cum enim gravamus aliquo magno labore, aene suffocamur, tum aperientes os et anhelantes, respiramus et melius habemus.

Vers. 4. 4. ASPICE IN ME, ET MISERERE MEI SECUNDUM
JUDICIO DILIGENTIUM NOMEN TUUM.

Aperiendo autem os ad orandum ita dixi: «Aspice in me, et miserere mei,» id est, aspice in me oculis pietatis, et miserere mei laborantis sub onere præceptorum tuorum, quæ meis viribus implere non possum; «miserere, inquam, mei secundum judicium diligentium nomen tuum,»

id est, juxta consuetudinem qua uteris erga amicos tuos, qui te in veritate diligunt; vox enim hebraica יְדִכְתָּם significat *judicium, morem, consuetudinem, modum, habitum*, et alia. Sed quia Septuaginta Interpretes verterunt χρίσια, et noster Interpretis *judicium*, in eumdem sensum exponere debemus hoc modo: «Miserere mei secundum *judicium*,» quo uteris in judicandis amicis tuis, qui te diligunt.

5. GRESSUS MEOS DIRIGE SECUNDUM ELOQUIUM Vers. 5.
TUUM, ET NON DOMINETUR MEI OMNIS INJUSTITIA.

In hoc misereberis mei «secundum *judicium* diligentium nomen tuum,» si direxeris gressus meos «secundum eloquium tuum,» id est, si per gratiam tuam feceris, ut ego rectam viam ingrediatur ambulans secundum directionem legis tuæ; et sic «non dominetur mei omnis *injustitia*,» id est, nullam *injustitiam* committam, quæ me captivum teneat; nam, ut Dominus dicit *Joan. VIII*: «Qui facit peccatum servus est peccati.»

6. REDIME ME A CALUMNIIS HOMINUM, UT CUSTO- Vers. 6.
DIAM MANDATA TUA.

Gressus meos dirige tunc potissimum, cum periculum est ne perturbatus calumniis declinem a recta via; «calumnia enim perturbat sapientem, et perdit robur cordis illius,» ut dicit Ecclesiastes cap. vii. «Redime me a calumniis hominum,» id est, libera me a calumniis hominum, ut animo tranquillo custodiam mandata tua. Non est facienda vis in verbo *redime*; nam apud Hebreos passim accipitur pro *libera*.

7. FACIEM TUAM ILLUMINA SUPER SERVUM TUUM, Vers. 7.
ET DOCE ME JUSTIFICATIONES TUAS.

Quod supra dixerat, «aspice in me,» idem aliis verbis repetit, dicens: «Faciem tuam illumina super servum tuum.» Sicut enim sol cum interpositione nubium obsecuratur, privat nos calore et lumine: ita Deus cum nos gratia sua non adjuvat, videtur abscondere faciem suam, vel tenebris cooperire, et contra, cum nos gratiae suæ lumine collustrat, videtur nubium obstacula dissipare, et nobis serenam faciem ostendere. Ait igitur: «Faciem tuam illumina super servum tuum,» id est, sereno me vultu respice, et lumine ad me transfuso, doce me justificationes tuas, id est, legem tuam intelligere et servare.

8. EXITUS AQUARUM DEDUXERUNT OCULI MEI, Vers. 8.
QUIA NON CUSTODIERUNT LEGEM TUAM.

Quam vehementer David Dei legem dilexerit, ostendit hactenus tot precibus toties repetitis pro gratia servandæ legis: nunc demonstrat ex magno dolore, quem concepit ex prævaricatione; non enim dicit se unam vel alteram lacrymam fudisse, sed rivos aquarum, id est, lacrymarum, ex oculis, quasi ex fontibus, produxisse, «quia non custodierunt legem Domini.» Tametsi enim

Instru-
menta
peccati,
nunc oculi,
nunc ma-
nus.
peccatum, id est, transgressio legis, procedat a voluntate, sive a corde : tamen instrumenta peccati nunc sunt oculi, nunc lingua, nunc manus. Peccati autem gravissimi, quod David aliquando commisit, et pro quo «lavabat per singulas noctes lectum suum,» instrumenta fuerunt oculi. Videl enim nimis curiose mulierem nudam, dum se lavaret; inde exarsit in concupiscentiam, inde processit ad adulterium et homicidium. Theodoretus et Euthymius, quos aliqui recentiores sequuntur, dicunt David flevisse peccata aliorum, et sic exponunt illud : «Quia non custodierunt legem tuam.» Sed SS. Patres nostri Hilarius, Ambrosius, Hieronymus et Augustinus constanter affirmant Davidem loqui de peccato suo, non de alieno.

Vers. 4. **Tsade. 1. JUSTUS ES, DOMINE, ET RECTUM JUDICIUM TUUM.**

In hoc octonario laudatur lex Domini a summa rectitudine et justitia : ac primum demonstrat David esse justissimam legem, quoniam auctorem habet justissimum, in quem injustitia cadere non potest. Ait igitur : «Justus es, Domine,» id est justus, per antonomasiam, et solus justus ea justitia, cum qua admisceri injustitia nequeat, juxta illud I Joan. i : «Deus lux est, et in eo tenebrae non sunt ullae.» «Et rectum judicium tuum,» id est, et consequenter rectum ac justum est judicium, decretum, mandatum tuum. Nam in hoc Psalmo per *judicium* fere semper ipsa lex intelligitur. Quanquam etiam illud verum est, *judicium* Dei, quo distribuit poenas et præmia, semper esse justum, licet interdum non appareat ejus justitia.

Vers. 2. **2. MANDASTI JUSTITIAM TESTIMONIA TUA, ET VERITATEM TUAM NIMIS.**

Ostendit legem Dei non solum esse justum, quia procedit a Deo justo, sed etiam quia continet ipsam justitiam. «Mandasti, inquit, justitiam testimonia tua,» id est, præcepisti nobis testimonia tua, quæ sunt ipsa justitia ; «et veritatem tuam nimis,» id est, et sunt ipsa veritas omnino. Lex decalogi in dispensationibus. S. Thomas I II, *Ques.* C, art. 8, ex hoc principio colligit legem decalogi esse omnino indispensabilem, quia continet ipsum ordinem justitiae : quomodo si quis juberet ut nullus peccet, vel ut nemo sit iniquus, lex esset omnino indispensabilis, quia non potest dari easus, in quo liceat peccare, vel iniquum esse.

Vers. 3. **3. TABESCERE ME FECIT ZELUS MEUS, QUILA OBLITI SUNT VERBA TUA INIMICI MEI.**

Propter hanc tantam æquitatem legis tuæ, dolore afficiebar, ita ut etiam tabescerem et languorem præ zelo, cum viderem homines, etiamsi inimicos meos, oblivisci verborum tuorum, id est, tam utilium præceptorum tuorum. In græco legitur, *zelus tuus*, et sic legunt Hilarius, Ambro-

sius, Hieronymus, Augustinus et Theodoretus in *Commentario Psalmorum*. Sed nostra lectio conformis est hebraico textui, nec desunt antiqui codices, qui nostræ lectioni faveant. Sanctus enim Augustinus testatur alios codices habere, *zelus meus*; alios, *zelus domus tuæ*; sensus autem semper est idem, ut notum est.

4. IGNITUM ELOQUIUM TUCUM VEHEMENTER, ET Vers. 4.
SERVUS TUUS DILEXIT ILLUD.

Iterum docet Propheta legem Dei esse justissimam et purissimam, ex similitudine ad aurum igne probatum. Dicitur enim eloquium Dei *ignitum vehementer*, quia similis est lex Dei auro in fornace ignis constituto, ubi non læditur, quia purum est ab omni sorde. Nam in textu hebraico habetur נִירָא, quod significat *probatum* et *examinatum igne*. Neque dici potest Septuaginta Interpretes non legisse *tserupha*, sed נִירָא, quod proprie *ignitum* significat : nam in hoc octonario singuli versus incipiunt per litteram *tsade*, et hoc vocabulum est initium versiculi. Itaque certum est hoc loco per *ignitum* intelligi *probatum*, et *examinatum igne*, ac per hoc significari legem Domini esse purissimam ab omni injustitia, ut est aurum igne examinatum. Simile habetur in Psalm. xi : «Eloquia Domini casta, argentum igne examinatum.» Unde etiam sequitur ut eadem lex summo amore diligenda sit; et merito David adjungit : «Et servus tuus dilexit illud.» Neque tamen est falsum, sed verissimum, legem Domini esse etiam igneam, ut dicitur Deuter. xxxii : «In dextera ejus ignea lex,» tum quia instar ignis illuminat et purificat; tum quia finis ejus est charitas, quæ est ignis divinus.

5. ADOLESCENTULUS SUM EGO, ET CONTEMPTUS : Vers. 5.
JUSTIFICATIONES TUAS NON SUM OBLITI JS.

Hoc refert David ad comparationem fratrum suorum, quasi dicat : Ego sum minimus inter fratres meos (hoc enim proprie significat vox hebreæ וְתַתִּיר), et contemptus a patre et fratribus ; et tamen exaltatus ad regnum, et a Deo præ omnibus honoratus, quia «justificationes tuas non sum oblitus.» Vide lib. I Reg. xvi. S. Ambrosius et S. Augustinus exponunt mystice de populo christiano, qui est frater junior respectu fratris senioris populi iudaici, et ab illo contemptus, sed a Deo magis dilectus, quia «justificationes Domini non est oblitus,» quas populus Judaicus oblitus est.

6. JUSTITIA TUA JUSTITIA IN ÆTERNUM, EX LEX Vers. 6.
TUA VERITAS.

Hæc est repetitio et declaratio secundi versiculi. Justitia enim Domini, id est, justissima lex Domini est justitia æterna, quia immutabilis et indispensabilis; et simul est veritas, quia nihil falsi continet : promissiones enim ejus et comminationes omnino impleri debent.

Vers. 7. 7. TRIBULATIO ET ANGUSTIA INVENERUNT ME,
MANDATA TUA MEDITATIO MEA EST.

Ex hac veritate fit ut in omni tribulatione consoletur me legis tuae assidua meditatio. « Tribulatio et angustia invenerunt me, » id est, quotiescumque tribulatio et angustia invenerunt me, « mandata tua meditatio mea est; » id est, id remediis accipio, ut mediter, et oblecter in mandatis tuis considerandis.

Vers. 8. 8. AEQUITAS TESTIMONIA TUA IN AETERNUM, INTELLECTUM DA MIHI, ET VIVAM.

Idem alius verbis dicit, quod in secundo et sexto versiculo : nam per *aequitatem* hoc loco *justitia* accipienda est, ut ex textu hebraico constat. « *Aequitas* testimonia tua in aeternum, » id est, præcepta tua sunt aeterna justitia, quia semper justissima sunt : ideo peto ut des mihi intelligentiam præceptorum tuorum, ut ea custodiendo vivam, quæ si non custodiem, continuo morerer.

Vers. 1. Coph. 1. CLAMAVI IN TOTO CORDE MEO; EXAUDI ME, DOMINE, JUSTIFICATIONES TUAS REQUIRAM.

In hoc octonario Propheta desiderium suum erga divinam legem ardentis oratione demonstrat : ac in primo quidem, et secundo versiculo exprimit vehementiam desiderii per clamorem ; in tertio et quarto, per horam intempestivam. « Clamavi, inquit, in toto corde meo, » id est, toto affectu totisque viribus clamavi; ideo « exaudi me, Domine. » Sicut enim vocem corporalem submissam non facile exaudimus, clamorem autem non possumus non exaudire : ita Deus orationem frigidam et remissam, quasi non audierit, non admittit : ardenter autem, et magno desiderio emissam, quasi non possit non audire, facile admittit. « Justificationes tuas requiram, » id est, exaudi me, ut « justificationes tuas, » id est, præcepta tua, diligenter requiram : vel « exaudi me, » et ego gratia tua adjutus præcepta tua requiram, quod in idem recidit.

Vers. 2. 2. CLAMAVI AD TE, SALVUM ME FAC, UT CUSTODIAM MANDATA TUA.

Potest hoc intelligi de salute in spe, quæ habetur per gratiam in hoc saeculo, et de salute in re, que habetur per gloriam in futuro saeculo. « Clamavi ad te, » id est, magno desiderio oravi; « salvum me fac, » per gratiam, quæ est salus inchoata, « ut custodiam mandata tua, » quantum in hoc saeculo fragilitas humana permittit ; et rursum « salvum me fac, » in aeterna vita, « ut custodiam mandata tua, » sine ullo timore prævaricandi.

Vers. 3. 3. PRÆVENI IN MATORITATE, ET CLAMAVI: QUA IN VERBA TUA SUPERSPERAVI.

Hunc locum corruptum esse aliqui putant, quia S. Augustinus legit, *præveni in immaturitate*. Sed

credendum est potius corruptum fuisse codicem quem habuit S. Augustinus; nam S. Hilarius, S. Ambrosius, S. Hieronymus in *Commentario*, et alii legunt, ut nos habemus, *in maturitate*. Sciendum est autem verbum *maturare* esse ambiguum, et aliquando significare *perficere*, ut cum dicimus, *maturare fructus*; aliquando, *accelerare* et *festinare*, qua notione dixit Poeta : « *Maturate fugam*, » lib. I *Aeneid.*: et *mature venisti* tam significat, *tempore opportuno venisti*, quam *satis cito venisti*. Hoc igitur loco *maturitas* non est opportunitas temporis, sed acceleratio et anticipatio hore, quod proprie expressit græcus codex, *ἐν ἡμέρᾳ*, id est, *in non hora*, sive ante horam, tempore intempestivo et immaturo, et sensus est : « *Præveni in maturitate*, » id est, *præveni tempus surgendi*, et in acceleratione et festinatione, antequam dies illucesceret, cum adhuc tempus dormiendi esset, ego præ desiderio anticipavi vigilias, et in oratione mea clamavi, quia valde speravi in verba promissionum tuarum.

4. PRÆVENERUNT OCULI MEI AD TE DILUCULO : Vers. 4.
UT MEDITARER ELOQUIA TUA.

Idem repetit alius verbis. « *Prævenerunt*, inquit, oculi mei » tempus vigilandi, et « *diluculo*, » id est, valde mane, ante ortum solis ad te respicere coepérunt, ut gratia tua adjuvante meditarer eloquia tua.

5. VOCEM MEAM AUDI SECUNDUM MISERICORDIAM Vers. 5.
TUAM, DOMINE; ET SECUNDUM JUDICIUM TUUM
VIVIFICA ME.

Pergit in oratione quam diluculo, remotis curris temporalibus, in magno silentio rerum omnium, attentissimo animo faciebat. « *Vocem meam*, inquit, *audi*, » non secundum merita mea, sed « secundum solitam misericordiam tuam, et secundum judicium tuum, » quo reddis quod promisisti; « *vivifica me*, » conservans et augens vitam spiritualem quam dedisti, et in futuro saeculo perficiens et consummans, ut amplius mori non possim.

6. APPROPINQUAVERUNT PERSEQUENTES ME INI- Vers. 6.
QUITATI; A LEGE AUTEM TUA LONGE FACTI SUNT.

Non sine causa peto vivificari, quoniam non desunt persecutores qui temptationibus assiduis mortificare me satagunt, qui persecutores, sive homines, sive dæmones, « appropinquaverunt iniquitati, et a lege tua longe facti sunt, » id est, iniquitatem diligunt, illi adhaerent, illam persuadere aliis conantur; sicut e contrario legem tuam oderunt, illam fugiunt, illam omnibus invisa reddere student. S. Augustinus, S. Ambrosius et S. Hieronymus in *Commentario* legunt, *appropinquaverunt persequentes mihi inique sive ini-
quitate*, id est, cum iniquitate : ita ut appropinquatio sit ad hominem, ut ei noceant, non ad iniquitatem, ut illi conjungantur. Et quidem vox

græca ambigua est, et iam *iniquitate* quam *iniquitati* reddi potest. Vox hebraica, ut nunc se habet, favet lectioni S. Augustini; nam ad verbum sic reddi potest, *appropinquaverunt persecutores iniquitatis*, id est, persecutores iniquissimi appropinquaverunt, supple, *ad me*. Tamen omnino credibile est verba hebraica non esse legenda, *רֹדֵף זִמָּה* rodephem zimma, id est *persecutores iniquitatis*, sed *rodephai zimma*, id est, *persecutores mei iniquitati*, quæ lectio est nostræ editionis Vulgatæ, et habetur apud S. Hilarium, et cum lectione græca bene cohæret, et optime respondet verbis sequentibus: « A lege autem tua longe facti sunt, » ubi Propheta opponit iniquitatem legi, et dicit persecutores suos appropinquasse iniquitati, et recessisse a lege: tamen uterque sensus bonus est.

Vers. 7. 7. PROPE ES TU, DOMINE: ET OMNES VIÆ TUE
VERITAS.

Quamvis persecutores mei « a lege tua longe facti sint, » tamen a te longe fieri non potuerunt: quia tu « prope es » illis per justitiam, « et omnes viæ tue veritas, » id est, omnes leges, omnia iudicia tua justissima sunt. Itaque manum tuam punientem ipsorum scelera fugere non potuerunt. Mihi quoque « prope es » tu, Domine, per auxilium, et quia « omnes viæ tue veritas, » non patieris ut mihi noceant persecutores: nam etsi forte dabis illi potestatem in corpus meum, non dabis in animam meam, et tandem omnis persecutio in coronam gloriæ convertetur.

Vers. 8. 8. INITIO COGNOSI DE TESTIMONIIS TUIS, QUA
IN ÆTERNUM FUNDASTI EA.

Quod autem « omnes viæ tue sint veritas, » immo etiam æterna veritas: « Initio cognovi de testimoniosis tuis, » id est, jam inde a primo tempore, quo primum coepi intendere in mandata tua, cognovi ex ipsis, dum ea attente considerarem, « quia in æternum fundasti ea, » id est, quod sint æternæ veritatis, et plane immutabilia et indispensabilia. Nam jam supra dictum est, ea esse immutabilia, quia continent ordinem justitiae, et ipsam legislatoris intentionem.

Vers. 1. Resh. 1. VIDE HUMILITATEM NEAM, ET ERIPE
ME, QUAIA LEGEM TUAM NON SUM OBLITUS.

Vers. 2. 2. JUDICA JUDICIUM MEUM, ET REDIME ME;
PROPTER ELOQUIUM TUUM VIVIFICA ME.

In hoc octonario rursum Propheta orationem fundit ad Deum, pro liberatione ab inimicis sive dæmonibus, sive hominibus, qui eum tentationibus suis ad prævaricationem legis pertrahere nitebantur. « Vide, inquit, humilitatem meam, » id est, afflictionem et tribulationem meam, « et eripe me, quia legem tuam non sum oblitus, » id est, quamvis legem non perfecte custodiam, tamen non post tergum meum eam abjeci, sed recordor et recogito eam, et custodire desidero;

ideo æquum est ut eripias me a tentantibus inimicis, et perficias in me, quod per gratiam tuam cœpisti. « Judica igitur judicium meum, » id est, judica causam meam, « et redime me, » per judiciariam sententiam tuam, de manu inimicorum meorum; « propter eloquium tuum vivifica me, » id est, propter promissionem tuam, sive propter legem quam constitui de præmiis bonorum et suppliciis malorum, vivifica me, vitam gratiæ augendo, et vitam gloriæ suo tempore largiendo.

3. LONGE A PECCATORIBUS SALUS, QUAIA JUSTIFI- Vers. 3.
CATIONES TUAS NON EXQUISIERUNT.

Dixi: « Vivifica me, quia legem tuam non sum oblitus; » scio enim longe esse a peccatoribus salutem, quia « justificationes tuas non exquisierunt. » Nam imprimis dæmones, qui per antonomasiæ peccatores dici possunt, longissime absunt a salute, quia nunquam ad eam pervenient, quod legem Domini non exquisierint, sed eam potius superbiendo contempserint. Alii quoque peccatores tam longe a salute absunt, quam longe absunt a lege Domini exquirenda; neque enim frustra dictum est a Domino: « Si vis ad vitam in-gredi, serva mandata, » Matth. xix.

4. MISERICORDIÆ TUÆ MULTÆ, DOMINE: SE- Vers. 4.
CUNDUM JUDICIUM TUUM VIVIFICA ME.

Quamvis severissime punias eos a quibus longe fecisti salutem tuam, tamen multæ sunt etiam misericordiæ tue; ideo peto ut secundum iudicium tuum, quo misericorditer judicas eos qui faciunt misericordiam et qui diligunt legem tuam, vivifices me.

5. MULTI QUI PERSEQUUNTUR ME, ET TRIBULANT Vers. 5.
ME; A TESTIMONIIS TUIS NON DECLINAVI.

Non sine causa postulo ut vivifices me, quia multi sunt hostes mei visibles, et plures invisibles, qui me mortificare contendunt: et tamen ego gratia tua adjutus « a testimoniosis tuis, » hoc est, a præceptis tuis, quæ sunt quasi rectissima via, « non declinavi, » neque ad dexteram, neque ad sinistram.

6. VIDI PRÆVARICANTES, ET TABESCEBAM: QUAIA Vers. 6.
ELOQUIA TUA NON CUSTODIERUNT.

Ostendit in hoc versiculo Propheta verum spiritum charitatis, quia non tam moleste ferebat persecutores ob propriam afflictionem, quam ob injuriam Dei: quod idem antea dixerat illis verbis: « Defectio tenuit me pro peccatoribus derelinquentibus legem tuam; » et rursum: « Tabescere me fecit zelus meus, quia oblii sunt verba tua inimici mei. »

7. VIDE QUONIAM MANDATA TUA DILEXI, Do- Vers. 7.
MINE; IN MISERICORDIA TUA VIVIFICA ME.

Ego videns prævaricantes, tabescebam; æquum

est ut tu videns me diligentem mandata tua, misericorditer me vivifices.

Vers. 8. **8. PRINCIPIUM VERBORUM TUORUM VERITAS, IN AETERNUM OMNIA JUDICIA JUSTITIAE TUAE.**

Duobus modis potest intelligi praesens versiculus. Uno modo, ut sensus sit : Verba tua procedunt a veritate, ut a suo principio, et quasi fonte; et ideo verissima sunt, et « in aeternum manent judicia justitiae tuae, » quae sunt ut pios maneat præmium, et impios pena : ita exponit S. Augustinus. Altero modo, ut sit sensus : « Principium verborum tuorum, » quando vide-licet ceperisti loqui cum Adamo, et jubens sub pena mortis, ne tangeret lignum scientiae boni et mali : « veritas fuit, » id est, verissimum fuit, et « judicia justitiae tuae, » quibus peccata tunc punire ceperisti, sempiterna sunt : ita exponit Eu-thymius.

Vers. 1. **Scin. 1. PRINCIPES PERSECUTI SUNT ME GRATIS, ET A VERBIS TUIS FORMIDAVIT COR MEUM.**

In hoc octonario demonstrat Propheta constantiam suam in custodienda lege Domini, et desiderium cavendi ab omni prævaricatione. « Principes, inquit, persecuti sunt me gratis, » id est, Saul rex sine ulla causa me persecutus est, reddens mala pro bonis, ut etiam postea fecit Isboseth filius Saulis, qui duce Abner injuste mecum bella gessit, et tandem idem fecit filius meus Absalon, qui regnum sibi usurpare, meque de solio exturbare conatus est. « Et a verbis tuis formidavit cor meum, » id est, ego tamen tantis tentationibus non succubui, ut eis nocerem; sed timens mandata tua, semel atque iterum Sauli percisi, et mortem Isboseth ultus fui, et Absalonem deflevi, reddens bona pro malis. S. Ambrosius et S. Augustinus hæc verba accommodant sanctis martyribus, qui persecutionem injustissimam passi ab imperatoribus infidelibus, plus timuerunt Deum, ut fidem conservarent, quam minas principum, ut fidem negarent.

Vers. 2. **2. LÆTABOR EGO SUPER ELOQUIA TUA, SICUT QUI INVENTIT SPOLIA MULTA.**

Non solum timui a verbis tuis, sed etiam dilexi verba tua, et ideo « lætabor super eloquia tua, » cum dabitur occasio illa adimplendi, sicut lætatur, qui peracto prælio invenit multa spolia hostium devictorum. Aptissima similitudo, tum quia David vir bellicosus erat, et assuetus prælii; tum quia in præceptis Dominicis observandis cum diabolo alacriter pugnandum est, et ex ea pugna, qui vicit revertitur, invenit illustres coronas a Deo paratas omnibus hostium spoliis pre-tiosiores.

Vers. 3. **3. INIQUITATEM ODIO HABUI, ET ABOMINATUS SUM; LEGEM AUTEM TUAM DILEXI.**

Iterum repetit amorem suum erga legem divi-

nam, et odium erga iniqutatem : quod erat manifestum indicium amoris legislatoris ; nam et Dominus in Evangelio dicit : « Si quis diligit me, sermonem meum servabit, » Joan. xiv; et ibidem : « Qui habet mandata mea, et servat ea, ille est qui diligit me. » Felix qui Spiritu Sancto reddente testimonium spiritui ejus, dicere potest : « Iniquitatem odio habui, et legem tuam dilexi. »

Vers. 4. **4. SEPTIES IN DIE LAudem DIXI TIBI, SUPER JUDICIA JUSTITIAE TUAE.**

Ethoc est charitatis signum, sine intermissione Deum laudare, quod judicia ejus justissima sint, et leges ipsius summam justitiam in se continent. Quamvis per numerum septenarium intelligatur hoc loco frequentissima laus, quomodo intelligitur frequens lapsus, cum dicitur : « Septies in die cadit justus, » Prov. xxiv, tamen non sine causa ex hoc loco Ecclesia usum septem horarum Canonicarum instituisse videtur. Nam cum ad imitationem tam sancti regis vellet filios suos frequentissime Deum laudare, determinavit septenarium numerum, cui si addatur octava hora, de qua dictum est supra : « Media nocte surgebam ad confitendum tibi, » fiet ut tertia quaque hora Trinitas Deus a fidelibus laudetur, ut S. Cyprianus notavit in serm. 6, qui est de *Oratione Dominicâ*.

Vers. 5. **5. PAX MULta DILIGENTIBUS LEGEM TUAM, ET NON EST ILLIS SCANDALUM.**

Magna et verissima laus est dilectionis legis divinae : nam qui diligit legem, diligit Deum legislatorem ; qui autem diligit Deum, diligit omnia in Deo, ac per hoc nullum habet ex parte sua inimicum, sed cum omnibus ex parte sua pacem habet. Deinde : « Diligentibus Deum omnia cooperantur in bonum, » ut dicit Apostolus Rom. viii Nemo autem nocere potest ei, cui « omnia cooperantur in bonum ; » quare qui diligit Deum, cum omnibus pacem habere debet ; et ideo Apostolus ad Gal. v, dicit : « Charitas, gaudium, pax, » etc. Pari ratione non est scandalum « diligentibus legem » Domini, sed sine offensione currunt ad patriam : nam scandalum activum non cadix in eum qui diligit legem, cum scandalizare peccare sit, et peccare sit legem prævaricari. Scandalum autem passivum, vel est pusillorum, qui ex ignorantia existimant illicitum esse, quod licitum est, et offenduntur cum vident illa fieri, quæ ipsi arbitrantur illicita ; vel est Pharisæorum, qui ex propria malitia in pejorem partem interpretantur, quæ interpretanda erant in meliorem. At qui diligunt legem Domini, perfecti sunt in charitate; proinde nec pusilli, nec pharisei sunt, ac per hoc non est illis scandalum. Vide S. Thomam. II II, *Quæst. XLIII*, art. 5 et 6.

Usam
septem
horarum
canoni-
carum
unde
institue-
rit Ecclæ-
sia?

Scanda-
lum ac-
tivum et
passivum
quid sit?

Vers. 6. **6. EXPECTABAM SALUTARE TUUM, DOMINE, ET MANDATA TUA DILEXI.**

Induit personam perfectorum hoc loco Propheta, et ideo cum fiducia dicit : « Exspectabam salutare tuum, » id est, salutem aeternam, quae a te est; et rationem reddit : « Et mandata tua dilexi, » id est, quia « mandata tua dilexi. » Quomodo dicit Apostolus II Tim. IV : « Cursum consummavi, fidem servavi, in reliquo reposita est mihi corona justitiae, quam reddet mihi in illa die justus judex. »

Vers. 7. 7. CUSTODIVIT ANIMA MEA TESTIMONIA TUA, ET DILEXIT EA VEHEMENTER.

In eadem perfecti persona loquitur, ac testatur se mandata servasse, quoniam ea vehementer amavit. « Vere enim amor, » ut scripsit S. Gregorius, « operatur magna, si est; si autem operari renuit, amor non est; » et Dominus in Evangelio Joan. XIV : « Qui non diligit me, sermones meos non servat; » et Apostolus ad Rom. XIII : « Bilectio malum non operatur. Plenitudo ergo legis est dilectio; » et ibidem : « Qui diligit, legem implevit. »

Vers. 8. 8. SERVAVI MANDATA TUA ET TESTIMONIA TUA, QUIA OMNES VIÆ MÆ IN CONSPPECTU TUO.

Iterum in persona perfectorum, se omnia mandata et testimonia servasse affirmat; sed ex alio motivo, quod proprium est perfectorum, videlicet, quia in omnibus actionibus suis cogitabat Deum esse praesentem; id enim significat illud, quia omnes viæ mæ in conspectu tuo, id est, quicquid agebam, in conspectu tuo agebam, sciens et cogitans te omnia conspicere. Hæc enim cogitatio mirabilem vim habet ad moderandas actiones humanas: nam si conspectus principis terreni id efficit, ut subditi coram eo peccare non audeant, imo etiam desides et negligentes, vel timidi et parvi animi videri erubescant: quid faceret conspectus Principis cœlestis, atque omnipotens, si ante oculos mentis perpetuo versaretur? Hinc Dominus Abrahamo dicebat: « Ambula coram me, et esto perfectus, » Gen. XVII; et Abraham dicebat: « Dominus in cuius conspectu ambulo, » Gen. XXIV; et Elias ac Elisæus dicebant: « Vivit Dominus, in cuius conspectu sto, » III Reg. XVII et IV Reg. III.

Vers. 9. Thau. 1. APPROPINQUET DEPRECATIO MEA IN CONSPPECTU TUO, DOMINE: JUXTA ELOQUIUM TUUM DA MIHI INTELLECTUM.

In hoc ultimo octonario concluditur Psalmus oratione ad Deum pro gratia et salute sepius petita; sciebat enim Propheta, quod postea in Evangelio Dominus admonuit, perseverantiam in oratione esse ad impetrandum longe utilissimam, Luc. XI. Ait igitur: « Appropinquet deprecatio mea in conspectu tuo, Domine, » id est, deprecatio mea, quæ suis meritis non confudit, elevetur et ascendat aspirante gratia tua, et appropinquet tibi, ita ut eam propius aspicere et admittere

digneris. Illud, *in conspectu tuo*, positum est pro *ad conspectum tuum*, sive *conspectui tuo*. Quid autem contineat *deprecatio*, explicatur in verbis sequentibus: « Juxta eloquium tuum da mihi intellectum, » id est, juxta promissum tuum, quod audivi in Psalm. XXXI: « Intellectum tibi dabo, et instruam te, » da mihi intelligere mandata tua eo modo, quo intelligunt, qui ea opere adimplent, et qui adimplendo ad vitam perveniunt.

2. INTRET POSTULATIO MEA IN CONSPPECTU TUO, Vers. 2.
SECUNDUM ELOQUIUM TUUM ERIPE ME.

Repetit aliis verbis eamdem petitionem; illud autem, *eripe me*, significat finem cur petierit intellectum sibi dari; nam finis illuminationis est liberatio a peccatis, juxta illud Evangelii: « Cognoscetis veritatem, et veritas liberabit vos, » Joan. VIII.

3. ERUCTABUNT LABIA MEA HYMNUM, CUM DO- Vers. 3.
CUERIS ME JUSTIFICATIONES TUAS.

Promittit gratiarum actionem, si obtinuerit gratiam tam sepe imploratam. « Cum docueris me justificationes tuas, » ita ut gratia tua illuminante et juvante, perficiam mandata tua, tunc ex plenitudine letitiae interioris, et agnitionis magni hujus beneficii, « eructabunt labia mea hymnum laudis, » et gratiarum actionis: nam ructus ex repletione oritur, « et ex abundantia cordis os loquitur. »

4. PRONUNTIABIT LINGUA MEA ELOQUIUM TUUM, Vers. 4.
QUIA OMNIA MANDATA TUA ÆQUITAS.

Non solum dicit se laudaturum Deum, sed etiam doctorum homines, ac demonstraturum quanta sit æquitas mandatorum Dei. « Pronuntiabit, inquit, lingua mea eloquium tuum, » id est, loquar hominibus præcepta tua, et docebo quod « omnia mandata tua æquitas sunt, » id est, æquissima sunt, ac proinde æquum est ut ab omnibus diligentissime observentur. Nisi magis placeat hunc versiculum esse repetitionem versiculi superioris, ut sensus sit: Laudabit « lingua mea eloquium tuum, » id est, præcepta tua, quia æquissima sunt. Sed prior expositio est S. Augustini, et communior.

5. FIAT MANUS TUA, UT SALVET ME: QUONIAM Vers. 5.
MANDATA TUA ELEGI.

Pergit in oratione sua David, petens quod unice petendum est, aeternam salutem quae est finis mandatorum. « Fiat manus tua, ut salvet me, » id est, sit potentia et sapientia tua ad me salvandum. Sic enim ex hebreo verti posset, ex quo intelligimus, illud, *fiat*, positum esse pro *sit*, quomodo etiam in cap. I Genes., ubi dicitur: *Fiat lux, fiat firmamentum, fiat luminaria, semper in hebreo ēst verbum substantivum sit*. Et quoniam *potentiam et sapientiam Dei* Christum esse docet Apostolus I Cor. I, recte exponunt Patres: *Sit*

Christus tuus ad me salvandum. « Quoniam manda tua elegi. » Optima ratio, cur pretendant salutem, quia mandata elegit, quoniam scriptum est : « Si vis ad vitam ingredi, serva mandata, » *Matth. xix.*

* Vers. 6. 6. CONCUPIVI SALUTARE TUUM, DOMINE, ET LEX TUA MEDITATIO MEA EST.

Reddit rationem cur tantopere petat salutem, quia videlicet illam praे omnibus desideratis concupivit, sicut revera super omnia bona concupiscenda est, cum sola desiderium nostrum possit implere; et quoniam non satis est concupiscere salutem, si quis ad eam pervenire velit, sed necesse est ambulare per viam praeceptorum Dei, ideo subjungit : « et lex tua meditatio mea est, » id est, de lege custodienda semper cogito, et in illa custodienda me semper exerceo.

Vers. 7. 7. VIVET ANIMA MEA, ET LAUDABIT TE; ET JUDICIA TUA ADJUVABUNT ME.

Vivet anima mea, » cum salutem concupitam obtinuerit, et manus tua fuerit ad salvandum eam : et tunc officium ejus erit, et solum negotium, te laudare : nam « beati qui habitant in domo tua, Domine! in secula seculorum laudabunt te, » *Psalm. lxxxiii.* « Et judicia tua adjuvabunt me, » id est, et mandata tua a me custodita adjuvabunt me, ut aliquando etiam corpore vivam, cum resurrexero in resurrectionem vitae, vel « judicia tua, » quibus in novissimo die judicabis pro meritis vivos et mortuos, « adju-

vabunt me, » ut corpore quoque vitam sempiternam possideam.

8. ERRAVI SIGUT OVIS, QUÆ PERIIT; QUÆRE Vers. 8.
SERVUM TUUM, QUIA MANDATA TUA NON SUM OBLITUS.

Erravi enim a patria expulsus, et adhuc exilio propter culpam parentis primi, toti humano generi communicatam; et « erravi, sicut ovis, » quæ seducta perii, non sicut diabolus, leo rugiens, qui ex malitia cecidit. « Quære ergo servum tuum; » quamvis enim ex parte quæsieris et inveneris, quatenus animam justificasti a peccato, et reconciliasti Deo, tamen adhuc quærenda est ovis perdita, quatenus exspectat redemptionem corporis sui, ut tota ad montes coelestes et uberrima pascua, ubi relictæ sunt nonaginta novem, quæ non errarunt, perducatur. confidenter autem peto salutem animæ et corporis, « quia mandata tua non sum oblitus. » In libris græcis varietas est propter vocabulorum similitudinem, ut notarunt SS. Patres Ambrosius et Augustinus : nam alii codices habent ζάννα, id est *quære*; alii ζέννα, id est *vivifica*; imo S. Hilarius legit solum *vivifica*; sed in hebreo nulla est varietas, neque litterarum similitudo, et habetur vocabulum, quod nihil significat, nisi *quære*. Non desunt ex recentioribus, qui hunc versiculum exponant de Davide errante in montibus, quando persecutiones Saulis et Absalonis fugiebat. Sed nimis humilis videtur sensus, et ab expositione veterum Patrum alienus.

PSALMI CXX-CXXXIV.

Psalmi hi quindecim (elegantiores omnes) *ascensionum* seu *graduum cantica* inscribuntur, de cuius appellationis significatione et ratione diversorum diversæ sunt conjecturæ, quarum quasdam tantum, easdemque probabiliores, attulisse sufficiet.

a) Prima quidem et antiquissima opinio est, hosce Psalmos ideo *graduum* dictos fuisse, quod tribus præcipuis Judæorum festis canerentur in ascensione quindecim graduum templi Salomonis. Tot enim fuisse gradus templi, non solum scribunt Nicolaus Lyranus et alii recentiores, sed etiam S. Augustinus tract. in *Psalm.*, veteresque Judei. Vid. Joseph. *De Bello Jud.* lib. VI, cap. xiv. Sed in ipso templo decantatos fuisse Psalmos cxxi. et cxxii. vix credas.

b) Alii, v. g. Vence, Ewaldus, *ascensionum cantica* interpretantur, hoc est, quæ decantata fuerunt a Judæis e Babylonico exsilio in patriam redeuntibus, afferantque loca *Esdr.* II, 1, 9; VII, 9; *Nehem.* VII, 67. Quod autem pluralis numerus, *ascensionum*, in illis titulis usurpatus sit, causam afferunt hanc, quod non una vice et tempore reversus est populus, sed variis: cf. *Esdr.* I, II cum VII, 6, 7, VIII. Illi tamen conjecturæ de horum carminum occasione et usu aliqua in his Psalmis refragari videntur, ut cum *Ps. cxxii*, 1, dicunt: *Eamus in domum Jovæ*, neque enim tunc reparatum erat *templum* a Chaldæis destrunctum.

c) Gesenius *graduum cantica* putat illa carmina appellata esse « propter numerum rhythmumque in pluribus conspicuum, qui in eo cernatur, quod gradatim quasi progrediatur oratio, siquidem vel postrema vel prima antecedens sententiæ verba ab initio subsequentis repeti soleant, » v. g. *Ps. cxxi* (juxta Vulg.) «: Vers. 1. Levavi oculos meos in montes, unde veniet auxilium mihi. Vers. 2. Auxilium meum a Domino, etc. Vers. 3... neque dormitet qui custodit te. Vers. 4. Ecce non dormitabit, etc. Item *Ps. cxxii*, 2, 3, 4; *cxxiii*, 3, 4; *cxxiv*, etc. Verum ista figura non in cunctis hisce 15 carminibus repetitur, contra observatur in aliis inscriptis aliter.

d) Magis nobis probatur Agellii, Maureri, Hengstenbergii et aliorum sententia, qui *carmen ascensionum* ideo dicta hæc carmina volunt, quod post reparatam urbem sanctam (cf. *Ps. cxxii*) ab Israelitis ad celebrandos dies festos Hierosolymam proficiscentibus (*ascendentibus*, ex usu loquendi Hebreorum) canerentur. Nihil est, quod laetitiae illi publicæ qualibet esse Israelitærum ad agendos festos dies proficiscentium, negant congruere querelas quæ in *Ps. cxx* aliisque horum Psalmorum fundantur. Neque omnium, dum peregrinatores sacri *Ps. cxx*, aliosque huic similes cantabant, præsentia (ut qui *scripserunt* istos Psalmos), sed præterita mala respiciebant eorumque recolabant memoria. « Contra favet illi sententiæ, ait Maurer, quod certe priui novem Psalmi ita dispositi videntur, ut tres carminum series efficiant, ternorum singulas carminum, quorum primum quodque optime conveniat in peregrina-

tionis initium, secundum in medium fere peregrinationem, tertium in peregrinationis finem. » Cæterum non cunctos hos Psalmos eadem, qua cantatos, occasione scriptos putamus. Nonnulli jam ante extiterunt, nec nisi accommodati fuerunt ad illos usus.

PSALMUS CXX

SECUNDUM HEBRÆOS.

V. v. — *Canticum graduum.*

1. Ad Dominum cum tribularer clamavi, et exaudiuit me.
2. Domine, libera animam meam a labiis iniquis, et a lingua dolosa.
3. Quid detur tibi, aut quid apponatur tibi ad linguam dolosam?
4. Sagittæ potenter acutæ, cum carbonibus desolatoriis.
5. Heu mihi, quia incolatus meus prolongatus est! habitavi cum habitantibus Cedar:
6. multum incola fuit anima mea.
7. Cum his qui oderunt pacem, eram pacificus; cum loquebar illis, impugnabant me gratis.

Argumentum. — Continet querelas populi, non amplius detenti in Chaldaea, sed reducti, de invidia et calunnias dolisque Samaritanorum atque populorum Judææ confinium, qui Judæis instaurationem cultus et reipublicæ invidebant, atque ædificationem urbis et templi ut impedirent omnem movebant lapideum. Strophæ duæ: vers. 4-4, Jova me defendet ab hostibus dolosis, insidiosis; vers. 5-7, qui sine intermissione turbant pacem meam.

1. *Canticum ascensionum.*

- Ad Jovam in angustiis quæ mihi sunt (meis) clamo, et exaudit me.
2. Jova, libera animam meam a labio mendaci, a lingua fraudulenta.
3. Quid dabit Jova tibi, et quid iterum dabit tibi, o lingua fraudulenta?
4. Dabit sagittas herois (alicujus) acutas cum carbonibus genistarum.
5. Væ mihi, quod commoror cum Moschis, habito apud tentoria Cedræorum!
6. Multum (jam satis) habitavit (peregrinavit) tibi anima mea cum osore pacis.
7. Ego sum pax (vir pacis), et cum loquor pacem, illi ad bellum.

NOTE.

Vers. 1. Alius, *exaudiuit*, ex captivitate reducendo. Vers. 2. *Libera* nunc etiam. Cf. *Esdr.* iv, 1, 2; *Neh.* iii, 19; iv, 1—5, 7 seqq. vi, xii, 28.—Vers. 4. Genistarum carbones maximum ardorem concipiunt, ac diu servant. — Vers. 5. « Cum Moschi inter Iberiam, Armeniam et Colchidem ædes habeant, Cedrae vero Arabiae sint populus, facile intelligitur, verba hæc non proprie capienda, sed omnino homines barbaros.

atque inhumanos intelligendos esse. » Maurer. Melius tamen, ut opinor, alii hæc nomina proprie accipiunt, coll. *Nehem.* ii, 19; iv, 1; vi, 4. Alexandrinus *meshech* ut appellativum nomen habuit, quod longum et diu protractum tempus significat. — Vers. 7. *Ad bellum*, puta prodeunt; alias: *ad bellum* vertunt meas cogitationes et meos sermones; Maurer, *pro bello* sunt, nil nisi bella et discordias spirant.

BELLARMINI EXPLANATIO.

PSALMUS CXIX.

TITULUS ET ARGUMENTUM.

Canticum graduum.

Psalmi quindecim, qui proxime sequuntur post Psalmum cxviii, omnes in titulo habent: *Canticum Graduum*; et quamvis gradus tam ad ascensum, quam ad descensum referri possit, tamen hoc loco non nisi ad ascensum pertinet: nam hebraica vox *ascensionem* significat; et similiter vox græca ἀναβοῶν. Igitur Psalmi isti quindecim cantica quedam ascensionum sunt, sive cantica eorum qui per gradus quosdam sursum ascendunt, et quidem Greci Theodoreetus et Euthymius, docent cantica ista intelligenda esse ad litteram de ascensione Judæorum de Babylone in Jerusalem, Spiritu Sancto per os David præcipientem calamitatem captivitatis Babylonicae et lætitiam liberationis. Alii malunt hos quindecim Psalmos compositos fuisse, ut canerentur in ascensione quindecim graduum templi Salomonis: tot enim fuisse gradus templi, non solum scribunt Nicolaus Lyranus et alii recentiores, sed etiam S. Augustinus tract. in *Psalmum* postremum: « Tot sunt, inquit, Psalmi qui appellantur *Graduum*, quoniam tot fuerunt etiam templi gradus. » Sed quidquid sit de his opinionibus, illud certum est, ascensiones istas sive de Babylone in Jerusalem, sive per gradus templi Salomonis, figuræ fuisse ascensionis electorum, qui per gradus virtutum, ac præcipue charitatis, ascendunt de valle lacrymarum ad celestem Jerusalem, et de hac ascensione Spiritum Sanctum potissimum esse locutum. Certe Psalmi sunt pleni affectibus in Deum, et proprii eorum qui se peregrinos atque exsules in terra inimicorum esse intelligunt; et nunc ærumnas exsiliī deflent, nunc ad requiem patriæ suspirant, semper autem se ad ascendendum, et in via Domini proficiendum accidunt.

EXPLICATIO PSALMI.

Vers. 1. 1. AD DOMINUM CUM TRIBULARER CLAMAVI, ET EXAUDIVIT ME.

Inter varias hujus exilii calamitates, una est maxime deploranda, videlicet lingua dolosa eorum cum quibus versari cogimus; ab hac se liberari petisse et impetrasse canit Propheta, ut exemplo suo instruat cæteros peregrinos. Ego, inquit, « cum tribularer, » non respexi ad auxilium hominum, sed « clamavi » in oratione ad Dominum, et ille pro sua pietate « exaudivit me. » Verba sunt clara, codicesque hebraici, græci et latini convenient.

Vers. 2. 2. DOMINE, LIBERA ANIMAM MEAM A LABIIS INIQUIS ET A LINGUA DOLOSA.

Declarat quid oraverit clamando: Dixi, inquit, « Domine, libera animam meam a labiis iniquis et a lingua dolosa, » quod est unum ex majoribus et frequentioribus malis hujus nostræ peregrinationis. « Labia iniqua » preferunt detractiones, convicia, calumnias, falsa testimonia, et similia verba contra legem justitiae; « lingua dolosa » profert verba deceptionis, adulatoria, simulatoria, fraudulentia; et possunt inveniri labia injusta sine lingua dolosa, ut cum quis aperte conviciatur, vel detrahitur; sed cum lingua dolosa adjungitur ad labia injusta, malum est gravissimum, adeo ut nihil fere addi possit, ut dicetur

in sequenti versiculo. Quod attinet ad verba, illud, *animam meam*, positum est pro *me*, quasi dicaret, *libera me*; sed nominatur *anima*, vel quia est pars nobilior, vel quia lingua dolosa parum docet, nisi vulneret animam, inducendo videlicet eam ad peccandum. Illud autem, *a labiis iniquis*, S. Hieronymus legit ex hebreo, *a labiis mendaciis*. Sed vox hebreæ utrumque significat, *mendacium* et *prævaricationem*: proinde recte verteunt etiam Septuaginta, *a labiis ἀδικῶν*, id est *iniquis*, et sententia est plenior et gravior, ut etiam in *Psalm. xlii*: « Ab homine iniquo et doloso eripe me. »

**3. QUID DETUR TIBI, AUT QUID APPONATUR TIBI Vers. 3.
AD LINGUAM DOLOSAM?**

Reddit rationem cur petierit liberari « a lingua dolosa, » quasi videlicet sit tale malum, ut nihil ei addi possit, quasi dicat: Quid enim mali dari aut addi posset supra linguam dolosam? sed difficultas est in verbis, tum quia in hebreo legitur active: *Quid dabit, aut quid apponet*; tum quia illud pronomen, *tibi*, videtur cogere ut hæc sententia non referatur ad Deum, et proinde non continuetur cum superioribus verbis. Quod attinet ad primam difficultatem, verba hebraica legi possunt etiam passive, si mutentur puncta, præsertim illud, יתְהַנֵּן, quod potest legi, *iutthan*; et legenda esse passive perspicuum est, quia non

solum Septuaginta verterunt passive, sed etiam S. Hieronymus reddit ex hebræo passive: *Quid dabitur tibi, aut quid opponetur tibi ad linguam dolosam?* Illud, *tibi*, potest esse otiosum, ex phrasim hebraica, ut in *Cant. I*: «Egredere tibi;» et cap. II: «Veni tibi, surge tibi, imber abiit sibi;» et in hoc ipso Psalmo: «Multum incola fuit anima mea sibi,» quod *sibi*, ut redundans, omiserunt Interpretes, et tunc tota sententia continuatur hoc modo: «Domine, libera animam meam a labiis iniquis et a lingua dolosa;» quid enim mali dari, aut apponi potest «ad linguam dolosam,» id est, super linguam dolosam? Quod si non placeat esse hoc loco otiosum illud, *sibi*, potest ita exponi, ut Prophetæ post orationem ad Deum vertat se, vel ad seipsum, vel ad incertam personam, dicens: «Domine, libera animam meam a labiis iniquis et a lingua dolosa;» quid enim, o anima mea, vel, o quicunque hic ades! tibi dari mali, aut addi potest «ad linguam dolosam?» id est, super malum lingue dolosæ.

Vers. 4. 4. SAGITÆ POTENTIS ACUTÆ CUM CARBONIBUS DESOLATORIIS.

Declarat elegantissima similitudine quale maius sit *lingua dolosa*: ac dicit esse verba ejus, quasi sagittas, quæ natura sua longe feriunt, et celeriter, ut vix caveri possint, et addit amplificationem admirabilem, dicens non esse qualescumque sagittas, sed «potentis,» id est, a robusta manu cum impetu emissas, et præterea ab artifice bene politas et acutas, et denique adeo ignitas, ut quidvis desolari et vastare possint, qualia sunt fulgura cœlestia, quæ ab omnipotenti manu mittuntur, et sunt vere ignita et acutissima. Igitur talia sunt verba dolosa, præsertim quando sunt instrumenta diaboli ad occidendas animas, quæ vocantur ab Apostolo ad Ephes. vi: «Tela nequissimi ignea.» S. Augustinus hos duos versiculos multo aliter exponit, nimurum vult esse dialogismum, ut primum homo in tribulatione positus oret: «Domine, libera animam meam a labiis iniquis et a lingua dolosa;» deinde Dominus respondeat: «Quid detur tibi, aut quid apponatur tibi ad linguam dolosam?» id est, quid remedium tibi dari poterit, aut apponi contra linguam dolosam? Hoc videlicet unicum tibi remedium erit: «Sagittæ potentis acutæ cum carbonibus desolatoriis,» id est, verba Dei cum exemplis charitatis igne succensis: «vivus enim est sermo Dei, et penetrabilior omni gladio ancipi,» cui si accedat exemplum ex vera charitate prodiens, quasi carbo ignitus, nihil ei resistere poterit. Utraque expositio ad ædificationem facit, sed prior videtur magis litteralis. Quod attinet ad verba, illud, *desolatoriis*, in hebræo est *בְּשָׁנָה*, quod S. Hieronymus recte vertit *juniperorum*. Sed Septuaginta explicaverunt metaphoram. Carbones enim juniperorum sunt valde solidi, et

ideo aptissimi ad incendendum et desolandum.

5. HEU MIHI! QUA INCOLATUS MEUS PROLONGA- Vers. 5.
TUS EST : HABITAVI CUM HABITANTIBUS CEDAR;
MULTUM INCOLA FUIT ANIMA MEA.

Ex occasione tam magni mali et tam frequentis in hac peregrinatione, suspirat ad patriam, et sic vere et ex corde cantat canticum ascensionis. «Heu mihi! inquit, quia incolatus meus,» vel, ut ex hebræo vertit S. Hieronymus, *peregrinatio mea prolongata est*. Cupit enim verus peregrinus cum Apostolo magis peregrinari a corpore, quam a Domino, et ideo nimis longam judicat præsentem vitam, in qua peregrinatur a Domino. «Habitavi cum habitantibus Cedar.» Non mirum videatur, si longam nimis queror esse hanc habitationem: «habitavi» enim hucusque «cum habitantibus Cedar,» id est, cum barbaris et efferatis gentibus, que non habitant in civitatibus, sed in territoriis, iisque nigris et rusticis, quales sunt Arabes. In hebræo et græco codice habetur: *Habitavi cum tabernaculis Cedar*; sed idem est sensus: quid enim est aliud *habitare cum tabernaculis*, quam *habitare cum habitantibus in tabernaculis*. Vox *Cedar* hebreice est *תֶּדֶר*, et *nigredinem tenebrasque* significat; unde *Cantic. cap. I*, opponuntur *tabernacula Cedar, pellibus Salomonis*, id est, tentoria nigra et rustica, tabernaculis pretiosis et splendidis. Vere autem civitates et palatia regum hujus mundi nihil sunt nisi tabernacula rusticorum, comparata ad mansiones cœlestis Jerusalem. Ideo rursum lamentatur peregrinus Dei, dicens: «Multum incola fuit anima mea,» id est, nimis longus fuit jam incolatus meus in terra aliena. In hebreo additur *sibi*; sed, ut supra diximus, ex phrasim hebraica otiose additur, et propterea ab Interpretibus sœpe omittitur; idem enim est *habitavit sibi* et *habitavit*. Hinc potest colligi paucos hodie reperiri, qui ex corde cantent canticum graduum, cum plerique omnes diligent adeo peregrinationem, et *tabernacula Cedar*, ut nihil tristius audiant quam sermonem *Nihil tristius homini- bus quam sermo de discessa ab hac vita.*

6. CUM HIS QUI ODERUNT PACEM ERAM PACIFI- Vers. 6.
CUS; CUM LOQUEBAR ILLIS, IMPUGNABANT ME GRATIS.

Concludit, rationem reddens, cur sit malum tamdiu peregrinari, et simul declarans metaphoram *tabernaculorum Cedar*; quod enim metaphorice et obscure dixit: «Habitavi cum habitantibus in tabernaculis Cedar,» clare exponit dicens: «Habitavi cum his qui oderunt pacem,» ego, qui nihil diligo magis quam pacem, id est, habitavi cum mihi dissimilibus, cum perversis, et adeo injustis, ut non solum cum hostibus, sed etiam cum amicis belligerare soleant; et si forte loqui de pace incipiebam ad illos, ipsi sine ulla causa magis me impugnabant. In textu hebreo est alia interpunctio, quam etiam sequitur S. Hie-

ronymus; sic ibi legitur: *Multum incola fuit anima mea cum his qui oderunt pacem. Ego pacem loquebar, et illi ad bellum.* Sed melior est interpunctio Septuaginta Interpretum, quae est etiam antiquior; nam in hebreo non est simpliciter: *Ego pacem loquebar;* sed hoc modo, si verbum verbo reddamus: *Ego pacem, et cum loquebar.* Ex quo intelligimus recte Septuaginta post pacem posuisse punctum, et quod diximus ex hebreo reddi, *ego pacem,* potest etiam reddi, *ego pax,* ut sit sensus: Cum his qui oderunt pacem, ego pax eram, id est, adeo pacificus eram, ut ipsa pax dici possem; et postea sequitur alius versiculus: *Et cum loquebar, illi ad bellum,* nimirum provocabant, quod in sententia convenit cum eo quod verterunt Septuaginta, et nos in nostra editione latina legimus: *Cum loquebar illis, impugnabant me.* Quod autem additur, *gratis,* positum est a Septuaginta explicationis gratia. Totus hic Psalmus hic convenit quidem omnibus electis, sed præcipue capitи electorum Christo, quatenus viator erat, secundum carnis passibilis conditio nem. Vere enim clamavit ipse ad Dominum Pa-

trem suum pernoctans in oratione Dei, et postea in horio, et demum in cruce, et verissime exauditus est, cum exaltaverit illum Deus, et dederit ei « nomen super omne nomen. » Vere quoque passus est *labia iniqua et linguas dolosas* usque ad mortem, ut ex toto decursu Evangeliorum patet. Verissime dicere potuit: « Incolatus meus pro longatus est, » cum in Evangelio dixerit: « Generatio adultera et incredula, quamdiu apud vos ero, quamdiu vos patiar? Vere habitavit cum habitantibus Cedar, » quia licet ipse lux esset, ac per hoc in Cedar, id est, in tenebris non habitaret, sed in lumine, tamen « cum habitantibus Cedar » visus est, et inter eos conversatus est. Denique vere « cum iis qui oderant pacem, » erat pacificus, quia « cum malediceretur, non maledicebat; cum patretur, non comminabatur; » et cum loqueretur illis de pace, de charitate, de regno Dei ipsi contra eum impugnabant sine ulla ratione vel causa, quod Joannes cap. xv, ipse idem notavit, cum ait: « Sed ut impleatur sermo, qui in lege eorum scriptus est, quia odio habuerunt me gratis. »

PSALMUS CXXI

SECUNDUM HEBRÆOS.

V. v. — *Canticum graduum.*

1. Levavi oculos meos in montes, unde veniet auxilium mihi.
2. Auxilium meum a Domino, qui fecit cœlum et terram.
3. Non det in commotionem pedem tuum : neque dormitet qui custodit te.
4. Ecce non dormitabit, neque dormiet, qui custodit Israel.
5. Dominus custodit te, Dominus protectio tua, super manum dexteram tuam.
6. Per diem sol non uret te, neque luna per noctem.
7. Dominus custodit te ab omni malo : custodiat animam tuam Dominus.
8. Dominus custodiat introitum tuum et exitum tuum, ex hoc nunc et usque in sæculum.

V. s. h. — *Canticum graduum.*

Levavi oculos meos in montes : unde veniet auxilium mihi.

Auxilium meum a Domino, factori cœli et terræ.

Non det in commotionem pedem tuum, nec dormitet qui custodit te.

Ecce non dormitabit, neque dormiet, qui custodit Israel.

Dominus custodit te : Dominus protectio tua, super manum dexteram tuam.

Per diem sol non percutiet te, neque luna per noctem.

Dominus custodiet te ab omni malo : custodiat animam tuam.

Dominus custodiat exitum tuum et introitum tuum : amodo et usque in æternum.

Argumentum. — Ab exsule quodam, fortasse totius populi cum ipso ex exilio redennit nomine, quem confecto jamjam itinere, Judææ montana, loca illa sancta, oculis denuo lustrari jam liceret, compositus Psalmus. In strophas quatuor divide, si lubet.

— 1. *Canticum ascensionum.*

Attollo oculos meos ad montes,
unde veniet auxilium mihi :

2. Auxilium meum veniet a Jova,
qui fecit cœlum et terram. —
3. Non sinet vacillari pedem tuum,
non dormitabit tutor (custos) tuus.
4. Ecce, non dormitat neque dormit
tutor Israelis. —
5. Jova est tutor tuus,
Jova umbra (tutela) tua,
Jova est ad manum dexteram tuam.
6. Interdiu sol non feriet (lædet) te,
et (nec) luna noctu.
7. Jova tuebitur (vel *tueatur*) te ab omni malo,
tuebitur animam tuam.
8. Jova tuebitur egressum tuum et introitum tuum,
ab hoc tempore et usque in sempiternum.

NOTE.

Vers. 4. *Ad montes*, illos puta quibus Hierosolymorum urbs cingebatur, et maxime Sionem, cui templo insidebat; alii, montes Palæstine, Tabor, Carmel, etc. Rosenmullerus : *ad montes*, i. e. sursum, in cœlum, auxilium petens. — Vers. 3. « Videtur sane, quum ad primam personam non redeatur, sed secunda servetur usque ad finem, scriptor ab hoc versu ipse se alloqui et confirmare. » Maurer. — Vers. 5. Propr. *tutores tui*, tutorum tuorum partes agit. Maurer, *umbra tua ad manum*, etc. *Manum* prolatu. — Vers. 6. *Luna noctu*, quod cum veteribus intelligendum est de frigore nocturno. Maurer hac locutione nonnisi hoc dici vult : neque interdiu, neque noctu tibi quidquam adversi accidet. — Vers. 8. *Egressum... introitum*, i. e. universam vitæ agendique rationem.

BELLARMINI EXPLANATIO.

PSALMUS CXX.

TITULUS ET ARGUMENTUM.

Canticum graduum.

Secundus Psalmus ex Gradualibus consolatur peregrinos ascendentibus in Jerusalem, promittens perpetuam Dei custodiā, ac primum loquitur Propheta in persona peregrini, deinde loquitur in persona propria, et consolatur peregrinum.

EXPLICATIO PSALMI.

Vers. 1. 1. LEVAVI OCULOS MEOS IN MONTES : UNDE VENIET AUXILIUM MIHI.

Peregrini nihil frequentius aspiciunt, quam locum ad quem tendunt, si is conspici possit; si minus, locum aliquem viciniorem: inde enim consolationem magnam percipiunt, quæ consolatione vires et auxilium præbet ad ambulandum; et quia terrena Jerusalem in montibus erat, et

cœlestis Jerusalem supra omnes cœlos est, ideo peregrinus, sive umbraticus, sive verus, dicit: « Levavi oculos meos in montes, » ubi sedet civitas sancta, « unde veniet mihi auxilium » consolationis. In Hebræo est verbum temporis futuri, *terabo*, sed saepè variantur tempora apud Hebræos; et præterea, quod ad sensum attinet, non multum refert, sive peregrinus dicat: Levavi jam oculos meos, sive levabo jam oculos meos. S. Augustinus

mystice more suo per montes intelligit SS. Apostolos; sicut enim oriente sole primi sunt montes qui lumen recipiunt, sic veniente Christo, justitiae sole, primi fuerunt Apostoli, qui lumen receperunt.

Vers. 2. 2. AUXILIUM MEUM A DOMINO, QUI FECIT CÆLUM ET TERRAM.

Declarat peregrinus se non exspectare auxilium a montibus, ad quos oculos levavit, sed ab eo qui præsidet sanctæ civitati in montibus positæ, quod clarus explicat initio *Psalm. cxxii*: « Ad te levavi oculos meos, qui habitat in cœlis; » describit autem verum Deum per opus creationis cœli et terræ, sicut in alio *Psalm. xciv*: « Dii gentium dæmonia, Dominus autem cœlos fecit. »

Vers. 3. 3. NON DET IN COMMOTIONEM PEDEM TUUM, NEQUE DORMITET QUI CUSTODIT TE.

Mutat Propheta personam, et loquitur in persona propria, et respondet peregrino, quasi dicat: Bene et sapienter levasti oculos tuos in montes, et non respexisti vanitates, quæ occurruunt in via; sed iis prætermisis a Conditore cœlestis patriæ auxilium et consolationem exspectasti; ideo ego opto, « ut Deus non det in commotionem pedem tuum, » id est, non sinat te labi et cadere in via; sed roboret pedes tuos, ut stabiles in cursu ad patriam perseverent. « Et non dormitet qui custodit te, » id est, opto etiam et rogo ut Pater, qui est custos tuus, semper vigilet in tua custodia, et nunquam sinat commoveri pedes tuos. Observa, primo, circa hunc versiculum, quod Deus metaphorice dicitur dormitare, quando permittit nos cadere, ac si non adverteret, quomodo qui dormitat, non advertit quid fiat. Secundo, phrasis hebraica est, *commoveri pedes*, sive *nudare*, pro eo quod est, *labi in peccatum*, ut *Psalm. xvii*: « Non sunt infirmata vestigia mea; » et *Psalm. lxxxii*: « Mei autem pene moti sunt pedes, pene effusi sunt gressus mei. » Tertio, in hebreo habetur in futuro, *non dabit ad movendum pedem tuum*, juxta quam lectionem esset prædictio et promissio. Sed tamen, ut diximus, tempus unum in hebreo saepè ponitur pro alio tempore, unde non solum Septuaginta, sed etiam S. Hieronymus vertit, *non det*. S. Augustinus legit: *Non des commoveri pedem meum*. Sed nescio quem codicem sectus sit; nostri enim hebraici, græci et latini habent tertiam personam, *non det*, vel *non dabit commoveri pedem tuum*.

In hebreo saepè ponitur pro alio.

Vers. 4. 4. ECCE NON DORMITABIT NEQUE DORMIET, QUI CUSTODIT ISRAEL.

Promittit Propheta peregrino imprecationem gratiæ, quæ petebatur, quasi dicat: Oro ut Pater non dormitet, qui te custodiendum suscepit, et sine dubio non dormitabit; nam nunquam dormitat, neque dormit, qui custodit populum suum peculiarem, qui per Israelem significatur, et in

quo populo omnes illi continentur, qui tanquam peregrini in hoc mundo versantur, et ad patriam cœlestem ascendere festinant. Quod dicitur, « non dormitabit, neque dormiet, » hunc habet sensum, non dormitabit subinde oculos claudendo et aperiendo: et multo minus se tradet profundo somno; itaque semper vigilabit, neque oculos ad momentum claudet. S. Augustinus pulchre dicit homines dormitare, quando carnem infirmitatis portant; dormire, quando moriuntur; et ideo non esse fidendum custodiae hominum; Dominus autem fidelissimo custodi tuto credere nos posse, cum ipse neque dormitet unquam in infirmitate, neque dormiat in morte. Monet etiam idem Augustinus, recte fideles homines per Israelem significari, quia Israël *Deum videns* interpretatur, et fideles Deum nunc per fidem vident, visuri postea etiam per speciem.

Vers. 5. 5. DOMINUS CUSTODIT TE, DOMINUS PROTECTIO TUA SUPER MANUM DEXTERAM TUAM.

Vers. 6. 6. PER DIEM SOL NON URET TE, NEQUE LUNA PER NOCTEM.

Dixit paulo ante Propheta peregrinum, in Deo confidentem, custodiendum esse, ne cadat in via; addit nunc aliam consolationem, custodiendum videlicet etiam esse, ne fatigetur ab æstu solis per diem, neque a lumine lunæ per noctem, quoniam Deus erit illi quasi umbraculum, quod manu dextera tenebit, eoque tum caput, tum etiam reliquum corpus tegere poterit. « Dominus, » inquit Propheta, non solum « custodit Israelem, » id est, populum suum universe, sed te quoque in particulari custodit; custodit autem, quia est protectio, sive *umbraculum*, ut propriæ sonat vox hebraica, « super manum dexteram tuam; » ex quo fiet, ut te tali umbraculo, ministerio dexteræ manus, tectum, neque sol uret per diem, neque luna per noctem. In textu græco est tempus futurum: *Dominus custodiet te*; sed in hebreo non est propriæ tempus præsens, neque futurum, sed participium: *Dominus custodiens te*, sive custos tuus; sensus autem idem est. Illud autem, *Dominus protectio tua super manum dexteram tuam*, posset continere metaphoram, ut alii volunt, hominis armati, et ad dexteram stantis, ut sensus sit: Dominus erit, vel est protectio tua, quia stat quasi miles armatus ad dexteram tuam. Sed quod nos diximus magis convenit litteræ, tum quia in hebreo pro voce *protectio*, est *tsel, umbra*, sive *umbraculum*; tum quia et in hebreo et in græco est, *super manum*, non *al manum*: unde videtur Propheta respexisse ad *umbraculum* quod super manum ponitur, et manu geritur; tum denique quia sequitur: Neque sol per diem uret te, neque luna per noctem; a calore autem, vel lumine solis et lunæ non defendit miles ad dexteram constitutus, sed *umbraculum* manu dextera super caput extensum. Porro metaphora *umbraculi*, et solis ac lunæ, diei et *Dei*

umbra- noctis, significat gratiam Dei, quæ peregrinum
culum. custodit tempore prosperitatis, et adversitatis; neque enim minus lœdere solet in hoc itinere dies prosperitatis quam nox adversitatis. S. Augustinus more suo mystice exponit dexteram et sinistram, ac dicit Deum protegere dexteram, non sinistram, quia sœpe permittit hominem lœdi in temporalibus, quæ significantur per sinistram, et non sinit lœdi in bonis spiritualibus, quæ significantur per dexteram.

Vers. 7. 7. DOMINUS CUSTODIT TE AB OMNI MALO, CUSTODIAT ANIMAM TUAM DOMINUS.

Addit Propheta aliam consolationem, eamque generalem, quasi dicat: Non solum te Dominus custodiet, ne cadas et ne fatigeris, sed ab omni alio malo, quod in itinere occurrere possit, te Dominus proteget atque custodiet, ex quo fiet ut anima tua, seu vita tua incolumis omnino toto in itinere conservetur. In hebreico græcoque textu habetur in tempore futuro: *Dominus custodiet te;* sed in sensu nulla differentia est; Dominus enim et custodit nunc, et custodiet postea, et hanc continuationem significare solet tempus futurum apud Hebreos.

Vers. 8. 8. DOMINUS CUSTODIAT INTROITUM TUUM, ET EXITUM TUUM, EX HOC NUNC ET USQUE IN SÆCULUM.

Concludit Propheta addendo ultimam et optatissimam consolationem, quasi dicat: Non solum

in aliqua parte itineris peregrinus Dei, qui ascensiones disposuit in corde suo, custodietur; sed in toto itinere semper custodietur; omne enim iter consistit in introeundo et exeundo, dum enim progredimur, intramus unam viam, et ea finita eximus; deinde intramus aliam, et postea eximus; sic etiam intramus unam provinciam, unam civitatem, unam domum, et deinde eximus, et intramus aliam, et eximus, donec finito itinere ad patriam pervenimus. Sic igitur in via viæ progredimur, dum inchoamus et perficimus opera bona: inchoare enim, intrare; perficere, exire est. Illud autem, *ex hoc nunc et usque in sæculum*, idem est, quod *nunc et semper*, quasi dicat: «Ex hoc nunc,» id est, ex hoc præsenti tempore, incipiat Dominus introitum et exitum tuum custodire, et usque in sæculum non desinat custodiare. S. Augustinus per *introitum et exitum* intelligit introitum in tentationem, et exitum ex tentatione. Alii generalius initium et finem omnium negotiorum, sive omnium actionum nostrarum, sive omnem humanam consuetudinem, juxta illud *Act. 1*: «Ex quo intravit, et exivit inter nos Dominus Jesus,» id est, ex quo nobiscum coepit conversari Dominus Jesus. Parum autem refert, quod in hebreo legatur in futuro, *custodiet*; nam significaciones temporum facile variantur. Unde ipse etiam S. Hieronymus verit ex hebreo, *custodiat*, ut nos in editione Vulgata legimus.

V. v. — *Canticum graduum.*

1. Lætatus sum in his quæ dicta sunt mihi: In domum Domini ibimus.

2. Stantes erant pedes nostri in atriis tuis, Jerusalem.

3. Jerusalem quæ ædificatur ut civitas, cuius participatio ejus in idipsum.

4. Illuc enim ascenderunt tribus, tribus Domini, testimonium Israel, ad confitendum nomini Domini.

5. Quia illic sederunt sedes in judicio, sedes super domum David.

6. Rogate quæ ad pacem sunt Jerusalem, et abundantia diligentibus te.

7. Fiat pax in virtute tua, et abundantia in turribus tuis.

8. Propter fratres meos et proximos meos loquebar pacem de te.

9. Propter domum Domini Dei nostri quæsivi bona tibi.

V. s. u. — *Canticum graduum David.*

Lætatus sum eo [al. *in eo*] quod dixerint mihi: In domum Domini ibimus.

Stantes erant pedes nostri in portis tuis, Jerusalem.

Jerusalem quæ ædificatur ut civitas, cuius participatio ejus simul.

Quia ibi ascenderunt tribus, tribus Domini, testimonium Israel, ad confitendum nomini Domini.

Quia ibi sederunt sedes in judicio, sedes domui [al. *domus*] David.

Rogate pacem Jerusalem: sit bene his qui diligunt te.

Sit pax in muris tuis, abundantia in dominibus tuis.

Propter fratres meos et amicos meos loquar pacem tibi.

Propter domum Domini Dei nostri quæsivi bona tibi.

Argumentum. — Studium maximum piorum hominam indicatur Hierosolymam aedendi, quæ urbs ab ædificiis, ab hominum frequentia, a religione, a tribunalibus laudatur, optanturque ei fausta et prospera omnia. Strophæ duæ : 1-5, 6-9. Davidis esse Psalmum titulus monet, sed contra ejus fidem facit, quod a) vers. 5 memorantur reges gentis Davidicæ, b) schin præfixum vers. 3 et 4, c) Alexandrinæ interpretationi nullum auctoris nomen est præscriptum. Ceterum ante exsilii Babylonici tempora compositus.

1. Canticum ascensionum, Davidis *carmen.*

Lætor quod dixerunt mihi :

« Domum Jovæ eamus. »

2. Stant jam pedes nostri
in portis tuis, Jerusalem.
3. Jerusalem, tu bene ædificata,
sicut urbs quæ (perpetuis ædibus) juncta sibi est invicem!
4. Illuc ascendunt tribus, tribus Jovæ,
prout lex Israeli datur,
ad celebrandum nomen Jovæ.
5. Nam ibi sedent (stant) throni (reges) ad judicium (judicandum),
throni domus Davidis.
6. Poscite pacem Hierosolymorum (fausta Hierosolymis appreçamini)!
prosperentur qui diligunt te!
7. Sit pax (salus) in antemurali tuo (mœnibus tuis),
securitas in palatiis (vel arcibus) tuis!
8. Propter fratres meos et socios (populares) meos
loquar jam *iterum* : « Pax in te! »
9. Propter domum Jovæ, Dei nostri,
rogabo (apprecabor) hoc : « Bonum omne tibi! »

NOTE.

Vers. 5. Si particulam *nam* expletive sumas, tertia hic erit laus Hierosolymitanæ urbis. Maurer, *nam ibi insident solitus*, etc. — Vers. 6. Alius intelligit *dicentes* : « Prosperentur.... arcibus tuis! » — Vers. 9. Maurer, *rogabo* (petam) *bonum tibi*, fausta omnia appreçabor tibi. Alii minus recte, *bene tibi facere studebo*.

BELLARMINI EXPLANATIO.

PSALMUS CXXI.

TITULUS ET ARGUMENTUM.

Canticum graduum.

Hic est tertius Psalmus Gradualis, in quo Prophetæ describit pulchritudinem et nobilitatem civitatis sanctæ Jerusalem, ad quam reverti cœpiabant Hebrei ex Babylonica captivitate. Sed ut civitas illa typus erat celestis patriæ, ita redeentes Hebrei ex captivitate ad terram Jerusalém figuræ erant peregrinationis et ascensionis nostræ ad eam, quæ sursum est, Jerusalem. Itaque totus Psalmus de utraque civitate et de peregrinis utrisque intelligi debet; sed primaria intentio Spiritus Sancti ad primarium finem sine dubitatione dirigitur.

EXPLICATIO PSALMI.

Vers. 1. **1. LETATUS SUM IN HIS QUAE DICTA SUNT MINI:** optimo nuntio accepto reversionis in patriam. Et quidem nuntius, qui significavit Hebreis revertendum iam esse in Jerusalém, Hieremias fuit, qui prædicterat post septuaginta annos solven-

Verba sunt populi Dei, qui lætari se dicit de

in domum Domini ibimus.

Nuntius dam esse captivitatem, et civitatem, ac templum reædificandum, *Hierem. xxv* et *xxix*; sed clarus id ipsum nuntiaverunt Daniel, Aggeus et Zacharias, qui vixerunt illo ipso tempore, quo soluta est captivitas. Isti igitur magno gaudio populum repleverunt, cum evolutis jam septuaginta annis dicebant: « In domum Domini ibimus, » id est, ad patriam revertemur, ubi montem Sion et locum domus Domini videre nobis dabitur, ibique templo reædificato, in domum Domini rursum ingrediemur. Sed nuntius sine comparatione ulla felicior Christus fuit, qui in Evangelio nobis loquitur et dicit: « Pœnitentiam agite; appropinquavit enim regnum cœlorum, » *Math. iv*; et clarius *Joan. cap. xiv*, 2 seq.: « In domo Patris mei mansiones multæ sunt. Si quominus dixisset vobis, quia vado parare vobis locum; et si abiero et paraverò vobis locum, iterum veniam et assumam vos ad me ipsum, ut ubi ego sum, et vos sitis. » Hic autem nuntius ineffabili lætitia replet eos qui didicerunt, quam bonum sit in domum Domini ire, et in ea domo non esse hospitem et advenam, sed civem Sanctorum et domesticum Dei. Id autem novit, qui attente cogitavit illud ejusdem Prophetæ: « Inebriabuntur ab ubertate domus tue, » *Psalm. xxxiv*; et rursus: « Replebitur in bonis domus tue, » *Psalm. lxiv*; et illud Apostoli ad *Ephes. i*: « Ut sciatis, quæ sit spes vocationis ejus, et quæ divitiae gloriæ hæreditatis ejus in sanctis. » Iste ex corde cupit in domum Domini ire, et ideo ex corde cantat: « Lætatus sum in his quæ dicta sunt mihi: In domum Domini ibimus. » Animalis autem homo non percipit quæ Dei sunt, et ideo propinquante morte, id est exilio et peregrinationis fine, non hilarescit, sed turbatur et gemit, et merito, quia sicut non disposuit ascensiones in corde suo, dum vivet, ita non sperat in domum Domini, quæ sursum est, ascendere; sed ad carcerem damnatorum in æternum puniendus descendere timet. Parum autem refert quod hebræus et græcus textus pro his quæ dicta sunt, habeant participium activum, videlicet in dicentibus mihi; vulgatus enim Interpres sensum expressit latina phrasi, ut facilius intelligeretur.

Vers. 2. 2. STANTES ERANT PEDES NOSTRI IN ATRIIS TUIS, JERUSALEM.

Explicat eur Hebræi lætentur de reditu in patriam, et rationem esse dicit, quoniam recordabantur ejus temporis, quo fuerant in patria ante captivitatem, et viderant pulchritudinem et magnitudinem Jerusalem; multi enim, qui pueri, vel adolescentes abducti fuerant in Babylonem, facile recordari poterant se fuisse antea in civitate Jerusalem, multis autem rediisse ex iis qui ante captivitatem fuerant in Jerusalem, et videbant civitatem et templum, scribit Esdras lib. I, cap. iii; dicens igitur: « Stantes erant pedes nos-

tri in atriis tuis Jerusalem, » id est, quia recordamur temporis, quo stantes erant pedes nostri in atriis tuis, id est, in portis tuis, ut expresse habetur in hebraico codice. Nominat autem Prophetæ portas, sive atria, et quasi vestibula civitatis, potius quam fora, vel plateas, quoniam eo tempore præcipui conventus et negotia fiebant in portis civitatum, ibique erat maxima hominum frequentia, ut colligitur ex illo *Prov. xxxi*: « Nobilis in portis vir ejus, quando sederit cum senatoribus terræ. » Constat etiam ex lib. II *Reg. cap. xviii*, fuisse in Jerusalem non simplices portas, sed duplices, et inter utrasque satis magnum spatium, quod hoc loco fortasse vocatur atrium. « David autem (inquit Scriptura) sedebat inter duas portas; » et *Hierem. cap. xxxix*: « Et ingressi sunt omnes principes regis Babylonis, et sedebunt in porta media; » certe magnum spatium debuit esse in illa porta media, ut tot principes cum administris suis capere posset. Sed quomodo nos christiani dicere poterimus: « Stantes erant pedes nostri in atriis tuis, Jerusalem, » qui in cœlestis patriæ atriis nunquam fuimus? Imo fuimus in atriis patriæ cœlestis; alioqui exules et peregrini non essemus; neque nos Christus de captivitate redemisset, nisi a patria extores et in terra aliena captivi fuissemus. Fuimus igitur in atriis cœlestis Jerusalem, quando in parente nostro Adamo paradisum terrestrem incoluimus, qui paradisus terrestris quasi vestibulum erat paridis cœlestis, et status ille innocentiae quasi atrium et porta erat status gloriæ; et fortasse hac de causa Spiritus Sanctus scribi non voluit: « Stantes erant pedes nostri in plateis Jerusalem, » sed in atriis vel portis, ut intelligeremus in hoc Psalmo præcipue sermonem fieri de cœlesti Jerusalem, non de terrena. Igitur lætati sumus ad vocem dicendum: « In domum Domini ibimus, » quia recordamur temporis illius, quo stantes erant pedes nostri in paradiso terrestri, ac per hoc in atriis paradi cœlestis; et ex bonis illis conjecturam facimus de bonis longe melioribus, quæ nobis in ipsa domo Domini conservantur, et quamvis paulo ante domus Domini nominata sit, nunc autem civitas Jerusalem nominetur, tamen unus Patria cœlestis cur variis dicitur nominibus?

Vers. 3. 3. JERUSALEM, QUE AEDIFICATUR UT CIVITAS,
CUJUS PARTICIPATIO EJUS IN IDIPSUM.

Hic jam incipit Propheta, sub nomine peregrinorum ad Jerusalem properantium, laudes ejusdem Jerusalem numerare, ut ex iis se magis ac magis ad ascendendum sine intermissione inflammet. Prima laus est, quod sit civitas pacatissima, ita ut ex charitate incolentium omnibus omnia sint communia. « Stantes, inquiunt, erant pedes nostri in atriis tuis, Jerusalem, » quæ Jerusalem ita aedificata est, et quotidie magis ac magis aedificatur, ut sit civitas, « cuius participatio est in idipsum, » id est, simul et communiter participatur ab omnibus. Ubi notandum est illud, *eius*, redundare ex phrasim hebraica; idem est enim, *cuius participatio*, et *cuius participatio ejus*. Adverte præterea interpunctionem in hebraico codice positam esse post vocem *aedificatur*, non post vocem *ut civitas*; proinde non est sensus: Jerusalem aedificatur ut civitas, quasi possit aliter aedificari quam ut civitas; sed aedificatur, ut civitas talis, cuius participatio simul est. Adverte postremo illud, *in idipsum*, quod a S. Augustino refertur ad æternitatem Dei, quæ semper est eadem, ad litteram nihil aliud significare, nisi simul, vel conjunctum, ut ex voce hebraica perspicuum est, ut etiam alibi diximus. Jam vero in sensu posteriore tota hæc sententia multo est clarior et sublimior, siquidem celestis Jerusalem vere aedificatur ut civitas, quia non est proprie civitas, neque sunt in ea lapides proprie dicti, sed aedificatur ut civitas, dum quotidie lapides vivi a summo artifice expoliti et conquadrauti adjunguntur celestis habitaculi aedificationi: ex quo sequitur, ut qui hæc intelligent, non modo persecutes aequo animo ferant, sed gaudeant et glorientur in tribulationibus, cum sciant eo modo se præparari ad cœlestem aedificationem. « Omne gaudium, » inquit unus ex his vivis lapidibus, *Jac. I.*, « existimate, fratres, cum in tentationes varias incideritis. » Deinde in cœlesti patria verissime est participatio in idipsum; nam in terrena Jerusalem non tam fuit, quam esse debuit participatio in idipsum, id faciente charitate, ut amicorum omnia sint communia, qualis participatio ad breve tempus fuit in Ecclesia, quæ erat Hierosolymis, « ubi nemo dicebat aliquid suum esse, sed erant illis omnia communia, » *Act. iv.* Et nunc etiam cernitur in familiis ordinum religiosorum, ubi regularia instituta in suo vigore persistunt. Sed in cœlesti Jerusalem summa est participatio in idipsum, cum sit Deus unus omnia in omnibus, id est, unus et idem Deus sit honor, et divitiae et deliciae omnibus habitantibus in domo Domini, et ea felicissima et summa ubertas sit vere semper idipsum, cum nullam patiatur diminutionem, vel alterationem.

Vers. 4. 4. ILLUC ENIM ASCENDERUNT TRIBUS, TRIBUS

DOMINI, TESTIMONIUM ISRAEL AD CONFITENDUM NOMINI DOMINI.

Hæc est secunda laus Jerusalem, frequentia videlicet incolarum, et conjungitur hic versiculus cum secundo. Reddit enim rationem hoc loco populus Dei cur dixerit: « Santes erant pedes nostri in atriis tuis, Hierusalem; » quævis non omnes fuissent cives Hierosolymitani, sed diversarum civitatum incole, tamen omnes ascenderant in Jerusalem ter per annos singulos. Dicitur igitur: « Stantes erant pedes nostri in atriis tuis, Jerusalem, quoniam illuc ascenderunt tribus, tribus Domini, » id est, multæ tribus, sive omnes tribus, et ideo maxima multitudo conveniebat in Jerusalem: hebraismus est enim, *tribus tribus*, pro *multa tribus*; ubi enim legimus *Gen. XIV*: « Vallis autem sylvestris habebat puteos multos bituminis, » in hebreo est, *puteos puteos bituminis*. Quod sequitur: « Testimonium Israel ad confitendum nomini Domini, » explicat cuius rei gratia tanta multitudo confluueret in Jerusalem; id enim siebat juxta testimonium, id est, legem datum Israeli, quæ præcipiebat ut non obliuiscerentur visitare templum Domini, quod unicum erat in tota terra promissionis, atque ibi confiterentur nomini Domini, confessionem laudis et gratiarum actionis. Sed in posteriore sensu, quem diximus esse a Spiritu Sancto magis intentum, redditur ratio cur dictum sit: « Jerusalem, quæ aedificatur ut civitas; » ideo enim aedificatur ut civitas, quia *illuc jam ascenderunt, et quotidie ascendunt tribus tribus Domini*, id est, animæ sanctæ ex omni tribu et natione, ut tanquam lapides vivi superaedificantur in domos spirituales, ut dicit S. Petrus in *I Epist. cap. II*. Ascenderunt autem animæ illæ Sanctorum in celestem Jerusalem ad confitendum nomini Domini, quoniam hoc est totum quod agitur in illa domo et civitate cessantibus omnibus negotiis aliis. « Beati, inquit idem Propheta *Psalm. LXXXIII*, qui habitant in domo tua, Domine, in sæculum sæculi laudabunt te; » et Tobias, *cap. XIII*, de cœlesti Hierosolyma loquens: « Per vicos, inquit, ejus alleluia cantabitur; » et hoc est testimonium, id est, præceptum datum Israeli, id est, animæ videnti Deum, ut nunquam cesseret a laude, quæ nunquam cessat ab amore. Quod autem testimonium idem sit, quod præceptum, ostendimus in explicatione *Psalmi XVIII*, et perspicuum est ex toto *Psalmo CXVIII*, ubi frequentissime accipitur testimonium pro lege, sive præcepto.

5. QUA ILLEG SEDERUNT SEDES IN JUDICIO, SEDES Vers. 3.
SUPER DOMUM DAVID.

Hæc est tertia laus Jerusalem, quod illic sit sedes regia et supremum tribunal, et potest continuari hic versiculus cum superiore propter illam particulam causalem, quia; videtur enim reddi ratio cur Deus voluerit in Jerusalem esse tem-

plum, ad quod ter in anno veniret omnis populus Israel, quia illa erat civitas regia, et quasi metropolis totius regni. Dicit igitur : « Quia illic, » id est in Jerusalem, « sederunt sedes in judicio, » id est, sedes regum sibi invicem succedentium, quorum proprium est judicare populum ; « sederunt, » id est, quieverunt immobiliter constituta et fixa, quod dicitur ad differentiam sedis Sauli primi regis, quae fuit in Gabaa Benjamin, sed ibi non quievit, cum paulo post translata fuerit; et similiter ad differentiam sedium Judicum, qui fuerunt ante reges, quae non sederunt alieni, sed frequenter transmutabantur de loco ad locum ; at sedes regum de familia David sederunt in Jerusalem immobiliter, et ideo subjungit : « Sedes super domum David, » id est, sedes regni, quae super familiam David fundata, quietem et stabilitatem invenerunt; sic enim dictum est Davidi a Deo, II Reg. vii : « Fidelis erit dominus tua et regnum tuum usque in aeternum, et thronus tuus erit firmus jugiter. » Igitur non dicuntur *sedes super dominum David*, quia regerent dominum David : regerant enim totam dominum Jacob, id est, omnes duodecim tribus Israel, non solum familiam David ; sed dicuntur *sedes fundatae super dominum David*, quia ex illa domo nascibantur reges populi Dei. In hebreo non habetur, *super dominum David*, sed *domini David*, id est, sedes datae domui David. Sed haec omnia longe melius in Christum et in coelestem Jerusalem convenient. Nam ne forte Iudei crederent verba Psalmi intelligenda esse principaliter de terrena Jerusalem, ac non potius de ea, ut coelestis Jerusalem figuram gerebat, permisit Deus ut non solum sedes regia de Jerusalem tolleretur, sed ipsa etiam Jerusalem everteretur. Promissio igitur illa ad Christum et ad Jerusalem, quae sursum est, pertinet, juxta valicinium *Isai. cap. ix.*, et *Daniel. cap. ix.*, et angeli ad Virginem, *Luc. i.* : « Dabit ei Dominus sedem David patris ejus, et regnabit in domo Jacob in aeternum, et regni ejus non erit finis. » Vere enim ac proprie in coelesti Hierusalem sederunt sedes in judicio, tum quia firmissime stabiliti sunt in celo thronus Christi, et throni eorum qui cum ipso regnant; tum quia ipsi sancti cum Christo regnantes et judicantes sunt sedes Dei; nam anima justi sedes est sapientiae, et istae sedes vere etiam sedent in judicio, juxta promissionem Domini *Matth. xix.* : « Vos qui secuti estis me, sedebitis super sedes duodecim judicantes duodecim tribus Israel. » Et sedes sunt super dominum David fundatae, quia omnis Sanctorum potestas regia et judicaria a Christo dependet, qui filius David in Evangelio dicitur, et accepit sedem David patris sui, et regnabit in domo Jacob in aeternum, et regni ejus non erit finis.

Sedes
cur di-
cantur
esse su-
per do-
mum
David?

Vers. 6. 6. ROGATE QUAE AD PACEM SUNT JERUSALEM, ET ABUNDANTIA DILIGENTIBUS TE.

Hortatur jam Propheta peregrinos de captivitate

revertentes, ut salutent saltem a longe civitatem Jerusalem, bene precantes ei pacem et abundantiam, quae sunt duo potissima bona, quae faciunt beatas civitates; nam pax, sine abundantia, est secura possessio misericordie; abundantia, sine pace, est dubia et incerta felicitas; sed quando abundantia cum pace jungitur, nihil deest ad statum felicissimae civitatis. Dicit igitur : « Rogate quae ad pacem sunt Jerusalem, » id est, precamini patrie vestrae a Deo veram et solidam pacem, et ut sit abundantia non solum ipsi civitati Jerusalem, sed omnibus diligentibus te, civitas sancta. In hebreo habetur simpliciter, *rogate pacem ipsi Jerusalem*; proinde illa verba, *que ad pacem sunt*, nihil sunt aliud, nisi periphrasis pacis.

7. FIAT PAX IN VIRTUTE TUA, ET ABUNDANTIA Vers. 7.
IN TURRIBUS TUIS.

Ponit Propheta ipsa verba, quae dicenda sunt ab iis qui, salutantes Jerusalem, precantur illi pacem et abundantiam, quasi dicat : Cum salutatis Jerusalem, dicite : « Fiat pax in virtute tua, et abundantia in turribus tuis. » Per *virtutem*, recte S. Hieronymus verit, *muros*; vox enim hebraica significat proprie *virtutem*, hoc est, robur et vires; sed accommodatorem ad omnia in quibus robur consistit, ut ad muros, in quibus consistit robur aedificii; item ad exercitum, in quo consistit robur armorum; item ad multitudinem populi, in qua consistit robur civitatis. Sed hoc loco accommodari debet ad muros, ut cohæreat cum sequentibus verbis, ubi turres nominantur. Itaque Septuaginta Interpretes, qui verterunt *virtutem*, expresserunt significationem verbi hebraici, ut sonat generatim; sed S. Hieronymus expressit significationem, ut hoc loco accommodanda erat. Dicitur autem, *fiat pax in virtute tua*, id est, in muris tuis fortissimis, quia quando pax est in muris, id est, quando muri non oppugnantur ab hostibus, tota civitas est in pace. Per turres autem de quibus dicitur, *et abundantia in turribus tuis*, significantur magna palatia, quae turrita esse solent; nam vox hebraica significat *palatia* potius quam *turres*, et S. Hieronymus verit, *in domibus tuis*. Porro vox *abundantia*, tum in hoc versiculo, tum in superiore, deducitur a voce hebraica, quae significat *pacem*; sed cum Septuaginta viri et S. Hieronymus verterint *abundantiam*, dubitare non debemus quin hoc vere significet; neque absurdum est a vocabulo *pacis* derivari vocabulum *abundantiae*, cum vere sit pax quasi mater abundantiae, ut bellum pater est caritatis et inopiae. Porro duo isti versiculi, quatenus pertinent ad coelestem Jerusalem, continent quidem salutationem et imprecationem pacis et abundantiae; sed non significant periculum esse, ne civitati illi supernae pax. *ter est abundantia, belum p-*

quam habemus de bonis cœlestis Jerusalem, quomodo etiam dicitur in *Apocal.* cap. vii : « Salus Deo nostro qui sedet super thronum et Agno. »

Vers. 8. 8. PROPTER FRATRES MEOS ET PROXIMOS MEOS,
LOQUEBAR PACEM DE TE.

Vers. 9. 9. PROPTER DOMUM DOMINI DEI NOSTRI, QUÆSIVI
BONA TIBI.

Claudit Psalmum Propheta, dum breviter explicat, ob amorem civium sanctæ civitatis, quos

fratres et amicos suos agnoscit, et multo magis ob amorem Dei conditoris, et habitatoris ejusdem civitatis, vel domus, se impulsu fuisse, ut precaretur eidem civitati pacem et abundantiam omnis boni. In hebræo codice verba illa, *loquebar* et *quæsivi*, futuri sunt temporis; sed qui periti sunt linguae hebraicæ, sciunt tempus futurum sèpissime ponî pro perfecto vel imperfecto; sèpè etiam significare continuationem actionis, quæ ita facta est, ut sit etiam futura.

PSALMUS CXXIII

SECUNDUM HEBRÆOS.

V. v. — *Canticum graduum.*

Ad te levavi oculos meos, qui habitas in cœlis.

2. Ecce sicut oculi servorum in manibus dominorum suorum;

Sicut oculi ancillæ in manibus dominæ suæ: ita oculi nostri ad Dominum Deum nostrum, donec misereatur nostri.

3. Miserere nostri, Domine, miserere nostri: quia multum repleti sumus despectione,

4. Quia multum repleta est anima nostra: opprobrium abundantibus, et despectio superbis.

V. s. h. — *Canticum graduum.*

Ad te levavi oculos meos, qui habitas in cœlis.

Ecce sicut oculi servorum ad manum dominorum suorum: sicut oculi ancillæ ad manum dominæ suæ, sic oculi nostri ad Dominum Deum nostrum, donec misereatur nostri.

Miserere nostri, Domine, miserere nostri: quia multum repleti sumus despectione.

Multum repleta est anima nostra opprobrio abundantium, et despectio superborum.

Argumentum. — Hunc Psalmum alii ad injurias referunt, quibus exsules affecti sunt a Babylonis, alii ad injurias, quæ Judæis in patriam restitutis illatae sunt a Samaritanis. Nos nostram facimus sententiam priorem, quum quæ vers. 3 et 4 habentur magis convenienter in Babylonios, Judæorum dominos, quam in Samaritanos una cum Judæis subjectos Persarum imperio. Strophæ duæ.

1. *Canticum ascensionum.*

Ad te attollo oculos meos,
qui sedes in cœlis.

2. Ecce, ut oculi servorum in manum domini ipsorum,
ut oculi ancillæ in manum heræ ipsius,
sic oculi nostri in Jovam, Deum nostrum,
dum misereatur nostri.

3. Miserere nostri, Jova, miserere nostri,
nam multum (jam satis) satiati sumus opprobrio,

4. Multum satiata est sibi anima nostra
hac irrisione insolentium, hoc opprobrio fastuosorum.

NOTÆ.

Vers. 2. Servi et servæ sollicito studio oculos defigunt in manibus dominorum dominarumque, ut ad omnes natus et motus illius sint parati. Similitudo hoc tantum spectat, quod oculi intenduntur, non vero in quem finem intenduntur. — Vers. 4. Alius, valde satiata est sibi anima nostra contemptu; fuimus in irrisionem abundantibus, in contemptum superbis. —

BELLARMINI EXPLANATIO.

PSALMUS CXXII.

TITULUS ET ARGUMENTUM.

Canticum graduum.

Orationem continet hic Psalmus hominis peregrinantis ad coelestem Jerusalēm, et in exilio vel itinere pressuram patientis.

EXPLICATIO PSALMI.

Vers. 1. **1. AD TE LEVAVI OCULOS MEOS, QUI HABITAS IN COELIS.**

Loquitur Propheta tum in persona peregrini, tum etiam in persona sua, qui unus erat ex veris peregrinis, ac dicit se in quibuscumque pressuris non respicere ad aliū adjutorem, nisi ad Deum; tum quoniam ipse solus habitat in summo cœlo, et inde omnia inferiora conspicit et moderatur; tum quia ipse est, qui per malos nos flagellat, ac propterea frustra confugimus ad alios, cum sit nemo qui de manu Dei nos possit eripere.

Vers. 2. **2. ECCE SICUT OCULI SERVORUM, IN MANIBUS DOMINORUM SUORUM.**

Vers. 3. **3. SICUT OCULI ANCILLÆ IN MANIBUS DOMINE SUÆ, ITA OCULI NOSTRI AD DOMINUM DEUM NOSTRUM, DONEC MISEREATUR NOSTRI.**

Explicat cur oculos ad Deum levaverit, ut videlicet respiciat Deum flagellantem, ut eo aspectu miserabili moveat ipsum ad misericordiam, et flagellare desinat. Id quod illustrat similitudine servorum, qui dum cœduntur a dominis, respiciunt mœsti ad manus cœdantium, ipso aspectu quasi petentes, ut miserti ipsorum cessent a plagis. Illud autem, *sicut oculi servorum in manibus dominorum suorum*, clariss. est in hebraeo, ubi habetur, *ad manus dominorum suorum*, et respondet applicatio: « Ita oculi nostri ad Dominum Deum nostrum. » Posita est autem similitudo, non servorum tantum, sed etiam ancillarum, vel quia non soli viri, sed etiam feminae peregrinantur ad patriam, et in peregrinatione flagellantur; vel quia viri fortes, proprie viri sunt; viri debiles et delicati feminae dici possunt; et utriusque tamen sua flagella in hoc itinere patientur. Ad flagella vero, quibus a Domino castigamur, non solum pertinent manifestae persecutions et calamitates, sed etiam tentationes occultæ, quibus anima vexatur assidue, item timores, angores, tristitia, quibus nemo caret in hac vita, et ideo non dicit Psalmus oculos nostros aliquo certo tempore levandos ad Deum, sed sine intermissione, « do-

nec misereatur nostri, » quod non fiet, nisi cum ad patriam pervenerimus; tunc enim « coronabit nos Deus in misericordia et miserationibus, cum sanaverit omnes languores nostros, et repleverit in bonis desiderium nostrum, » ut dicitur in Psalm. CL.

4. MISERERE NOSTRI, DOMINE, MISERERE NOSTRI, Vers. 4. QUA MULTUM REPLETI SUMUS DESPECTIONE.

Non contentus Propheta oculis ad Deum fixis misericordiam implorasse, voce etiam cordis et corporis clamat, et clamorem ingeminat pro se et pro sociis peregrinationis, dicens: « Miserere nostri, Domine, miserere nostri. » Et sane, qui recte adverteret, atque attente consideraret, quid sit quod sequitur: « Quia multum repleti sumus despectione, » plane intelligeret tantam esse nostram miseriari, ut cessare ab isto clamore non posset. Homo enim ad imaginem Dei creatus, et super omnia opera Domini constitutus, sœpe etiam ab ipso Deo in filium adoptatus, et ad regnum cœlorum prædestinatus, ita in hac peregrinatione, non solum a dæmonibus et prævis hominibus, sed etiam ab animalibus, etiam minimis, et ab ipsis elementis despiciatur, et assidue vexatur, ut Propheta verissime dixerit, quia non despiciuntur solum, sed etiam « repleti sumus despectione, » nec solum repleti sumus, sed multum repleti sumus. Quid enim est quod hominem, etiam justum et sanctum, in hac lacrymarum valle non despiciat? sed præcipua tamen despectio, de qua proprie loquitur hoc loco Propheta, est ea quam patientur boni a malis, et justi ab inquis. Verissima enim et universalis est illa Apostoli sententia: « Omnes qui volunt pie vivere in Christo Jesu, persecutions patientur, » I Tim. iii; et illa Domini: « Si de mundo fuisselis, mundus, quod sumus erat diligenter; sed quia de mundo non estis, propterea odit vos mundus, » Jona. xv. Et ratio est manifesta, quoniam bonum et malum contraria sunt, et contraria pacem inter se habere non possunt. Et quoniam justi patientes sunt et mites, et didicerunt a Domino non resistere malo, et percu-

Hominis
misera
qua
sit?

tienti maxillam præbere etiam alteram, ideo ab improbis superbe despiciuntur et conculcantur, vexantur et irridentur.

Vers. 5. **5. QUA MULTUM REPLETA EST ANIMA NOSTRA :**
OPPROBRIUM ABUNDANTIBUS, ET DESPECTIO SUPERBIS.

Docet hoc ultimo versiculo David contemptum ac despectionem, de qua supra loquebatur, accidere pauperibus et humilibus peregrinis ab hominibus copiosis et superbis. Quamvis enim aliqui auctores velint illud, *opprobrium abundantibus, et despectio superbis*, esse imprecationem, ut sensus sit : Opprobrium recidat super abundantes, et despectio super superbos, tamen, si respiciamus textum originalem, et velimus concordare versionem S. Hieronymi cum versione Septuaginta Interpretum, cogemur sequi S. Augustinum, et dicere sensum hunc esse : « Multum repleta est anima mea, » confusione vide licet, quia factus sum « opprobrium abundantibus, et despectio superbis. » Sanctus enim Hieronymus ex hebræo recte vertit, *multum repleta est anima opprotrio abundantium et despectione superborum*; cum qua versione rectissime cohæret, quod habent Septuaginta Interpretes et latina editio Vulgata, si subintelligatur verbum *factus sum*, et continuetur *opprobrium*, etc. Ait igitur Propheta : « Multum repleta est anima mea, » quod est idem cum eo quod supra dixit : « Multum repleti sumus despectione. » Sed hoc loco explicandi gratia nominat animam, quoniam despectionis sensus proprius ad animam intelligentem pertinet; quæ enim anima intelligentia carent, sentire possunt dolorem, sed non despectionem. Illud autem, *repleta est*, in hebræo legitur, *satiata est*, quæ vox mirum in modum auget significationem; si enim qui multum satiantur, id est, ultra satietatem replentur, etiamsi bonis

cibis repleantur, magnum dolorem percipiunt: quid sentient, qui nimium satiantur malis cibis, qualia sunt opprobria et despectiones? Quod vero sequitur : « Opprobrium abundantibus, et despectio superbis, » idem omnino significat : idem sunt enim opprobrium et despectio, et iidem etiam sunt abundantes et superbis. Omnes enim superbis inflati sunt, et proinde abundantes sunt; sed abundant vento, non solido bono, id est, abundant opinione et existimatione sui ipsorum; nam si divitias terrenas habeant, putant suas esse, neque cogitant Deo reddendam esse de eorum dispensatione rationem. Si in dignitate et honore constituti sint, arbitrantur sibi illa omnia deberi, et sua bona esse, et non intelligunt data esse ad aliorum utilitatem, et rationem gravissimam de ea dignitate reddendam, neque ad se aliud quam onus pertinere. Proinde non minus despiunt, si de tali onere inflentur, quam si bajulus gloriaretur, quod valde oneratus incederet. Si virtutes aliquas, si ingenium, si doctrinam habent, sibi persuadent multo majora esse quam sint, et sibi tribuunt que sunt Dei dona. Denique si carent divitiis, dignitatibus, honoribus, et contra si puniuntur et flagellantur, existimant sibi fieri injuriam, et de Deo murmurant et blasphemant; quod totum inde oritur, quia pleni sunt, vel potius inflati vento propriae existimationis. Sed veniet tempus quo opprobrium et despectio in ipsos revertentur, quando videlicet in die novissimo dicent, quod scriptum est in lib. *Sap. cap. iv* : « Hi sunt quos aliquando habuimus in derisum et in similitudinem improprieti. Nos insensati vitam illorum aestimabamus insaniam, et finem illorum sine honore. Ecce quomodo computati sunt inter filios Dei, et inter sanctos sors illorum est. » Et infra : « Quid nobis profuit superbia? aut divitarum jactantia quid contulit nobis? Transierunt illa omnia tanquam umbra. »

PSALMUS CXXIV

SECUNDUM HEBRÆOS.

V. v. — 1. *Canticum graduum.*

Nisi quia Dominus erat in nobis : dicat nunc Israel :

2. Nisi quia Dominus erat in nobis :
Cum exsurerent homines in nos,
3. Forte vivos deglutissent nos :
Cum irasperetur furor eorum in nos,
4. Forsitan aqua absorbuisset nos.
5. Torrentem pertransivit anima nostra : forsan pertransisset anima nostra aquam intolerabilem.

V. s. h. — *Canticum graduum David.*

Nisi Dominus fuissest in nobis : dicat nunc Israel :

- Nisi Dominus fuissest in nobis : cum exsurgent super nos homines,
Forsitan vivos absorbuissent nos : cum irascetur furor eorum super nos,
Forsitan aquæ circumdedisset nos : torrens transisset super animam nostram.
Forsitan transisset super animam nostram aquæ superbæ.

6. Benedictus Dominus, qui non dedit nos in captionem dentibus eorum.

7. Anima nostra sicut passer erepta est de laqueo venantium : laqueus contritus est, et nos liberati sumus.

8. Adjutorium nostrum in nomine Domini, qui fecit cœlum et terram.

Benedictus Dominus : qui non dedit nos in prædam dentibus eorum.

Anima nostra quasi avis erepta est de laqueo venantium :

Laqueus contritus est, et nos liberati sumus.

Auxilium nostrum in nomine Domini, qui fecit cœlum et terram.

Argumentum. — Populus, de exsilio revocatus a Jova, agnoscit divinitus se liberatum, et propterea gratias canit Deo liberatori. Strophæ duæ : vers. 1-5, nisi Jova ope sua nobis adfuisset, hostes nos perdidissent; 6-8, laudibus effteratur Jova, liberator noster. Quo tempore a Davide, si vera est inscriptio, conditum sit carmen, nemo nunc facile assequi poterit.

1. Canticum ascensionum, Davidis *carmen*.

Nisi Jova *fuisset*, qui adfuit nobis,
dicat Israel,

2. Nisi Jova *fuisset*, qui adfuit nobis,
quum surgerent contra nos homines,

3. Tunc vivos devorassent nos,
quum exardesceret ira eorum in nos;

4. Tunc aquæ (calamitatis) obruiisset nos,
torrens transivisset super animam nostram;

5. Tunc transivissent super animam nostram
aquæ æstuosæ (vel *tumentes*).

6. Benedictus sit Jova,
qui non dedit nos prædam dentibus eorum.

7. Anima nostra ut avis evasit ex laqueo aucupum:
laqueus dilaceratus (discissus) est, et nos evasimus.

8. Adjutorium nostrum *est* in nomine Jovæ,
qui fecit cœlum et terram.

BELLARMINI EXPLANATIO.

PSALMUS CXXIII.

TITULUS ET ARGUMENTUM.

Canticum gradum.

Hic Psalmus continet exultationem eorum qui de gravissimis tribulationibus liberati fuerant. Et quidem filii Israel, qui de captivitate Babylonica redierunt in Jerusalem, in itinere nullas graves persecutions passi fuisse leguntur : sed solam dum captivi detinerentur, et inter adificandam civitatem et templum, ut ex utroque libro Esdræ intelligi potest. Itaque Psalms hic quatenus ad carnales Israelitas pertinet, referendus est ad eas afflictiones quas passi sunt, vel dum essent in captivitate, vel dum templum et civitatem iterum ædificarent; quatenus autem ad spirituales Israelitas, id est, ad christianos ad coelestem Jerusalem ascendentibus pertinet, referendus est ad persecutions paganorum aliorumque impiorum, a quibus liberati sunt martyres sancti, et electi ceteri quotidie liberantur.

EXPLICATIO PSALMI.

Vers. 1. 1. *NISI QUIA DOMINUS ERAT IN NOBIS, DICAT NUNG ISRAEL, NISI QUIA DOMINUS ERAT IN NOBIS.*

Sermo imperfectus et interruptus, initio Psalmi,

signum est magnæ atque insolite exultationis, quæ loquentem non sinit perficere sententias inchoatas. Dicit igitur multitudo Sanctorum de magnis tentationibus liberatorum : « Nisi quia

Dominus erat in nobis, » id est, nisi Dominus omnipotens nobiscum fuisset, nunquam evadere potuissimus. Sed antequam compleat sententiam, præ latitia gestiens invitat Israelem, id est, totum populum Dei ad confessionem et laudem, dicens : « Dieat nunc Israel; » et iterum repetit : « Nisi quia Dominus erat in nobis. » Quod attinet ad verba, illud, *quia*, in hebreico textu habetur post verbum *Dominus*, hoc modo : *Nisi Dominus quia erat in nobis*. Sed Interpretes Septuaginta, ut sententia esset clarior, ordinem verborum immutasse videntur. S. Hieronymus eam particulam, ut redundantem et otiosam ex hebreica pharsi in sua versione omisit. Sic enim vertit : *Nisi Dominus fuisset in nobis*. Si quis tamen velit eam retinere, ita suppleri poterit : *Nisi Dominus, quia erat in nobis, nos liberasset*; vel secundum Septuaginta : *Nisi liberati essemus, quia Dominus erat in nobis*. Quid autem factum fuisset, nisi Dominus nos liberasset, explicatur in sequentibus.

Vers. 2. 2. CUM EXSURGERENT HOMINES IN NOS, FORTE VIVOS DEGLUTISSENT NOS.

Vers. 3. 3. CUM IRASCRETUR FUROR EORUM IN NOS, FORSITAN AQUA ABSORBUISSET NOS.

Ecce quid accidisset nobis, nisi Dominus fuisset in nobis, neque juvisset potentissima sua virtute. « Cum exsurgerent homines in nos, forte vivos degluttissent nos, » id est, cum nostri persecutores exsurgerent adversus nos, periculum fuit ne tanta velocitate nos perderent, quanta solet mare, vel flumen vivos deglutire eos, qui in illud forte *Homines* præcipitantur. Tria sunt hoc loco consideranda : *cur di- cantur piorum persecutores*. Primum, vocantur *homines* persecutores piorum, quia ducuntur sola ratione humana, qualis remansit in natura per peccatum corrupta; ratio enim humana, post naturæ corruptionem, nihil altum sapit, nihil divinum, nihil spirituale, neque alium finem propositum habet, nisi conservationem et augmentum propriæ temporalis felicitatis. De his dicit Apostolus I Cor. iii : « Cum sit inter vos zelus et contentio, nonne carnales estis, et secundum hominem ambulatis? » et paulo infra : « Nonne homines estis? » ubi pro eodem Apostolus accipit, *carnalem esse*, et *hominem esse*; secundum *carnem ambulare*, et secundum *hominem ambulare*. Deinde difficultas non exigua est de particula, *forte*, quæ etiam bis repetitur paulo infra. Videtur enim hæc particula non bene posita in editione Vulgata, cum potius affirmaliva, ut *certe, utique, sane*, poni debuisse. Nam si legamus *forsitan*, sequetur non necessarium esse auxilium Dei in magnis temptationibus superandis, quandoquidem Propheta non audet certo affirmare, sed sub dubio relinquit an gravissima tentatio nos dejectura sit, si Deus non sit in nobis. Sed quanquam non desint ex recentioribus, quibus ista particula non placeat, et verbum tum hebraicum, tum græcum, non velint reddi per

forte aut *forsitan*, sed per *utique* aut *certe* : nos tamen non audemus ullo modo a lectione Vulgatae editionis recedere : nam S. Hieronymus vir doctissimus, et utriusque linguae peritissimus fuit; et major ei fides, quam ulla dicti dictionariis habenda est. Is autem ex hebræo constanter vertit *forsitan*; et in expositione Psalmorum, in qua editionem Septuaginta interpretatur, similiter legit *forsitan*; denique in emendatione Psalterii *ad Suniam et Fretellam*, nihil in hoc loco emendat. Sanctus quoque Hilarius, Origenem secutus, S. Joannes Chrysostomus, S. Augustinus magno consensu *forsitan* legerunt; neque in Bibliis hoc loco ulla est varietas lectionis. Neque timendum est ut particula ista detrahere nos cogat aliquid de gratia Dei: non enim illud, *forsitan*, significat potuisse nos forte resistere inimicis in nos irruentibus sine auxilio gratie protegentis; sed potuisse fieri ut non vivi deglutiemur, quia *forsitan* inimici non eo usque deservissent. Sed quoniam periculum erat etiam ut usque ad internecionem crudelissimam deservirent, ideo dicitur : « Nisi Dominus fuisset in nobis, *forsitan* vivos degluttissent nos. » Postremo diximus illud, *vivos degluttissent nos*, sumptum esse a similitudine maris vel fluminis deglutionis, sive absorbentis eos qui cadunt in aquas, tum quia nullæ sunt fere bestiæ, quamvis crudelissimæ, quæ vivos deglutiant homines, sed lacerant ac diserpunt, ut notum est; tum etiam quoniam hoc requirit versiculos sequens, qui, de more Psalmorum, id ipsum aliis verbis repetit; sic enim habet : « Cum irascetur furor eorum in nos, *forsitan* aqua absorbusset nos. » Sensus enim est, *forsitan* ut aqua absorbusset nos, id est, furor hostium nostrorum instar aquæ profundissimæ repente absorbusset nos. Neque in hoc solo versiculo, sed etiam in sequentibus persistit Propheta in similitudine aquarum, ut mox videbimus.

4. TORRENTEM PERTRANSIVIT ANIMA NOSTRA, Vers. 4.
FORSITAN PERTRANSISSET ANIMA NOSTRA AQUAM INTOLERABILEM.

Persistit in eadem similitudine, comparans adversariorum persecutiones torrenti rapido et profundo, qui sine potentissimo auxilio pertransiri non potest. Et si quis cogitet quales fuerint persecutiones paganorum et hæreticorum in sanctos martyres, et tentationes dæmonum adversus sanctos eremitas aliosque Christi confessores, videbit simillimas fuisse torrenti violentissimo, quoniam licet sancti martyres et sancti confessores gloriosi evaserint, tamen plurimi, ac fere sine numero, quasi vi torrentis abrepti et absorpti perierunt, ut cognosci potest ex Cypriano in serm. *De Lapsis*, et Eusebio Cæsariensi in lib. VIII *Hist. cap. I*, ex versione Ruffini. Dicit igitur Propheta in persona Sanctorum : « Torrentem pertransivit anima nostra, » id est, persecutionem, quasi torrentem pertransivit anima nostra; caro enim succubuit,

*et cessit persecutorum furor, sed anima gloriose pertransiit; sed « nisi Dominus fuisset in nobis, forsitan pertransisset anima nostra aquam intolerabilem, » id est, intrasset torrentem nimis profundum, unde evadere non potuisset. Itaque illud, *pertransisset*, non significat, *transivisset*, vel *evasisset*, sed *intrasset*, et *pertransire carpisset*, sive *pertransire coacta fuisset*. Illud autem, *intolerabilem*, recte verterunt Septuaginta, ἀντοπατῶν, id est, *sine substantia*, *sine hypostasi*, *sine fundamento*, *sine fundo*, ubi pedes figi possent, quo verbo significatur profunditas aquarum, quae transmitti non potest. Sed occurrit hoc loco contrarietas aperta inter codicem hebraicum et versionem Septuaginta Interpretum. Codex enim hebraicus diserte habet, *torrentem pertransivit super animam nostram*; et editio Septuaginta habet, *torrentem pertransivit anima nostra*; et paulo post hebraicus textus habet, *forsitan pertransissent super animam nostram aquæ intolerabiles*; editio autem Septuaginta habet, *forsitan pertransisset anima nostra aquam intolerabilem*. Et quidem S. Hieronymus, in expositione hujus loci, non tacet meliorum esse lectionem hebraicam. Sed existimamus posse conciliari has lectiones duobus modis. Primum enim fieri potest ut Septuaginta Interpretes non habuerint in suo textu particulam ἡγ, quae significat *super*; remota autem illa particula, quae determinat vocabulum *anime* ad easum accusandi, remanet ambiguum, utrum vocabulum *anime*, sicut etiam vocabula *torrentis* et *aquarum*, sint casus nominandi, aut accusandi. Proinde utramque lectionem patiuntur verba hebraica, illam videlicet S. Hieronymi: *Torrentem pertransivit animam nostram*; et illam Septuaginta: *Torrentem pertransivit anima nostra*; et quoniam Septuaginta Interpretes meliores codices habuisse credibile est, quam S. Hieronymus habuerit, et fidelissime transtulerunt, quod invenerunt, sequitur ut lectio Septuaginta, quae est etiam nostræ Vulgatae editionis, retinenda, et hebraicæ, quae nunc exstat, anteponenda sit. Deinde potest etiam fieri ut Septuaginta legerint quidem, ut legit S. Hieronymus, sed maluerint sensum potius transferre, quam verba. Nam cum aliquis pertransit profundum torrentem, simul fit ut et ipse transeat torrentem, et torrens pertranseat super eum. Sed clarior sententia esse videtur, si dicatur homo pertransire torrentem, quam si dicatur torrens super eum transire. Potest enim torrens transire super hominem, etiam immobilem, et jacentem in profundo, sed non potest homo transire per torrentem, quin torrens transeat super eum. Ut ergo significant Septuaginta torrentem transire super hominem non jacentem, sed ambularem, vel natantem, maluerunt dicere hominem transisse per torrentem, quam torrentem per hominem.*

5. BENEDICTUS DOMINUS, QUI NON DEDIT NOS IN

Vers. 5. CAPTIONEM DENTIBUS EORUM.

6. ANIMA NOSTRA SIGUT PASSER EREPTA EST DE Vers. 6.
LAQUEO VENANTUM: LAQUEUS CONTRITUS EST, ET
NOS LIBERATI SUMUS.

Agreditur Propheta aliam similitudinem, ex qua magis adhuc illustretur et intelligatur magnitudo beneficij divini. Comparat igitur persecutionem, sive tentationem laqueo aucupis, ac dicit gratias esse Deo agendas, Deumque benedendum, quod non dederit nos in captionem dentibus adversariorum, id est, non permiserit capi et occidi, ac devorari. Quomodo autem id fecerit explicat, dicens: « Anima nostra sicut passer erepta est de laqueo venantium, » id est, anima nostra incidit quidem in persecutionem et temptationem, sicut passer, aut quæcumque alia avis (nomen enim hebraicum **לְבָבָשׁ** generalim aves significat), in laqueum venatoris, sive aucupis; sed tamen liberata est ab illa temptatione et persecutione, antequam caperetur a tentatore, et occideretur; quomodo aliquando avis capitur quidem laqueo, sed eripitur inde, antequam ab aucupe capiatur manibus, et occidatur, et manducetur. Id autem factum est, quia « laqueus contritus est, et nos liberati sumus, » id est, quia temptationi per gratiam Dei finis impositus est, antequam anima fidem negaret, vel alio modo in peccatum consentiret, quomodo aliquando laqueus, qui avem comprehenderat, frangitur, et avis avolat, et spem aucupis in prædam inhiantis frustratur.

7. ADJUTORIUM NOSTRUM IN NOMINE DOMINI, Vers. 7.
QUI FACIT CÆLUM ET TERRAM.

Concludit cum laude Dei, humiliter agnoscens victoram tantam, et liberationem de tam periculosis temptationibus, non viribus suis tribuendam, sed adjutorio cœlesti Dei omnipotentis: cuius omnipotentiae manifestum est argumentum, quod fecerit cœlum et terram. Modus autem, quo Deus solet de magnis temptationibus eripere servos suos, insinuatur dum dicitur: « Laqueus contritus est, » laqueus enim frangi solet, quando avis, vel exterrita aliquo clamore, vel allœta meliore esca, vim facit, et sic laqueum frangit. Quando enim avis, quamvis laqueo irretita, inhæret esce ab aucupe propositæ, nec intelligit se comprehensam, non conatur aufugere, et eo modo facile capitur et occiditur. Sic igitur anima hominis in temptatione posita, cum primum a Deo illustrata, et vel clamore judicii divini et gehennæ exterrita, vel promissionibus cœlestis gloriæ allœta, incipit cogitare dura quidem esse tormenta præsentia, sed duriora sine comparatione ulla tormenta futura et sempiterna; vel dulcem esse vitam præsentem, dulcem voluptatem, dulces divitias, sed dulciora sine comparatione præmia vita futuræ: incenditur amore bonorum supernorum, et metu suppliciorum gehennæ, atque eo igne divinitus accenso vires concipit, et ma-

Lectio Septuaginta anteponenda lecturei S. Hieronymi.
Septuaginta Interpretis lectionem, ut etiam fieri potest, ut Septuaginta legerint quidem, ut legit S. Hieronymus, sed maluerint sensum potius transferre, quam verba. Nam cum aliquis pertransit profundum torrentem, simul fit ut et ipse transeat torrentem, et torrens pertranseat super eum. Sed clarior sententia esse videtur, si dicatur homo pertransire torrentem, quam si dicatur torrens super eum transire. Potest enim torrens transire super hominem, etiam immobilem, et jacentem in profundo, sed non potest homo transire per torrentem, quin torrens transeat super eum. Ut ergo significant Septuaginta torrentem transire super hominem non jacentem, sed ambularem, vel natantem, maluerunt dicere hominem transisse per torrentem, quam torrentem per hominem.

gno impetu firmissimæ deliberationis non peccandi in Deum, laqueum temptationis frangit, et liberata volat, et cum jubilatione canit : « Adiutorium nostrum in nomine Domini, qui fecit cœ-

lum et terram. » De hoc modo evadendi scribit S. Cyprianus in lib. *De Exhortatione martyrii*, cap. ult. Has cogitationes quæ persecutio potest vincere? quæ tormenta superare?

PSALMUS CXXV

SECUNDUM HEBRÆOS.

V. v. — 1. *Canticum graduum.*

Qui confidunt in Domino, sicut mons Sion; non commovebitur in æternum, qui habitat

2. in Jerusalem.

Montes in circuitu ejus, et Dominus in circuitu populi sui, ex hoc nunc et usque in sæculum.

3. Quia non relinquit Dominus virgam peccatorum super sortem justorum, ut non extendant justi ad iniquitatem manus suas.

4. Benefac, Domine, bonis et rectis corde.

5. Declinantes autem in obligationes adducet Dominus cum operantibus iniquitatem : pax super Israel.

Argumentum. — Hanc improbabilis Tilingii conjectura est, hunc Psalmum scriptum esse, postquam Samaritani magnam Judæorum multitudinem ad sese pellebant, imprimis proceros quosdam: cf. *Nehem.* vi, 12, 13; xiii. Hoc igitur præsenti carmine vatem spectasse, ut magis confirmaret eos, qui neque minis hostium, neque blanditis aut corruptionibus seduci se passi fuerint ad prodendum, impia defectione ad Samaritanos, communem populi Judæi causam. Strophæ duæ: 1-3, 4-5.

1. *Canticum ascensionum.*

Qui confidunt in Jova, sunt instar montis Sionis, qui non nutat, in æternum sedet (stat).

2. Hierosolyma — montes circa eam sunt, et (ita) Jova circum populum suum est, ab hoc tempore et usque in æternum.

3. Neque enim residebit sceptrum (dominatio) improbitatis in sorte justorum, ne extendant justi ad pravitatem manus suas.

4. Bene fac, Jova, bonis, et rectis in cordibus ipsorum.

5. Et qui deflectunt in vias curvas suas, eos mittat (Maurer, perdat) Deus cum maleficiis. Pax (vel salus) super Israelem!

V. s. n. — *Canticum graduum.*

Qui confidunt in Domino, quasi mons Sion, immobilis, in æternum habitabilis.

Jerusalem, montes in circuitu ejus, et Dominus in circuitu populi sui : amodo et usque in æternum.

Quia non requiescat [al. requiescit] virga impietatis super sortem justorum, ut non mittant justi in iniquitatem manus suas.

Benefac, Domine, bonis et rectis corde.

Qui autem declinant ad pravitates suas, deducet eos Dominus cum his, qui operantur iniquitatem : pax super Israel.

BELLARMINI EXPLANATIO.

PSALMUS CXXIV.

TITULUS ET ARGUMENTUM.

Canticum graduum.

In hoc Psalmo consilium bonum dat sanctus Propheta peregrinis ascendentibus in patriam, tum terrenam, tum cœlestem. Consilium autem est, ut in Deo totam spem suam ponant. Deus enim potentissimus et fidelissimus est, neque unquam confundet sperantes in se, atque ad se toto desiderio properantes.

EXPLICATIO PSALMI.

Vers. 1. **1. QUI CONFIDENT IN DOMINO, SICUT MONS SION;**
NON COMMOVEBITUR IN ÆTERNUM, QUI HABITAT IN
JERUSALEM.

Ponit initio Propheta generalem atque certissimam promissionem, eamque bis repetit ad maiorem veritatis asseverationem. Dicit igitur : « Qui confident in Domino, sicut mons Sion, » id est, omnes qui vere confident in Domino, erunt immobiles et securi, quæcumque tandem ingruat tempestas, sicut est ipse mons Sion, qui non solum immobilis est, quia mons est, sed etiam quia Deo sacer et charissimus est. Addit repetens, et quasi explicans quod dixerat, : « Non commovebitur in æternum, » qui habitat in Jerusalem; ubi quod dicitur, « non commovebitur in æternum, » respondet illis verbis : Erit immobilis sicut mons Sion. Quod sequitur, « qui habitat in Jerusalem, » respondet illis, « qui confident in Domino. » Illi enim qui habitant cogitatione et spe in cœlesti Jerusalem, ipsi sunt qui confident in Domino. Sic enim explicatur fiducia in Deum in *Psalm. xc* : « Qui habitat in adjutorio Altissimi, in protectione Dei cœli commorabitur. » Quod attinet ad verba, in hebræo codice habetur alia interpunction, et proinde alia ordinatio verborum. Sed quia interpunctio non erat in antiquis codicibus, sed a Rabbinis addita est, ideo non tanti facienda est, ut propter eam contemnamus interpunctionem Septuaginta Seniorum et latine nostræ Vulgatae editionis. Præterea illud, qui *habitat in Jerusalem*, ambiguum est in hebræo, utrum ad montem Sion, an potius ad hominem confidentem in Deo referendum sit; sed Interpretes Septuaginta declaraverunt referri ad hominem, non ad montem: nam *mons* græce est generis neutri; et illud, *qui*, tam græce, quam latine, est generis masculini. Adde quod *mons* non tam proprie dicitur habere in civitate, quam homo. Quia vero non omnibus, qui habitant in terrena Jerusalem, convenit *non commoveri in æternum*, cum ipsa Jerusalem stare non potuerit in æternum; et quia *habere in Jerusalem*, hoc loco idem est, quod *confidere in Domino*, ideo diximus cum S. Augustino

hic agi de habitatore cœlestis Jerusalem per spem et desiderium, quomodo habitabant, qui dicebant : « Conversatio nostra in cœlis est, » *Philip.* cap. III.

2. MONTES IN CIRCUITU EJUS, ET DOMINUS IN
CIRCUITU POPULI SUI, EX HOC NUNC ET USQUE IN
SÆCULUM.

Probat quod dixit, montem Sion securum et stabilem esse, sed multo magis eos qui confident in Domino, siquidem Sion montes habet « in circuitu, » quasi pro muro; sed qui « confident in Domino, » ipsum Dominum omnipotentem habet in circuitu; et montes, qui Sion montem circumdant, complanari possunt et cadere; sed Dominus in circuitu est populi « ex hoc nunc et usque in sæculum. » Sententia igitur horum duorum versiculorum est, omnes qui confident in Domino, securos esse debere, quia Dominus protegit eos ab omni malo; et quamvis interdum temporaliter affligantur, id etiam cooperatur illis in bonum; et si forte permittit Deus illis auferri divitias, vel sanitatem, vel aliquid ejusmodi, reponit aliquid melius, id est, patientiam et consolationem cum merito gloriae sempiternæ. Sed hoc loco per confidentiam non debet intelligi vana præsumptio, sed fiducia illa, quæ ex fide non ficta, ex corde puro, ex conscientia bona, ex dilectione ferventi nasci solet.

3. QUA NON RELINQUET DOMINUS VIRGAM PECCATORUM SUPER SORTEM JUSTORUM, UT NON EXTENDANT JUSTI AD INIQUITATEM MANUS SUAS.

Explicat paulo clarius qua ratione Dominus proteget confidentes in adjutorio ipsius. Quod si, inquit, permittit Dominus aliquando justis de causis, iniquos dominari pii, non diu hoc permittet, ne pii desperantes incipiunt etiam ipsi facere opera impiorum; sic igitur ait : « Quia non relinquet Dominus virginem peccatorum super sortem justorum, » id est, dabit quidem aliquando Dominus impiis virginem, id est sceptrum, quod est insigne potestatis, « super sortem, » id est, super hæreditatem, sive partem et portionem « jus,

torum; » sed non u relinquet virgam in manu impiorum. In hebræo est ad verbum: Non *re-quiescat virga peccatoris super sortem justorum*, quæ verba eundem habent sensum; sed metaphora *quietis* eleganter explicat brevitatem temporis, quo peccatores permittuntur regnare super justos: quamvis enim tempus quò regnant impii super justos, longum videri possit iis qui non cogitant æternitatem, tamen iis qui certi sunt ex divina promissione regnum Sanctorum cum Christo sine fine duraturum, momentaneum videtur omne quod finem habet. Ait igitur: « Non *re-quiescat virga peccatoris super sortem justorum*, » id est, erit quidem potestas peccatoris aliquando super justos ad eorum probationem, vel exercitationem, vel correctionem; sed erit quasi slans, non sedens; transitura, non manens; temporalis, non æterna. « Ut non extendant justi ad iniquitatem manus suas, » hoc est, ne justi non perseverent in justitia, si videant felicitatem iniquorum tam esse diuturnam, ut credi possit nullum finem habitura.

Ver. 4. 4. BENEFAC, DOMINE, BONIS ET RECTIS CORDE.

Quia dixerat periculum esse ne justi scandalum paterentur ex nimis diuturna potestate iniquorum, convertit se ad Deum, atque precatur ut benefaciat bonis, liberando videlicet eos velociter a potestate impiorum, aut certe patientiam illis et consolationem internam copiose suppeditando; et simul admonet ac docet illos vere esse bonos, qui sunt « recti corde, » id est, qui non scandalizantur de judiciis Dei, sed in bonam partem accipiunt omnia quæ Deus facit, etiamsi permittat impios dominari quantumvis diuturno tempore. Illi enim sunt recti corde, qui conformant consuum, id est, judicium et voluntatem, cum rectissima regula judicij et voluntatis Dei, etiamsi non intelligent cur Deus hoc aut illud faciat, vel fieri permittat; de his scribitur in alio Psalmo: « Quam bonus Israel Deus, his qui recto sunt corde! » Iste enim acquiescent in omnibus Deo, et placet illis Deus, et illi placent Deo, quomodo lignum rectum in pavimento recto optime collocatur et quiescit; lignum autem distortum non potest collocari, nec quiescere, nisi in loco distorto.

**5. DECLINANTES AUTEM IN OBLIGATIONES, AD- Ver. 5.
DUCET DOMINUS CUM OPERANTIBUS INIQUITATEM:
PAX SUPER ISRAEL.**

Occasione ultimi verbi versiculi superioris, quo bona optabantur rectis corde, subjungit Prophetæ terribilem comminationem iis qui declinant a rectitudine cordis, ac dicit eos, qui declinant a rectitudine ad tortuositatem, et in persecutione vel tribulatione perdunt sustinentiam, ac vel per fidem negant, vel de Deo queruntur ac murmurant, eos « cum operantibus iniquitatem, » id est, cum ipsis persecutoribus atque impiis hominibus, in judicium adducendos, quoniam, ut ait S. Jacobus cap. ii: « Qui totam legem servaverit, offendat autem in uno, factus est omnium reus; » et tum demum separatis omnibus malis de medio bonorum, pax vera et sempiterna erit « super Israël, » id est, super populum Dei. Hoc loco magna est quæstio de verbo illo *obligationes*, et quidem alii alia dicunt: sed ego, ut permitto unumquemque abundare in sensu suo, ita si debeat hic versiculos cohærere cum superiore, et si conciliandi sunt codices latini cum græcis et hebraicis, nihil dubito quin latius Interpres scriperit *obligationes*, non tam respiciens ad rem quæ ligatur et stringitur per obligationem, quam ad ipsam obliquitatem et tortuositatem, quæ cernitur in fune, dum aliquid ligatur; neque enim obligari potest aliquid, nisi funis, alioqui directus, torqueatur, et in circulos ducatur. Id ita esse, primo, colligitur ex voce hebraica, quæ proprie obliquitatem significat, et a S. Hieronymo redditur *pravitatem*; deinde ex voce græca, quam Euthymius explicat per obliquitatem et perversitatem. Denique ex ratione continuationis: nam si per *obligationes* intelligamus *obligationes* ad aliquid faciendum, ut sunt vota, juramenta, promissa, pacta, et similia, vix percipi poterit quod sibi hoc loco Prophetæ velit; si vero per *obligationes* intelligentur nodi et tortuositates quæ opponuntur rectitudini cordis, de qua proxime fuerat locutus, omnia optime cohærebunt. Interpres igitur Vulgatus obscure quidem, sed vere et proprie locutus est.

Obligationes,
quid?

PSALMUS CXXVI

SECUNDUM HEBRÆOS.

V. v. — 1. Canticum graduum.

In convertendo Dominus captivitatem Sion, facti sumus sicut consolati.

2. Tunc repletum est gudio os nostrum, et lingua nostra exultatione.

Tunc dicent inter gentes: Magnificavit Dominus facere cum eis.

V. s. n. — 1. Canticum graduum.

Cum converteret Dominus captivitatem Sion, facti sumus quasi somniantes.

Tunc implebitur risu os nostrum, et lingua nostra laude.

Tunc dicent in gentibus: Magnificavit Dominus facere cum istis.

3. Magnificavit Dominus facere nobiscum :
facti sumus lætantes.

4. Converte, Domine, captivitatem nostram,
sicut torrens in austro.

5. Qui seminant in lacrymis, in exultatione
metent.

6. Euntes ibant et flebant, mittentes semina
sua :

Venientes autem venient cum exultatione,
portantes manipulos suos.

Magnificavit Dominus facere nobiscum; facti
sumus sicut lætantes.

Converte, Domine, captivitatem nostram,
sicut rivos in austro.

Qui seminant in lacrymis, in exultatione
metent.

Qui ambulans ibat et flebat, portans ad se-
minaandum sementem, veniens veniet in ex-
ultatione, portans manipulos suos.

Argumentum. — « Compositum est carmen, quum pars populi exilio Babylonicō rediisset. Strophæ duæ: vers. 1-3, quanta fuit lætitia nostra, quinque exilio nos Jova reduceret ! 4-6, revoca, Jova, cæteros quoque omnes, ut flebile tempus fortuna sequatur melior. » Maurer. Alius tamen eam Hengstenberg censet, in secunda strophe (vers. 4) non cæterorum captivorum redditum peti, sed liberationis perfectionem, nempe ut Judæi in patriam reversi a Samaritanorum persecutione liberarentur.

1. Canticum ascensionum.

Quum se (suum favorem) vertit Jova ad captivitatem (captivos) Sionis,
fuimus ut somniantes.

2. Tunc plenum fuit risu os nostrum,
et lingua nostra clamore læto;
tunc dixerunt inter gentes :
« Præclare egit Jova cum istis. »

3. Præclare Jova egerat nobiscum,
eramus læti.

4. Verte te, Jova, ad captivitatem (calamitatem) nostram,
ita sis nobis, ut torrens in austro (regionibus æstu solis exsiccatis).

5. Qui serunt cum lacrymis (inter lacrymas),
cum læto clamore metent (alius metant).

6. Vadit (propr. vadendo), vadit et flet (propr. flendo),
qui portat tractum (gall. la poignée, vel le jet) seminis;
venit, venit (alius, veniat, veniat) cum læto clamore,
qui portat manipulos suos.

NOTE.

Vers. 1. Maurer, quum reduceret Jova captivos, etc.; Ewaldus, quum Jova convertit, puta in meliorem statum; Hengstenberg, quando Dominus se vertit ad reversionem, etc. — Vers. 3. Maurer, egit, sumus. — Vers. 4. Alius: Opes copiosas largire nobis, ut copiosæ sunt aquæ torrentium australium. Ewaldus, converte, Jova, nostras calamitates, quasi torrentes in terras siccatas inducens. Maurer, reduc, Jova, captivos (cæteros) nostros, ut torrentes in austro, i. e. quemadmodum qui in terris calidis per æstatem exsiccati erant torrentes pluvio anni tempore aquis se replent terraque aridam iterum irrigant, sic fac, o Jova, ut desolata hæc terra suis iterum repleatur incolis, a suis iterum excolatur colonis. — Vers. 5. Proverbialis sententia, qua significatur, tristibus lata solere succedere. Similitudo deprompta est a seminantibus, quibus, dum terræ semina committunt, adversa quæque occursant, quæ lacrymas sepe cieut pauperculo agricolæ, qui incertum messis proventum reputat; quas ipsas tamen molestias lætissima messis excipit atque compensat.

BELLARMINI EXPLANATIO.

PSALMUS CXXV.

TITULUS ET ARGUMENTUM.

Canticum Graduum.

Psalmus hic apertissime loquitur de reversione a captivitate et ascensione ad patriam, et convenit proprie in tempus illud, quo decretum Cyri de solvenda captivitate Judæorum primum promulgatum est: quod quidem figura fuit Evangelii, quo nobis annuntiata est remissio peccatorum, et ascensio ad cœlestem Jerusalem.

EXPLICATIO PSALMI.

Vers. 1. 1. IN CONVERTENDO DOMINUS CAPTIVITATEM SION, FACTI SUMUS SICUT CONSOLATI.

Latinus Interpres voluit ad verbum reddere verba græca, et ideo minus latine locutus videtur. S. Hieronymus sententiam, non verba secutus, ita reddidit: *Cum converteret Dominus captivitatem Sion, facti sumus sicut somniantes.* Vere enim vox hebraica *somniantes* significat, et sensus est: Cum primum auditum est a nobis decretum relaxationis et reversionis in patriam, præ gaudio vix credere potuimus quod dicebatur, et nobis non videre et audire, sed somniare videbamur. Simile quid accidit patriarchæ Jacob, Gen. XLV, qui cum audisset filium suum Joseph vivere, quem jamdudum mortuum luxerat, quasi de gravi somno evigilans non credebat. Sanctus etiam Petrus, Act. XII, de carcere præter spem mirabiliter liberatus, existimabat se visum videre. Porro Septuaginta Interpretæ verterunt, *consolati*, quia ex nimia consolatione fiebat ut sibi Judei somniare viderentur. Sed perspicua erit lectio, si utrumque jungamus hoc modo: *Cum converteret Dominus captivitatem Sion, facti sumus ex nimia consolatione et letitia quasi somniantes nos liberatos; vel, si placeat, hic esse potest sensus: Facti sumus sicut consolati, id est, facti sumus ut sunt ii, qui consolationem post magnam tribulationem accipiunt, id est, hilares et jucundi ex tristibus et moerentibus.* Hanc ineffabilem consolationem vere experiuntur, qui serio convertuntur ad Deum, et contempta spe sæculi, atque omnium rerum terrenarum cupiditate deposita, dirigunt pedes suos in viam pacis. Intelligunt enim quam ineffabile bonum sit, erui de captivitate diaboli, et de profundo gehennæ, et ad veram libertatem atque aeternam pacem in cœlesti patria possidendam, Deo voante et ducente, preparari.

Vers. 2. 2. TUNC REPLETUM EST GAUDIO OS NOSTRUM, ET LINGUA NOSTRA EXULTATIONE.

Ex consolatione interna prodiit letitia externa, quæ in hilaritate vultus et in voce exultationis

agnoscitur. « Tunc, » inquit, id est, ubi auditus est bonus nuntius liberationis, « repletum est gaudio os nostrum, » id est, facies nostra hilaris et jucunda apparuit, et lingua nostra prorupit in verba laetiæ et jubilationis. In hebræo pro gaudio habetur *risus*; sed in idem recidit sententia: *risus enim laetiæ signum est.* Si quis autem velit per *os* non intelligere faciem, sed quod propriè dicitur *os*, sensus erit: Repletum est os nostrum laetiæ vocibus et laudibus, et idem significabitur per verba sequentia, « et lingua nostra exultatione, » quæ repetitio est in Psalmis frequentissima.

**3. TUNC DICENT INTER GENTES : MAGNIFICAVIT Vers. 3.
DOMINUS FACERE CUM EIS.**

Nuntius bonus hujus liberationis, sicut eos qui liberati sunt, affecti ingenti laetiâ; ita etiam alios, qui hoc audierunt, magna admiratione replevit, et ideo dixerunt: « Magnificavit Dominus facere cum eis, » id est, magnifice gessit se Dominus cum populo suo. Quamvis enim Cyrus fuerit, qui populum Hebræorum ex tam longa captivitate liberavit, tamen omnes facile intelligebant id factum esse divino instinctu; nam liberatio facta est ipso tempore, quo Deus per Hieremiam predixerat esse faciendam, id est, post annos septuaginta; et Cyrus ipse, lib. I Esdræ, cap. I, agnoscit imperium orbis terræ a Deo coeli sibi tributum, et ab eodem Deo jussum se templum in Hierusalem ædificare, populumque dimittere; et denique nunquam sperandum erat ut rex ullus sponte sua, et sine ullo pretio tot millia captivorum dimitteret, nec solum dimitteret, sed etiam magnis donis oneratos dimitteret. Itaque merito gentes omnes tam magnum beneficium divinæ Providentiae tribuebant. Sed cur Propheta utitur hoc loco tempore futuro, cum paulo ante usus sit tempore præterito? dixit enim: « Tunc repletum est gaudio os nostrum, » unde consequens erat ut diceret: « Tunc dixerunt inter gentes; » cur igitur ait: « Tunc dicent inter gentes? » Hebreus codex utrumque verbum ponit in tempore futuro, quod tamen, secundum con-

suetudinem linguæ hebraicæ, utrumque veri potest in tempus præteritum. Sed codex græcus, quem secutus est Interpres latinus, primum posuit in præterito, secundum in futuro. Fortasse igitur hic est hebraismus, et accipiendum est tempus futurum pro præterito. Fortasse etiam illud, *tunc*, hoc loco non significat tempus liberationis jam præteritum, sed tempus divulgationis hujus rei ad gentes etiam longe positas, quod erat futurum, ut sensus sit: Cum perveniet fama hujus rei ad gentes longe positas, tunc dicent inter se gentes: » Magna fecit Deus cum populo Iudeorum. » Neque minus haec admiratio gentium locum habet, cum homines, qui de hoc mundo sunt, vident aliquos qui de mundo erant, mundo terga vertere, et ad patriam cœlestem per viam veræ virtutis et Christi imitationis ascendere. Mundus enim non dilit quidem eos, qui de mundo non sunt, sed miratur tamen, et Deum in illis et cum illis esse negare non potest.

**Ver. 4. 4. MAGNIFICAVIT DOMINUS FACERE NOBISCUM,
FACTI SUMUS LÆTANTES.**

Approbant liberati quod gentes dicunt, quia vera dicunt, ac si ita subjungerent: Vere Dominus magnifice se nobiscum gessit, et præter meritum et spem nostram egit nobiscum, cum de tam miserabili captivitate nos ad dulcissimam patriam revocavit; et ideo facti sumus lœtantes, qui sub jugo captivitatis gemebamus mœrentes.

**Ver. 5. 5. CONVERTE, DOMINE, CAPTIVITATEM NOSTRAM,
SICUT TORRENS IN AUSTRO.**

Quoniam non statim omnes captivi reversi sunt, sed primum aliqui cum Esdra, deinde alii cum Nehemia, ideo qui primi redierant, precantur Deum pro plena atque integra reversione captivorum. Utuntur vero similitudine torrentis, qui flante austro plenisime et velocissime fluere solet. Dicunt igitur: » Converte, Domine, captivitatem nostram, » id est, fac ut revertantur captivi nostri, qui adhuc remanent in terra aliena, plane omnes, et quam citissime, ut sit plena et velox redditio, qualis esse solet earum rerum, quas torrens secum abripit et devoavit, quando flante austro tum pluvias de celo cadentibus, tum nivibus liquefactis et de montibus fluentibus impletur. Sed multo magis spiritualibus peregrinis haec precatio necessaria est: quamvis enim jam aliqui ad patriam pervenerint, tamen multi adhuc peregrinantur: plurimi etiam amare cœperunt captivitatem, et affxi rebus temporalibus, de patria nihil cogitant; ideo necesse est ut Deus, instar torrentis, austro flante violenter eos compellat, et quasi cogat ascendere. Denique tum isti, tum illi, adhuc ex parte captivi tenentur; omnes enim expectant, ut liberetur omnis creatura a servitute corruptionis, et ipsi etiam in celo beati expectant redemptionem corporis

sui. Pro hac igitur perfecta libertate filiorum Dei, de qua loquitur Apostolus ad Rom. viii, recte precamur: » Converte, Domine, captivitatem nostram, sicut torrens in austro. » Quod attinet ad verba, in hebraico et græco codice habetur, *torrentes*, sive *rivos aquarum*, in numero multitudinis, et casu accusandi; sed probabile est in græcis antiquis et magis correctis fuisse χαυκές, id est *torrens*, non χαυκών, id est *torrentes*. Nam S. Hieronymus, in *Commentario* ubi exponit editionem Septuaginta, legit *torrens*, et S. Augustinus similiter legit *torrens*. Verbum autem hebraicum potest intelligi tam in casu nominandi quam accusandi: sed in sensu nulla difficultas est. Nam idem est sensus, sive dicamus:

» Converte captivitatem nostram, » ut torrens

convertit et trahit omnia secum; sive: » Converte captivitatem nostram, » ut torrentem pro-

trudis et impellis, quando austro flante imple-

tur aquis. Major quæstio est de nomine *Austri*, De nomi-

siquidem recentiores quidam accurati et docti ne Aus-

contendunt, nomine *Austri* non debere intelligi tri.

ventum, sed regionem australem desertam et aridam, qualia sunt deserta Arabiæ; ac sensum

hujus loci esse volunt: » Converte captivitatem

nostram, » sicut torrentes fluunt in locis aridis

et desertis: sic enim lœtificabit nos reversio cap-

tivorum, quomodo lœtificantur loca arida fluentibus aquis. Sed nobis veneranda est Patrum

auctoritas: nam Septuaginta Interpretes sine

dubio per *Austum* intellexerunt *ventum*: id enim

proprie significat *vēto*, qua voce hoc loco usi

sunt; deinde S. Hieronymus, S. Augustinus,

Theodoreetus, Euthymius, et alii veteres tum

græci, tum latini agnoscunt hoc loco similitudi-

nem venti australis liquefacientis nives, et con-

gregantis nubes, atque eo modo torrentes im-

plentis. Ratio etiam connexionis, et nomen *tor-*

rentis, huic expositioni favere videtur. Utitur

enim Propheta nomine *torrentium*, ut significet

plenitudinem reversionis captivorum; per loca

vero deserta et arida rivuli quidam fluere solent,

non autem torrentes pleni et magni, quos in-

gentes pluviae vel nives de montibus fluentes

faciunt. At, inquit, vox hebraica non significat

ventum, sed *australem plagam*, vel loca arida et

deserta. Respondeo, quod sœpe respondi, non

debere restringi significationes vocum hebraica-

rum ad hebraica dictionaria: major enim fides

habenda est Septuaginta Interpretibus et S. Hie-

ronymo, quam omnibus dictionariis; et quemadmodum vox græca *vēto* significat proprie

ventum australem, et inde transfertur aliquando

ad significandam regionem, unde ventus ille

negheb, quam ipsi volunt significare *plagam aus-*

tralem, transferatur etiam ad significandum ven-

turem australem, et hoc loco ita accipiendam esse

hanc vocem veterum auctoritas satis nobis per-

suadet,

Spiritu-
libus pe-
regrinis
precatio
necessa-
ria.

Major fides ha-
benda est
LXX in-
terpre-
tibus,
quam di-
ctiona-
riis.

Vers. 6. 6. QUI SEMINANT IN LACRYMIS, IN EXULTATIONE METENT.

Posteaquam rogavit Propheta Deum, ut reducat ad patriam omnes captivos, exhortatur ipsos captivos, ut libenter suscipient laborem ambulandi et ascendendi, neque retineantur amore earum rerum, quas in terra aliena possidebant, quoniam in patria sua multo plura et meliora invenient. Utitur autem similitudine aptissima seminantis et metentis. Seminans enim ordinarie in lacrymis seminat, id est, cum dolore et gemitu, quia cogitur triticum suum projicere in terram, neque scit an unquam illud recuperabit, ac proinde videtur laborare et fatigari, ut opes suas amittat: sed quando messis venit, cum magno gaudio metit, quia videt triticum suum, quod videbatur dum seminaretur, amissum, non solum non periisse, sed eum maximo feno redditum sibi fuisse. Sed haec exhortatio apud spirituales peregrinos praecepue locum habet. Qui enim captivitatem diligunt, et amore mundi capti, de coelesti patria nihil cogitant, nisi existimant justorum iter ad celum, nihil esse aliud nisi jacturam et detrimentum. Qui enim vere peregrini sunt, et ad patriam coelestem ascendunt, opes suas pauperibus largiuntur, qui nunquam restituent, sine pretio vel praemio laborant, ut fratres suos doceant, ut Apostolus faciebat, sponte seipsi voluntatibus privant: quae stultitia esse videtur iis qui nesciunt quid ista pariant. Sed hoc nihil est aliud, nisi seminare in lacrymis, ut postea tempore suo cum exultatione metent: quod si ii, qui captivitatem adhuc amant, attente considerarent, certe ipsi etiam mutato consilio, ascendere inciperent, et sua omnia, licet cum sensu aliquo doloris, interim seminarent, ut paulo post in coelesti patria cum exultatione meterent.

Vers. 7. 7. EUNTES IBANT ET FLEBANT, MITTENTES SEMINA SUA.

Vers. 8. 8. VENIENTES AUTEM VENIENT CUM EXULTATIONE, PORTANTES MANIPULOS SUOS.

Describit paulo fusius et clarius morem seminantis et metentis. « Euntes, inquit, ibant, » id est, rustici ex domo sua exeentes ibant ad agrum, « et flebant mittentes semina sua, » id est, cum dolore spargebant triticum suum in terram, vindentes se privari interim opibus suis non sine dolore quaesitis. Sed postea « venientes » ex agro tempore messis, « venient » domum « cum exul-

tatione portantes manipulos suos, » id est, referentes pro paucis granis integros manipulos spicarum. Neque curavit Propheta similitudinem applicare, quia facile erat unicuique id per se facere. Utitur hac eadem similitudine Apostolus II Cor. ix: « Qui parce seminat, parce et metet. » Et quoniam similitudo admirabilis est, non erit Semen-inutile considerare quibus in rebus semen cum tis cum eleemosyna comparetur, ut magis animentur qui ascensiones in corde suo disponunt ad opes suas comparatio. libentissime cum pauperibus communicandas. Primum igitur granum, quod seminatur, res est exigua, et tamen producit tantam granorum multitudinem, ut incredibile videatur: sic etiam eleemosyna res est in se vilis, cum sit actio humana et temporaria, et per organum corporis corruptibilis facta, et tamen producit non multas pecunias, aut panes, aut vestes, sed regnum sempiternum: quomodo si granum tritici seminatum non produceret spicam triticeam, sed spicam auream plenam, gemmis pretiosis loco granorum. Deinde granum seminatum debet corrumpi et perdi, alioqui non nasceretur, juxta illud Evangelii: « Nisi granum frumenti cadens in terram mortuum fuerit, ipsum solum manet: » sic eleemosyna debet donari, non commutari, et donari iis qui non possunt retribuere; denique debet amitti ac perdis sine ulla spe recuperationis in hac vita: ita enim corrupta et perdita iterum nascitur, et fructum plurimum parit in aeterna vita. Denique seminatum granum eget sole et pluvia, ut germinare possit: sic etiam eleemosynæ, ut alia omnia bona epera, egent sole divinæ gratiæ et pluvia sanguinis Medicatoris, id est, requirunt, si meritoria esse debeant, ut fiant ex gratia Dei, quæ nascitur ex Christi sanguine: tunc enim res in se minima efficit maxima ratione virtutis, quam ex gratia recipit; et sic non solum meritoria de congruo, sed etiam de condigno, ut scholæ loquuntur, meritoria est vita aeternæ. Sed hoc interest inter sationem tritici, et distributionem eleemosynæ recte factam, quod plurima sunt, quæ facere possunt, ut qui seminavit in lacrymis triticum, in exultatione non metat: nam et potest seminatum granum deficiente imbre non nasci; et potest natum a bruchis, vel nebulis corrumpi; et potest jam maturum a furibus diripi, vel incendio perdi. At eleemosyna ex charitate facta, salva est, quippe in celo reconditur, ubi nec bruchi, neque nebulæ, neque fures accessum ullum habent. Igitur qui spirituale semen in lacrymis seminat, in exultatione fructum magnum sine ulla dubitatione metet.

PSALMUS CXXVII

SECUNDUM HEBREOS.

V. v. — 1. *Canticum graduum Salomonis.*

Nisi Dominus ædificaverit domum, in vanum laboraverunt qui ædificant eam.

Nisi Dominus custodierit civitatem, frustra vigilat qui custodit eam.

2. Vanum est vobis ante lucem surgere : surgit postquam sederitis, qui manducatis panem doloris :

Cum dederit dilectis suis somnum :

3. Ecce hæreditas Domini, filii, merces, fructus ventris.

4. Sicut sagittæ in manu potentis, ita filii excusorum.

5. Beatus vir qui implevit desiderium suum ex ipsis : non confundetur cum loquetur inimicis suis in porta.

Argumentum. — Docet, nihil proficere hominum labores, nisi Deo juvante, itaque ex Jova pendere habitationem, securitatem, quæstam, victum, liberorum stirpem.

1. *Canticum ascensionum, Salomonis carmen.*

Nisi Jova exstruat domum,
frustra laborant (gall. *se fatiguent*) structores ejus in eo (labore);
nisi Jova custodiat urbem,
frustra vigilat custos.

2. Frustra vobis est, o matutinantes surgere,
retardantes sedere (quiescere a labore), comedentes panem laborum :
sic dat Jova dilecto suo per somnum.

3. Ecce donum (propri. *hæritas*) Joyæ sunt liberi,
præmium est fructus uteri.

4. Sicut sagittæ in manu herois,
sic sunt filii juventutis.

5. Beatus vir, qui implevit pharetram suam illis (sagittis) !

Non confundentur quando dicent (causam) cum inimicis suis in porta.

NOTE.

Vers. 1. *In eo* : Maurer, *in ea*, domo scil. — Vers. 2. Alii, *morantes sedendo*, operi faciendo in seram usque noctem assidentes. *Laborum*, magno labore paratum. *Sic*, i. e. tot ac talia bona, quot et qualia vos multa opera queritis. Rosenmull. *ita dabit dilecto suo somnum* : *ita*, i. e. quemadmodum vos frustra fatigamini, ut vix pauxillum somno et quieti indulgetis, ita e diverso Deus iis, quos diligit, quiete et sine curis dormire concedit. Alius, *vere* (profecto) *dat Deus dilectis suis somnum*. — Vers. 4. Lyricorum more, expatiatur vates, docens quantum bonum sit educasse liberos. *Filii juventutis*, quos quis juvenis genuit, i. e. adulti et robustiores, quales firmissimum præsidium solent esse domus paternæ et senescientium parentum, quod ipsum significatur eo, quod dicuntur esse *sicut sagittæ in manu herois*. Alius

cum Vulg. *fili excussorum*, puta qui plurimis ærumnis vexantur, ut *neourim* sit particip. *paul* verbi נָעָרִים *excussit*. Cæterum hæc filiorum cum hastilibus comparatio Arabibus etiam familiaris est.— Vers. 5. *Confundentur*, i. e. causa cadent; puta patres talibus filiis stipati. Alii ad filios referunt, ob plural. numerum, sed sine idonea causa, eodem tamen sensu.

BELLARMINI EXPLANATIO.

PSALMUS CXXVI.

TITULUS ET ARGUMENTUM.

Canticum Graduum Salomonis.

Psalmi
hujus
obseuri-
tas. Psalmus hic semper mihi visus est supra modum obscurus, et nunc etiam post longum studium fateor me non perfecte assequi litteralem sensum. Probabilior expositio videtur esse illa, quam tradiderunt Græci, S. Joannes Chrysostomus, Theodoretus et Euthymius, quod videlicet pertineat hæc prophætica exhortatio, sive admonitio, ad populum Hebræorum post reversionem a captivitate Babylonica, quando laborabat in ædificanda domo Dei, et restauranda civitate Jerusalem, et a vicinis gentibus toto fere illo tempore vexabatur et impeditiebatur. Huc etiam pertinere videtur titulus: *Canticum graduum Salomonis*; tribuitur enim Salomon hæc adhortatio, quoniam ipse prior ædificavit domum Domini et civitatem Jerusalem amplificavit, et multis bonis replevit. Ipse igitur commode introducitur, qui admoneat Zoroahbelem, qui fuit quasi alter Salomon, quomodo se gerere debeat in domo et civitate reædificanda, custodienda et amplificanda. Sed altiore sensu veru Salomon, id est *pacificus*, Christus, qui est *pax nostra*, juxta Apostolum, admonet eos qui ad veram pacem aspirant, et aspirando ascendunt de valle lacrymarum ad visionem pacis, Jerusalem coelestem, quomodo debeant ædificare et custodiare domum, sive civitatem Ecclesie; tum etiam quia unusquisque sibi per bona opera domum ædificare debet in cœlo, eamque custodiare, ut ad eam suo tempore feliciter inhabetandam, perpetuoque possidendam, ascendas. Scio nonnauquam in Scripturis, per ædificationem domus, intelligi *fecunditatem* sive *copiam filiorum*. Sed hunc Psalmum communis expositio Patrum de vera domo Dei, id est, de templo, sive materiali, sive mystico, non de carnali filiorum copia intelligendum esse docuit.

EXPLICATIO PSALMI.

Vers. 1.3 1. NISI DOMINUS ÆDIFICAVERIT DOMUM, IN
VANUM LABORAVERUNT QUI ÆDIFICANT EAM.

Hæc dicuntur Judæis ædificantibus domum Dei, id est templum, quando infelicitè opus procedebat, impedientibus vicinis gentibus, ut scribitur in I lib. *Esdrae*. Admonentur autem, ut cogitent, nihil valere opera hominum, nisi primarius ædificator Deus adsit; et ideo non solum operentur manibus, sed etiam corde et ore Deum invocent, et in ejus adjutorio præcipue fidant. « Nisi Dominus ædificaverit domum, » id est, nisi Dominus invocatus cum fiducia operantibus adfuerit, « In vanum laboraverunt qui ædificant eam, » id est, omnis labor frustra consumptus est, et frusta etiam deinceps consumetur. Hæc eadem dicuntur præpositis Ecclesiæ, qui prædicatione verbi Dei convertere nituntur homines ad Deum, et ex iis templum Domino, id est Ecclesiam, ædificare, juxta illud I Corin. iii: « Dei ædificatio estis; » et ibidem: « Ut sapiens architectus fundamentum posui, alius autem superedificat; » sed nisi adsit ille principalis architectus, qui dixit Matth. xiv: « Super hanc petram ædificabo Ecclesiam meam, » in vanum ædificant homines, frustra prædicant doctores verbi Dei, dicente Domino: « Sine me nihil potestis facere, » Joan. xvi. Denique dicuntur eadem unicuique nostrum, qui domum nobis per actus fidei, spei et charitatis in cœlo ædificare

debemus: domus enim Dei, ut S. Augustinus ait serm. 22 *De Verbis Apostoli*, credendo fundatur, sperando erigitur, diligendo perficitur, neque ullus in cœlesti patria civis admittitur, qui tales domum non ante paraverit. Sed hæc domus magis orando et gemendo, quam operando fabricatur, quia « non sumus sufficientes cogitare aliquid ex nobis, tanquam ex nobis, » II Cor. iii.

2. NISI DOMINUS CUSTODIERIT CIVITATEM, FRUS- Vers. 2.
TRA VIGILAT, QUI CUSTODIT EAM.

Cum civitas Hierusalem post captivitatem ædificaretur, simul ædificanda et simul custodienda erat, ut testatur Scriptura in lib. II *Esdrae*. Gentes enim quæ in circuitu erant, non solum impeditre conabantur ædificationem, sed etiam demoliri quod ædificatum fuerat: et ideo filii Israel una manu gladium tenebant, altera faciebant opus, et multi eorum dispositi ad custodiendum, perpetuas agebant excubias. Sed nihilominus tot vigilis suis nihil profecissent, nisi Dominus civitatem custodiare voluisse. Hoc idem contingere certum est præpositis Ecclesiæ, qui simul ædificare Ecclesiam, et simul custodiare debent: versamur enim in medio inimicorum, qui nihil magis oderunt, quam Ecclesiæ amplificationem. Et quamvis episcopis ad hoc detur in Ecclesia locus altior, ut quasi e specula omnia prospicere, et populum custodire possint, tamen neque corda

penetrant, neque ubique cum omnibus esse possunt; ideo « nisi Dominus custodiat civitatem, frustra vigilat qui custodit eam. » Hoc ipsum singulis nobis accidere solet, ut dum per bona opera domum nobis ædificamus, non desint hostes, qui variis temptationibus destruere moliantur ædificium inchoatum; unde nos Apostolus armat, scribens *Ephes. cap. vi*, dum dicit: « Accipite armaturam Dei, ut possitis resistere in die malo; » et infra: « In omnibus sumentes scutum fidei, in quo possitis omnia tela nequissimi ignea extinguere. » Sed nisi Dominus nobis adsit, et nos sœpe dormitantes custodiat, et pro nobis pugnet, frustra erit omnis labor noster.

Vers. 3. 3. VANUM EST VOBIS ANTE LUCEM SURGERE :
SURGITE POSTQUAM SEDERITIS, QUI MANDUCATIS PA-
NEM DOLORIS.

Filii Israel præ nimia sollicitudine, dum in angustiis essent, ante lucem opus ædificationis aggrediebantur, ideo monet illos Spiritus Sanctus nihil profuturum quod ante lucem operari incipient, nisi Dominus illis adfuerit; sed si Dominum adjutorem habuerint, et in illo spem suam posuerint, opus prospere successurum, etiamsi post necessariam quietem, orto jam sole operi se accingant. « Vanum, inquit, est vobis ante lucem surgere, » ad opus videlicet ædificationis prosequendum; ubi subintelligendum est: Nisi Dominus ædificaverit domum, vel « custodierit civitatem; » et ideo confidentes in Domino, et illum assidue invocantes, « surgite postquam sederitis, » id est, post nocturnam atque necessariam quietem, surgite ad opus, « qui manducatis panem doloris, » id est, vos, qui in angustia et oppressione nunc vivitis propter infestationem continuam inimicorum. Sed in sensu magis intento a Spiritu Sancto monentur præpositi Ecclesiæ, et singuli etiam fideles, ut in ædificanda domo, sive communi, sive particulari, non magis fidant operationi, quam orationi; sed imitantur Dominum, qui per noctes vigilabat in oratione, juxta illud *Luc. vi*: « Erat pernoctans in oratione Dei, et interdiu concionabatur, et miraculis sermonem confirmabat; » necnon Apostolos imitantur, qui in *Act. cap. vi*, dicunt: « Nos autem orationi et ministerio verbi instantes erimus. » « Vanum, inquit, vobis est ante lucem surgere, » id est, totum tempus consumere in ædificatione vel custodia. « Surgite postquam sederitis, » id est, surgite ad opus postquam sederitis, vacantes quieti contemplationis et orationis. « Qui manducatis panem doloris, » id est vos, qui præ desiderio cœlestis patriæ assidue gemitis et dicitis: Fuerunt mihi lacrymæ meæ panes die ac nocte, » dum dicitur mihi quotidie: « Ubi est Deus tuus? » Qui enim valde amat, dum non possunt frui presentia rei amatæ, sustentantur interim desiderio et gemitu, et eo modo lacrymæ flunt illis panes die ac nocte, id est, in prandio et cœna.

In hebræo non habetur illud, *surgite*; sed videntur Septuaginta legisse paulo aliter quam nunc habeatur in nostris codicibus; ubi enim nunc est στάθε, id est *surgere*, ipsi videntur legisse στάθε, *surgite*; et quamvis Euthymius ex græco codice legit *surgere*, tamen veteres Patres legunt *surgite*, ut S. Hieronymus et S. Augustinus in *Commentario*; et videtur etiam S. Joannes Chrysostomus ita legisse. Denique ita legit S. Hilarius, qui, ut S. Hieronymus scribit in lib. *De Scriptoribus Ecclesiasticis*, imitatus est Origenem in explanatione Psalmorum. Certum autem est Origenem et alios veteres Græcos et Latinos habuisse codices correctiores, quam unus Euthymius habuerit, nisi forte Euthymius etiam legerit *surgite*, sed corrigendum putaverit esse textum, unius litteræ mutatione: nam ἐγένεσθαι est *surgere*, et ἐγένεσθαι est *surgite*.

4. CUM DEDERIT DILECTIS SUIS SOMNUM, ECCE Vers. 4.
HÆREDITAS DOMINI, FILII MERCES, FRUCTUS VEN-
TRIS.

Post exhortationem et admonitionem, addit Propheta consolationem, prædicens, fore ut post praesentes tribulationes, det Dominus pacem et quietem populo suo, et tunc filios Israel manifeste futuros Dei hæreditatem, et potentissimos atque fortissimos, ut nullos deinceps hostes passuri sint; quæ Prophetia respicit novum populum, id est, Ecclesiam Christi, cuius typus erat templum, et civitas ipsa Hierusalem. Nam, ut S. Augustinus demonstrat lib. XVIII *De Civitate Dei*, cap. XLV, Iudeis post civitatis et templi in-

staurationem omnia in deterius prolapsa sunt, plura indecne per Vespasianum et Titum iterum civitas eversa, et templum incensum fuit. Ait igitur: « Cum dederit dilectis suis somnum, » id est, cum pacem et quietem Dominus populo suo dederit, mittens ad illos verum Salomonem, qui templum verum, id est, Ecclesiam suam fundabit et propagabit, atque ipsos etiam imperatores orbis terræ illi subjiciet. « Ecce hæreditas Domini, filii merces fructus ventris, » id est, ecce tunc apparetur, quod hæreditas Domini erunt filii plurimi, juxta illud *Psalm. II*: « Postula a me, et dabo tibi gentes hæreditatem tuam, et possessionem tuam terminos terræ; » et « merces » ejusdem Christi Domini erit « fructus ventris, » filii videlicet plurimi, juxta illud *Isai. LIII*: « Si posuerit pro peccato animam suam, videbit semen longævum. » Nam, ut sœpe monuimus, frequenter in Psalmis idipsum bis repetitur. Itaque idem est, *hæreditas Domini filii*, et *merces fructus ventris*, id est, Christi Domini hæreditas et merces erunt multi filii, qui nihil aliud sunt, nisi fructus ventris. Atque haec expositio est conformis hebreo textui, ubi vox illa, *fructus*, est nominativus casus, non genitivus; sed in editione græca vox *fructus* est casus genitivi, et ideo juxta grecum codicem sensus erit, quod filiorum mul-

tem-
plum
in-
cen-
sus
et
ever-
sa
civitas
sub
Tito
et
Vespa-
siano.

tudo erit *haereditas Domini*, et *merces Christi*, qui Christus vere proprieque *fructus ventris* fuit, cum non ex viro, sed ex sola Virgine ortum habuerit; et haec fortasse verior est expositio, quoniam verbum hebraicum potest mutatis punctis reddi per genitivum, sed verbum græcum non potest reddi per nominativum. Proinde si codices omnes conciliandi sint, haec posterior expositio priori anteponenda erit. Jam vero si Psalmus explicetur secundum altiorem sensum, in hoc versiculo prædictitur felicitas cœlestis Hierusalem, quæ post somnum mortis temporariæ in resurrectione manet eos, qui sicut oportebat ad patriam sempiternam passibus amoris et fidei ascendere properarunt. Ait igitur: « Cum dederit dilectis suis somnum, » id est, cum post varios labores et certamina dederit Deus omnibus dilectis suis, tam præpositis Ecclesiæ ædificatoriis, quam privatis fidelibus domum sibi per opera bona fabricantibus, somnum beatæ mortis, « ecce haereditas Domini, filii merces fructus ventris, » id est, tunc apparebit in die ultimi iudicii, quod filii Dei sint ipsius Dei haereditas, quia tunc dilecti salutem æternam consequentur, et post hoc transibunt in æternam Dei possessionem et haereditatem; et iidem filii erunt merces Christi, qui est « fructus ventris, » quia salus electorum est Christi merces: ipse est enim, qui gratiam et gloriam electis suis patiendo et moriendo promeruit. Non multum autem refert, quod in hebræo habetur, sic dabit dilecto suo somnum, pro eo quod nos habemus in græca et latina versione, cum dederit dilectis suis somnum; nam particula hebraica ים multa significat, nimirum sic, vere, tunc, etc. Itaque reddi potest, tunc dabit, id est, post illas tribulationes dabit, et sensus in idem recidit; vox autem רְדִידָה, lidido, dilecto suo, potest etiam legi ledidav, dilectis suis; et sic legerunt Septuaginta et S. Hieronymus, qui habuerunt codices sine punctis, quæ a Rabbinis postea addita sunt; et si forte necessario legendum esset, dilecto suo, exponeremus unicuique dilecto suo, vel dilecto populo suo, quod est idem cum eo quod nos habemus, dilectis suis.

Vers. 5. 5. SICUT SAGITTÆ IN MANU POTENTIS, ITA FILII EXCUSSORUM.

Declarat his verbis Propheta potentiam filiorum Christi, qui sunt ejus haereditas et merces, ac dicit fore potentissimos, quales sunt sagittæ in manu viri robustissimi, que maximo impetu jaciuntur, et omnia perrumpunt; loquitur autem de spirituali potentia servorum Christi, quæ non minus cernitur in actione quam in passione; nam et cum instar tonitrii et fulgoris terrefaciunt, et convertunt infideles ad fidem, vel peccatores ad penitentiam, efficacia prædicationis, splendore sanctitatis et miraculorum virtute; et quando tormenta omnium generum, incredibili patientia et fortitudine, ad mortem usque decertantes pro

fide et pietate tolerant, quid sunt aliud nisi « sagittæ in manu potentis? » Sed cur filii isti tam fortes dicuntur *filii excussorum?* quia filii sunt hominum ejectorum et expulsorum a mundo quasi quisquiliæ et rejectamenta, videlicet filii Prophetarum et Apostolorum; nam de Prophetis Apostolus dicit *Hebr. xi*: « Alii vero ludibria et verbera experti, insuper et vincula, et carceres; tentati sunt, lapidati sunt, secti sunt, in occisione gladii mortui sunt; circuierunt in melotis, et in pellibus caprinis, egeates, angustiati, afflicti, quibus dignus non erat mundus. » De Apostolis dicit idem Paulus, *I Cor. iv*: « Puto quod Deus nos Apostolos novissimos ostendit, tanquam morti destinatos, quia spectaculum facti sumus mundo, et angelis, et hominibus; usque in hanc horam esurimus, et sitimus, et nudi sumus, et colaphis cædimur, et instabiles sumus, et laboramus operantes manibus nostris. Maledicimur, et benedicimus; persecutionem patimur, et sustinemus; blasphemamur, et obsecramus, tanquam purgamenta hujus mundi facti sumus, omnium peripsema usque adhuc. » Et tamen isti ita excussi, et rejecti, fortissimi fuerunt, et de mundo et de dæmonibus mirabiliter triumpharunt. Horum filii sunt omnes electi, qui sicut sagittæ in manu potentis hostes vulnerarunt et vicerunt. Scio locum istum varie tam a veteribus, quam a recentioribus exponi, sed, ut alias dixi, unusquisque in suo sensu abundet, ubi nullum subsit fidei periculum. Neque refert quod S. Hieronymus ex hebreo vertat, *filii juventutis*, ubi nos habemus, *filios excussorum*, et versionem suam defendat in epist. *ad Marcellam*, de quæstionibus super hunc Psalmum: nam vox hebraica utrumque significat, et *juventutem* et *excusorem*; proinde versio Septuaginta et nostra Vulgata editio non repugnant textui originali. Neque reprobamus S. Hieronymi intelligentiam, siquidem electi ut sunt *filii excussorum*, quia filii Prophetarum et Apostolorum a mundo reprobatorum, ita sunt etiam *filii juventutis*, quia sunt per regenerationem et renovationem juvenes facti, ac per hoc alacres, et fortes, et expediti ad bellum contra spirituales hostes. Sed in futuro sæculo, ac præsertim in die resurrectionis et ultimi iudicii, maxime apparebit quam sint potentes isti *filii excussorum*, qui tunc per resurrectionem gloriosam erunt veri *filii juventutis*, quia « renovabitur ut aquilæ juventus » eorum: « stabunt enim in magna constantia adversus eos qui se angustiaverunt, » ut dicitur *Sap. v*; et adversarii « videntes turbabuntur timore horribili, et dicent: Hi sunt quos aliquando habuimus in derisum, » etc.; et *Psalm. cxlix*: « Gladii ancipes in manibus eorum ad faciendam vindictam in nationibus, increpationes in populis, ad alligandos reges eorum in comedibus, et nobiles eorum in manicis ferreis, ut faciant in eis judicium conscriptum: gloria hæc est omnibus sanctis ejus. »

Vers. 6. 6. BEATUS VIR, QUI IMPLEVIT DESIDERIUM SUUM EX IPSIS : NON CONFUNDETUR, CUM LOQUETUR INIMICIS SUIS IN PORTA.

Concluditur Psalmus per epiphonema, acclamando ipsi Domino Christo : « Beatus vir, qui implevit desiderium suum ex ipsis, » id est, vere felix est ille, Christus videlicet, « qui implevit desiderium suum ex ipsis » filiis, quoniam perduxit ad finem desiderium suum, quod erat vindredi salutem et gloriam filiorum suorum, pro quibus tam multa fecit et pertulit, et ideo « non confundetur, cum loquetur inimicis suis in porta, » id est, in ultimo iudicio, quod exercet in amplissima porta, id est, in conventu totius mundi, « non confundetur, cum loquetur inimicis suis » dæmonibus et hominibus iniquis; sed eos potius confundet et convincet in iustitia et imbecillitate: tota enim contentio Christi cum diabolo et ministris ejus, ab initio mundi usque ad finem, fuit circa salutem generis humani, quod totum ad inferos secum diabolus pertrahere semper conatus est. Atque ad hunc finem singulis etatibus persecutio[n]es Judæorum, pagorum, haereticorum, iniquorum omnis generis, adversus Ecclesiam excitavit. Sed cum in die iudicii conspiciuntur tot millia electorum cum Christo gloriose regnantium et triumphantium, et justissime coronatorum, et contra sublata erit iniquis omnis potestas, et ad æterna supplicia juste damnatis nulla spes erit bella renovandi, tunc ipse Christus non confundetur, sed confundet omnes inimicos suos. In hebreo habetur : *Beatus vir qui implevit pharetram suam ex ipsis, sagittis videlicet. Septuaginta Seniores maluerunt explicare metaphoram; et quia implere pha-*

*retram sagittis, significat implere domum fortissimis filiis, ideo maluerunt vertere : « Beatus vir qui implevit desiderium suum ex ipsis, » hoc est, pro voto et desiderio implevit domum suam filii optimis et robustissimis. Illud autem, non confundetur, cum loquetur inimicis suis, in hebraico et graeco codice habetur in numero multitudinis, non confundentur, cum loquentur. Non est improbabile in aliquo texto vitio scriptorum esse numerum variatum: non enim verisimile est interpretem latinum vel graecum de industria numerum mutasse. Et cum S. Hieronymus et S. Augustinus in Commentario legant in singulari, non confundetur, cum loquetur, et contra S. Hilarius et S. Joannes Chrysostomus legant in numero multitudinis, non confundentur, cum loquentur, necesse est ut graeci codices fuerint varii, sicut etiam latini codices Vulgati varii sunt; sed ultraque lectio vera est: nam et de Christo vere dicitur : « Non confundetur, cum loquetur inimicis suis in porta; » et de electis filiis Dei vere etiam dicitur : « Non confundentur, cum loquentur inimicis suis in porta, » cum scriptum sit *Sop. v* : « Tunc stabunt justi in magna constantia adversus eos qui se angustiaverunt. » Illud autem, in porta, interpretati sumus, in ultimo iudicio, quoniam, ut diximus in explicatione psalmi cxxi, apud Hebreos in portis civitatum conveniebat multitudo populi In portis civitatum feabantur ad iudicia; et præterea ex doctrina S. Augustini in expositione hujus versiculi, in porta loqui, est publice loqui, sicut loqui in cubiculo, est loqui occulte et secrete. Quoniam igitur ultimum iudicium palam et publice, et in conspectu omnium hominum et angelorum fiet, rectissime dicitur in porta fieri, et Christus atque electi ejus recte inimicis suis loqui dicuntur in porta.*

PSALMUS CXXVIII

SECUNDUM HEBREOS.

V. v. — 1. *Canticum graduum.*

Beati omnes, qui timent Dominum, qui ambulant in viis ejus.

2. Labores manuum tuarum quia mandubabis, beatus es, et bene tibi erit.

3. Uxor tua sicut vitis abundans in lateribus domus tuæ.

Filii tui sicut novellæ olivarum in circuitu mensæ tuæ.

4. Ecce sic benedicetur homo, qui timet Dominum.

5. Benedicat tibi Dominus ex Sion; et videoas bona Jerusalem omnibus diebus vitæ tuæ.

6. Et videoas filios filiorum tuorum, pacem super Israel.

V. s. n. — *Canticum graduum.*

Beatus omnis, qui timet Dominum, qui ambulant in viis ejus.

Laborem manuum tuarum [*h. palmarum*] cum comederis, beatus tu, et bene tibi erit.

Uxor tua sicut vitis fructifera in penetralibus domus tuæ.

Filii tui sicut germina olivarum, in circuitu mensæ tuæ.

Ecce sic benedicetur viro qui timet [*h. timenti*] Dominum.

Benedicat tibi Dominus ex Sion, et videoas [*h. vide*] bona Jerusalem omnibus diebus vitæ tuæ.

Et videoas filios filiorum tuorum, pacem [*h. pax*] super Israel.

Argumentum. — Duarum stropharum carmen: vers. 1-3, felicem hominem pium! privata pariter ille, 4-6, atque publica utitur salute.

1. Canticum ascensionum.

Beatus omnis, qui timet Jovam,
qui ambulat in viis ejus.

2. Laborem manuum tuarum næ tu comedes,
o te felicem et fortunatum!

3. Uxor tua ut vitis frugifera *est*
in penetralibus (intima parte) domus tuæ;
filii tui ut surculi olearum (densi, vel læte crescentes)
circum mensam tuam.

4. Ecce (considerate!), nam sic benedicitur vir,
qui timet Jovam.

5. Benedic te Jova ex Sione,
et cum voluptate adspice felicitatem Hierosolymæ
omnes dies vitæ tuæ.

6. Et adspice filios filiorum tuorum.
Pax (vel *salus*) super Israelem!

NOTE.

Vers. 1. Vel, *beatus omnis tu, qui times*, etc. — Vers. 2. Oratio convertitur ad ipsum pium. *O te*, etc.; vel, *beatus es tu, et bonum est tibi*. — Vers. 3. « Uxorem idcirco cum vite conferri vult Kimchi, quod, ut vitis omnium arborum sola intra domum plantari potest, ita tamen ut illius rami foras mittantur, quo calore solis gaudeant: ita uxor domi delitescere seque continere debeat, nec unquam in publicum prodiere, sed liberos foras ad obeunda domestica mittere, non secus ac vitis domi satæ rami foras mittuntur. Simplicius dicere, conferri uxorem cum vite propter fecunditatem, quæ maxime in vite commendatur. Per hæc verba, *in interiora domus tuæ*, significare vult, honestam et pudicam matronam domi se continere clausam, non foras vagari sicut meretrices, » etc. Muisius. — Vers. 5. *Adspice*, imperativus est fidenter promittentis.

BELLARMINI EXPLANATIO.

PSALMUS CXXVII.

TITULUS ET ARGUMENTUM.

Canticum Graduum.

Videtur hic Psalmus S. Hilario et S. Augustino juxta litteræ corticem ita de temporalibus bonis, quorum promissio propria Testamento veteris est, agere ut necessarium sit mysticum sensum invenire, si ad christianorum mores accommodari debeat. Sed fortasse non erit difficile ita illum exponere, ut simul ad Testamentum vetus, et ad novum, ad bona Hierusalem terrenæ et cœlestis pertineat. Est igitur argumentum hujus Psalmi, exhortatio ad piatem, proposita ingenti mercede virtutis.

EXPLICATIO PSALMI.

Vers. 1. BEATI OMNES QUI TIMENT DOMINUM, QUI AMBULANT IN VIIS EJUS.

Docet Propheta redeentes a captivitate quomodo

se gerere debeat, si nolint iterum in captivitatem reverti, sed perpetuo frui bonis Hierusalem, quæ doctrina utrisque peregrinis convenit, tam iis qui peregrinabantur a patria terrena, atque ad

eam ascendere cupiebant, quam iis qui peregrinantur a patria coelesti, atque ad eam redire festinant. Ait igitur : « Beati omnes qui timent Dominum, » id est, illi omnes, sive viri, sive feminae, sive magni, sive parvi, sive nobiles, sive ignobiles, sive domini, sive servi, sive docti, sive indocti, denique omnes omnino nullis exceptis, tunc solum vere beati erunt, id est, fortunati, contenti, hilares, in optimo statu constituti, quem statum omnes desiderant, si Deum vere timuerint, id est, si Deum offendere formidaverint, atque eo timore muniti, a Dei gratia, quae fons est omnium bonorum, nunquam exciderint. Signum autem sancti hujus timoris est, si « in viis ejus, » id est, in praecceptis ejus ambulaverint. Nam timor iste sanctus ex amore procedit, et Dominus ait *Joan. xiv* : « Si diligitis me, mandata mea servate; » et iterum : « Qui habet mandata mea et servat ea, ille est qui diligit me; » et iterum : « Qui non diligit me, sermones meos non servat. »

Vers. 2. 2. LABORES MANUM TUARUM QUIA MANDUCABIS,
BEATUS ES, ET BENE TIBI ERIT.

Incipit enumerare felicitates hominis timentis Deum, atque ad eum ipsum sermonem dirigit, dicens : Prima felicitas tua erit, quod « manducabis labores manuum tuarum, » id est, frueris iis bonis quae labore manuum, sive operum tuorum acquisieris. Quo loco diligenter considerandum est, non ponere Prophetam felicitatem priorum in magna copia divitiarum, sed in iis bonis quae proprio labore acquiruntur, quae ordinarie modica esse solent. Magnae enim divitiae, vel ex hereditate parentum, vel ex rapina et usura, aliisque malis artibus plerumque habentur. Laudat S. Hieronymus in epist. *ad Heditiam*, Quæst. I, vulgatam illam sententiam : « Dives aut ini quis, aut ini qui hæres. » Quare idem Propheta in *Psalm. xxxvi*, 16, dicit : « Melius est modicum justo super divitias peccatorum multas; » et in *Psalm. lxxii* : « Ecce ipsi peccatores, et abundantes in sæculo obtinuerunt divitias; » et in *Psalm. cxliii* : « Promptuaria eorum plena eructantia ex hoc in illud, oves eorum fœtosæ abundantes in egressibus suis, boves eorum crassæ, non est ruina maceræ, neque clamor in plateis eorum. Beatum dixerunt populum cui hæc sunt. Beatus populus, cuius Dominus Deus ejus. » Itaque S. David non Hebreis tantum, sed etiam christianis concionatur, cum non ponat felicitatem in magnis divitiis; sed in eo solum, quod vivant de suis justis laboribus : ubi duo vitia extrema reprehendit : unum, eorum qui labores aliorum manducant; alterum, eorum qui ne suum quidem laborem manducant, sed avare recondunt, ut divitias augeant. Illi igitur soli beati sunt, qui labores manuum suarum manducant. Quod si forte aliqui timentes Deum, et ambulantes in viis ejus, non possint frui bonis suis, sed esurire et siti cogantur, quod bona sua ab aliis direpta fuerint, non propterea falsa

erit promissio quæ hoc loco habetur : nam si Deus quibusdam amicis suis permittit, ut eu piant saturari de micis quæ cadunt de mensis di vitum, ut de Lazaro mendico legimus *Luc. xvi*, et nemo illis eas micas tribuit, dat sine dubio illis Deus aliquid longe melius, videlicet « gaudium de tribulatione, » ut Apostolus dicit *ad Hebr. x*, « rapinam bonorum vestrorum cum gaudio suscepistis; » et de se ipso dicit, *II Cor. vii* : « Superabundo gaudio in omni tribulatione nostra; » et tunc sensus hujus versiculi hic erit : « Laborem manuum tuarum quia manducabis, beatus es, et bene tibi erit, » id est, nunc manducabis laborem, id est, de gaudio laboris et tribulationis reficeris; poste va vero de fructu ipso laboris, id est, de præmio honorum operum saginaberis; et ideo nunc « beatus es » in spe, et postea « bene tibi erit, » in re. Atque hoc proprie pertinet ad spirituales peregrinos, qui gaudent tribulatione inopiae et æruminarum, scientes quod « tribulatio patientiam operatur, patientia vero probationem, probatio vero spem, spes autem non confundit, quia charitas Dei effusa est in cordibus nostris, *Rom. v*. Quod attinet ad verba, in hebreo est, *labores manuum*, ut nos habemus; sed in græco videtur esse, *labores fructuum*, et sic plurimi vertunt et legunt ex græco. Sed vox græca *τριπλῶν*, et *fructus*, et *volas manuum* significat. Proinde Septuaginta propriissime verterunt hebraicam vocem *τριπλῶν*, quæ proprie *volas manuum* significat. Igitur nostra editio Vulgata plane concordat cum originali hebraico et cum editione Septuaginta.

3. UXOR TUA SICUT VITIS ABUNDANS IN LATERI- Vers. 3.
BUS DOMUS TUÆ.

Hæc est altera felicitas timentis Deum, et ambulantibus « in viis Domini, » quod si forte uxorem ducere voluerit, unam tantum ducet, eamque non ad libidinem explendam, sed ad filiorum procreationem accipiet, ut Angelus Tobiam monuit dicens : « Accipies virginem cum timore Domini, amore filiorum magis, quam libidine ductus; » et ipse Tobias vere dixit : « Domine, tu scis quia non luxuria causa accipio sororem meam conjugem, sed solo posteritatis amore, » *Tob. vi* et *viii*. Ait igitur : « Uxor tua, » non *uxores*, non *concubinae tuæ*, « sicut vitis abundans, » id est, multis pariens filios, ut vitis fecunda multos racemos, « in lateribus domus tuæ, » id est, intus manens, ut modesta et pudica, et curam domus interioris habens, dum vir de his quæ foris sunt, cogitat. S. Hieronymus vertit, in *penetalibus domus*, quoniam de lateribus interioribus hoc loco agitur. Sed quamvis hæc felicitas quædam sit, tamen ut intelligamus non magnam esse felicitatem, Deus multis magnisque amicis suis, etiam conjugatis, hanc felicitatem non dedit, ut Abrahamo et Saræ, Isaaco et Rebeccæ, Zachariæ et Elizabethæ; multis etiam inspiravit desiderium et propositum sanctæ virginitatis, ut creditur de sanctis prophè-

Virginitatis do-
num
conjugio excellen-
tius. Elia et Hieremia, et scitur de B. Virgine Ma-

ria, S. Joanne Baptista, S. Joseph, et aliis prope infinitis, quos certe Deus non privasset felicitate conjugii et fecunditatis carnalis, si non esset vir-

ginitas donum longe excellentius. Adde quod sancti viri, qui vel conjugi caruerunt, vel sterilem sortiti sunt, non fuerunt privati felicitate fecunditatis, sed eam habuerunt alterius generis, et sine comparatione majorem. Christus imprimitis, qui caput est omnium Sanctorum, non habuit carnalem uxorem, neque filios carnales, sed habuit tamen sponsam Ecclesiam, et filios spirituales innumerabiles. Sic etiam Abraham unum habuit filium ex Sara, sed per fidem factus est pater multarum gentium; onnes enim fideles

Virisanc-
ti non
solum
patres,
sunt
matres
sunt
sunt
conver-
tunt.
filii Abra-
ha dicuntur ab Apostolo, Rom. iv; et quod mirabile est, viri sancti non solum patres, sed etiam matres sunt eorum quos ad fidem, vel sed etiam ad poenitentiam convertunt: patres enim sunt matres prædicando verbo aut exemplo, et matres genuendo pro eis, et orando. Idem enim Apostolus ad I Cor. iv, cum ait: « Non ut confundam vos haec scribo, sed ut filios meos charissimos moneo; nam etsi decem millia paedagogorum habeatis in Christo, sed non multos patres, nam per Evangelium ego vos genui. » Alibi vero se matrem dicit, cum ait ad Gal. iv: « Filii mei, quos iterum parturio donec formetur Christus in vobis. » Quod si placet spiritualibus filiis assignare patrem et matrem, quamvis ab eodem homine generentur et pariantur, dicere poterimus patrem esse amorem Dei et proximi, matrem esse sapientiam; vere enim amor est, qui filios gignit; sed per sapientiam gignit, dum sapienter loquens, et Scripturas explanans persuadet auditoribus fidem, aut poenitentiam. Sic enim de sapientia scribitur Sap. viii: « Hanc amavi, et exquisivi a juventute mea, et quæsivi sponsam mihi eam assumere, et amator factus sum formæ illius. »

Vers. 4. 4. FILII TUI SICUT NOVELLE OLIVAREM IN CIR-
CUITU MENSE TUE.

Tertia felicitas hic describitur, educatio videlicet filiorum. Viri enim timentes Deum, et ambulantes « in viis ejus, » non tantum filios multos, sed etiam bonos et bene moratos habebunt, quoniam ab infantia illos docebunt timere Deum, et ambulare « in viis ejus. » Sic igitur ait: « Filii tui sicut novellæ olivarum, » id est, similes erunt arbustulis optimis, quales sunt oleæ, quæ semper virent, et fructum dulcissimum faciunt; non autem similes erunt rubis, aut spinis, aut sterilibus plantis; erunt autem « in circuitu mensæ tuæ, » ut eos omnes simul vident, et cum eis convivens et convescens, majorem ex illis delectationem capias. Quæ omnia convenient etiam in filios spirituales, quos cum Pater Verbo Dei pascit, et proficere videt, mirifice gaudet, et cum Apostolo dicit: « Gaudium meum et corona

mea, sic state in Domino charissimi. » Philipp. iv.

5. ECCE SIC BENEDICER HOMO QUI TIMET DO-
MINUM. Vers. 5.

6. BENEDICAT TIBI DOMINUS EX SION, ET VIDEAS BONA JERUSALEM OMNIBUS DIEBUS VITÆ TUA. Vers. 6.

7. ET VIDEAS FILIOS FILIORUM TUORUM, PAGEM SUPER ISRAEL. Vers. 7.

Quarta est hæc felicitas, quod videlicet vir timens Deum non solum de bonis propriis gaudium habere debeat, sed etiam de communib[us]. Ideo addit, quod ita sit a Deo, qui habitat in Sion, benedicendus, ut videat civitatem suam Hierusalem abundantem omnibus bonis, toto tempore vitae suæ, et videat in ea civitate filios filiorum similiter beatos et felices; et denique pacem, que Pax omnia bona conservat et custodit, stabilem vi- conservat super populum Israel. Sed altiore sensu, et et cuncto magis proprio, atque a Spiritu Sancto intento, hic describitur felicitas tanto major tribus superioribus, quantum distat cœlum a terra, et Deus a creaturis: et propterea non eam narrando, sed prædicando Propheta proponit. « Ecce, » inquit, præter omnia quæ dicta sunt, « sic benedicetur homo, qui timet Dominum, » nimurum dicitur illi: « Benedicat tibi Dominus ex Sion, » id est, non solum benedicat tibi Dominus de terra, temporalia bona tribuens, sed etiam benedicat ex monte sancto suo, ex altissimo habitaculo suo, tibique praestet, ut « videas bona Hierusalem omnibus diebus vitae suæ, » id est, videas Deum, in quo sunt omnia bona Hierusalem, « omnibus diebus vitae tuae, » id est, in æternum, et in sæculum sæculi: nam cum anima sit immortalis, et corpus etiam post brevem somnum mortis temporalis sit resurrectum ad vitam immortalem, certe bona quæ hic videmus, non videmus omnibus diebus vite nostræ, sed per minimam partem diem vitæ nostræ, ut vere cum Jacob dicere possumus: « Dies vitæ nostræ, » quibus in terra peregrinamus, « pauci sunt et mali, » sed bona cœlestis Hierusalem vere videbimus omnibus diebus vite nostræ, qui sine fine erunt: sicut etiam omnes iniqui videbunt mala Babylonis omnibus diebus æternæ mortis suæ. Neque mirum est, quod non dixerit Propheta: Ut possideas bona Hierusalem; sed: « Ut videas, » quoniam vera bona Hierusalem videndo possidentur, siquidem in visione Dei perfecta beatitudine consistit. « Similes, » inquit Joannes in I Epist. cap. v, « ei erimus, » id est beatissimi et felicissimi, et quasi dii quidam, « quoniam videbimus eum sicuti est. » Accedet ad gaudium beatorum quod videbunt in patria illa cœlesti « filios filiorum suorum, » id est, non solum illos quos ipsi per se Deo genuerunt, sed etiam, qui per filios suos spirituales, et per « filios filiorum, » usque ad mundi consummationem ad Deum adducti fuerint; et de omnibus, tanquam de propriis et ad se pertinentibus, gaude-

In visio-
ne Dei
perfec-
tudo.

bunt. Denique accedet ad consummationem felicitatis, quod videbunt « pacem super Israel, » pacem firmam et stabilem, quae securissimos reddet omnes habitatores Hierusalem usque in aeternum: videbunt enim omnes suos inimicos perfecte sub-

jectos sub scabello pedum Christi, id est, in profundam gehennam detrusos, aeternis vinculis aligatos: « terra enim scabellum est pedum Dei; » iniqui autem omnes sub terram conclusi jacebunt per saecula sempiterna.

PSALMUS CXXIX

SECUNDUM HEBRAEOS.

V. v. — 1. *Canticum graduum.*

Sæpe expugnaverunt me a juventute mea, dicat nunc Israel;

2. Sæpe expugnaverunt me a juventute mea: etenim non potuerunt mihi.

3. Supra dorsum meum fabricaverunt peccatores, prolongaverunt iniquitatem suam.

4. Dominus justus concidit cervices peccatorum.

5. Confundantur et convertantur retrorsum omnes qui oderunt Sion.

6. Fiant sicut fœnum tectorum, quod priusquam evellatur, exaruit:

7. De quo non implevit manum suam, qui metit, et sinum suum qui manipulos colligit.

8. Et non dixerunt qui præteribant: Benedictio Domini super vos, benediximus vobis in nomine Domini.

V. s. h. — *Canticum graduum.*

Sæpe expugnaverunt me ab adolescentia mea; dicat nunc Israel.

Sæpe expugnaverunt me ab adolescentia mea: sed non potuerunt mihi.

Supra cervicem meam arabant arantes, prolongaverunt sulcum suum.

Dominus justus concidet laqueos impiorum.

Confundantur et revertantur retrorsum, omnes qui oderunt Sion.

Fiat sicut fœnum tectorum, quod statim, ut viruerit, arescit.

De quo non implebit manum suam messor, et sinum suum manipulos faciens.

De quo non dixerunt transeuntes: Benedictio Domini super vos, benediximus vobis in nomine Domini.

Argumentum. — Compositum carmen, quo tempore exsilio redierant Judæi. Strophæ duæ: vers. 1-4, ex multis illisque gravissimis malis Israelem Jova eripuit; 5-8, excidant (vel *excident*) ausis suis illius hostes!

1. *Canticum ascensionum.*

Multum (multis vicibus) presserunt me inde a pueritia mea, dicat Israel:

2. Multum presserunt me inde a pueritia mea, neque *tamen* superarunt me.

3. Super dorsum meum ararunt (verberibus) aratores, longos duxerunt sulcos suos.

4. Jova justus *est*, abscidit funes improborum.

5. Confundantur (excidant ausis) et cedant retro omnes osores Sionis!

6. Sint ut gramen tectorum, quod, priusquam extrahat (aliquis), exarescit.

7. Quo (gramine) non implet manum suam messor, et (nec) sinum suum, qui colligit (Maurer, *colligat*) mergites.

8. Nec dicunt prætereuntes :
 « Benedictio Jovæ ad vos *veniat!*
 Benedicimus (bene precamur) vobis in nomine Jovæ ! »

NOTE.

Vers. 1. *A pueritia mea*, temporibus, quibus eram in Agypto. — Vers. 3. *Propr. longum spatium fecerunt sulcis*, etc. — Vers. 6. *Gramen tectorum*, quod in tectis planis ædificiorum nascitur, sed altas radices non agit. Pro *extrahat*, alii *efflorescat*. Quam elegantem felicitatis fluxæ imaginem deinde vates exornat. — Vers. 8. Alius, et sint de eorum numero, quibus *non dicunt*, etc. Cf. *Ruth*. II, 4. Verba postrema videntur esse repetitio et confirmatio formulæ præcedentis, parallelismi in gratiam adjecta. Vel, quod placet, accipienda sunt pro salutatione mutua, ut Chaldaeus, qui his verbis hæc præmisit : *Neque respondent illis*, salutantibus viatoribus messores. Est autem, ait Rosenmullerus, ἡδεα hæc amabilis antiquitatis, quales sunt multæ Homericæ, quod simul tota bene precandi formula refertur et exprimitur, quum satis esset dicere : *Nemo bene precatur talibus.*

BELLARMINI EXPLANATIO.

PSALMUS CXXVIII.

TITULUS ET ARGUMENTUM.

Canticum Graduum.

In Psalmis Gradualibus, ut initio admonimmo, vicissim Prophetæ nunc deplorat ærumnas peregrinationis, nunc bona patriæ cœlestis laudat, ut tam illæ quam ista ad ascendendum et festinandum hortentur. Quoniam igitur in præcedenti Psalmo multa dixit de bonis Hierusalem : nunc redit ad mala Babylonis, in qua exsules sumus et peregrini.

EXPLICATIO PSALMI.

Vers. 1. 1. SÆPE EXPUGNAVERUNT ME A JUVENTUTE
MEA, DIGAT NUNC ISRAEL.

Consolatur se populus Dei in tribulatione positus, quod jam sit assuetus talibus angustiis, et semper Deo adjuvante liberatus fuerit. Conveniunt autem hæc verba populo Judæorum, dum in reædificatione templi et civitatis a vicinis gentibus oppugnaret; et conveniunt etiam Ecclesiæ Christi, quæ vix unquam ab oppugnatione paganorum, vel hæreticorum, vel falsorum christianorum respirare potuit. Ait igitur : « Sæpe expugnaverunt me a juventute mea, dicit nunc Israel, » id est, populus Dei *Israel* vocatus, non miretur si ab hostibus oppugnatur, quia nihil novi patitur, sed revocet ad memoriam præteritas angustias, et dicat : « Sæpe expugnaverunt me ini-mici mei » jam inde a prima mea ætate ; nam vix nata Ecclesia, passa est in Abele persecutionem Cain, ac deinceps sapissime similia pertulit. Quod attinet ad verba, id solum notandum est, verbum *expugnaverunt* positum esse pro *oppugnaverunt*; nam vox hebraica significat *angustiare*, et vox græca significat *bellaverunt*, et ex versiculo sequenti manifeste colligitur non prævaluuisse hos-tes in populum Dei; proinde pugnasse, sed non expugnasse; bellasse, sed non debellasse.

2. SÆPE EXPUGNAVERUNT ME A JUVENTUTE Vers.
MEA, ETENIM NON POTUERUNT MIHI.

Reddit rationem cur sæpe hostes repetierint prælium, sive pugnam; ac dicit causam esse, quia nunquam prævaluerunt : nam si semel prævaluerint, et populum Dei penitus extinxissent, non fuisset opus tot præliis toties renovatis. Verissimum esse quod hic asseritur, Ecclesiastica historia testatur. Illud, *non potuerunt mihi*, vel possum est pro, *non potuerunt in me*, vel subintelligitur aliquid, ut, *non potuerunt mihi nocere*, vel præ-valere.

3. SUPRA DORSUM MEUM FABRICAVERUNT PECCATO- Vers.
RES, PROLONGAVERUNT INIQUITATEM SUAM.

Quod propriis verbis Prophetæ dixerat, id nunc per similitudines et metaphoras repetit et confirmat; dicit igitur populus Dei de persecutoribus suis : « Supra dorsum meum fabricaverunt peccatores, » id est, supra dorsum meum artem fabri-blem exercuerunt utentes dorso meo pro incude, quam fabri ferrarii assidue percutiunt. In hebræo habetur verbum στρατη, quod Septuaginta verte-runt *fabricare*, et S. Hieronymus *arare*; sic enim ad verbum reddidit : *Supra dorsum meum arave-runt arantes*, et vere utrumque significare potest

quamvis enim non habeamus locum in Scripturis (quod ego sciam), ubi שְׁרֵך significet *fabricare*, habemus tamen Gen. iv, vers. 22, et III Reg. cap. vii, vers. 14, vocem *choresh*, ab eadem radice, quod significat *fabrum ferrarium*, ex quo sequitur ut *charash*, significet *fabiolum artem exercere*. Neque dubium esse potest quin Septuaginta Interpretates, homines doctissimi, ex nomine *fabri* deduxerint verbum *fabricare*, quod hoc loco non significat, *aedificium erigere ex lapidibus et lignis* (inepta enim similitudo videretur, si quis dicaret super dorsum hominis domum, vel *aedificium quodlibet fabricari*) ; sed, ut diximus, significat juxta proprietatem vocis hebraicæ, *fabricare* instrumenta ferrea super dorsum, quasi super incudem ; que similitudo significant assiduum et durissimam persecutionem : nihil enim crebris et fortius percuti solet, quam incus a fabris. Idem significatur verbis sequentibus, « prolongaverunt iniquitatem suam ; » prolongatio enim iniqutatis est continualio persecutionis, quam semper boni patiuntur a malis. S. Hieronymus vertit, *prolongaverunt sulcum suum*. Sed quamvis vox hebraica, quæ nunc habetur in hebraico textu, significet *sulcum*, tamen si una littera postponatur, vel altera anteponatur, significabit *iniquitatem*, et hoc modo sine dubio legerunt Septuaginta Seniores ; et quod littera *vau* debeat anteponi, perspicuum est ex eo, quod ubi nunc est, otiosa est et supervacanea. Itaque Septuaginta non legerunt סְלָעָה, *sulcum suum*, sed סְלָעָה וְיַתְּנִיחַת *iniquitatem suam* a voce *aron*, quæ est *iniqutias*. Sed licet nos hoc modo concordemus lectionem græcam et latinam cum hebraica, et sententiam Vulgatae lectionis omnino sequendam esse existemus, tamen non negamus lectionem S. Hieronymi habere etiam bonum sensum, si ita exponatur : *Supra dorsum meum araverunt arantes, prolongaverunt sulcum suum*, id est, *supra dorsum meum jugum gravissimum posuerunt*, et me quasi bove abusi araverunt arantes, et non parvo tempore me jugum ferre compulerunt, sed tempore longissimo, quoniam longissimum sulcumducere voluerunt.

Vers. 4. 4. DOMINUS JUSTUS CONCIDIET CERVICES PECCATORUM : CONFUNDANTUR ET CONVERTANTUR RETRORSUM OMNES QUI ODERUNT SION.

Consolatur nunc Propheta populum Dei, prædicens non procul abesse vindictam divinam in impios persecutores justorum, quasi dicat : Bono animo estote, justi, quoniam persecutores qui dem vestri injuste dorsum, sive cervicem vestram nunc premunt : sed paulo post Dominus justus juste cervices ipsorum non premet, sed concidet, et in frusta comminuet gladio suo, ut nunquam amplius vobis nocere possint; et tunc demum confundentur, qui antea superbe exultabant, et convertentur retrorsum fugientes et carentes omnes illi qui oderunt et persequeban-

tur populum Domini. Observa primo, illud, *concidet*, in textu græco et hebraico esse in præterito, *concidit*. Sed tamen S. Hilarius et S. Augustinus legunt et exponunt, *concidet*; proinde videtur fuisse varia lectio in textu græco, quam illi sequi sunt. Hebraica vero lingua facile patitur mutationem temporum, ut possimus præteritum accipere pro futuro. Itaque non est facile mutanda lectio nostra latina. Sed sive legamus *concidit*, sive *concidet*, sensus constat. Deus enim jam concidit cervices multorum persecutorum, ut Pharaonis, Nabuchodonosoris, Balthasaris, Antiochi, Neronis, Domitiani, Diocletiani, et similium; et in futuro etiam concidet cervicem omnium aliorum, qui similiter persecutores piorum, velerunt, vel sunt. Observa secundo, pro verbo *cervices*, in hebraeo esse *laqueos*, sive *funes*; sed verisimile est Septuaginta non legisse *לְבָבָי*, ut nunc est in hebraeo, sed *לְבָבָי*, quod *cervices* significat, sive *dorsum*; nec minus verisimile est Davidem conservasse eamdem similitudinem, et sicut dixerat *supra dorsum meum*, ita postea addidisse *concidet dorsa*, ut ostendat simili pena puniendos peccatores, sed graviore. Observa tertio, quod dicitur Deus *concidere cervices peccatorum*, intelligi de peccatoribus superbis, vel obstinatis; nam peccatoribus, qui humiliiter confitentur peccata sua, et emendare cupiunt, Deus non concidit cervices, sed medetur languoribus ipsorum. Observa quartto, illa verba, *confundantur et convertantur retrorsum*, non esse proprie imprecationem, sed prædictionem, ut sæpe monuimus. Sed si quis velit accipere, ut verba sonant, poterit pie imprecationem exponere, ut nimis sit imprecatio bona confusionis, quæ penitentiam adducit, et conversionis a peccatis ad Deum; sed prior expositio est magis ad litteram.

5. FLANT SICUT FOENUM TECTORUM, QUOD, PRIUS- Vers. 5.
QUAM EVELLATUR, EXARUIT.

6. DE QUO NON IMPLEVIT MANUM SUAM, QUI ME- Vers. 6.
TIT, ET SINUM SUUM, QUI MANIPULOS COLLIGIT.

Alia est imprecatio, quæ similiter prædictio nem nota: significat enim brevissimam fore persecutorum felicitatem, et mirabili amplificatione comparat eam fœno, quod est res per se vilis et fragilis, et, sicut dicitur in Evangelio: « hodie est, et cras in elibanum mittitur ; » sed non contentus fœno comparasse, addit similem esse fœno, quod non in campis, sed in tectis domorum nascitur, id est, herbas minutissimæ, quæ nascitur super tecta, quæ nullius est pretii, nullique usui aptæ: ac propterea nemo illam metit, neque in manipulos redigit, sed arescere et perire permitit. Sed quamvis hæc amplificatio sit apud nos, qui nihil videmus vilius et fragilius, tamen cum ad judicium novissimum venerimus, fortasse hæc non amplificatio, sed extenuatio nobis videbitur, quid enim erit tunc cernere viros quondam potentissimos et ditissimos, et qui se domos suas

regnis et imperiis stabilivisse crediderant, cernere, inquam, abjectos projici in locum totius mundi infimum? Et qui deliciis et voluptatibus assueti, ne levissimum quidem incommodum ferre poterant, sempiternis cruciatibus addictos videre, sine ulla consolatione in æternum perseveraturos?

Vers. 7. **7. ET NON DIXERUNT QUI PRÆTERIBANT : BENE-DICTIO DOMINI SUPER VOS : BENEDIXIMUS VOBIS IN NOMINE DOMINI.**

Quia dixerat fœnum tectorum non solere meti et colligi, addit non futurum etiam, ut messoribus ejus a prætereuntibus benedicatur, quomodo benedici solet messoribus tritici, vel fœni, quod in campis nascitur et crescit; quod pertinet ad majorem confusionem iniquorum, qui fœno nascenti in tectis comparati sunt. Dicit igitur: Non

contigit vobis, neque continget ut qui transeunt per vias benedicant iis qui vos metunt; nulli enim vos metent, sed qui tecta purgant projiciunt vos in ignem, vel in cloacam. Quamvis autem benedictio prætereuntium proprie ad messores pertineat, tamen redundat etiam in id quod metitur; precantur enim prætereuntes, ut copiosa et matura sit messis; sic igitur benedictionis carrentia et privatio redundabit in ipsos iniquos, quibus in judicio novissimo nemo benedicet, nemo eorum miserebitur; sed ab omnibus despiciunt et contemnuntur, quod ad maximam eorum ignominiam pertinebit. Nemo igitur illis dicet: «Benedictio Domini super vos;» neque dicet: «Benedicimus vobis in nomine Domini;» sed contra potius a Christo justice et ab omnibus Sanctis ejus dicetur: «Ite, maledicti, in ignem æternum.»

PSALMUS CXXX.

SECUNDUM HEBREOS.

V. v. — 1. *Canticum graduum.*

De profundis clamavi ad te, Domine: 2. Domine, exaudi vocem meam.

Fiant aures tuæ intendentes in vocem deprecationis meæ.

3. Si iniquitates observaveris, Domine: Domine, quis sustinebit?

4. Quia apud te propitiatio est, et propter le-gem tuam sustinui te, Domine.

Sustinuit anima mea in verbo ejus: 5. spe-ravit anima mea in Domino.

6. A custodia matutina usque ad noctem speret Israel in Domino.

7. Quia apud Dominum misericordia, et co-piosa apud eum redemptio.

8. Et ipse redimet Israel ex omnibus ini-quitatibus ejus.

V. s. n. — *Canticum graduum.*

De profundis clamavi ad te, Domine; Domine, exaudi vocem meam:

Fiant aures tuæ intendentes ad vocem deprecationis meæ.

Si iniquitates observabis, Domine, Domine, quis sustinebit?

Quia tecum est propitiatio: cum terribilis sis.

Sustinui Dominum, sustinuit anima mea: et verbum ejus exspectavi: anima mea ad Dominum: a vigilia matutina usque ad vigiliam matutinam, exspectet Israel Dominum.

Quia apud Dominum misericordia, et multa apud eum redemptio.

Et ipse redimet Israel ex omnibus ini-quitatibus ejus.

Argumentum. — Totius populi, ut versus duo postremi ostendunt, preces continens Psalmus, in exilio compositus. Strophæ duæ: vers. 1-4, precatio; 5-8, spes.

1. *Canticum ascensionum.*

Ex profundis (aquis, i. e. mersus malis) voco te, Jova.

2. Jova, audi vocem meam,

sint aures tuæ attentæ voci deprecationis meæ.

3. Si delicta serves (memoria; Hengstenb. observes), Jova, Jova, quis stabit (non condemnabitur)?

4. *Minime vero*: nam tecum (apud te) *est* condonatio, ut timearis (colaris, ut Deus misericors).

5. Opperior Jovam, opperitur anima mea,
et verbum ejus exspecto.
6. Anima mea *exspectat* Jovam,
magis quam custodes mane,
custodes mane.
7. Exspecta, Israel (alius, *speret Israel*), Jovam,
nam cum Jova (apud Jovam) *est* gratia,
et multum cum eo liberationis (vel *redemptionis*).
8. Isque liberabit (vel *redimet*) Israelem
ab omnibus delictis (delictorum poenitentia) ejus.

BELLARMINI EXPLANATIO.

PSALMUS CXXIX.

TITULUS ET ARGUMENTUM.

Canticum Graduum Salomonis.

Pro defunctis recitari solitus Psalmus in Ecclesia. Brevis hic Psalmus est, sed plenus saluberrima doctrina, ut non sine causa in Ecclesia praeter cæteros frequenter; unus est ex gradualibus, quia deplorat miseriæ exsilio; unus est etiam ex penitentialibus, quia docet rationem agendi veram poenitentiam; pro defunctis quoque recitari solet in Ecclesia frequentissime, quoniam si dicatur in persona animarum in purgatorio detentarum, omnia optime quadrant: nam et animæ illæ sunt in quodam profundo, et ascendere cupiunt, et exspectant misericordiam Dei per Redemptoris nostri præmium. In summa tria continet, orationem ad Deum, exhortationem ad populum, et prædictionem redemptioñis futuræ.

EXPLICATIO PSALMI.

Vers. 1. 1. DE PROFUNDIS CLAMAVI AD TE, DOMINE : DOMINE, EXAUDI VOCEM MEAM.

Oraturus Propheta Deum, primo postulat audiendam, deinde exponit petitionem suam. Audiendum postulat in primis duobus versiculis. Incipit autem a similitudine hominis jacentis in ima valle, vel in profundo puto, qui nisi magna voce clamet, non potest exaudiri ab iis qui sunt in altissimo monte; et vere aptissima similitudo est: nam licet Deus sit ubique per essentiam et potentiam, tamen ratione dissimilitudinis homo peccator longissime distat a Deo. Deus enim semper est justus et beatus, et in altis habitat; homo peccator semper est malus, et miser, et similis Jonæ prophetæ, qui cum Deo noluisset obedire, dejectus fuit non solum in profundum maris, sed etiam in profundum ventrem ceti; et tamen

Oratio fervens omnia perrumpit et penetrat. Dicit autem David: « De profundis, » non *de profundo*, quia verus penitentis ex duobus profundis clamare debet: ex profundo miseriæ, tanquam ex valle lacry-

Verus penitentis ex duabus profundis propriæ miseriæ: qui enim non cogitat et non

cognoscit profundum in quo est, non curat inde clamare ascendere, sed contemnit; et sic in majus profundum cadit, juxta illud Prov. xviii: « Impius cum in profundum venerit, contemnit; » qui autem profunda consideratione intelligit se exullem esse, peregrinum, et in magno periculo versari, ne forte ad patriam nunquam perveniat, et quod infinitæ miseriæ est, se jam in inferno inferiore, si non presentia, certe merito peccatorum suorum jam locum habere cœpisse, non potest non toto corde horrere et pavere, et magno affectu clamare ad eum, qui solus potest eum ex tam horrendo profundo eripere, et manum ad ascendendum porrigit. Sequitur: « Domine, exaudi vocem meam, » id est, quamvis in profundo sim, et tu in altis habites, tamen quia magna voce clamo, potes me exaudire; ideo peto ut exaudiendas vocem meam.

2. FIANT AURES TUÆ INTENDENTES IN VOCEM Vers. 2. DEPRECATIONIS MEE.

Non sufficit ut quis magna voce clamet, ut audiatur, sed requiritur ut is ad quem clamatur, attendat. Sæpe enim fit ut quis ita animum fixum habeat in alia re, ut non attendat ad vocem loquentis secum: et tunc frustra sonitus verborum pulsat ad aures ejus. Deus autem om-

*

nia quidem semper videt, et audit; sed quando non facit quod petimus, videtur ita se gerere, ac si non attenderet ad vocem orantis, quasi alia cogitaret; ideo David omnino audiri cupiens, non contentus magna voce clamasse, rogit etiam ut Deus dignetur attendere, id est, admittere preces, et donare quod petitur.

Ver. 3. 3. SI INIQUITATES OBSERVAVERIS, DOMINE, DOMINE, QVIS SUSTINEBIT?

Captata jam audientia, exponit petitionem suam, quae est, ut Deus non judicio utatur secum, sed misericordia; non rigide querat rationem debitorum, sed misericorditer ea condonet. Sed hanc petitionem non simpliciter proponit, ne nimis audax videatur, sed illam involvit in ratione propter quam Deus moveri potest ad eam concedendam, quae est mirabilis rhetorica et ab ipso Spiritu Sancto hausta. Sic igitur loquitur:

« Domine, si iniuitates » hominum observare volueris, omnes condemnabis; non decet autem infinitam bonitatem tuam omnes omnino perdere; igitur non debo nimis audax videri, si peto ut peccata mihi condones et de hoc profundo eruas: in quod me iniuitas sola demersit.

Quod attinet ad verba, nomen *iniuitates* tes pro significat omnia genera peccatorum, ut sunt prævaricatio legis, ut dicitur I Joan. iii « : Et peccatum est iniuitas, » alioqui enim non omnia peccata proprie sunt iniuitas, id est, injustitia, cum alia sint peccata luxuria, alia superbia, etc. Illud, *observaveris*, in textu originali et in editione Septuaginta proprio significat *custodire*, ut sensus sit: Si iniuitates, quae sunt debita quædam nostra, in tuo libro rationum diligenter custodias, ut exigas de illis rationem, nemo nostrum tibi satisfaciet; ideo peto ut eas de libro tuo deleas, et misericorditer indulgeas, cum solvendo non simus. Illud autem, *quis sustinebit?* non significat patienter *expectare*, ut paulo infra, « propter legem tuam sustinui te, Domine; » sed significat *sustinere in iudicio*, sive *in reddenda ratione non deficere*: quamvis enim in latina editione idem sit verbum in hoc versiculo, et in sequenti, tamen in textu hebraico et græco sunt verba diversa. Vere autem si Deus sine misericordia nos judicare velit, nemo omnino subsistet; nam offendio in Deum est infinitæ magnitudinis, et nos sine gratia ejus non solum condigne satisfacere non possumus, sed neque sufficienes sumus ad peccati gravitatem agnoscendam, vel ad dolorem pro admisis concipiendum, vel ad pœnitentiam ipsam inchoandam; præterea nos non scimus numerum neque gravitatem peccatorum nostrorum, nam « delicta quis intelligit? » Deus autem scit exactissime numerum peccatorum, et in libro suo omnia scripta tenet. « Tu quidem, inquit Job, gressus meos dinumerasti; » idem etiam scit, et solus cognoscit gravitatem infinitam peccati mortalis; quomodo ergo po-

terit homo tam ignorans et tam infirmus reddere rationem tam sapienti calculatori et tam potenti exactori? Itaque sicut potest homo se in puteum dejicere, sed non inde ascendere; ita potest peccare, sed non satisfacere, nisi misericorditer adjuvetur.

4. QUIA APUD TE PROPITIATIO EST, ET PROPTER LEGEM TUAM SISTINUI TE, DOMINE.

Vera pœnitentia, quam in hoc Psalmo pœnitentiali Propheta nos docet, duo potissimum requirit, cognitionem propriæ miseriæ et cognitionem misericordiæ divinæ: qui enim miseriam propriam ignorat, non querit medicinam, nec agit pœnitentiam; qui misericordiam Dei nescit, Qui m serico diam I nescit despera venia desperat veniam, et pœnitentiam inutilem agit. Igitur Propheta in tribus versiculis præcedentibus ostendit se plane cognoscere miseriam suam, cum de profundo elamet, et cum dicat peccata ejusmodi esse, ut si Deus ex solo judicio agere velit, nemo subsistere possit: nunc ostendit se nosse etiam misericordiam Dei maximam, et ideo non obstante magnitudine, vel multitudine peccatorum, se sperare veniam et salutem. Sic igitur ait: « Quia apud te propitiatio est, et propter legem tuam sustinui te, Domine; » id est, quamvis nemo subsistere possit, si observare velis iniuitates nostras, ego tamen quia novi te ex natura misericordem esse, et scio apud te inveniri propitiationem, et quia tu legem posuisti tibi, ut cum impenitentibus severissime te geras, cum pœnitentibus misericorditer et suaviter, ideo « propter hanc legem tuam sustinui te, Domine, » sperans et exspectans indulgentiam peccatorum. Nota illud, *quia*, non reddere rationem superiorum, sed sequentium, nimurum ejus quod dicitur: « Sustinui te, Domine. » Nota præterea illud, *apud te propitiatio est*, ab Augustino referri ad pretium sanguinis Redemptoris, qui vere est propitiatio pro peccatis totius mundi; tamen hoc loco simplicior intelligentia esse videtur, ut sensus sit: quia tu facile propitiaris pœnitentibus; nam de pretio redemptionis agitur in fine Psalmi, ut paulo post videbimus. Illud autem, *propter legem tuam*, non significat legem quam nobis dedit (nam secundum illam nos condemnaret, non absolveret), sed legem suam, quam ipse servare solet, juxta illud: *Omnes viae Domini misericordia et veritas; et alibi: Misericordiam et iudicium cantabo tibi.* Itaque Deus juxta legem suam, id est, quam sibi ipse prescrivit, primo peccatoribus misericordiam offerit, ut pœnitentiam agant; deinde justitiam, si impenitentes esse perseverent. Recte ergo S. Augustinus dicit hic agi de lege charitatis, non de lege justitiae. Sed mira est in codicibus varietas; nam in hebraeo est, *ut timearis*, vel, ut S. Hieronymus reddit, *cum terribilis sis*; in græco, *propter nomen tuum*; in latino, *propter legem tuam*. Quæ tamen varietas facile tolli poterit, si verbum he-

braicum *thirvare* legatur cum aliis punctis, *thorah*, et sine dubio Septuaginta Interpretes legerunt *thorah*, id est, *legem*; neque obstat quod *thorah* in fine habeat litteram *he*, et *thirvare* habeat litteram *aleph*; nam illae sunt litterae permutabiles, et sepe una ponitur pro alia. Porro græca exemplaria variant, ut Chrysostomus notavit, et alia habent, *propter nomen tuum*; alia, *propter legem tuam*; quam lectio optima est, et eam habent S. Hilarius, S. Hieronymus, S. Augustinus et S. Gregorius in commentariis hujus loci; neque difficile fuit in græco textu ponere *nomen*, *pro lege*, cum in græco idiomate *nomen* et *lex* iisdem fere scribantur litteris. Itaque lectio latina Vulgatae editionis omnino conservanda est, cum a vero textu hebraico et græco non discordet, et habeatur in commentariis sanctorum Patrum, et sensum optimum faciat. Verbum *sustinui* in hebraico et græco clarius est: significat enim *exspectare*, sive *sperare*, quod etiam declaratur in verbis sequentibus hujus Psalmi.

Vers. 5: 5. SUSTINUIT ANIMA MEA IN VERBO EJUS : SPERAVIT ANIMA MEA IN DOMINO.

Hic jam incipit exhortatio ad alios, quos exemplo suo hortatur ad spem in Deo ponendam. Ego, inquit, in profundo miseriarum fui; sed non desperavi de misericordia Dei, siquidem anima mea peccatorum vulneribus saucia « sustinuit, » id est, *exspectavit* medelam; « in verbo ejus, » id est, *juxta promissionem ejus*. Sæpe enim Deus per Mosem in Deuteronomio et alibi promisit indulgentiam penitentibus. « Cum quæsieris, inquit Deuter. iv, Dominum Deum tuum, inveneries eum, si tamen toto corde quæsieris, et tota tribulatione animæ tuae. » Hinc ipse David in *Psalm. cxviii*, dicebat: « Memento verbi tui servo tuo, in quo mihi spem dedisti. » Quod autem paulo obscurius dixerat, iterum repetit verbis clarissimis dicens: « Speravit anima mea in Domino, » nimurum indulgentiam se accepturum, quam petebat. Multum autem valere debet Davidis exemplum: fuit enim ipse in profundo miserarium, sive culpam, sive pœnam respicias; culpa ejus gravissima fuit, nam adulterium commisit, cum abundaret uxoribus; occidit militem innocentem, qui sibi fidelissime serviebat; offendit Deum, a quo acceperat regnum et donum prophetiæ, item robur, pulchritudinem, prudentiam, divitias, etc. Sed etiam in profundo miseriarum fuit, quando persequebatur eum rex Saul, ut sæpe in periculo mortis fuerit: et tamen quia non desperavit, sed speravit potius, liberatus est.

Profan-dum mi-seriarum in Davi-de.

Vers. 6: 6. A CUSTODIA MATUTINA USQUE AD NOCTEM, SPERET ISRAEL IN DOMINO.

Quod ego, inquit, facio, totus Israel, id est, omnis populus Dei faciat, speret videlicet in Domino, cum in quocumque profundo fuerit: sive

peccatis, sive peccatorum pœnis prematur, in Dei adjutorio confidat. « A custodia matutina usque ad noctem, » id est, tota die, a summo mane, usque ad noctem extremam, ita ut nullo tempore desinat sperare in Domino. Dicitur autem *custodia matutina*, sive *vigilia matutina*, tempus auroræ; nam veteres dividebant noctem in quatuor partes, quarum quilibet tres horas continebat; et dicebantur *custodiæ*, sive *vigiliæ*, quia custodes, sive vigiles civitatum vel castorum, tribus horis vigilando custodiebant civitatem sive castra, ac deinde tradiebant alteri officium vigilandi et custodiendi. *Custodia* igitur *matutina* est tempus a nona hora noctis usque ad exortum solis. In codice hebraico et græco bis repetitur *custodia matutina*, et in hebreo non habetur, usque ad noctem. Ex quo videtur latina Vulgata editio partim esse mutila, partim redundans, cum non habeat bis, *a custodia matutina*, ut habeat hebraica veritas; et habeat, usque ad noctem, quod non habet eadem veritas hebraica. Sed si quis diligenter omnia consideret, videbit lectionem latiniæ Vulgatae editionis cum hebraica veritate plane congruere. Nam S. Hieronymus ex hebreo ita reddidit: *A custodia matutina usque ad custodiæ matutinam*, et Vulgatus latinus interpres hoc ipsum significavit, cum posuit: « A custodia matutina usque ad noctem; » non enim dixit: *A custodia matutina usque ad vesperam*, quasi per diem tantum, et non per noctem sperare debeamus in Deo, sed usque ad noctem, totam videlicet, quæ terminatur in custodiæ matutinam, sive auroram, quæ in Evangelii dicitur quarta vigilia noctis. Itaque idem est, ac si dixisset: *A summo mane usque ad summam noctem*, sive ab initio diei, usque ad finem noctis; et hoc modo acceperunt hanc sententiam Chrysostomus et Euthymius, qui scripserunt admoneri hoc loco fideles, ut tota die et tota nocte sperent in Domino. Ratio cur tota die et nocte sperandum sit, duplex est: una, quia semper in periculis versamur, nec est momentum in quo Dei auxilio non egeamus; altera, quia in omni tempore licet sperare in Domino, et semper accepta est conversio et pœnitentia, sive id fiat mane, id est, in adolescentia, sive in meridie, id est, in virilitate, sive ad vesperam, id est, in senectute, et sive fiat de die, id est, tempore prosperitatis, sive de nocte, id est, tempore adversitatis. Scio textum hebraicum paulo aliter distinguiri, quam textum græcum vel latinum; sed quoniam id accedit ex punctis recens a Rabbinis additis, non est difficile, remotis punctis, distinctionem eamdem in codicibus omnibus invenire. Fateor quidem græcos codices, qui habent: *A castodia matutina usque ad noctem, a custodia matutina speret Israel in Domino*, non omnino concordare cum codice hebraico, et cum latina Vulgata editione; sed credibile est in codice græco aliquid redundare, quod forte re-

Divisio
noctis in
quatuor
partes
apud ve-
teres.

lictum est ex adjunctione alieujus alterius versionis, ad versionem Septuaginta Interpretum. Fortasse etiam variae sunt lectiones editionis græcae : nam Chrysostomus videtur omnino legisse in codice græco, ut nos legimus in latino.

Vers. 7. **7. QUA APUD DOMINUM MISERICORDIA, ET COPIOSA APUD EUM REDEMPTIO.**

Reddit rationem cur oporteat semper in Deo confidere, et simul prædictit redemptions generis humani, quæ futura erat per Jesum Christum Dominum nostrum. Merito sperare possumus in Domino tota die et nocte, quoniam apud ipsum « misericordia est. »

Misericordia quidem extra Deum opera misericordiæ; unde dictum est : opera extra Deum : sed in piis hominibus participatio quædam misericordiæ; sed ipsa misericordia apud Deum tantummodo reperitur, inque solo ejus sinu reponitur. quis autem potest miseras tollere, nisi qui miser esse non potest? quis potest defectus omnes curare, nisi qui defectu omni caret, et omnipotens est? Deo soli proprio convenit, quod idem Propheta dicit : « Tu, Domine, suavis et mitis, et multa misericordiæ omnibus invocantibus te. » Itaque rectissime sancta mater Ecclesia in precibus Deum appellans dicere solet : « Omnipotens et misericors Deus; » neque solum sperare debemus in Deum, quoniam apud eum « misericordia est, » sed etiam quoniam apud eumdem « copiosa redemptio est; » nam misericordia Dei, quæ generi humano misereri decreverat : ut justitiae quoque satisfaceret, invenit ipsa pretium magnum, sanguinem videlicet Unigeniti, qui redimeret copiosissime omnes omnino captivos. Potuit enim homo seipse vendere sub peccato, et a divina justitia subjici diabolo tanquam tortori, cui homo consenserat ad peccatum; sed non potuit ullo modo seipse redimere, neque de potestate diaboli eruere. Ergo quod homo non potuit, misericordia divina fecit, ut per san-

guinem Unigeniti fieret. Sed hæc redemptio apud Deum erat, cum Psalmus iste scriberetur, id est, in consilio et decreto Dei; nunc autem « misericordia Domini plena est terra, » quando quotidie pretium illud in redemptionem captivorum expenditur, unde ab Apostolo dicitur : « Empti estis pretio magno, glorificate et portate Deum in corpore vestro, » I Cor. vi; et clarius a B. Petro : « Non corruptilibus auro, vel argento redempti estis, sed pretioso sanguine quasi Agni immaculati et incontaminati Christi, » I Petri i. Dicitur autem hæc redemptio copiosa, tum quia « propitatio est pro peccatis nostris, et non tantum nostris, sed etiam totius mundi, » I Joan. ii; tum quia non solum hoc pretio redimimur a captivitate, sed etiam evehimur ad participacionem hæreditatis et regni, ut simus « hæredes Dei, cohæredes autem Christi, » Rom. viii.

8. **ET IPSE REDIMET ISRAEL EX OMNIBUS INQUI- TATIBUS EJUS.**

Redemptio quæ erat apud Deum, tum plane manifestabitur, cum redimetur Israel, id est, populus Dei, non ut Judæi carnales exspectant a potestate regum temporalium, sed ab omnibus iniquitatibus suis. Quod angelus de Jesu Christo exposuit, cum ad S. Joseph ait, Matth. i : « Vocabis nomen ejus Jesum: ipse enim salvum faciet populum sumum a peccatis eorum. » Hæc redemptio jam quidem inchoata est, sed perfectissime complebitur in die novissimo, cum liberabimur non solum a peccatis, sed etiam a pœnis omnibus peccatorum, et a periculo deinceps pecandi, quod significavit David in Psal. cii, cum ait : « Quantum distat ortus ab occidente, longe fecita nobis iniquitates nostras; » et initio Psalmi : « Qui propitiatur omnibus iniquitatibus tuis, qui sanat omnes infirmitates tuas, qui redimit de interitu vitam tuam, qui replet in bonis desiderium tuum, » etc.; et perspicue Daniel cap. ix : « Ut consummetur prævaricatio, et finem accipiat peccatum, et deleatur iniquitas, et adducatur justitia sempiterna. »

PSALMUS CXXXI

SECUNDUM HEBRÆOS.

V. v. — 1. *Canticum graduum David.*

Domine, non est exaltatum cor meum : neque elati sunt oculi mei.

Neque ambulavi in magnis, neque in mirabilibus super me.

2. Si non humiliter sentiebam, sed exaltavi animam meam :

Sicut ablactatus est super matre sua, ita retributio in anima mea.

V. s. h. — *Canticum graduum David.*

Domine, non est exaltatum cor meum, neque elati sunt oculi mei.

Et non ambulavi in magnis, et in mirabilibus super me.

Si non proposui, et silere feci animam meam :

Sicut ablactatus super matrem suam : ita ablactetur super me anima mea.

3. Speret Israel in Domino, ex hoc nunc et usque in sæculum. Exspecta, Israel, Dominum : amodo et usque in æternum [*h. in sæculum*].

Argumentum. — Contestatur de animo humili et demisso suo auctor, et quod alienissimus sit ab omni insolentia et elatione, contra potius se totum a Deo pendere.

1. Canticum ascensionum, Davidis *carmen*.

Jova, non effert se cor meum, neque elati sunt oculi mei,
nec versor in rebus magnis et altioribus me.

2. Si non (i. e. certe) complanavi et compescui animam meam;
ut *infans* ablactatus apud matrem suam,

ut *infans* ablactatus, *sic apud me est anima mea*.

3. Exspecta, Israel, Jovam,
ex nunc et usque in sempiternum.

NOTE.

Vers. 2. Maurer : Quemadmodum qui a lacte depulsus est puer ubera non amplius appetit, sic ego eorum, quæ olim ardentissime cupiveram, desiderium omne nunc deposui. Hengstenberg : Tam expersum omnis fastus et superbæ, quam puer recens ablactatus; in ea enim actate nihil adhuc esse potest *ἐνεργέατις* elatum et superbum, et imprimis ablactationis tempore, quo infantes miserrimi esse solent. Alius : *Si non quietam et docilem servari animam meam sub manu tua, ut est ablactatus infans super sua matre, quemadmodum ablactatus matris lacte privatur, ita sit apud me anima mea*, sua caret gratia et auxilio. — Vers. 3. Alius, *speret Israel in Jova*, etc.

BELLARMINI EXPLANATIO.

PSALMUS CXXX.

TITULUS ET ARGUMENTUM.

Canticum Graduum.

Cantat in hoc Psalmo David humilitatis suæ virtutem, et cantat non coram tribus, aut quatuor hominibus, sed in theatro orbis terræ; et tamen cum hoc sit vobementer se laudare, non facit contra praeceptum illud *Proverb. xx* : « Laudet te alienus, et non os tuum; extraneus, et non labia tua. » Siquidem, ut laudare se turpe est, cum absque necessitate id fit; sic non se laudare, quando necessitas id requirit, stultum est. Itaque B. Paulus, qui dixerat : « Non qui seipsum commendat, ille probatus est, sed quem Deus commendat, » seipse mirifice commendavit in II *ad Corinth.* cap. x, quia vidit id necessarium esse ad pseudoapostolorum calumnias retundendas. David igitur in hoc Psalmo humilitatis virtutem sibi ipse tribuit, quoniam sæpe accusatus fuerat superbæ et ambitionis, a quo vitio maxime abhorrebat. Lib. I *Reg. cap. xvii*, dicit ad eum frater ejus : « Ego novi superbiam tuam et nequitiam cordis tui; » lib. eodem cap. xxxi et alibi, sæpe Saul queritur de Davide, quod illi insidiaretur; et lib. II *Reg. cap. xvi*, Semeli, maledicens Davidi, objicit ei quod regnum Saulis invaserit. David igitur ad ejusmodi calumnias refellendas Deum vocat in testem summae suæ humilitatis, ac modestiæ singularis. Præterea, etiamsi nulla calumnia præcessisset, poterat humilitatem suam prædicare, non ut virtutes suas factaret, sed ut ostenderet se, quamvis robore, potestate, sapientia, et opibus omnibus hominibus sui temporis in Palestine excelleret, tamen non in suis viribus fiduciam unquam posuisse, et ideo debere omnes alios ad ipsius exemplum in solo Deo sperare ut in fini Psalmi dicitur. Est autem hic Psalmus ex Gradualibus unus, quoniam docet in quo humilitas vera consistat, et nulla est via securior ad ascendendum, humilitate, dicente Domino : « Omnis qui se humiliat, exaltabitur. »

EXPLICATIO PSALMI.

Vers. 1. 1. DOMINE, NON EST EXATATUM COR MEUM, NEQUE ELATI SUNT OCULI MEI.

Securus Propheta, quod vera dicturus esset,

Deum ipsum alloquitur, quem nemo fallere potest; dicit autem coram Deo se vitio superbæ nunquam fuisse obnoxium, sive cor internum, sive signa oculorum externa considerentur. Multi

enim occulte superbi sunt in corde suo, magni se aestimantes : tamen extrinsecus humilitatem simulant; multi etiam non minus elato supercilie despiciunt proximos suos, quam eos corde tumido atque inflato contemnant. David autem neque cor elatum, neque elatos oculos gerebat; sed erat humilis corde, et eam humilitatem oculis præferebat.

Vers. 2. **2. NEQUE AMBULAVI IN MAGNIS, NEQUE IN MIRABILIBUS SUPER ME.**

Dixit de superbia cordis et oculorum : nunc addit de superbia verborum et operum : aliqui enim jactant se posse facere, vel fecisse, aut esse facturos majora et mirabilia, quam revera possint; et hoc modo ambulant, sive ascendunt super se inter loquendum; aliqui etiam reipsa præsumunt aggredi opera que superant vires ipsorum, et isti ambulant, sive ascendunt supra seipso opere et factis. David autem stabat in gradu suo, in vera humilitate fundatus, et ideo neque loquendo, neque operando ambulabat super seipsum in magnis et mirabilibus, id est, neque gloriabatur se magna et mirabilia fecisse supra vires suas; neque tentabat facere, que sciebat se non posse perficere.

Vers. 3. **3. SI NON HUMILITER SENTIEBAM, SED EXALTAVI ANIMAM MEAM.**

Vers. 4. **4. SICUT ABLACTATUS EST SUPER MATRE SUA : ITA RETRIBUTIO IN ANIMA MEA.**

Non contentus Propheta ipsi Deo, qui corda serutatur, dixisse se ab omni superbia semper abhorruisse, id ipsum confirmat juramento execratorio, ut tanto major fides ipsius verbis ab omnibus habeatur. Dicit igitur : « Si non humiliter sentiebam » de me ipso, « sed exaltavi animam meam; » vel, ut significantius loquitur textus originalis : *Si non composui me ad æqualitatem cum cæteris, sed supra cæteros me extuli.* « Sicut ablactatus est super matre sua, » id est, sicut infans recens ablactatus manet in sinu, vel super genua matris suæ, moestus et plorans, quia privatus est dulcedine lactis, quæ pro illo tempore summæ deliciae ipsius erat: « ita retributio in anima mea » sit, id est, sic anima mea privetur dulcedine consolationis divinæ, quæ meæ potissimum ac pene solæ deliciae sunt. Quantum sit hoc supplicium, quod sibi Propheta sanctissimus imprecatur, soli illi intelligere possunt, qui eodem spiritu repleti gustaverunt quam dulcis sit Deus. Quod enim David nihil faceret opes et delicias terrenas, et ipsam regiam celsitudinem ac maiestatem, pra amorem divinæ suavitatis, Psalmi ab ipso compositi, tanquam amatoria cantica, manifeste testantur. « Quam magna, inquit *Psalm. xxx,* multitudine dulcedinis tuæ, Domine, quam abscondisti timentibus te! » et rursus *Psalm. xxxii :* « Gustate et videte, quoniam suavis est Domi-

nus; » et *Psalm. xxvi :* « Tibi dixit cor meum exquisivit te facies mea, faciem tuam, Domine, requiram, ne avertas faciem tuam a me; » et *Psalm. lxxvi :* « Renuit consolari anima mea, memor fui Dei, et delectatus sum; » et *Psalm. lxxxv :* « Lætica animam servi tui, quoniam ad te, Domine, animam meam levavi; quoniam tu, Domine, suavis et mitis; » et *Psalm. ciii :* « Ego vero delectabor in Domino; » et *Psalm. lxiii :* « In velamento alarum tuarum exultabo, adhaesit anima mea post te; » denique in *Psalm. lxxx :* « Quid mihi est in cœlo, et a te quid volui super terram, Deus cordis mei, et pars mea Deus in æternum? » et *ibid.* : « Mihi autem adhaerere Deo bonum est, » quasi dicat : Quærant alii bona quæcumque, sive in cœlo, sive in terra; « mihi adhaerere Deo » summum « est bonum, » ipse Deus est cordis mei, ipse pars, hereditas, portio, omne meum bonum, ipso uno contentus sum, et in æternum ero. Cum ergo David humilis et simplex, quasi infans lactaneus, in lacte divini amoris omne suum bonum haberet, non poterat sibi majus aliquod malum imprecari, quam ut fieret sicut infans ante tempus ablactatus, qui consolationem nullam admittit, cum se ab uberibus matris removeri videt. Quod attinet ad verba, illud, *si exaltavi animam meam*, ex hebræo vertit S. Hieronymus, *si silere feci animam meam.* Sed Septuaginta non legerunt *Ἐπειδὴν οὐκέτι*, quod est *silere feci*, sed *Ἐπειδὴν οὐκέτι*, quod est *exaltavi*: nam litteræ *τ* et *τ* in hebræo simillimæ sunt; neque dubitare debemus quin libros correctiores habuerint Septuaginta Interpretes, quam S. Hieronymus habuerit. Sic etiam : « Ita retributio in anima mea, » S. Hieronymus ex hebræo reddit, *ita ablactata ad me anima mea.* Sed in hebræo eadem vox *ablactatum* et *retributionem* significat, punctis paululum immutatis : nam *לְבָנָה gamul* est *ablactatus*, *לְבָנָה gemul*, *retributio*. Igitur Septuaginta, ubi habetur *ablactatus*, legerunt *gamul*; ubi habetur *retributio*, legerunt *gemul*. S. Hieronymus autem utробique legit *gamul*; sed lectio Septuaginta, cui concordat nostra Vulgata editio, est longe melior, tum quia vix intelligi potest quid sit, *ita ablactata ad me anima mea*; tum quia secundum lectionem Septuaginta habetur in hebræo elegantiissima allusio vocis *retributionis* ad vocem similem *ablactati*.

5. SPERET ISRAEL IN DOMINO EX HOC NUNC ET Vers. 5. USQUE IN SECULUM.

Ex hac Psalmi conclusione intelligi potest quod tendat illa humilitatis prædicatio : non enim vir vere humilis propositum habuit se laudandi, sed admonendi populum suum quam parum de se præsumere, et quam multum in Deo confidere debeat. Ait igitur : « Speret Israel in Domino, » id est, si ego rex et propheta, non me efferre audeo propter potentiam et sapientiam, neque de me ipso præsumo, sed omnem spem meam in

Deo collocatam habeo, certe par est, ut populus
meus Israel, qui etiam populus Dei est, non se
existimet aliquid esse, cum nihil sit, neque in

viribus suis confidat, sed speret in Domino, et
non hodie solum, aut cras, sed omni tempore
speret.

V. v. — 1. *Canticum graduum.*

Memento, Domine, David, et omnis mansuetudinis ejus :

2. Sicut juravit Domino, votum vovit Deo Jacob :

3. Si introiero in tabernaculum domus meæ, si ascendero in lectum strati mei :

4. Si dedero somnum oculis meis et palpebris meis dormitionem,

5. Et requiem temporibus meis, donec inveniam locum Domino, tabernaculum Deo Jacob.

6. Ecce audivimus eam in Ephrata : invenimus eam in campis silvæ.

7. Introibimus in tabernaculum ejus : adorabimus in loco, ubi steterunt pedes ejus.

8. Surge, Domine, in requiem tuam, tu et arca sanctificationis tuæ.

9. Sacerdotes tui induantur justitiam, et sancti tui exultent.

10. Propter David servum tuum, non avertas faciem Christi tui.

11. Juravit Dominus David veritatem, et non frustrabitur eam : De fructu ventris tui ponam super sedem tuam.

12. Si custodierint filii tui testamentum meum, et testimonia mea hæc, quæ docebo eos :

Et filii eorum usque in sæculum sedebunt super sedem tuam.

13. Quoniam elegit Dominus Sion : elegit eam in habitationem sibi.

14. Hæc requies mea in sæculum sæculi : hic habitabo, quoniam elegi eam.

15. Viduam ejus benedicens benedicam : pauperes ejus saturabo panibus.

16. Sacerdotes ejus induam salutari : et sancti ejus exultatione exultabunt.

17. Illuc producam cornu David : paravi lucernam Christo meo.

18. Inimicos ejus induam confusione : super ipsum autem efflorebit sanctificatio mea.

V. s. h. — *Canticum graduum.*

Memento, Domine, David, et omnis afflictionis ejus.

Qui juravit Domino, votum vovit Deo [h. potenti] Jacob.

Si intravero in tabernaculum domus meæ, si sedero [h. ascendero] super lectum straminis [h. stratus] mei.

Si dedero somnum oculis meis, et palpebris meis dormitionem.

Donec inveniam locum Domino : tabernacula [al. tabernaculum] Deo [h. potenti] Jacob.

Ecce audivimus illum in Ephrata : invenimus illum in regione saltus.

Intremus in tabernacula [al. tabernaculorum] ejus : adoremus scabellum pedum ejus.

Surge, Domine, in requiem tuam, tu et arca fortitudinis tuæ.

Sacerdotes tui induantur justitia, et sancti [h. misericordes te] tui laudent.

Propter David servum tuum, ne avertas faciem Christi tui.

Juravit Dominus David veritatem, non [al. et non] avertetur ab ea :

De fructu ventris tui ponam super sedem tuam [h. thronum tuum].

Si custodierint filii tui pactum meum, et testificationem meam quam docuero eos :

Et filii eorum usque in æternum, sedebunt super thronum tuum.

Quoniam elegit Dominus Sion : desideravit eam in habitaculum suum [h. sibi].

Hæc est requies mea in sempiternum : hic habitabo, quia desideravi eam.

Venationem ejus benedicens benedicam : [al. add. et] pauperes ejus saturabo pane.

Sacerdotes ejus induam salutari, et sancti [h. misericordes] ejus laude laudabunt.

Ibi oriri faciam cornu David : paravi lucernam Christo meo.

Inimicos ejus induam confusione : super ipsum autem florebit diadema ejus.

Argumentum. — « Hunc Psalmum nonnulli in dedicationem templi Salomonici , alii in templi secundi inaugurationem... referunt Salomonis ætati repugnat, quod tristior est Psalmi sonus ; cf. imprimis vers. 15. De Serubabelis ætate quominus cogites, obstat vers. 10, ubi *regem* intelligendum esse clarissime perfacet ex vers. 11, 12, 17, 18... Nos igitur compositum putamus carmen iis temporibus, quibus res Iudeorum ad finem vergere cœperunt, fortasse in Josiam regem post instaurata ab illo Jovæ sacra ad prescriptum legis Mosaicæ nuper inventæ. » Maurer. Stropheæ quatuor : vers. 1-5, Davides constituit locum stabilem condere arcae sacræ; vers. 6-9, propositum peregit; vers. 10-12, promissa tunc facta Davidi utinam Jova nunc præstet; vers. 13-18, nam Sionem sedem suam sempiternam, regisque populique florentissimum per omnes ætates statum esse voluit.

1. Canticum ascensionum.

Memento, Jova, Davidi
omnis ærumnæ ejus.

2. Qui juravit Jovæ,
voxit Forti (Deo) Jacobi :
3. « Si (certe non) ingrediar tentorium domus meæ (domum meam),
non condescendam lectum stratorum meorum;
4. Non dabo somnum oculis meis,
palpebris meis soporem :
5. Donec invenero locum pro Jova,
ædes pro Forti (Deo) Jacobi. »
6. « En , audivimus eam (arcam) esse in Ephrata,
invenimus eam in campis Jaar.
7. Eamus igitur ad ædes ejus (Jovæ),
prosternamus nos ad scabellum pedum ejus (arcam).
8. Surge, Jova, ad quietem tuam (locum quietis tuum),
tu et arca potentiae tuæ.
9. Sacerdotes tui vestiant se justitia,
et pii tui lætas voces tollant. »
10. Propter Davidem, servum tuum,
ne repellas faciem uncti tui.
11. Juravit Jova Davidi veritatem,
non recedet ab illa :
« De fructu ventris tui collocabo in solio tibi (successorem).
12. Si observent filii tui feedus meum,
et præcepta mea, quæ docui eos,
etiam filii eorum in sempiternum sedebunt in solio tibi. »
13. Nam elegit Jova Sionem,
voluit esse habitationem sibi (dicens) :
14. Hæc est quies (ad quietem sedes) mea in sempiternum,
hic habitabo, nam volui eam.
15. Cibos ejus (Sionis) benedicam (abundantes reddam),
pauperes ejus satiabo pane.
16. Et sacerdotes ejus vestiam salute,
et pii ejus (faciam ut), lætas voces tollant.
17. Ibi (Sione) germinare faciam cornu Davidis,
Parabo lucernam (prosperitatem) uncto (regibus) meo.

18. Hostes ejus vestiam pudore,
et in ipso (uncto) micabit (gloriose splendescet) diadema ejus.

NOTÆ.

Vers. 1. Omnem recordare laborem et sollicitudinem, quibus Davides se ipsum afflixit cultus tui restituendi causa : cf. I Paral. xiii, 3; II Sam. vi, 9. Alexandrinus, quasi legerit *anevatho*, vertit *mansuetudinis*, quo pietatem ac religionem videtur intellexisse.— Vers. 5. Donec sedem stabilem condidero arce sacrae.— Vers. 6. *Ephrata*, i. e. in finibus Ephraimitarum, puta silunte. *Campis Jaar*, i. e. in Kiriath-Jearim oppido (I Sam. vii, 1; II Sam. vi, 2). Verba Davidis continuantur.— Vers. 7. *Eamus* in Ephrata et in campos Jaar, ubi est arca, invitaturi Jovam ad occupandam sedem Sioniam : ita Maurer. Alius : Olim inveniebamus arcam in Ephrata, etc.; nunc vero eamus in montem Sionem, sedem arce stabilem.— Vers. 9. *Justitia*, salutis et felicitatis causa. Maurer, *salute*, ad parallelismum. Alii, *ornatu sacro*, quod friget. Hic absolvuntur Davidis verba.— Vers. 10. Accedit jam ad id, cuius causa Davidis de Jovæ sacris merita hucusque laudaverat. *Uncti tui*, regis alicujus, Davidis successoris.— Vers. 15. *Cibos*. Vulgatus, qui vertit *viduam*, *xix*, pro *bitæ*, legit in cod. Alexandrino vetusto.— Vers. 18. *Ejus* : Maurer, *suum*, puta hujuscem uncti (regis); Hengstenberg : *Davidis*. Vulg. *sanctificatio mea*, a *nazar*, separavit, a *communi usu segregavit*; fortasse intellexit laminam auream summi pontificis, in qua scriptum : *Sanctum Domino*, ut rex ille simul sit sacerdos, quod de Messia verum est.

BELLARMINI EXPLANATIO.

PSALMUS CXXXI.

TITULUS ET ARGUMENTUM.

Canticum Graduum.

Psalmum hunc vel Salomon composuit, cum, ædificato templo, intulit arcam Domini in locum ei preparatum, vel certe compositum a Davide, sibique datum ad concinendum post templi ædificationem Salomon cecinit : id perspicuum est tum ex fine cap. vi in lib. II *Paralipom.*, tum ex tota serie hujus Psalmi, ac præcipue ex illis verbis : « Propter David servum tuum, non avertas faciem Christi tui. » Continet autem ad litteram Psalmus hic, primo, commemorationem ardentissimi desiderii, quo tenebatur David ædificandi templi; secundo, petitionem ad Deum, ut stabilitur regnum in domo David, ut sanctificantur ministri Domini, et alia id genus, juxta promissiones Dei, quas multa ante David accepérat. Numeratur hic Psalmus inter Graduales, tum quia cani debebat a populo redeunte a captivitate, ut exercitaretur ad imitandum desiderium Davidis, et diligentiam Salomonis in templo reædificando; tum, ut admoneatur spiritualis peregrinus quanto fervore flagrare debeat in ædificando spirituali templo, tum in corde suo, tum in cœlesti Hierusalem, cum pro templo lapideo, in quo arca lignea locum quietis acceptora erat, tam ingenti desiderio arserit cor Davidis, et sumptus prope infinitos fecerit Salomon, et tantos labores suscepérunt longissimo tempore multa hominum multitia. Nam, ut legimus in lib. III *Reg.* cap. iii, erant octoginta millia latomorum, et septuaginta millia portantium onéra, et tria millia trecenti præfecti operum. Neque tamen supervacanea aut nimia dicenda sunt, cum ad illius honorem pertineant, cuius magnitudinis non est mensura vel finis.

EXPLICATIO PSALMI.

Vers. 1. **1. MEMENTO, DOMINE, DAVID, ET OMNIS MAN-**
SUETUDINIS EJUS.

Verba Salomonis hæc sunt, qui Deum orat per merita patris sui David. « Memento, » inquit, Davidis amici tui, et meritorum ejus inter quæ præcipuum fuit studium mansuetudinis. Illud, *memento*, non arguit oblivionem in Deo, sed significat Deum, quando non miseretur filiorum viri justi, ita se gerere quasi non recordaretur, quid apud se vir ille justus meruerit. Nihil igitur isto modo loquendi significatur, nisi Deum orari velle Deorsim vult per merita hominum justorum, et propter eadem

merita multa concedere, quæ alioqui minime concessisset. Id cognosci potest ex lib. III *Reg.* cap. xi, ubi Deus per Prophetam loquitur ad Hieroboam, ac dicit se valde irritatum esse peccatis Salomonis, sed tamen conservaturum illi regnum omnibus diebus vitæ suæ, « propter David servum suum, qui custodivit mandata et præcepta sua; » ex quo loco appetat orationem hujus Psalmi fuisse exauditam. Meminit autem Salomon mansuetudinis Davidis, omissis aliis virtutibus, tum quia mansuetudo in Davide potissimum eluxit, ut patuit ex eo quod noluit Saulem occidere, cum posset, cum tamen ab eo sine ulla

per merita
ta homi-
num jus-
torum.

Davidis
mansue-
tudo.

causa quereretur ad mortem, lib. I Reg. xxiv; tum etiam quia mansuetudo mirabiliter placet in oculis Dei, quia individua comes est humilitatis et charitatis, et quia similem facit hominem Deo, qui « suavis et mitis est, et multæ misericordiae omnibus invocantibus eum, » Psalm. lxxxv. Itaque ante Davidem, Moses amicus Dei maximus fuit, quia « mitissimus erat super omnes homines, » Num. xii; et post Davidem Christus Dominus, plenus gratia et veritate, non aliam virtutem magis in se imitandam esse docuit, cum ait: « Discite a me, quia mitis sum et humilis corde, » Matth. xi. Neque repugnat mansuetudini Davidis, vel Mosis, quod uterque multos homines occiderit; neque mansuetudini Christi, quod ejerit ex templo ementes et vendentes, mensasque eorum subverterit: nam mansuetudo non est contraria justitiae; imo soror est zeli honoris Dei; et honoris qui facile tolerat injurias proprias, quod est mansuetudinis, aptior est ad vindicandas injurias Dei et proximi, tum quia omnes vident eum non moveri ex affectu proprio, sed ex solo justitiae zelo; tum quia oblitus quodam modo sui, totus occupari potest in Dei honore querendo et propagnando. S. Hieronymus ex hebreo vertit: *Memento, Domine, David, et omnis afflictionis ejus.* Sed vox hebraica קָרְבָּן, quam hebrei humiliari eum reddere solent, potest cum aliis punctis legi קָרְבָּנָה, quod significat, mansuetudinis ejus; et sic legerunt Septuaginta Interpretes.

- Vers. 2.** 2. SICUT JURAVIT DOMINO, VOTUM VOVIT DEO JACOB.
Vers. 3. 3. SI INTROIERO IN TABERNACULUM DOMUS MEÆ, SI ASCENDEREO IN LECTUM STRATI MEI.
Vers. 4. 4. SI DEDERO SOMNUM OCULIS MEIS, ET PALPEBRIS MEIS DORMITIONEM.
Vers. 5. 5. ET REQUIEM TEMPORIBUS MEIS, DONEC INVENIAM LOCUM DOMINO, TABERNACULUM DEO JACOB.

Effectum exponit Salomon mansuetudinis et humilitatis David patris sui: quoniam enim mitis erat et humilis corde, indignum putabat ut ipse haberet domum ad habitandum, et lectum ad quiescendum; et arca Dei non haberet sedem stabilem, templum videlicet, in quo honorifice permaneret, sed huc et illuc transferretur: properterea juravit et vovit se non intraturum domum suam, nec in lectum ascensurum, imo etiam neque extra lectum dormitetur, aut quietem ullam capturum, donec inveniret locum quietis arcæ Dei. Quando David hoc votum voverit, non habetur expresse in divinis Litteris; sed tamen colligi videtur ex lib. II Reg. vii, ubi David dicit ad Nathan prophetam, se constituisse ædificare templum Domino, eo quod erubesceret ipse habitare in domo cedrina, dum arca Dei maneret in tentorio. Sed eadem nocte jussit Deus per Nathan significari Davidi, non velle ut ipse ædificaret templum, sed hanc provinciam filio suo relinqueret;

quod ipsum repetit ipse David in lib. I Paralip. cap. xxii et xxviii. Sed quæstio est, quid proprie David voverit. Qui Hebræos sequuntur, existimant Davidem ignorasse ubi Deus vellet sibi erigi templum, et ideo voluisse se non acceptum ullam quietem, donec sibi a Deo locus templi revelaretur; ac ne nimis longo tempore cogant Davidem extra domum sub dio manere, addunt hoc votum susceptum fuisse a Davide, quando vedit angelum percutientem populum, et illo ipso die revelatum ei fuisse per Gad prophetam velle templum sibi ædificari in area Ornan Iebusæi in monte Moria, II Reg. cap. xxiv. Sed ista sine fundamento dicuntur, et ad fabulas Rabbinorum fortasse rejici possunt: non enim de situ templi, sed de ipso templo ædificando sollicitus erat David; neque vovisset quod non erat in sua potestate, quale est, habere Dei revelationem, sed quod ipse prestare poterat suo sumptu et labore. Quando igitur dicit: « Donec inveniam locum Domino, » per locum non intelligitur situs, sed templum, quod erat futurum locus, id est, habitatculum Dei: quod explicatur per vocem sequentem, « tabernaculum Deo Jacob, » id est, donec tale templum extruxero, ut in eo digne possit arca Domini collocari. Verum est quidem situm templi fuisse a Deo demonstratum Davidi, ut dicitur in II Paral. cap. iii; sicut etiam demonstrata fuerant omnia, quæ ad templum pertinebant, ut dicitur I Paral. cap. xxviii: « Omnia, inquit, venerunt scripta manu Domini ad me; » sed nulla fit eo loco mentio juramenti, aut voti; neque vero, si David juravit se non ingressurum in domum suam, donec exstrueret templum, periculum erat ne nimis diu pernoctaret sub dio; verba enim illius juramenti amplificationem continent Scripturæ divinæ familiarem: proprie autem significant sollicitudinem magnam rei faciendæ. Simile est illud in I Psal.: « Sed in lege ejus meditabitur die ac nocte; » et illud Psalm. xxxiii: « Benedicam Dominum in omni tempore, semper laus ejus in ore meo; » et clarius Isaï. cap. lxii: « Super muros tuos constitui custodes, tota die et tota nocte in perpetuum non tacebunt; » et Prov. cap. vi, præscribit Salomon talen sollicitudinem ei, qui promisit aliquid proximo suo, qualem hoc loco tribuit Davidi, dicens: « Discurre, festina, suscita amicum tuum, ne dederis somnum oculis tuis, nec dormitent palpebre tue. » Simile est illud in Testamento novo: « Oportet semper orare, et nunquam deficere, » Luc. cap. xviii; et cap. xxi: « Vigilate itaque omni tempore orantes. » Neque enim ista significant omni hora et omni momento esse orandum, sed habendam esse orationem in maximis negotiis, et non permittendum ut ab aliis terrenis occupationibus impediatur. Sic igitur juramentum illud intelligimus: « Si introiero in tabernaculum domus meæ, » id est, juro me non intraturum in domum meam,

ita ut obliiscar domus Dei ædificandæ. « Si ascendero in lectum strati mei, » id est, juro me non ascensurum in lectum strati mei, ita ut non cogitem de lecto, id est, de loco templi, ubi proprie arca Domini requiescit. « Si dedero somnum oculis meis, et palpebris meis dormitionem, » id est, juro me non dormiturum, neque dormitaturum, ita ut non vigilem circa templum Domini erigendum; « et requiem temporibus meis, » id est, juro me non compositurum caput meum ad quiescendum, ita ut quiescam a sollicitudine domus Domini preparandæ. Quod juramentum et votum, quod in se fuit, accuratissime adimplevit, ut intelligi potest ex verbis ejus, I Paralip. cap. xxix : « Ego, inquit, totis viribus meis præparavi impensas domus Domini Dei mei: aurum ad vasa aurea, argentum in argentea, æs in ænea, ferrum in ferrea, lignum in lignea; et lapides onychinos, et quasi stibinos, et diversorum colorum, omnemque pretiosum lapidem, et marmor Parium abundantissime, et super hæc, quæ obtuli in domum Dei mei, de peculio meo aurum et argentum in templum Dei mei, exceptis his, quæ præparavi in ædem sanctam, tria millia talenta auri de auro Ophir, et septem millia talentorum argenti probatissimi ad deaurandos parietes templi. » Ac præter has ingentes opes, paravit etiam idem David descriptionem omnium partium templi, atriorum, porticuum, cœnaculorum, exedrarum et similium rerum, ac præterea omnium ornamentorum, ut habetur I Paralip. cap. xxviii. Hæc omnia typi fuerunt, ac figuræ veri Davidis Christi, qui ut templo vivum et tabernaculum æternum Deo pararet, pernoctans in oratione, vere non intrabat in domum suam, neque ascendebat in lectum suum, neque dabat oculis somnum, neque temporibus requiem; « et non corruptibilis auro, vel argento, » sed pretioso sudore, ac sanguine pretiosissimo paravit sibi « gloriosam Ecclesiam non habentem maculam, neque rugam, » et civitatem illam ædificavit in cœlis, quam vidit S. Joannes in Apocalypsi ornatam « omni lapide pretioso, » Apoc. cap. xxi. Ex his denique unusquisque nostrum intelligere debet, quanta vigilantia, sumptu et labore sit opus, ut in corde nostro templum Domino erigamus.

Vers. 6. 6. ECCE AUDIVIMUS EAM IN EPHRATA, INVENI-MUS EAM IN CAMPIS SYLVÆ.

Adfert rationem, cur David optaverit templum Domino ædificare, quoniam arca Domini sedem propriam et stabilem non habebat. « Ecce, inquit, audivimus eam, » arcum videlicet, fuisse « in Ephrata, » id est, in terra Ephraim, quando videlicet erat in Silo tempore Samuelis, I Reg. iv; deinde « invenimus eam in campis sylvæ, » I Reg. cap. vi, quando dimissa a Philisteis inventa est in agro Josue Bethsamite, quem esse locum sylvosum perspicuum est ex proxima civitate Caria-

thiarim, quo fuit transportata ex agro Josue: nam *Cariathiarim* dicitur civitas sylvarum. Sed singula verba consideremus: per pronomen *eam*, dicimus significari arcum, ut Chrysostomus, Euthymius et alii docent; tametsi enim antea nominata non fuerit, tamen significata est implicite in illis verbis: « Donec inveniam locum Domino, tabernaculum Deo Jacob; » neque enim Dominus, et Deus Jacob eget loco pro se, sed pro arca sua, in qua ipse tanquam in sede sua manere, vel tanquam in scabello pedes habere videbatur, cum inde responsa daret. Quod autem S. Hieronymus reddit ex hebræo, *audivimus eum in Ephrata, invenimus eum in campis sylvæ*, nos movere non debet; nam fieri potest ut S. Hieronymus inciderit in textum corruptum: nunc enim in hebræo habetur *eam*, non *eum*, ut etiam in codice græco et latinis omnibus; et hoc modo Patres legunt. Per vocabulum *Ephrata*, exposuimus terram Ephraim, in qua erat Silo, ubi longo tempore mansit arca: quamvis enim *Ephrata* in uno, vel in altero loco Scripturæ significet *Bethlehem*, tamen hoc loco non potest Bethlehem significare, cum in ea non legatur unquam fuisse arca Domini, et cum minore fundamento alii quidam per *Ephrata* hoc loco intelligi volunt Hierusalem, quod non longe absit a Bethlehem. Per *campos sylvæ*, non desunt, qui intelligent aream Ornan Jebusæi, quæ erat in monte Sion, quos irridet S. Hilarius, quia nihil simile habet area cum sylva. Alii intelligunt *Cariathiarim*, quæ interpretatur *civitas sylvarum*: sed Scriptura non dicit inventam fuisse arcum in civitate, sed in campis; et verbum *invenimus* significat casu inventam, cum esset amissa: cum autem esset in *Cariathiarim*, non erat querenda, vel invenienda tanquam amissa, cum in ea civitate studiose collocata fuisse. Respicit igitur Scriptura, ut nos diximus, ad illud tempus, quo arca jamdudum a Philisteis capta, inventa est in agro Josue Bethsamite, quo eam detulerant vaccæ indomitiæ, quibus a Philisteis fuerat alligata. Verba illa, *audivimus* et *invenimus*, volunt quidam significare arcum fuisse in Silo ante tempora Davidis, sed Davidis tempore fuisse in *Cariathiarim*: ideo enim de priore mansione dictum esse *audivimus*, quia non ipse viderat, sed a majoribus accepérat; de posteriore dictum esse *invenimus*, quia tempore suo id acciderat. Sed nos existimamus non esse verum, Davidis tempore fuisse arcum inventam in *campis sylvæ*; fuit enim eo loco inventa post septem menses a captivitate sua, ut patet ex lib. I Reg. cap. vi, quo tempore David nondum natus erat, ut ex collatione temporum manifeste colligitur. Itaque verba illa non dicuntur a Davide, vel a Salomone in persona sua, sed in persona populi; et idcirco dicitur in numero multitudinis: « Audivimus eam in Ephrata, invenimus eam in campis sylvæ, » quasi dicat: *Audivimus* a majoribus

nostris arcam aliquando fuisse in Silo, in terra Ephraim, et rursum postea invenimus et vidi-
mus eam «in campis sylvæ;» non enim deerant
senes qui ejus rei meminisse potuissent: ex quo
refellitur argumentum, quo nonnulli demonstrari
putant hunc Psalmum non fuisse compositum a
Salomone, quia videlicet ipse nondum natus
erat, quando arca inventa est in campis sylvæ.
Si enim hoc argumentum concluderet, demons-
traretur etiam Psalmum non fuisse a Davide com-
positum; nam neque ipse natus erat, quo tem-
pore arca Dei reperta est in campis sylvæ.

Vers. 7. **7. INTROIBIMUS IN TABERNACULUM EJUS, ADORA-
DIMUS IN LOCO, UBI STETERUNT PEDES EJUS.**

Exposito voto et desiderio patris sui Davidis,
reducturus Salomon arcam in templum a se aedi-
ficatum, ait: «Introibimus in tabernaculum ejus,»
id est, fuit haec tenus Dominus quasi hospes in va-
riis locis, sed nunc habebit stabilem domum, et
ideo nos introibimus «in tabernaculum ejus»
jam erectum et constructum in monte Sion, et
«adorabimus in loco ubi steterunt pedes ejus,»
id est, adorabimus conversi ad arcam sanctam,
quæ est scabellum, ubi steterunt, ac stare solent
pedes ejus. Sic enim sanctuarium in interiori
parte tabernaculi constructum erat, ut arca esset
quasi scabellum pedum Domini, et super aream
esset propitiatorium, quasi sedes Domini, quæ
tenebatur a duobus Cherubim. Itaque illud, *adorabimus in loco*, positum est pro, *adorabimus in locum*, vel *adorabimus locum*, ut in hebræo clari-
rus est: *Adorabimus scabellum pedum ejus*. Adorabunt enim Hebræi arcam, non ut Deum, sed ut
scabellum pedum ejus, unde dicitur etiam in *Psalm. xcvi*: «Adorate scabellum pedum ejus,
quoniam sanctum est.» Est autem hoc loco no-
tandum, verbum *adorandi* in hebræo proprie signi-
ficare, *incurvare se*, et ideo construi cum da-
tivo, vel cum accusativo addita præpositione *ad*,
ut: *Incurvate vos arcæ*, vel *ad arcam*, et non recte
diceretur: *Incurvate vos arcam*, et hæc est ratio,
cur aliquando Interpretes vertant, *adorate ad sca-
bellum*, aliquando, *adorate scabellum*, quia ali-
quando servant phrasim hebraicam, aliquando
latinam.

Vers. 8. **8. SURGE, DOMINE, IN REQUIEM TUAM, TU ET
ARCA SANCTIFICATIONIS TUÆ.**

Introducturus Salomon arcam in templum magnificissime aedicatum, poetico more eam
invitat ad templum ingrediendum et inhabitan-
dum. «Surge, inquit, Domine,» de loco, ubi
haec tenus quasi hospes habitasti, et ingredere in
domum tuam propriam, in qua deinceps re-
quiesces, id est, unde non transibis de loco ad
locum, ut usque modo fecisti. Explicat autem
se loqui Domino, non ut est in se, sic enim cœli
cœlorum Deum non capiunt, ut idem Salomon
alibi dicit; sed ut peculiari modo in arca testa-

menti erat, quia ex illa responsa dabat, et ideo
addit: «Tu et arca sanctificationis tuæ,» id est,
tu cum throno tuo et scabello pedum tuorum:
quod scabellum est arca sanctificationis tuæ, id
est, arca, in qua et per quam tu ab omnibus qui
illam sciunt, sanctificaris et honoraris. In hebræo
habetur, *arca fortitudinis tuæ*, et hoc modo legi-
tur in II Paral. cap. vi, non solum in textu he-
braico, sed etiam in græco et latino. Videntur
igitur Septuaginta Interpretes hoc loco voluisse
non tam reddere verbum, quam explicare sen-
tentiam. *Arca* enim *fortitudinis Dei* dicitur, quia <sup>Area i
titudi
Dei.
quid</sup>
per eam ostendit Deus fortitudinem suam; nam
Josue iii, cum arca intrasset Jordanem, portanti-
bus eam sacerdotibus, continuo aquæ Jordanis
conversæ sunt retrorsum; item *Josue* vi, cum arca
septies civitatem Hierico circuisset, muri Hierico
corruerunt. Item lib. I Reg. cap. v, cum area
capta fuisset a Philistæis, et posita in templo
idoli Dagon, mane sequenti inventus est Dagon
jacens pronus in terra coram arca, et quo cum
que circumferretur arca a Philistæis, interficiebat
innumerabiles homines, ita ut Philistæi dicarent:
«Non maneat apud nos arca Dei Israel, quia
dura est manus ejus super nos, et super Dagon
deum nostrum.» Denique Bethsamitæ cum ar-
cam Dei ad se delatam curiose inspexissent, os-
cisi sunt supra quadraginta millia ex ipsis, ut
habetur lib. I Reg. cap. vi; et cum Osa teligisset
arcam Dei, continuo a Deo occisus est, II Reg.
cap. vi. Sed hæc ipsa fortitudo Dei, quæ per ar-
cam demonstrabatur, efficiebat ut Deus ab om-
nibus sanctificaretur, timeretur et honoraretur.
Siquidem Bethsamitæ, cum interficerentur ob ar-
cam Dei a se visam, dixerunt: «Quis poterit
stare in conspectu Domini Dei sancti hujus?» In
idem igitur recidit, *arca fortitudinis tuæ*, ut ha-
betur in hebræo, et *arca sanctificationis tuæ*, ut
habetur in codice græco et latino.

**9. SACERDOTES TUI INDUANTUR JUSTITIAM, ET Vers.
SANCTI TUI EXULTENT.**

Introducta jam arca in templum, orat Salomon
primo pro sacerdotibus, secundo pro rege, id est,
pro se: nam ab his dependet salus totius populi.
Sacerdotes enim regunt populum in spiritualibus,
et reges in temporalibus. Pro sacerdotibus duo
quædam postulat, ut sint justi et sancti, quales
esse debent, ut recte fungantur officio suo, et ut
alacriter Deum laudent, quod est proprium eo-
rum munus. Debent enim pro se et pro toto po-
pulo reddere Deo tributum laudis et gratiarum
actionis, pro beneficiis, quæ omni tempore acci-
pimus a Deo, et gratias agendo, ac laudando
benefactorem, provocare benignitatem ejus ad
continuanda et augenda beneficia. Dicit igitur:
Oro, Domine, ut per gratiam tuam «sacerdotes
tui induantur justitiam,» id est, non solum justi
sint intus in corde et animo, sed etiam exterius in
omni eorum vita, in verbis et operibus cernatur

justitia, et nihil turpe in eis appareat, qui tibi ministraturi et populum tuum docturi sunt. Metaphora enim indumenti ad hoc adhibetur, ut intelligamus quemadmodum vestis tegit turpitudinem, et ornat hominem, ac distinguit a cæteris: ita debere sacerdotes per opera justitiae id efficeret, ut nihil turpe in eis appareat, et per eximiam sanctitatem discernantur a reliquo populo, et non possit dici: « Sic populus, sic sacerdos. » « Et sancti tui exultent, » id est, et iidem sacerdotes, qui sancti tui proprie sunt, cum ad ministrandum tibi sanctificati et dedicati sint, exultent alacriter laudando te, et sic bene fungantur munere suo. In hebræo habetur, et sancti tui laudent te, sive jubilent tibi; ex quo intelligimus exultationem, quam in nostro textu habemus ex græco, non esse quamcumque exultationem, sed exultationem in laudando Deo, et gratias agendo illi, sive dum sacrificant, sive dum psallunt. Et si tanta justitia, et sanctitas, et alacritas requirebatur in sacerdotibus illis qui sacrificabant oves et boves, et laudabant Deum pro temporalibus beneficiis, quid, quæso, requiritur in sacerdotibus illis, qui sacrificant divinum Agnum, et gratias agunt pro beneficiis sempiternis? vñ nobis misericordia, qui ministerium altissimum sortiti, tam procul absumus a fervore, quem Salomon in umbraticis sacerdotibus exigebat!

Vers. 10. 10. PROPTER DAVID SERVUM TUUM, NON AVERTAS FACIEM CHRISTI TUI.

Orat nunc pro rege, id est, pro se, Salomon, et ut facilius impetrat, adducit merita patris sui Davidis. Orat autem ut, quandocumque accesse rit ad precandum Deum, Deus exaudiat orationem ejus. « Propter David, inquit, servum tuum, » id est, propter fidele obsequium, quod tibi præstabilit pater meus dum in terris vixit; « ne avertas faciem Christi tui, » id est, non facias ut ego, qui loco patris mei unctus sum in regem populi tui, confusus recedam a te, rejecta videlicet prece mea, et eo modo facias me avertire faciem meam a te. Quod enim avertere faciem orantis, sit eum non exaudire, sed confusum dimittere, perspicuum est ex lib. III Reg. cap. II, ubi cum mater Salomonis dixisset: « Petitionem unam parvulam ego deprecor a te, ne confundas faciem meam; » respondit Salomon: « Pete, mater mea, neque enim fas est ut avertam faciem tuam. » Sed quamvis hæc vera sint, tamen video mihi altiorem sensum in his verbis videre. Omne bonum nostrum in duplice respectu positum est, in respectu pio Dei ad nos, et in respectu nostro pio ad Deum, ut videlicet ille nos patris pietate respiciat, et nos illum filiorum pietate respiciamus; mutuus enim iste pietatis aspectus fons est et origo bonorum omnium, sed prior est respectus Dei, et ab illo respectu noster oritur. « In hoc (inquit Joannes in Epist. cap. IV) est charitas, non quasi nos dilexerimus Deum, sed quoniam ipse prior dilexit

nos. » Itaque Deus, dum nos diligit, facit etiam nos diligere, et dum nos respicit ut filios, facit ut eum respiciamus ut patrem: quamvis autem non peccando, libere avertamus faciem a Deo, tamen si Deus respicere nos voluerit et misereri, respiciendo et miserendo faciet ut peccare non libeat, et ut faciem a Deo non avertamus; vel si averterimus, iterum convertamus. Quomodo *Luc.* cap. XXI, quando conversus Dominus respexit Petrum jam aversum, continuo illum convertit, ita ut « egressus foras amare fleverit; » atque hoc est, quod David orat in *Psalm.* XXIV: « Respice in me, et miserere mei; » et hoc loco Salomon: « Ne avertas faciem Christi tui, » id est, ne sinas averti a te faciem meam, quod facies, si non avertis a me faciem tuam.

11. JURAVIT DOMINUS DAVID VERITATEM, ET Vers. 11.
NON FRUSTRABITUR EUM: DE FRUCTU VENTRIS TUI
PONAM SUPER SEDEM TUAM.

Hic jam incipit commemorare promissiones factas a Deo Davidi patri suo, ut iis commemoratis facilius impetrat quod petit, cum quasi debitum reposcere videatur. « Juravit, inquit, Dominus David veritatem, » quasi dicat: Juravit David Dominus, se domum illi adificaturum; et Dominus vicissim juravit Davidi se regnum in domo ejus in sempiternum stabiliturum: Deus enim vinci se liberalitate non patitur, et non solum opera, sed etiam voluntates et desideria cumulatissime remuneratur. *Juramentum Dei* significat rei immobilitatem, et hoc loco præsertim, ubi dicitur: « Juravit David veritatem, » id est, rem per se veram ex Dei promissione, certiorem et firmiorem reddidit juramento. Addit postea aliam firmitatem, dicens: « Et non frustrabitur eum, » id est, non faciet irritum juramentum, quod alias dicere solet. « Juravit Dominus, et non poenitebit eum. » Quo loco recte admonet S. Augustinus, poenitentiam in Deum cadere non posse, sed metaphorice dici *pœnitere*, quando rem aliquam mutat; non *pœnitere*, quando non mutat, sed stabilem et firmam esse decernit. Ponit exemplum ex lib. I Reg. cap. XV, ubi Dominus dicit: « Pœnitet me quod constituerim Saul regem, » et in eodem capite dicit Samuel Deum non esse ut hominem, « ut pœnitentiam agat. » Ergo, inquit Augustinus, cum Deus immutabili suo consilio aliquid mutat, propter ipsam rei, non consilii mutationem, *pœnitere* dicitur. Neque multum refert, quod in hebræo et græco legatur: *Non frustrabitur eam*, id est, veritatem promissam, et in latino textu legamus: *Non frustrabitur eum*, id est Davidem, ut legit etiam S. Hilarius: nam sensus est idem. Pergit Salomon, ac docet quæ sit veritas promissa et juramento confirmata a Deo, et ait: « De fructu ventris tui ponam super sedem tuam, id est, dabo tibi successorem in regno filium tuum: quæ verba videntur intelligenda ad litteram de Christo, non de Salomone, nisi forte de Salomone dicantur.

tur, ut typum Christi gerebat; nam de hoc eodem juramento dicitur in *Psalm. LXXXVIII*: « Semel juravi in sancto meo, si David mentiar; semen ejus in æternum manebit, et thronus ejus sicut sol in conspectu meo, et sicut luna perfecta in æternum, et testis in cœlo fidelis. » Itaque illud, *ponam*, cum dicitur: « De fructu ventris tui ponam super sedem tuam, » non significat simpliciter *ponam*, sed *constitua* et *firmabo*: quæ certe Salomonis non conveniunt. Adde, quod B. Petrus, *Act. cap. II*, dicit de Davide: « Propheta cum esset, et sciret quia jurejurando jurasset illi Deus de fructu lumbi ejus sedere super sedem ejus, providens locutus est de resurrectione Christi, quia neque derelictus est in inferno, neque caro ejus vidit corruptionem. » Ubi S. Petrus unam scripturam *Psalmi XXX* exponit ex alia *Psalmi CXXXI*, quem nunc explicamus. Atque hoc est, quod *Luc. I*, angelus dicit ad Virginem: « Dabit ei Dominus sedem David patris ejus, et regnabit in domo Jacob in æternum.

Vers. 12. 42. SI CUSTODIERINT FILII TUI TESTAMENTUM MEUM, ET TESTIMONIA MEA HÆC, QUÆ DOCEBO EOS.

Vers. 13. 13. ET FILII EORUM USQUE IN SÆCULUM, SEDEBUNT SUPER SEDEM TUAM.

Juramentum et promissio sine pœnitentia est de uno filio, id est, de Christo, cuius regni nullus unquam erit finis: sed de aliis filiis promissio conditionata est, id est, « si custodierint testamentum, » hoc est, fœdus Domini de non habendis diis alienis; et si custodierint « testimonia, » id est, præcepta Dei, « sedebunt super sedem tuam, » sin minus, projicientur. Sic enim expressius dicit ipse David Salomonis, *I Paralip. XXVIII*: « Si quæsieris Dominum, invenies eum; si autem dereliqueris eum, projiciet te in æternum; » et paulo ante de eodem Salomone dicit Deus: « Firmabo regnum ejus usque in æternum, si perseveraverit facere præcepta mea et judicia, sicut et hodie; » et in *Psalm. LXXXVIII*, ubi legimus: « Si dereliquerint filii ejus legem meam, visitabo eos in virga virorum; » non addit: « Misericordiam meam non dispergam ab eis; » sed: « Non dispergam ab eo, » id est, a Davide, quia videlicet thronus David erit firmus jugiter, propter æternum Christi regnum, etiamsi regnum terrenum Salomonis et Roboam et similium deficiat et destruatur. Quod attinet ad verba, in hebræo pro *testamento*, est *pactum*, sive *fœdus*; sed Septuaginta vertere solent illam vocem hebraicam, קֹדֶשׁ, per vocem græcam ἱερόν, quæ *testamentum* significat; nec solum Septuaginta, sed etiam B. Paulus *ad Rom. cap. IX*, *ad Gal. cap. IV*, et alibi *testamentum* vocat, quod Hebrei dicunt *fœdus*. Verisimile igitur est vocem illam hebraicam utrumque significare, vel etiam præcipue *testamentum*: major enim fides habenda est Septuaginta Interpretibus, quam Rabbinorum dictionariis; constat autem ex S. Hieronymo in *cap. II. Malach.*, Septuaginta Interpretes

semper vertisse *testamentum*. Fortasse autem dīvina providentia voluit ut in Ecclesia existarent duo ista vocabula, *testamenti* et *pacti*, quoniam revera pactum Dei cum populo non est simplex pactum, sed habet conditiones testamenti, cum sit pactum de hereditate danda, et quod non habuit vim, nisi intercedente morte testatoris Christi, ut dicitur *Hebr. cap. IX*; ad hoc enim significandum Moses aspersit sanguinem, cum pactum nomine Dei cum populo sancivit, *Exod. XXIV*. Et præterea testamentum hoc non est simplex testamentum, sed habet rationem pacti, cum requirat conditionem de observantia mandatorum et perseverantia in fide. Est igitur testamentum simul et pactum. Illud autem, *usque in sæculum*, non conjugitur cum *sedebunt super sedem tuam*, sed cum verbis præcedentibus, *si custodierint filii tui et filii eorum*, ut aperte colligitur ex textu hebraico. Igitur sensus est: Si filii tui et filii eorum custodierint pactum et præcepta usque in sæculum, id est, si perseveraverint in timore Dei, non deturbabuntur a solio regni tui; si autem non perseveraverint, regnum ipsorum ad alios transferetur, ut factum est, et experientia docet.

14. QUONIAM ELEGIT DOMINUS SION, ELEGIT *Vers. EAM IN HABITATIONEM SIBI.*

15. HÆC REQUIES MEA IN SÆCULUM SÆCULI; HIC *Vers. HABITABO, QUONIAM ELEGI EAM.*

Possentaliquo modo hæc accommodari ad arcem, sive civitatem Sion terrenam, ut figura erat Ecclesiæ nunc militantis, et postea triumphantis: elegit enim Deus civitatem illam pro tempore, ut esset civitas regia et sacerdotalis, ita ut ibi esset thronus regius, et etiam templum Domini. Sed tamen quia brevi diruenda erat et evertenda, et regnum ex ea tollendum et templum ipsum incendendum, dicendum est hæc pertinere ad Ecclesiam, quæ est regnum Christi, et ipsa est Hierusalem et Sion, de qua dicitur in *Psalm. II*: « Ego autem constitutus sum Rex ab eo super Sion montem sanctum ejus; » et continuantur hæc verba cum illis: « Juravit Dominus David veritatem, et non frustrabitur eum: De fructu ventris tui ponam super sedem tuam, » id est, juravit Davidi se positurum et stabiliturum filium ejus Christum super sedem ejus, quæ est Sion, quæ ideo dicitur civitas David, quia « elegit Dominus Sion » id est Ecclesiam, in habitationem suam perpetuam; et de ea dixit: « Hæc requies mea in sæculum sæculi, » id est, non deseram unquam hanc Ecclesiam, sed in ea perpetuo requiescam, quoniam transferam eam ad perfectam beatitudinem in cœlis, et ibi habitabo in ea in sempiternum, quoniam firmissimo atque æterno decreto elegi eam. Dicitur autem Deus requiescere, ut S. Augustinus notat, quando facit nos requiescere: tunc autem perfecte requiescimus, quando pars Ecclesiæ peregrinans in terris, perveniet ad eam partem, quæ gloria triumphat in cœlis.

Vera. 16. 16. VIDUAM EIUS BENEDICENS BENEDICAM, PAUPERES EIUS SATURABO PANIBUS.

Hic versiculus cum sequentibus promittit civitati David, quae est Sion, multa bona, quae utcumque applicari possunt terrenæ civitati, ut figura erat Ecclesiæ; sed ipsi Ecclesiæ proprie et perfecte convenient. Primum igitur promittit abundantiam rerum temporalium tantam, ut etiam viduae, quæ solent esse maxime destitutæ, et alii pauperes satiari possint: benedictio enim Dei abundantiam in Scripturis significare solet. Sed haec abundantia in sensu altiore significat copiam cibi spiritualis verbi Dei et sacramentorum, quibus abundant filii Ecclesiæ, illi præsertim, qui sunt spiritu pauperes. Antiqua hæreticorum calumnia occurrit hoc loco breviter refellenda. Rendet enim Calvinus editionem nostram Vulgatam, quod pro *victu* substituerit *viduam*. Dicit enim presbyterum aliquem lusciosum existimasse *c* et *t* esse unum *d*, et sic pro *victum*, legisse *vidum*, et quia *vidum* nihil significat, addidisse *a*, et fecisse *viduam*, et neminem fuisse in Ecclesia nostra qui hanc corruptionem advertere potuerit. Sed facile est calumniam refutare: latinus enim Interpres rectissime vertit, quod invenit in græco; in græco autem sine dubio invenit ριτον, quod *viduum* significat omnium consensu; neque solus noster Interpres in græco legit ριτον, sed etiam Patres, Hilarius, Ambrosius, Augustinus, Chrysostomus, Prosper, Cassiodorus et alii. Imo S. Hilarius meminit utriusque lectionis, et contendit veram lectionem esse *viduam*, et sic lectum fuisse antequam Christus nasceretur. Verum quidem est in hebræo non haberi *viduam*, sed *venationem*, vel *victum*, neque ullam esse similitudinem litterarum, ob quam suspicari quis possit illos scripsisse *viduam*, siquidem *vidua* hebraice dicitur וִדּוֹתָה, et *victus*, seu *venatio* dicitur וִידּוֹתָה, et hanc vocem in omnibus codicibus invenimus: sed in græco idiomate magna similitudo litterarum est inter ριτον, quod significat *viduum*, et ριτον, quod significat *victum*. Igitur necesse est, vel in hebræo mutatum esse textum, et Septuaginta legisse longe aliter, quam modo se habet: et hæc sententia S. Hilarii est; vel in græco textu esse corruptionem factam vitio scriptorum, quia unam literam legerunt pro alia, ut S. Hieronymus putat. Sed in sensu nulla sere diversitas est, cum per utrumque vocabulum significetur abundantiam ciborum fore in civitate Dei. Et quoniam, ut idem Hieronymus dicit, usus obtinuit ut legeretur *vidua*, non est lectio latina ullo modo mutanda, cum non a luscioso sacerdote, ut Calvinus dicit, sed a veneranda antiquitate ortum habuerit.

Vera. 17. 17. SACERDOTES EIUS INDUAM SALUTARI, ET SANCTI EIUS EXULTATIONE EXULTABUNT.

Alterum bonum sanctæ civitatis erit, quod sacerdotes ejus sanctitate et justitia conspicui erunt.

Salus enim animæ justitia est, sicut morbus animæ iniquitas est; et quia precatus fuerat Salomon ut sacerdotes induerentur *justitiam*, ideo nunc Deus dicit se id effecturum, ut sacerdotes induantur *salutari*, id est, salute quæ est eadem cum *justitia*, cum de salute spirituali agatur. Fortasse etiam altiore sensu per *salutare* intelligitur hoc loco Salvator Christus, ut in Cantico Simeonis: « Quia viderunt oculi mei salutare tuum; » et ab hoc loco Psalmi accepit fortasse B. Paulus modum illum loquendi ad Rom. xiii: « Induimini Dominum Jesum Christum, » id est, facite ut in vestris moribus conspiciantur sanctitas et justitia Christi. Illud autem, et *sanceti ejus exultatione exultabunt*, respondet ei quod antea dictum erat: « Et sancti tui exultent; » nam ut eo loco per exultationem intelligebatur laus Dei cum alacritate, ita hic quoque intelligitur; et ut ibi per Santos intelligebantur sacerdotes, ita et hic. Eadem enim verba sunt in textu hebraico in utroque loco.

18. ILLUC PRODUCAM CORNU DAVID, PARAVI LU- VERA. 18.
CERNAM CHRISTO MEO.

Tertium bonum, et quidem maximum, sanctæ Sion erit, quod ibi orietur regnum David: nam pro voce *illuc*, in hebreo et græco est *ibi*. Accipendum est igitur *illuc* pro *illuc*, id est, in Sion. Per *cornu* significatur metaphorice potestas et excellentia regia: ut enim cornu est durissimum et elevatum, ita regia dignitas est potens et supereminens. Significatur autem ad litteram per *cornu David* regnum Messiae, quod erat inchoandum in Sion, et inde per totum mundum propagandum. Explicuit hoc Zacharias in suo cantico *Luc. i*, cum ait: « Erexit nobis cornu salutis in domo David pueri sui; » et idem prædicterunt omnes Prophetæ: Isaías cap. ix: « Super solium David, et super regnum ejus sedebit, ut confirmet et corroboret illud usque in æternum. » Hieremias cap. xxviii: « Ecce dies veniunt, et suscitabo David gerumen justum, et regnabit rex, et sapiens erit, et faciet judicium et justitiam. » Ezechiel, cap. i, non solum prædictit regnum Christi, sed etiam currum ejus triumphalem, qui vehebatur a quatuor animalibus, homine, leone, vitulo et aquila, quæ sunt quatuor Evangelistæ. Daniel cap. ii: « In diebus regnorum illorum suscitabit Deus cœli regnum, quod in æternum non dissipabitur. » Zacharias cap. ix: « Exulta satis, filia Sion. Ecce Rex tuus venit tibi justus et Salvator, ipse pauper, et ascendens super asinam, » etc. Ex quomodo appareat, non posse intelligi versiculum istum Psalmi de Salomone, nec de regno ejus: tunc enim Salomon regnabat et florebat; hic autem de futuro dicitur: *Illuc producam*, id est, oriri faciam et quasi germinare cornu David: quasi aperte prædiceret eversionem regni temporalis, quod tunc vigebat, et suscitandum postea in eadem civitate regnum æternum Messiae. Quod autem sequitur: « Paravi lucernam Christo meo, »

potest duobus modis intelligi. Primum enim per *lucernam* potest intelligi Messias, et per *Christum*, David. Scriptura enim passim vocat *lucernam*, filium sive posteros; nam in filiis parentes vivunt et lucent: vide lib. III Reg. cap. XI et XV; et tunc sensus erit: « Illuc producam cornu David, quia paravi lucernam, » id est, filium, successoremque ejus Messiam, « Christo meo » David: et erit quasi explicatio ejus, quod antea dixerat: « De fructu ventris tui ponam super sedem tuam. » Ut enim hoc non intelligenter carnales Judæi de Salomone, explicatur hoc loco de Messia futuro. Potest tamen etiam aptissime intelligi, ut S. Augustinus exponit, de Praecursore Domini et ipso Domino, ut lucerna sit Joannes, ut Christus sit Dominus Jesus; quoniam enim Messias venturus erat sine opibus et comitatu regio, non facile a Judæis expectantibus Messiam, regem temporalem, agnoscere potuisset, nisi præcessisset Joannes, qui singulari sua sanctitate et vita austerritate omnium oculos in se converteret, instar lucernæ lumentis in caliginoso loco; dicit igitur: « Illuc producam cornu David, » id est, regnum aeternum Messiae, et jam præparavi « lucernam, » id est Praecursorem, qui erit quasi lucerna « Christo meo, » id est, ipsi Messiae; atque ad hunc locum videtur Dominus aspexisse, cum ait Joan. cap. V: « Ipse erat lucerna ardens et lucens.

Vers. 19. 19. INIMICOS EJUS INDUAM CONFUSIONE, SUPER IPSUM AUTEM EFFLOREBIT SANCTIFICATIO MEA.

Prædictit Christum multos habiturum inimicos, ut revera habuit Judæos, qui dixerunt: « Nolumus hunc regnare super nos, » Luc. XVI; et ad Pilatum: « Non habemus regem, nisi Cæsarem, » Joan. XIX. Sed prædictit quoque poenam inimicorum Christi: « Inimicos, inquit, ejus induam confusione, » id est, implebo ignominia maxima, quod etiam impletum esse scimus, et oculis nostris videntur. Nam paulo post Christi mortem venerunt Romani, et, civitate illorum eversa, ipsos magna

strage affecerunt, et eorum qui supererant, alios vilissimo pretio vendiderunt, alios in publicis ludis bestiis objecerunt; et ab illo tempore gens Judæorum ubique servit, ubique contemnitur; sed in die novissimo, non solum Judæi, sed etiam omnes pagani, et haeretici, et omnes falsi fratres, qui Christo in membris ejus inimici fuerunt, induentur confusione. « Super ipsum autem, » id est, super Christum, « effloreat sanctificatio mea. » Illi induentur confusione, Christus induetur gloria: nam sanctificatio, quæ in hoc mundo erat quasi semen in terra absconditum, tunc florebit in gloriam, id est, germinabit flores sanctificationis. Nec solum Christus, sed etiam omnia membra ejus induentur gloria, quia tunc sanctificatio emittet flores incredibilis pulchritudinis, quando gratia vertetur in gloriam. In hebræo vox est נזר, quæ significat *diadema* ejus; sed quamvis Exod. XXIV illa vox significet *tiaram* Pontificis; et lib. IV Reg. XI accipiatur pro corona regia, tamen potest etiam significare *sanctificationem*, ut hoc loco verterunt Septuaginta Interpretes: nam venit a verbo נזר, quod significat *separare* et *consecrare*; unde dicuntur *nazarei*, quasi *sanctificati*, et *consecrati* Deo; et *corona pontificalis* vel *regia* dicitur נזר *nezer*, quia consecrat quodam modo pontificem, vel regem, et a vulgo separat. Sed in sensu non est diversitas, nam *gloria sanctificationis* rectissime *corona*, vel *diadema* dici potest; nec multum interest, si dicatur, *florebit sanctificatio*, id est, sanctificatio emittet flores glorie; sive *florebit sanctificatio*, id est, micabit diadema glorie. Neque etiam multum refert, quod nos legamus *sanctificatio mea*, et in hebræo *sanctificatio*, sive *dialema ejus*: nam Septuaginta legerunt *ιων*, ubi nunc est *vau*; et eadem sanctificatio vel diadema et Dei est, quia ab illo datur, et nostra est, quia nobis datur: proinde utraque lectio veritatem continet; sed nostra præponenda est, cum sit in codicibus græcis et latinis, quibus Ecclesia semper usa est.

PSALMUS CXXXIII

SECUNDUM HEBRAEOS.

V. v. — 1. Canticum graduum David.

Ecce quam bonum, et quam jucundum, habitare fratres in unum!

2. Sicut unguentum in capite, quod descendit in barbam, barbam Aaron;

Quod descendit in oram vestimenti ejus:

3. Sicut ros Hermon, qui descendit in montem Sion.

Quoniam illuc mandavit Dominus benedictionem, et vitam usque in sæculum.

V. s. II. — Canticum graduum David.

Ecce quam bonum et quam decorum, habitare fratres in unum!

Sicut unguentum optimum in capite, quod descendit in barbam, barbam Aaron: quod descendit super oram vestimentorum ejus.

Sicut ros Hermon, qui descendit super montanam [h. montes] Sion.

Quoniam ibi mandavit Dominus benedictionem [al. add. et] vitam usque in aeternum [h. sæculum].

Argumentum. — Concordia fraternæ laudes.

1. *Canticum ascensionum, Davidis carmen.*

Ecce quam bonum et quam jucundum,
habitare fratres etiam una !

2. Sicut oleum pretiosum in capite (effusum super caput),
quod descendit (defluit) in barbam, barbam Aaronis,
quod descendit in oram vestimentorum ejus.
3. Sicut ros Hermonis (in montem Hermonis cadens),
sicut ros qui descendit in montes Sionis :
nam ibi (eo) demandat Jova prosperitatem,
vitam (felicitatem) in perpetuum.

NOTÆ.

Vers. 1... Israelitas habitare ut fratres et una, concorditer.— Vers. 2. Nihil jucundius Orientalibus oleo unctorio. Pretiosissimo autem apud Hebraeos oleo ungebatur pontifex maximus (*Exod. xxx, 23 seqq.*), qui ipse significatur nomine Aaronis, quemadmodum a primo Cæsare successores sunt *Cæsares* appellati. *Barbam, barbam*, de pilo in pilum, in barbam totam, anadiplosis. Hengstenberg, *quaæ* (barba) *descendit in oram superiorem vestimentorum ejus*, quasi barba potius quam oleum hic spectetur !— Vers. 3. Sequitur nova imago, qua concordia suavitas exprimitur. Aliis *ros Hermonis* est ros suavissimus et frigidissimus. *Ibi*, ubi concordia viget. Alius, *in Sione*.

BELLARMINI EXPLANATIO.

PSALMUS CXXXII.

TITULUS ET ARGUMENTUM.

Canticum Graduum.

Compositus videtur hic Psalmus, ut a Judeis cantaretur, quando post redditum a captivitate, et reædificata civitate, ac templo, cœperunt simul pacifice habitare, et esse unus populus, remota distinctione vel schismate, quod erat ante captivitatem inter regnum Israel et regnum Juda. Sed convenit etiam omni multitudini, ubi vigent concordia et communio, quales sunt multitudines servorum Dei in monasteriis, ubi regularis observantia viget. Sed potissimum locum habet hic Psalmus in cœlesti patria, et cantatur ab iis qui finita peregrinatione illuc perveniunt, ubi omnes sunt consummati in unum, ut loquitur Dominus *Joan. xvii*, et ubi Deus est « omnia in omnibus », *juxta Apostolum I Corinth. xv.*

EXPLICATIO PSALMI.

Vers. 1. **1. ECCE QUAM BONUM ET QUAM JUCUNDUM HABITARE FRATRES IN UNUM !**

sunt cor unum et anima una, unusquisque gaudet de bono aliorum, non minus quam de suo; quod pertinet ad jucunditatem.

2. SICUT UNGUENTUM IN CAPITE, QUOD DESCENDIT IN BARBAM, BARBAM AARON : *Vera 2.*

3. QUOD DESCENDIT IN ORAM VESTIMENTI EJUS; *Vera 2.*
SICUT ROS HERMON, QUI DESCENDIT IN MONTEM SION.

Duabus similitudinibus explicat jucunditatem et utilitatem habitantium in unum; ac primo jucunditatem comparat unguento pretioso, quo ungebatur caput summi pontificis, quod erat

Vox est eorum, qui jam experiri et gustare cœperunt utilitatem et dulcedinem perfectæ charitatis. Vocab enim *bonum*, id quod est utile; et *jucundum*, id quod est dulce: quamvis enim aliqua sint bona, quæ non sunt jucunda, ut labor penitentiarum; et quædam jucunda, quæ non sunt bona, ut voluptas peccati; tamen in concordia et pace fratrum simul habitantium hæc duo conjuncta inveniuntur. Nam virtus unita est major et fortior, et melius ac facilius conservatur, quod pertinet ad utilitatem; et ubi per charitatem multi

odoris suavissimi, ut patet ex cap. xxx *Exod.*; quod quidem unguentum effusum in caput pontificis, inde defluebat ad barbam, et a barba in oram vestimenti, id est, in illam partem quæ circumdat collum, quæ immediate subjecta est barbae: non enim per oram intelligitur extremitas vestis, sed summa, ut notavit S. Augustinus, et ut sonant vox hebraica et græca, et ut ratio ipsa demonstrat: non enim tantum unguenti effundi solebat in caput, ut usque ad extremas vestes deflueret. Sed illud hoc loco notandum est, unguentum non communicari a capite, nisi partibus unitis: nisi enim barba capiti adhæreret, sed abscissa alicubi maneret, sine dubio defluxum unguenti non participaret, et nisi vestis unita esset corpori, sed plicata maneret in arca, similiter unguento non perfunderetur; sic igitur, nisi fratres habitarent in unum, et inter se glutino charitatis conjuncti essent, dona cœlestia a capite Christo defluentia non descenderent in barbam, id est, in prælatos, neque a barba in vestimenta, id est, in reliquum populum. Ait igitur: «Sicut unguentum in capite, quod descendit in barbam,» id est, jucunditas fratrum habitantium in unum et inter se conjunctorum, ac debita proportione invicem subjectorum, est sicut unguentum pretiosum et fragrantiae suavissimæ, quod in capite effusum descendit in barbam. «In barbam Aaron,» id est, non loquor de quocumque unguento, sed de illo quod descendit in barbam Aaronis, tempore consecrationis suæ; quod etiam «descendit in oram,» superiorem videlicet partem «vestimenti ejus.» Deinde comparat utilitatem eorumdem fratrum habitantium in unum rori, qui descendit in montem: neque enim montes ex rore jucunditatem ullam percipiunt, sed utilitatem magnam, quoniam pluvia ad montes vel non descendit, vel non hæret, sed ex montibus ad valles continuo descendit: ros autem hæret in montibus, eosque infundit et germinare facit. Nominat autem duos montes, Hermon et Sion, qui quamvis loco conjuncti non essent, cum mons Hermon esset trans Jordanem ad orientem, et mons Sion citra Jordanem ad occidentem, tamen conjuncti erant quoad similitudinem qualitatum, cum uterque sit verus mons, et unus major et altior, videlicet Hermon, alias minor et humilior, id est Sion. Ex quo voluit nos Spiritus Sanctus admonere, conjunctionem fratrum habitantium in unum debere esse cordium magis quam corporum; nam de primis fratribus habitantium in unum scriptum est: «Erat autem multitudo credentium cor unum et anima una,» *Act. iv.* Dicit igitur: «Sicut ros Hermon, qui descendit in montem Sion,» id est, bonum utilitatis habitantium

in unum, est «sicut ros Hermon, qui descendit in montem Sion,» sive, ut est in hebreo, *in monte Sion*. Quomodo autem ros montis Hermon, qui longe distat a Sion, descendat in montem Sion, variis modis exponunt Interpretes. Mihi videtur Prophetam considerasse montem Hermon esse altissimum et amplissimum, atque in eo magnam esse roris abundantiam; montes autem Sion esse multo humiliores et aridiores, et ideo more poetico dixisse, ex monte Hermon descendere rorem in montes Sion, quasi communicet mons Hermon rorem, quo abundat, cum montibus Sion qui eo carent: non quod idem omnino ros, qui est in monte Hermon, descendat in montes Sion, sed quod similis ros descendens in montes Sion videatur quodam modo ex monte Hermon descendere. Et aptissime convenit haec similitudo in conventum fratrum habitantium in unum: sunt enim fratres concordes quasi tot montes, sive colles Sion, in quos descendit ros cœlestis a Christo, qui est quasi Hermon altissimus et rore cœlesti plenissimus; unde dixit Joannes: «Et de plenitudine ejus omnes accepimus,» *Joan. i.* Non communicat autem Christus nobiscum eam ipsam gratiam et gloriam numero, quam in se habet, sed aliam similem et minorem.

4. QUONIAM ILLIC MANDAVIT DOMINUS BENEDIC- *Vers.* TIONEM, ET VITAM USQUE IN SÆCULUM.

Reddit rationem cur tantis bonis abundet conventus fratrum concorditer pacificeque viventium: «Quoniam, inquit, illuc mandavit Dominus benedictionem,» id est, illuc misit Dominus benedictionem suam, quæ est fons omnium bonorum; Domino enim «benedicere» benefacere est: quoniam igitur Deo gratissima est concordia et charitas fraterna, ideo replet eam copia bonorum omnium, idque non ad breve tempus, sed in æternum; nam ideo cum benedictione misit ad eos «vitam usque in sæculum.» Quæ omnia hic in terris habentur in spe, sed in patria habentur in ré. Recte igitur initio diximus hunc Psalmum ab illis proprie cantari, qui ex peregrinatione pervenient ad patriam. Ibi enim perfecta est concordia, ibi unguentum perfectæ charitatis continuo defluit a capite Christo in omnia membra, et ros luminis gloriae a monte Hermon in omnes colles Sion; dicitur enim *Hermon* lumen elevatum; et *Sion*, specula: proinde recte ab altissimo lumine descendit participatio ejus in eos qui digni sunt speculari Deum facie ad faciem; ibi est benedictio Domini, id est, affluentia omnium aliorum bonorum; ibi denique est vera vita «usque in sæculum,» quæ nunquam deficit.

Quoniam
ros mo
tis He
mon
descer
dat in
monte
Sion.

PSALMUS CXXXIV

SECUNDUM HEBRAEOS.

V. v. — 1. *Canticum graduum.*

Ecce nunc benedicite Dominum, omnes servi Domini;

Qui statis in domo Domini, in atris domus Dei nostri.

2. In noctibus extollite manus vestras in sancta, et benedicite Dominum.

3. Benedicat te Dominus ex Sion, qui fecit cœlum et terram.

V. s. h. — *Canticum graduum.*

Ecce benedicite Domino, omnes servi Domini: qui statis in domo Domini in noctibus.

Levate manus vestras ad sanctum [h. sancte], et benedicite Dominum.

Benedicat tibi Dominus ex Sion, factor cœli et terræ.

Argumentum. — Peregrinatores, ait Hengstenberg, urbem Hierosolymitanam vespere ingressi, Levitas excubias agentes ut Deum celebrent hortantur, qui respondent formula benedictionis vers. 3. Maurero et aliis videtur canticum fuisse Levitarum, quorum erat, nocturnas excubias in templo agere. Versiculus 3 alterius chori responsio erit, vel non, prout jussivum vel indicat, futurum habebitur. Pauca addit Alexandrinus ex Psalmo sequenti.

1. *Canticum ascensionum.*

En, benedicite Jovam, omnes servi Jovæ,
qui statis in domo Jovæ noctibus.

2. Tollite manus vestras ad sanctum,
et benedicite Jovam.

3. Benedicat te Jova ex Sione,
qui fecit cœlum et terram.

BELLARMINI EXPLANATIO.

PSALMUS CXXXIII.

TITULUS ET ARGUMENTUM.

Canticum Graduum.

Hic est Psalmus postremus Gradualium, qui eos qui jam feliciter ascenderunt, hortatur ut vacent perpetuis laudibus: quod est officium habitantium in domo Domini, juxta illud *Psalm. LXXXIII*: « Beati qui habitant in domo tua, Domine, in secula saeculorum laudabunt te. » Pertinet tamen suo modo hic Psalmus ad eos qui, post ædificationem templi, in illo habitabant; et ad eos qui, dum peregrinantur in terra, corde habitare nituntur in cœlo, et cum Apostolo dicere possunt: « Conversatio nostra in cœlis est, » *Philipp. III.*

EXPLICATIO PSALMI.

Vers. 1. 1. ECCE NUNC BENEDICITE DOMINUM, OMNES SERVI DOMINI. 2. QUI STATIS IN DOMO DOMINI, IN ATRIS DOMUS DEI NOSTRI. Vers. 2.

Ecce, inquit, nunc liberati a tentationibus et persecutionibus, tempus est ut toti intenti sis sit laudibus Domini; proinde « benedicite Dominum, » vos « omnes servi Domini, » qui non habetis aliud in quo illi jam serviatis, nisi in persolvendo tributo perpetuae laudis et gratiarum actionis.

« Vos, inquam, qui statis in domo Domini, » id est, qui permanentem habetis domum, et non amplius tanquam peregrini in tentoriis habitatis; et præterea statis, id est, securi consistitis, non timentes casum, quomodo ille, « qui in veritate non stetit, » *Joan. VIII.* Nec solum domum, sed etiam atria possidetis, ita ut et interiorem do-

mum, ubi Deus videtur, et exteriorem, ubi videntur creaturæ, quæ sunt veluti atria, felicissimi habeatis.

Vers. 3. **3. IN NOCTIBUS EXTOLLITE MANUS VESTRAS IN SANCTA, ET BENEDICITE DOMINUM.**

Tempus maxime opportunum orandi et laudandi Deum nox est, quando quies ubique esse solet. Itaque David *Psalm. cixviii*, « media nocte surgebat ad confitendum Domino; » et Isaías cap. **xxvi** dicit: « Anima mea desideravit te in nocte; » et Jeremias *Thren. II* hortatur: « Consurge, lauda in nocte, in principio vigiliarum. » Et ipse Dominus noster, *Luc. v.*, pernoctabat « in oratione Dei; » et Apostolus cum Sila, *Act. xvi*, in ipso carcere « media nocte orantes laudabant Dominum. » Recte igitur admonet Propheta servos Dei, ut nocturno potissimum tempore extollentes manus in Sancta Sanctorum, ubi erant propitiatorium et arca Dei, benedicant Dominum. Moraliter autem significat hic versiculus servos Dei debere benedicere Deum, non solum in die prosperitatis, sed etiam in nocte adversitatis. Sed in sensu præcipue intento, significatur hoc loco, in cœlesti patria, sicut semper est dies, si de luce et tenebris agatur, ita semper esse noctem, si agatur de labore et quiete. Intrantibus enim in illam requiem « dicit spiritus, ut requiescant a laboribus suis, quia opera eorum sequuntur illos; » et illa est *nox* de qua dicitur in *Psalm. cxxxviii*: « Et nox illuminatio mea in deliciis meis; » et de qua dicit Dominus *Joan. v.*: « Venit nox, in qua nemo

potest operari, » et proinde solis Dei laudibus vacare oportet. In his igitur quietissimis, sed lucidissimis noctibus, « extollite manus vestras, » beati servi Dei; et ad sanctuarium verum, ubi Deus ipse residet, conversi, « benedicite Dominum. »

4. BENEDICAT TE DOMINUS EX SION, QUI FECIT CÆLUM ET TERRAM.

Hortatus est Propheta sanctos Dei servos, ut assidue Dominum benedicant; nunc vicissim ipse benedictionem illis a Domino precatur, sed utitur numero singulari, quia videbat eos ita esse glutino veræ charitatis unitos, ut essent unum in Domino. Illi igitur unitati servorum Dei dicit: « Benedicat te Dominus ex Sion, qui fecit cœlum et terram. » Quod ad verba attinet, in hebræo codice desunt illa verba, *in atris domus Dei nostri*; sed verisimile est, in codicibus correctioribus, quos habuerunt Septuaginta Interpretes, illa verba non defuisse, præsertim cum in *Psalm. cxxxiv* idem versiculus repetatur, et in eo verba illa legantur etiam in codicibus hebraicis. Illud vero, *in noctibus*, hebræus codex conjungit cum superioribus, hoc modo: *Qui statis in domo Domini in noctibus*; et postea incipit alium versiculum ab aliis verbis: *Extollite manus vestras*, etc. Sed interpunctio Rabbinorum modernorum, qualis nunc est in codicibus hebraicis, non debet præjudicare auctoritati gravissimæ Septuaginta Interpretum, qui illud, *in noctibus*, principium esse versiculi, et cum sequentibus verbis conjungi debere censuerunt.

PSALMUS CXXXV

SECUNDUM HEBRAEOS.

V. v. — 1. *Alleluia.*

Laudate nomen Domini, laudate, servi, Dominum :

2. Qui statis in domo Domini, in atris domus Dei nostri.

3. Laudate Dominum, quia bonus Dominus : psallite nomini ejus, quoniam suave.

4. Quoniam Jacob elegit sibi Dominus, Israel in possessionem sibi.

5. Quia ego cognovi quod magnus est Dominus, et Deus noster præ omnibus diis.

6. Omnia quæcumque voluit, Dominus fecit in cœlo, in terra : in mari, et in omnibus abyssis.

7. Educens nubes ab extremo terræ; fulgura in pluviam fecit.

Qui producit ventos de thesauris suis.

V. s. h. — *Alleluia.*

Laudate nomen Domini, laudate, servi, Dominum.

Qui statis in domo Domini, in atris domus Dei nostri.

Laudate Dominum, quoniam bonus Dominus : cantate [h. psallite] nomini ejus, quoniam decens.

Quia Jacob elegit sibi Dominus : Israel in peculium suum.

Quia ego scio quod magnus Dominus, et Dominus [h. dominator] noster præ omnibus diis.

Omnia quæ [al. quæcumque] voluit Dominus, fecit in cœlo, et in terra : in [al. et in] mari et in cunctis abyssis.

Levans nubes de summitatibus terræ, fulgura in pluviam fecit : educens ventos [h. ventum] de thesauris suis.

8. Qui percussit primogenita Ægypti ab homine usque ad pecus.

9. Et misit signa et prodigia in medio tui, Ægypte; in Pharaonem, et in omnes servos ejus.

10. Qui percussit gentes multas, et occidit reges fortes.

11. Seon regem Amorrhæorum, et Og regem Basan, et omnia regna Chanaan.

12. Et dedit terram eorum hæreditatem: hæreditatem Israel populo suo.

13. Domine, nomen tuum in æternum: Domine, memoriale tuum in generationem et generationem.

14. Quia judicabit Dominus populum suum, et in servis suis deprecabitur.

15. Simulacula gentium argentum et aurum, opera manuum hominum.

16. Os habent, et non loquentur: oculos habent, et non videbunt.

17. Aures habent, et non audient: neque enim est spiritus in ore ipsorum.

18. Similes illis fiant qui faciunt ea, et omnes qui confidunt in eis.

19. Domus Israel, benedicite Domino: domus Aaron, benedicite Domino.

20. Domus Levi, benedicite Domino: qui timet Dominum, benedicite Domino.

21. Benedictus Dominus ex Sion, qui habitat in Jerusalem.

Qui percussit primitiva Ægypti ab homine usque ad pecus [*h. quadrupedem*].

Misit signa et portenta in medio tui, Ægypte: in Pharao, et in cunctos servos ejus.

Qui percussit gentes multas, et occidit reges fortes.

Seon regem Amorrhæorum, et Og regem Basan, et omnia regna Chanaan.

Et dedit terram eorum hæreditatem: hæreditatem Israel populo suo.

Domine, nomen tuum in æternum [*h. sæculum*]: Domine, memoriale tuum in generatione et generatione.

Quia judicabit Dominus populum suum, et in servos suos [al. *servis suis*] erit plaabilis.

Idola gentium argentum et aurum, opera manuum hominum.

Os habent, et non loquentur: oculos habent, et non videbunt.

Aures habent, et non audient: sed nec est spiritus in ore eorum.

Similes illis fiant qui faciunt ea, et omnis qui confidit in eis.

Domus Israel, benedicite Domino: domus Aaron, benedicite Domino.

Domus Levi, benedicite Domino: timentes Dominum, benedicite Domino.

Benedictus Dominus ex Sion, qui habitat in Jerusalem. Alleluia.

Argumentum. — Recentioris temporis Psalmus, factus in usum sacrum, maximam partem conflatus ex locis aliis. Populum exhortatur ad celebranda beneficia, majoribus a Deo exhibita, quibus ostenderit potentiam suam, et se verum ac unicum Deum esse, hacque occasione utens ex antithesi exagitat et insectatur idola gentium exterarum et cultum horum, atque superstitionem illorum universam, quorum nugacia numina et nihil sint, et nihil possint simile. Exordium vers. 1-4; strophæ tres, 5-7, 8-14, 15-18; conclusio, 19-21.

1. Laudate Jovam.

Laudate nomen Jovæ,
laudate, servi Jovæ,

2. Qui statis in domo Jovæ (sacerdotes et Levitæ),
in atriis domus Dei nostri (totus populus).

3. Laudate Jovam, nam benignus est Jova;
canite nomini ejus, nam suave (*vel suavis*) est.

4. Nam Jacobum elegit sibi Jova,
Israelem in peculium suum.

5. Nam scio ego, magnum esse Jovam,
et Dominum nostrum majorem (*vel magis*) quam omnes dii.

6. Quæcumque voluit Jova, fecit,
in cœlo et in terra,
in maribus et omnibus abyssis.

7. Qui adscendere facit nubes ab extrema terra (horizonte), fulgura ad pluviam (cum pluvia, vel eam afferentia) facit, educit ventum e thesauris (promptuariis) suis.
8. Qui percussit primogenitos *Ægypti*, ab homine usque ad bestiam.
9. Misit signa et prodigia in medium tuum, *Ægypte*, in Pharaonem et in omnes servos (ministros) ejus.
10. Qui percussit gentes multos, et interfecit reges potentes (Maurer, *numerosos*) :
11. *Cædem, inquam, facit* Sichoni regi Amoritarum, et Ogo, regi Basanitidis, et omnibus regnis Cananeæ.
12. Et dedit terram eorum possessionem (possidendam), possessionem Israeli, populo suo.
13. Jova, nomen tuum *manet* in sempiternum ; Jova, memoria tui per omnes ætates.
14. Nam judicat Jova populum suum, et servorum suorum miseretur.
15. Simulacra gentium argentum et aurum *sunt*, opus manuum hominis.
16. Os iis *est*, et non loquuntur ; oculi iis, nec vident;
17. Aures iis, neque auscultant, nec est spiritus in ore ipsorum.
18. Similes illis *sunt* qui faciunt ea, quicumque confidunt in eis.
19. Domus Israelis, benedicite Jovam ; domus Aaronis (sacerdotes), benedicite Jovam ;
20. Domus Levi, benedicite Jovam ; cultores Jovæ, benedicite Jovam.
21. Benedictus sit Jova ex Sione, qui habitat Hierosolymam.
Laudate Jovam.

NOTE.

Vers. 11. « Falluntur qui *h* hic accusativi signum habent. Quod superiore versu cum accusativo positum est, id hoc loco, mutata structura cum *h* est constructum. Hoc ipsum verbum ter præter hunc locum sic constructum reperitur, *Ps. cxxvi, 19, 2 ; Job. v, 20 ; II Sam. iii, 30.* » Maurer.